

修訂日期: 2009/04/22 發行日期: 2009/5/30

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 24, No. 467

原始資料: CBETA 人工輸入, CBETA 掃瞄辨識

No. 467-A 銷釋金剛科儀會要註解序

夫以法身為道。廣周沙界。細入微塵。非空非有。無內無外。悟之則為四聖。迷之則為六凡。是以釋迦觀長庚而見諦。向鹿野苑室羅筏城祇園等處。將以斯道而覺有情。所以初談小教。次演空宗。八部般若。次第宣說。今此經者。即大般若部分所攝。始自善現申請。終以大覺答問。以住斷降伏。共斷二十七疑。漸除二執。頓入一乘也。爰有宋宗鏡禪師者。乃應真之一數也。悲深智闊。學海汪洋。道徹離微。辭雄理備。撮玄機於掌握。發妙義於言前。語中玉轉。珠向句裏。釋天鑑地。得遊戲之三昧。具無礙之辯才。鎔百煉之堅金。琢三陳之美玉。故將梁昭明所判三十二分金剛經。依文衍義。剖析精微。乃立科儀。發明經趣。總有七種規模。一提綱。二要旨。三長行。四結類。五頌經文。六警世。七結歸淨土。或博採經論。直註本經。或廣引他宗。申明旨趣。掃除知解。剪斷葛藤。為人天之正轍。作苦海之舟航者也。自宋迄今。四海盛行。見聞讀誦者廣。幽冥獲益者多。若病者遇善見之醫王。似貧者得如意之真寶。今此會要註解。迺因無盡燈公瞻禮普陀。路過蘇州。而處士許公敬愚等迎請。出本師大寧所解科儀註頌。意欲刊板流通。而燈公止曰。不可。此科儀京都善果達法師。先有集註。文辭廣博。卷已十軸。後學罔窺涯涘。次普恩桂法師。繼踵前註。集為說記二卷。悉以刊刻。雖然。文理幽深。間有宗趣事跡。揀討未備也。公欲金湯內教。須請智者校正重集。始可流行。由是特令澹齋張公。持帛千里而來。請予重集。予以。此經乃大乘教。被菩薩機。宗鏡乃聖位不測之人。方堪科註。我輩凡情淺識。豈敢當任斯事。柰以既為佛子。當報佛恩。若不度法度生。辜負先聖遺蔭。所以會取諸家捷要之註。安於科儀本文之下。貴圖經義通曉。非敢胸臆強為。祇是述成而已。復命隱士吳公期號寶山。薰毫繕錄。工已周完。而寶坻縣紀陀信士孟准等。助財壽梓。以伸大寧先師遺志。用廣其傳。永圖不朽之意也。願見聞披覽者。昇慧日於中天。破昏衢於暗室。九有悉蒙津濟。三途咸獲菩提。以此功勳。祝一君之壽域。報四重之恩床。仰佛日以增輝。庶法輪而常轉矣。

肯

大明嘉靖三十年龍集辛亥四月

佛誕之辰少室山嗣祖沙門覺連沐手焚香拜序

銷釋金剛科儀會要註解十卷總目錄

第一卷銷釋金剛科儀卷(起)
生於退屈(止)

第二卷野狐尚聽百丈法(起)
但念彌陀(止)

第三卷法會因由分第一(起)
體露堂堂(止)

第四卷依法出生分第八(起)
大道分明(止)

第五卷離相寂滅第十四(起)
一聲還續(止)

第六卷一體同觀第十八(起)
也則不如(止)

第七卷淨心行善二十三(起)
目擊金容(止)

第八卷不受不貪二十八(起)
涅槃如夢(止)

第九卷梁武帝請傳大士(起)
願今回向(止)

第十卷總上九卷原文銷釋金剛科儀卷
經科會要註解十卷大全總目錄(終)

No. 467

銷釋金剛科儀會要註解卷第一

姚秦三藏法師 鳩摩羅什 譯

隆興府百福院 宗鏡禪師 述

曹洞正宗嗣祖沙門 覺連 重集

銷釋金剛者。以喻釋喻名題也。金剛乃經題之喻。銷釋乃科題之喻。金剛。喻般若之堅利。能破煩惱。銷釋。喻科文之解判。能分事理。銷者煎銷也。釋者解釋也。如金在鑛。須假紅爐鉗鎚鍛煉。鑛去金存。方為真寶。使用自在。一切眾生。本有佛性。亦復如是。金喻眾生佛性。鑛喻無明煩惱。眾生佛性。隱在五蘊身中。被煩惱鑛重重封蔕。愚鈍眾生。不覺不知。本有真性。甘處貧窮。虛受輪轉。是故。佛祖出世。假設言教修證。權立地位階級。以智慧為爐。以三昧為火。以斷妄為鎚。碎五蘊山。破煩惱鑛。顯真金性。煉成法身至寶。普濟貧窮眾生。各獲性寶。得大受用。是故我佛最初成道。歎云。奇哉奇哉。一切眾生。皆具如來智慧德相。但以妄相執著而不證得。我當教以正道令其永離妄想執著。自於身中得見如來廣大智慧。與佛無異也。科儀者。科者斷也。禾得斗而知其數。經得科而義自明。儀者法也。佛說此經。為一切眾生。斷妄明真之法。今科家。將此經中。文義事理。復取三教聖人語言。合為一體。科判以成篇章。故立科儀以為題名。大意欲令眾生。知本有性。在日用間。但能見聞不昧。虛徹靈通。六根門頭。放光動地也。會要註解者。會取諸家捷要之註。安於每段經科之下。謂之註解。貴使文義易曉。豈敢胸臆自作。但集述前古之成文。撮為卷帙。用圖不朽之意也。卷者。言舒卷有規也。看則展舒。不看則卷收。故云卷也。第者次第也。一者首也。為眾卷之首也。

蓋聞。漢朝感夢。白馬西來。摩騰彰漢。化之初時。

此敘教法初來之義也。蓋聞者。乃發文之端也。亦謙詞耳。言其不能詳細而知。祇是一蓋聽聞而述也。漢。即國號也。然有西東二漢之別。今言漢者。即東漢孝明顯宗皇帝。乃光武第四子。朝。即朝廷也。是天子所居殿庭。而人臣朝覲之處也。感夢者。敘教法初來之時。帝為能感。佛為所感。感應道交。結而成夢也。白馬西來者。即永平七年。帝寢南宮。夢金人丈六。項佩圓光。胸題萬字。飛行殿庭。去來無礙。指其帝曰。立教。且集羣臣。令占所夢。時有通人傅毅奏曰。臣按周書異記云。周昭王二十四年歲次甲寅。四月八日子時分。有五色祥光。貫太微宮中。然後徧於四方。作青紅色。爾時山川宮殿普皆震動。江河泉井泛漲流溢。時王問臣所以。有太史蘇由對曰。此是西方。有大聖人生焉。已後千年。教法流於此土。王令鑄石。立在南郊。天祠之前。以年記之。至今一千七十餘年。陛下所夢者將必是乎。帝信以為然。即遣定遠將軍秦景。中郎將蔡愔。博士王遵等。一十八人。使往西域。訪求佛道。至天竺臨境。大月支國。遇摩騰竺法蘭二梵僧。併優填王第四。以白[疊*毛]畫釋迦像一軸。四十二章經。十住斷結經。佛本生經。法華藏經。佛本行經。共六十萬言。馱於白馬。相伴東還。八年乙丑。蔡愔等。達於洛陽。摩騰入闕。獻經像。帝大悅。館於鴻臚寺。法蘭。復兼行化。而後至。十年丁卯。勅於洛陽城西。立白馬寺以居之。以白馬

馱經。遂名白馬寺。此土三寶自此為始也。下結云。摩騰彰漢。化之初時。彰者明也。化者教也。今以佛之音聲。為教化之體也。此言化之初時。即是教化初來之時也。

羅什。感秦宗之代典。明明佛日。照破昏衢。朗朗慧燈。至今不滅。教之興也。其在斯焉。

此明般若。初興之始也。梵語羅什。此云童壽。雖童稚之年。而有耆宿之德。故云童壽。感秦宗之代典者。秦即前秦國號。宗者主也。亦崇敬之義也。代。即時代也。典即墳典也。又秦有四秦。此正當前秦符堅主。建元十三年正月。太史奏曰。有德星現於外國野分。當有大智德人。入輔中國。爾時襄陽趙王國中。時人稱道安法師。為一聖人。習鑿齒。半聖人也。符堅。以十萬兵。攻襄陽遂得二人。謂左右曰。吾以十萬雄師。祇得一箇半聖人耳。左右問誰。曰。安一人。習半人也。安聞之。因言進曰。丘慈有羅什法師。善解大小宗乘。博通三藏。堅默識之。建元十八年。遣呂光率兵十萬。四伐丘慈。謂光曰。朕聞西域。有鳩摩羅什。深解法相。善曉陰陽。朕甚思之。賢哲者。國之大寶。若克丘慈。速迎還國。光軍未至。什謂丘慈王白純曰。有敵兵從東方來。勿抗其鋒。光兵至。純遂交戰。光破丘慈。殺純。立純弟白鎮為王。光與什東迴。至涼州聞堅。已被姚萇所害。光僭號關外。年稱大安。在位一十八年而卒。光之子紹。及纂併卒。光之姪呂隆為王。姚萇卒。子姚興立。弘始三年三月。有連理樹生於朝庭前。道遙園中葱變為菖香草。五月遣隴西公碩德。舉兵西伐。呂隆軍大敗。九月隆。上表歸降。方得迎什入關。十二月二十日至長安。待以國師之禮。選諸方有才智沙門八百。中有四聖十哲。同譯經三百八十卷。此經弘始五年。於長安草堂寺譯出華言。故云。羅什感秦宗之代典。明明佛日等者。此二句雙歎上文。讚美此經。如日之明以照晝。如燈之明以照夜。昏衢者。喻五陰煩惱之執情。障隱本有之佛日。遮蔽本有之慧燈。所以沉淪七趣。似長夜昏衢。不知不覺也。至今不滅者。自佛說此般若大教。從漢秦兩代傳來。至于大宋理宗淳祐間。大興流布。故云。至今不滅也。教之興也者。總結釋迦佛。一代教法。興崇流通也。其在斯焉者。乃為指法之辭。斯者此也。教之大興。在此漢秦兩代之時。故云。其在斯焉者也。

末法之代。至于今日。某甲。恭白十方賢聖。現坐道場。

此歎慶歸祈之辭也。歎則生逢末運。慶則欽遇斯經。歸投祈禱希欲冥加也。佛一代時教。有正像末三運之別。正法一千年。像法一千年。末法一萬年。此言末法者。正當後五百歲佛滅後二千五百年時。乃是科主歎而自慶。意云。正當末法惡世之中。今日得逢斯典。猶浮木盲龜之值。針鋒纖芥之投。不為輕忽小事也。雖自知自解。又恐來者難能。故制科文解釋。欲使學者。覩科文而明經旨。如暗逢燈也。將欲為文。亦恐凡情淺解。至理難臻。故祈三寶冥加密助。故曰。恭白十方也。某甲。科主自稱也。恭者敬也。白者陳也。此即三業虔誠也。十方賢聖。即橫論。現坐道場。即豎論。道場者。即十方三世。賢聖成道說法之場也。

本師釋迦牟尼佛。文殊普賢二大菩薩。

即歸此土三寶也。蓋。佛為佛寶。菩薩為僧寶。法寶含在其間。本師者。科主懇切之稱。亦名本師。本體模範也。體効佛之遺範。故云本師。梵語釋迦牟尼。此云。能仁寂默。乃圓應之號也。梵語文殊。此云妙德。亦名妙吉祥也。普賢者。德無不徧曰普。祐上利下曰賢。菩薩者。略梵語。具云菩提薩埵。此云覺有情也。有生皆有情。菩薩有情中之覺耳。佛有覺性。而無情也。菩薩亦未免有情。故云。上求佛果。下化眾生。即自利利他之號也。

滿空聖眾。一切神祇。有天眼者。天眼遙觀。有天耳者。天耳遙聞。他心宿住。聖心玄鑒。慈愍故。慈愍故。大慈愍故。

此總祈一切聖眾。運五通而鑒照。起四量以冥加。天眼等者。即五通也。聖心即神境通。玄鑑喻也。慈能與樂。悲能拔苦。喜能慶悅。捨能平等。蓋慈內。含四無量心也。三稱者。誠之切也。不言漏盡通者。此乃神聖眾也。唯佛具六通。如上。皆具五通也。

信禮常住三寶。

信者重也誠也。禮者體也。信而無禮。心必不實。禮而無信。意必不誠。二者具足。可為誠實之禮也。常住者。簡別之義。不同前來十方此土三寶。此即自性常住。清淨法身。佛寶也。此性有覺照義。法寶也。此性有和合義。僧寶也。寶者。貴重之義。即實相一體常住三寶也。

歸命十方一切佛。歸命十方一切法。歸命十方一切僧。法輪常轉度眾生。

此是重重祈禱。不盡讚揚也。歸投請命。希求加護。故云歸命。又命者為一身之總也。今言歸命者。總含三業。恭敬尊重讚歎之禮也。十方一切。總該橫豎。佛者略梵語。具云佛陀。此云覺也。即自覺覺他。覺行圓滿也。法者軌持義。即軌持自性。令物生解也。僧者略梵語。具云僧伽。此云眾和合。兼舉云。和合僧也。法輪度眾生者。乃科主祈希三寶。不泯四弘。恒居三界。利濟有情。同證無為。共成正覺。故云度眾生也。

夫金剛般若。能開解脫之門。玉偈波羅。善入菩提之路。

此一卷金剛般若經。是開解脫之門。入菩提之路。門有出入義。路有往來義。喻此經為入理門戶之道路也。解脫。即斷果。菩提。即智果。皆二轉依號也。玉偈波羅者。即讚美之義。讚美此經。能詮之文。如眾德之王。難見難聞。難逢難遇。故云。善入菩提之路矣。

行行而非空非有。句句而無去無來。

總美此經能詮之文。行行句句。非空非有。無去無來。其中所詮之義。不同前來初教所說。心無境有。境無心有之謂。此經。純談妙有實相真空。顯揚般若根本真智。又非空。不同無因。非有。不同邪因。無去。不屬過去。無來。不屬未來。故不落

有無二邊。去來三際。真可謂。斥相泯心。談空之教也。

金剛經。說三十二分。分分而功德難量。須菩提。聞四句妙偈。偈偈而殊因莫測。

此這一卷金剛經。原為佛說。後昭明太子。科為三十二分。故云分分也。功德難量者。修進曰功。見性曰德。若有行人。依此修進。即得見性成佛。故云難量也。梵語。須菩提。此云善吉。亦名空生也。聞四句者。自第八分中。佛告須菩提。若人以滿三千大千世界七寶。以用布施。得福雖多。不如有人。以此四句偈。為他人說。其福勝彼已下。共有七處說偈。故云偈偈也。以此推之。乃字字句句。有殊勝之功德。不測之因果。故云殊因莫測也。四句者。古今論四句偈不一。各執己見。初無定論。今但依銅碑記云。天親菩薩。昇兜率宮。請益彌勒。如何是四句偈。彌勒答云。無我相。無人相。無眾生相。無壽者相是也。

書寫讀誦。當生華藏之天。為人演說。定達涅槃之路。

著簡曰書。傳本曰寫。對本曰讀。背本曰誦。若有人。依此經。如法修行。當生華藏世界海極樂淨土中。蓋華藏天為總舉。文之巧也。此華藏世界。無邊妙華香水海中。有不可說佛剎微塵數大蓮華。一一華開。有微塵數香水海。每一海中。有一蓮華寶光明剎種。一一種。有二十重。每重。二十佛剎微塵數世界圍繞。故云華藏也。天者。自然也。清淨也。意云。願書寫讀誦聽聞者。決定至於涅槃。故曰定達也。

般若乃菩提佛母。信心。即功德道源。長養聖胎。出生妙法。

梵語般若。唐言智慧。內則指於本覺真心。外則指於斯經妙旨。下顯機云。信心即功德道源。雖有內智外教。要在於信。信則菩提果成。教法流通。故云信為道源功德母長養一切諸善根也。依此教修。長養成聖之胚胎。出生無上之妙法也。

大抵。看經通義。問道窮源。啟淨信心。具擇法眼。分句。讀貫通之理。明問。酬辯論之文。心心無間理全彰。念念不忘文自現。

上一節文。言教之功能。此一節文。言機之作用。雖然此經。能長養聖胎。出生妙法。大端主意。還要看經之人。通達經中。所詮義理。如或義理不明者。應須博問先知。指示其道。窮究其源。此聞慧也。然後啟清淨之信心。淨心者。即經中信心清淨即生實相之心。此思慧也。亦要行人具擇法眼。擇法眼者。即正智之眼也。擇即揀擇。此勉行人。須用智眼。揀去人我無明身邊等見。擇取中道無為真如之理。分句逗者。義盡為句。義不盡為讀。文為能詮。理為所詮。看經行人。須要一一分別。句讀短長。義理通貫。方得名為具眼之人。然後可為造進行履也。明問酬者。即請問酬答也。今此經自第二分中問。云何應住等。直至經終。共有二十七處問酬辯論之文。行人應須一一分明。方得長養聖胎出生妙法也。科家慈心太煞。指示叮嚀。故云心心無間理全彰念念不忘文自現。念念者。與前心心義同。當換其文。義即一也。無間者。不忘也。亦但變其文耳。即一念專注其心。不容漏泄走作也。如此則。其文自現。其

理自彰。正是以聖教為明鏡。照見自心。以自心為慧燈。燭經幽旨也。

或問酌深妙。而句義玄微。詳究元因。而略陳數段。庶一問一答。其文明若日星。重辯重徵。其義曉如白黑。

或者。不定之辭。或佛問。須菩提答。或須菩提問。佛答。此經總有二十七疑。二十九問。其間所問所答者。句法淵深。義理微妙。使初機淺解者。罔知其涯涘。因此經文難曉。故致科文。釋而通之也。故述功云。詳究元因。詳細也。究考也。元本也。即是細詳考究。其根本元因諸家之解釋。撮略直指。採集述陳。以成數段科文也。庶者使也。使經中一問一答重辯重徵。其文其義者。其為指法之義。指經得科。而義如日星晝夜白黑兩分也。文。即能詮之文。義。即所詮之理也。

義隨文。而文隨義。左右逢源。

義者。經義也。文者。科文也。華嚴經云。一即多。而多即一。文隨於義。義隨文。左右者。如身之左右二肘。不離本身。

珠走盤而盤走珠。縱橫無礙。

珠者寶也。物類相感志云。閬苑浦出珠。置盤中自轉也。珠喻經義。盤喻科文。縱橫無礙。亦即左右逢源。意云。此之文理玄妙。冀行人翫味留心。倘然一言之下。心地開通。便可謂拳中舊寶。不假披沙。倒駕無底空船。逆遊涅槃法海。庶不負佛祖之慈心也。

信解受持者。洞明真性。

科家至此願云。此法流通之處。若有行人。信敬曉解明白。領納於心。持之不捨。即得洞明自己真性也。

見聞隨喜者。咸悟菩提。

目覩曰見。達耳曰聞。隨即隨順。喜即歡喜。所謂此法流通之處。若是行人。見聞隨喜稱善讚美者。咸悟菩提。前一節。洞明真性為因。此一節。咸悟菩提為果也。

流通天上人間。普遍微塵剎海。

上一句。從遠至近。從色界頂天。至閻浮提地。人間天上。悉皆流通此法也。下一句。從狹至廣。無處不到曰普。無處不周曰遍。微塵者。隙塵也。剎海者。浮幢佛剎也。在於香水海中。漂浮而住。故云剎海。明此大法。從微塵至剎海。悉皆周遍矣。

太虛無際。法施何窮。

太虛。即空之異名也。以此為喻。虛空無邊。法施無邊。科主意云。此法處處流通。無有窮盡。此之法施一句一偈。入於八識田中。永為金剛種子。萬劫不壞。直至成佛。故無窮也。

以斯般若功勳。總報四恩三有。

以斯般若。即指此經。願今科文。解釋般若。功德利益。用報四恩三有。四恩者。天地蓋載。日月照臨。皇王水土。父母生身也。三有者。欲有。色有。無色有也。以三界因果不忘。未離於有。故云三有。前節。法施既無窮。以此報恩亦無窮。故云總報也。

觀夫。空如來藏。碎祖師關。獨露真常。無非般若。

觀夫者。發語之辭也。如來藏有三。以配三諦三身也。空如來藏。即真諦法身也。不空如來藏。即俗諦報身也。空不空如來藏。即中道諦化身也。關者。門之橫木為關也。宗。以一千七百則因緣。為祖師關。故云欲透諸祖重關。只須一一撈波。今云。空如來藏者。直顯直諦法身。聖凡兩忘。真俗俱泯。故云空如來藏也。獨露真常者。科家慈心太切。分明指示。此明真理之外。了無片事可得。故云無非般若也。

三心不動。六喻全彰。七寶校功。四句倍勝。

上伸般若之功能。此伸施財之所以。三心者。經云。過去心。未來心。現在心。皆不可得。故云三心不動。六喻者。夢幻泡影露電也。彰者明也。七寶者。金。銀。琉璃。磲磬。碼瑙。珊瑚。琥珀也。校者比也。經云。以七寶滿三千大千世界。布施功德。比況此經。見聞受持。四句之功德。百千萬億。不及其一。故云四句倍勝也。

若乃循行數墨。轉益見知。宗眼不明。非為究竟。

上來歎教。雖有如是之功。要在行人用意。若乃者。指看經之人。若不句句消歸自己。言言冥合真心。一向只管循行數墨。只是轉增多見多知。背却般若功能。障塞真常妙用。楞嚴經云。知見立知。即無明本。知見無見。斯即涅槃。宗眼者。宗即心宗。眼即智眼。心為一身之主宰。萬法之根源。心不妙悟。多聞無益。華嚴經云。如人數他寶。自無半錢分。於法不修行。多聞亦如是。此勉行人。若不如說而修。洞見真諦者。皆是是非為究竟也。

嗚呼。

此是科家。警歎之辭。緊要行人珍重。下乃法喻分明。令人著眼也。

微宣奧旨。石火電光。密顯真機。銀山鐵壁。

微宣奧旨者。敘陳此經。乃是微妙之法。深奧之旨。第一之說。要令行人。急須著眼。故喻石中之火。電內之光。此理。眨眼參差千萬里。低頭思慮萬重關。密顯真機者。此經。凡有二十九處。言菩提心。總是一箇真心。故云密顯真機。即真心之機。靈妙莫測。人難履踐。喻如銀山鐵壁。挨撈不入。拈弄不得。如蚊子上鐵牛相似。難以咬嚼也。

瞥生異見。滯在中途。進步無門。退身迷路。

此乃重重指示。微細提携。要人發起真知真見。若是行人。瞥生一念異見之情。便於般若真智相違。情存於境。墮在中途未得到家。故云進步無門。退身迷路。可謂無端起知見。著相求菩提。情存一念悟。寧越昔時迷。此理。但起纖毫聖凡之見。即

是途路之說者也。

聊通一線。俯為初機。良馬見鞭。追風千里矣。

此乃科家。自伸己功。亦是謙辭。我今致此科文。只是於行人聊通一線。俯為初機。豈敢達於上士也。良馬見鞭者。引喻比之。若是上智。未舉先知。不言而會。豈用剩殘之說。古云。若是金毛獅子子。三千里外見誦訛。不用開口動舌也。

彌陀如來。

上云。俯為初機。此言。初機所以。科家。先舉能攝之佛。次警所攝之機。梵語彌陀。此云無量壽。乃樂邦之主也。以彼佛。光明無量。照十方國。無所障礙。故曰阿彌陀。其佛壽命無量無數。故名無量壽也。

竊以。幻身不久。浮世非堅。不久。則形軀變異。非堅。則火宅無安。

竊以者。偷竊之義。不敢正言。亦是謙辭也。幻身者。無而忽有曰幻。眾法積聚曰身。最初原無此身。只因三緣假合而有。成必有壞。有必歸無。故云不久。浮世非堅者。喻此色身。如水上泡。速起速滅。故云非堅。不久變異者。言此身形。不久變異也。生則童顏少壯。衰老病死。故云變異也。非堅無安者。以喻三界為一火宅。眾生業報。皆處其中。天有五衰。人有八苦。如眾火所逼。有何安樂。故云無安。經云。三界無安。猶如火宅。科家。要人識幻身不久。知法身長久。火宅無安。淨土長安也。

由是。輪迴六趣幾時休。遷轉四生何日盡。若不念佛求出離。畢竟無由得解脫。

由是者。結前起後之辭。由前云因有幻身。封執為我。便有所。起十使煩惱六十二見。八十一品惑障。由此我故。而生六根。所染六塵。造無邊罪。隨業受報。六趣輪迴。喻如車輪。上下遷轉。無有窮盡。故云何日盡。幾時休也。六趣者。即六道是也。四生者。即胎卵濕化是也。以六趣四生為眾生所住之境界。所遊之道路。出入往來無有休息也。若不念佛者。科家。與行人。指條出路。唯有念佛一門。方得離六道。出四生。所以云。若不念佛求出離。畢竟無由得解脫也。

豈不忙然省悟。火急脩持。

此乃科家勉人。急早修持。如救頭然也。既是西方一路。念佛法門。為離六趣。超出四生。捷徑要路。何不速疾省悟。聞早修持。故喻云。如火燒頭。速救猶遲。故云火急也。修持者。要人修進持念六時精勤。一心不亂。觀想彌陀。專持聖號。臨命終時。決定往生極樂世界。見佛聞法。受上品記。故云修持。石屋詩云。世事紛紛無了期。自家活計猛提撕。落湯螃蟹人人見。撲火飛蛾個個知。病到始知身是苦。死來唯有業相隨。浮光幻影須臾事。火急修行早是遲。

盡報為期。誓生安養。高超三界證真空。迥出四流無苦趣。

此是科家。勉人進修。要在從始發心。至生淨土。為一期之限耳。故云盡此一箇報身。為一個修淨土期限。故云盡報為期也。誓生安養者。誓即發願也。安養者。淨

土也。如云。願以此功德。乃至盡此一報身。同生極樂國。故云誓生安養也。高超三界者。言此念佛法門。是橫出三界。不同二乘。斷九地惑證四果理。歷五十五位階級。乃是豎出三界也。惑最難斷。果最難證。不如念佛法門。不用斷惑。不歷地位階級。不須證果。帶業往生。故云高超三界也。證真空者。言此念佛法門。不但只是超出三界。又能證入真空實相之理。故云證真空也。迥出四流者。即欲流。有流。無明流。見流。故云四流。喻如長江之水。古今不斷長流也。無苦趣者。既是念佛法門。超出三界。遠離四流。得生極樂世界。無有三惡道苦。故云無苦趣也。

釋迦如來。

前一節。舉能攝之彌陀。此一節。舉能折之釋迦。二佛。化生利物。各專其門。酌昔本願。各居其土。教化眾生也。

詳夫。百年光景全在剎那。四大幻身豈能長久。

詳夫者。是發語之端也。百年者。自人壽八萬四千歲時。為增劫之終。又為減劫之始。一百歲減一年。減至人壽一百歲時。有釋迦佛出興於世。度脫眾生也。此言百年光景。即三萬六千日之光景。即一百個四時八節。之時景也。剎那者。佛言。如壯力士。持劍斬一綆絲。一時速斷之頃。有六十四之剎那也。蓋百年光景。而被於剎那不住。念念不停。消磨盡矣。故云全在剎那。四大幻身者。此身。以地水火風四大而成。幻化而有。最初受胎之際。識心投入赤白二滴。如磁石吸鐵相似。三緣和會。方成此身。生老病死。終歸散滅。故云豈能長久。此一段文。從詳夫百年。下至青山低處止。乃是如居士。勸發菩提心之文。總有三大科。其一。顯六道輪迴之苦楚。其二。明三教聖賢之因緣。其三。廣示異轍同歸大道也。

每日塵勞汨汨。終朝業識茫茫。不知一性之圓明。徒逞六根之貪欲。

此明眾生。染緣之因也。每日者。從朝至暮也。塵即六塵。勞即勞擾。業即六塵之業識。牽引此心。汨沒塵境。眼被色牽。耳隨聲轉等。故喻流水之汨沒。業海之茫茫。故結云。只因不識一性之圓明。所以徒逞六根之貪欲。不知元是一精明。分為六和合。經云塵為賊媒自劫家寶是也。貪欲者。吸引無盡曰貪。五塵所好為欲也。

功名盖世。無非大夢一場。富貴驚人。難免無常二字。

前一節。歎時不常。此一節。歎身不久。警其不識圓明之性。徒逞貪欲之為。乃是教勉除貪。喻如黃糧大夢也。無常者。死之異名也。

爭人爭我。到底成空。誇會誇能。畢竟非實。

爭人者。爭競彼此。分別高低。如楚霸王鴻溝為界。自刎烏江。到頭得失皆空。徹底悉歸敗壞。可謂試看漢陵併楚廟。一般瀟灑月明中也。誇會者。矜誇手段。見識超人。華陀刮骨之妙。韓侯埋伏之機。臨終有苦難逃。命盡無方可避。故云畢竟非實也。

風火散時無老少。溪山磨盡幾英雄。

此警生死不在老少也。風火者。地水火風也。散時者。即命盡之時也。暖氣歸火。動轉歸風。潤濕歸水。骨肉歸土。不定老少而為常準。故云。莫待老來方學道。孤墳多是少年人也。溪山磨盡英雄者。如漢有三傑。英名盖世。唐有十室。雄烈絕倫。而今空有虛名。到底同歸下土。故云日月無根天不老。英雄盡被消磨了也。

綠鬢未幾。而白髮早侵。賀者纔臨。而弔者隨至。

綠鬢未幾者。少小則朱顏綠鬢。老耄則鶴髮雞皮。故云。暗送冷霜侵綠鬢。輕垂衰邁老形骸也。賀弔者。昨日誇官慶賀。今朝命盡黃泉。古德云。畫虎雖成未點班。百年夫婦一朝難歡情未動悲情動。賀者纔臨弔者還。玉燭堂前空寂寂。紅羅帳裡淚潺潺。從來未見夫郎面。枉惹虛名滿世間。故云。賀者纔臨。而弔者隨至也。

一包膿血。長年苦戀恩情。七尺髑髏。恣意慳貪財寶。

此一節。破貪色之迷。令修五不淨觀。古云。皮包骨肉併膿血。強作嬌嬈誑惑人。千古英雄皆坐此。百年同化一坑塵。慳貪財寶者。乃破貪財之執也。淨土詩云。皮包血肉骨纏筋。顛倒凡夫認作身。到此始知非是我。從前金玉付他人。故云。七尺髑髏。恣意慳貪財寶也。

出息難期入息。今朝不保來朝。愛河出沒幾時休。火宅憂煎何日了。

此歎人命無常。如風中燭。一息不來即後世。誰人保得此身堅。雪峰云。一盞孤燈照夜臺。上床脫了襪和鞋。三魂七魄夢中去。未委明朝來不來。愛河出沒者。指前財色貪愛喻如一河。一切痴迷眾生盡沒其中。為生死本相續常劫。無有出期。故云幾時休也。火宅者。三界譬為一宅。其中眾生而常止住。天上五衰之火逼。人間八苦之火迫。因愛生貪。貪而復嗔。嗔而結業。故喻如火逼迫憂煎也。非一朝一夕。經歷塵點劫數。受苦無窮。故云何日了也。

不願出離業網。只言未有功夫。閻羅王忽地來追。崔相公豈容展限。

不願出離者。此明眾生以苦為樂。甘住其中不願出離也。如網籠罩。不能出離。縱有良師善友勸修出世之因。只言事業未辦。不得閑暇工夫也。梵語閻羅。唐言靜息。以罪人所造善惡因果。注於簿中年月日時。分明不容折詞諍論。故云靜息。忽地來追者。以世人。陽限壽命屬於陰司。命盡之時。閻君發帖拘喚。故云來追。崔相公者。人曹官也。掌冥司生死之簿。未注生先注死。故云。豈容展限也。即東漢時人。姓崔名瑗字子玉。後出任遷偃縣令。時人歌曰。天降聖明君。賜我仁慈父。後胡廣薦瑗遷濟北為相。次後命終。為泰山府君。掌冥司之事也。有云符到便行。不容住滯之謂也。

回首家親都不見。到頭業報自家當。

此明人死。孤魂獨逝也。回首者。轉頭也。不見者。死生別路也。既是生死路別。家親豈能得見。慈親孝子。無復相隨。到頭業報者。平生每日為妻為子。所造惡業

。唯是自家承當。妻子不能相代。古云。縱使妻兒相惜。無計留君。假饒骨肉滿前。有誰替汝。所以自家當也。

鬼王獄卒。一任欺凌。劒樹刀山。更無推抵。

鬼王乃陰府閻羅十王。獄卒即牛頭馬面等卒也。一任欺凌者。阿含經云。牛頭見受苦眾生。惟恐不毒。或問獄卒。眾生受苦。甚可悲愍。何以無慈。獄卒答云。如此罪惡。諸受苦者。在世不尊君王。不孝父母。謗佛謗法。謗諸賢聖。罵辱六親。輕慢師長。造十惡業。故受此苦。罪畢脫免之時。故我恒加勸諭。此地獄中劇苦無量。非可忍耐。汝今得出。更莫造罪。今日幸脫。俄頃復還。令我筋力疲厭。從劫至劫與其相對。以是義故。我於罪人。無片慈心。故加楚毒。劒樹者。經云。有十八劒林地獄。一一地獄。縱廣五百由旬。滿中劒樹。一一劒樹。高四十由旬。枝葉刀劒。令諸罪人上。刀山者。經云。別有十八刀山地獄。一刀山。高五百由旬。盡以刀。刃向上各高三尺。有大羅叉。驅諸罪人。皆登此山。割截脚足。苦不可忍。以前世時。於山野中安施鎗刺。傷害眾生。故招斯罪也。

或攝沃焦石下。或在鐵圍山間。

經云。阿鼻地獄。上衝大海沃焦山下。大海水滴。如車軸許。成大鐵尖。滿阿鼻城。在此地下。八十萬里。有石名沃焦石。廣八萬四千由旬。厚二萬里。下有一百三十六座地獄。有八大地獄為主。一斬活等。或在鍊圍者。大鍊圍山遶大千界。高至三禪天。中鍊圍山遶中千世界。高等二禪天。小鍊圍山遶小千世界。量等初禪天。盡在其中。十六寒地獄。十六熱地獄。併在其中者也。

受鑊易。則萬死千生。遭剉磔。則一刀兩段。

阿含經云。十六熱地獄中。第六名銅鑊地獄。大五百由旬。獄卒努目捉罪人足。倒投鑊中。隨湯上下。身爛骨現。苦不可當。求死不得。求生無方。從此鑊出復入彼鑊。無有休止。巧風吹活。又入鑊中。苦不可言。遭剉磔下。教化地獄經云。有合山地獄合石地獄。山石合來。磔剉其身。骨肉粉碎。佛言前生斬害眾生。為兩段者。經云。阿鼻地獄中。七重劒林。復有飛刀從空而來。斫斷身體。肢節頭首段段而壞。乃生前殺生之報也。

饑吞熱鐵。渴飲鎔銅。

前云。十六地獄中。第四饑餓地獄。獄卒縛諸罪人。仰臥地上。以杓盛於洋銅熱汁。灌入罪人口中。從咽至腹洞徹下過。無不焦爛。苦不可當。死而復活。還又灌之。晝夜三時。有大銅鑊。入閻王宮。王見怖畏有大獄卒。以鉤擗大王口。以杓盛洋銅汁。灌入王口。無不焦爛。事之了畢。還與嫖女。受諸娛樂。彼諸大臣亦復如是也。

十二時甘受苦辛。五百劫不見頭影。

此明地獄時長也。十二時者。以人間一千六百年。為他化自在天一晝夜。他化自在天一千六百年。為阿鼻地獄中一晝夜。阿鼻地獄中十二時。則人間六十小劫。墮此

獄中經五百劫。方得出頭。故云五百劫不見頭影也。

受足罪業。復入輪迴。

此明地獄罪業受畢。復入六道輪迴也。罪者。謂五逆十惡。兼謗方等經之罪。墮阿鼻獄中。經八萬四千大劫。罪畢復入寒冰獄中。八千歲目無所見。百千狐狼而共掣食。命終之後。又入畜生道。五千萬歲。罪畢復生人中。盲聾瘡痍貧窮下賤。經五百身還入三途。不言餓鬼者。上饑吞熱餓等是也。

頓失舊時人身。換却這迴皮袋。

此一節。呈前復入輪迴之義也。雖得人身。而不修十善慈悲喜捨。從此復造罪業。又入三塗。所謂頓失舊時人身。換却這迴皮袋。向下形容失人身換皮袋所以也。

披毛戴角。銜鐵負鞍。以肉供人。用命還債。

此節。呈前既失人身。復為異類也。披毛戴角者。即牛馬等。用力耐還也。以肉供人者。即雞猪等。以命還債也。唐時。汾州孝義縣民。姓路伯達。永徽年中。負欠同縣人錢。一千文諱而不還。遂共錢主於佛前盟誓。我若昧公錢財。願我身死與公家作牛。錢主其心乃止。路伯達死之二年錢主家牯牛生一牛犢。額上生白毛。為路伯達三字。其子姪。將錢五千求贖。主不肯允。乃施與隰城縣。啟福寺僧真如。助造佛圖也。凡有人見此事。無不發心止惡遷善也。

生被刀砧之苦。活遭湯火之災。

此明以肉供人之事。唐時。晉江縣尉張縱。好啖鱠魚。偶死至冥府。王曰。我追張從。汝何故將張縱來。宜放迴還。吏曰。此人好食鱠。罰他為魚七日。王乃然之。其吏引至河邊。推縱入水。化成小鯉魚。七日長二尺餘。忽有漁翁布網得之。置水倉中。有晉江王縣丞。使人求魚。漁翁以小鯉與之。夫人嫌小。更來索之。遂將大魚奉之。夫人對鏡梳粧。袒褊一膊。囑付庖人作鱠。以待張縱友人御史李萼。庖人持刀削鱗已。未及剪頭。縱之本身遂活。乃詣王縣丞宅。握萼手曰。食鱠飽耶。具如上說。陰府罪罰為魚七日之事。彼此驚歎。此言殺生者。現世受刀砧之報也。活遭湯火之災者。唐時。內侍徐可範。嘗取活鰲。鑿去其甲。以熱油注而食之。又用肥驢縻絆室內。盆盛五味汁於前。四面迫之以烈火。待其渴飲五味汁盡。宰而喫之。後忽得疾。見羣獸鳥雀啄食其肉。痛苦萬狀。覺冷忽思床下布火。及熱油醋灌身。又以網罩。不久發熱。身生瘡疱。疼入骨中。臨死為一束黑骨。此亦殺生之報應。故云活遭湯火之災也。

互積冤愆遞相食噉。

此謂呈前二事。遞相殺害食噉也。冤愆有二。一者人中冤愆。經云。一切眾生從無始來。冤對無量。或於父母師長六親妻子兄弟姊妹等。起諸冤結。更相嫌恨是也。二者畜生中冤愆。經云。一切眾生從無始來。三毒十惡。好殺禽獸斷牛羊等。或殺害眾生噉食其肉。或發撒陂池壅塞溝渠。惱害水性。恣意殺害。遞相食噉。冤對無量也。

。

那時追悔。學道無因。

那時追悔者。以前世惡冤對相纏也。墮落三途。隨類受報。都不自由。被業所牽。追悔不及。欲學妙道。無因而得也。宋時。丞相王安石。字介甫。熙寧間。行青苗法不善。無益於人。其子王雱。為崇政殿說書。陰為父佐務。其青苗新法必行。雱忽而卒。公亦罷相。晏閑中如一夢寐。見一鬼使領雱荷鍬枷號泣公前。謂獲譴罪。由行青苗法不善。公問使者乞解脫。使曰。建寺齋僧可免。由是捨宅為寺。額曰保寧寺。齋僧追薦冥福。此文出言行錄矣。

何如直下承當。莫待今生蹉過。

此是總結前文。警勉要人省悟也。前已既知在三途中無因學道。何如今日直下承當。古云。此時若蹉過。萬載卒難逢。動靜元非物。不墮有無中。傳大士云。夜夜抱佛眠。朝朝還共起。起坐鎮相隨。語默同居止。纖毫不相離。如身影相似。欲知佛去處。只這語言是也。

釋迦文佛。捨皇宮而直往雪山。

此下之文。明直下承當。所以也。梵語釋迦。唐言能文。亦云能儒。謂此娑婆世界。以文字語言而為佛事聞其法者皆得開悟。故云文佛也。三祇果滿萬行功圓。上辭兜率下降王宮。與母摩耶右脇誕生。具三十二相八十種好。於是不樂王位志欲出家成無上道廣度眾生。始遊四門遇老病死。及見僧人心生厭離。太子年方十九。淨居天人統領天眾衛護出宮。四王捧馬足。及車匿騰空踰城而去。行三由旬至跋陀山林。以室劍自割鬚髮。淨居化作獵師身披袈裟。太子將七寶衣貿之而著。修九次第定知定非真棄之。復入雪山。六年苦行。覩長庚星悟道。正當此土周昭王四十九年己卯歲十二月初八日子時分也。可謂。棄金輪之寶位。捨九五之皇宮。不貪榮樂雪山苦行。容鵲巢於頂上。掛蛛網於眉間。不離草座成等正覺。乃是我佛出家教化眾生之樣子也。

居士龐公。將家財而悉沉滄海。

唐時。有襄州衡陽縣。居士龐公名蘊字道玄。家豪富貴積財滿室。世本儒業少悟塵勞志求真諦恤念孤貧。時有二商往借資財。取財付訖。無力荷行。公以脚力送之。至於樹下歇息嘆曰。有慈悲心不知記往借人。今可昧之。言罷驢作人言。吾往昔借公財物而昧。今來為驢還債商聞大驚。即將財帛送還公所。公曰何忽而迴。商曰公豈知其意。吾欲昧之。具述驢言因由所以送還。吾恐後世亦然。公於夜間。至馬廐所。默聽畜等。互相酬還言論多少。公回坐歎曰。吾本濟人而不知返累如此。吾所集者禍也。吾以棄之福也。寧可清貧度日不圖濁富虛名。即將家財運集滿船送至漢陽江中。沉而墜之。其女靈昭編笊籬其子龐大哥種田園而度之時光也。

真武不統王位。惟務修行。

玄帝啟云。乃淨樂。國王之太子。即奎婁二星分野之下上應羣龍。梵度天也。王后名善勝夢吞太陽而孕。十有四月降誕王宮。於開皇元年建甲辰歲戊辰月甲寅日庚午時。於母左脇降生。瑞氣覆國。天華散。異香芬身寶光。充滿國。皆變金色降誕之後。面滿月。目鳳睛。耳秋荷。眉分八字唇若丹朱。七歲博通書史。十五辭父出家。志心念道。恒常誓言。不統王位。惟務修行。父王不允。密潛深山。偶遇紫元真君。授與無極妙道。君曰汝擇山峰。冲霄紫氣之上。方乃居也太子越海東遊。途逢一童授劍曰。此方黑蛇毬角斷魔雄劍。長七尺二寸。闊四寸八分。受已東行。至均州之南。名曰武當。乃隱居也。王思太子領兵五百追至武當入山渡水。九次方見太子。周圍澗水泛漲不能行之。五百人足忽然難舉。遞相謂言。太子願力使之然也同聲言曰迴國。願從太子在此學道。言已如故。唯王泣而獨迴也。太子居山。有靈鵲報曉。黑虎衛岩。烏鴉喙赤。順之者昌黑虎驅奸。逆之者殃。修之未契。思欲下山。至澗邊見老母而磨鍊杵。太子問曰。磨杵何也。老母答曰。為作針耳。子曰。不亦難乎。母曰。功到自成。有何難哉。太子省其意也。麓仙題曰。碎礪功多粗者精聖師邀謁上天京。我心匪石堅於石。小器成而大道成。遂迴途中。折梅奇柳誓曰。我若道成開花結果。言畢至岩端坐。感動美人時來顧看。一日言曰。吾乃羣仙特來試之。言已飛去。向所折者變為柳木。梅實桃核杏形。名曰柳梅。其味酸甘。能愈百病。玉溪真人曰。高真學道隱山時。親折梅枝寄柳枝。行滿功成應舉日。花開子結試先知。仙翁護境百邪遠。聖果標名萬世垂。服餌延齡除固疾。志誠拜事福相隨。由是功行已滿。果然花開子結太子見七十二峰。中一峰聳紫霄下。庚子年丙戌月。丙寅日。清旦天華自落祥雲四合。四方各三百里。頭頂紫氣。披松羅服。五府龍君接上九霄。朝參玉闕。惟務修行者惟者獨也。務者專也。斷習曰修。行則無住。故云不統王位。惟務修行也哉。

呂公既作神仙。尚勤參請。

唐時。呂公者。姓呂名岩字洞賓。別號純陽子。文名呂岩。真人。京川河陽蒲板人也。生於唐玄宗天寶年間。世為顯官。累舉進士不第乃休。因遊華山遇鍾離權。乃晉之郎官。避亂學養命術。將度純陽首以財試。一日鍾呂偕行。鍾拾一石以藥塗之即成黃金。授與之曰前途路費。呂問此仍壞否。鍾曰若頻經火。或五百年壞矣。呂擲之曰。他日誤人去在。鍾後以色試之。命呂入山採藥。化一小廬美婦歡迎之曰。夫故久矣。今遇君子願不見棄。婦欲執手而近。呂以手托開云。母人革囊穢於我矣。言訖婦女不見。即鍾離也。於是授金丹之術。及天仙劍法。遂得遊行自在。詩曰。朝遊南嶽暮蒼梧。袖裡青蛇膽氣麤。三入岳陽人不識。朗吟飛過洞庭湖始謁龍牙和尚。呂問曰。佛法大意云何。牙與偈曰。何事朝愁與暮愁。少年不學老還羞。明珠不是驪龍惜自是時人不解求。因過鄂州黃龍山。見紫氣盤旋有異人所止遂入值機禪師上堂。師知有異人潛迹座下。即厲聲曰。眾有竊法者。呂毅然問曰。一粒粟中藏世界半升鐺內煮山川。且道意旨如何。師曰守屍鬼。呂曰爭柰囊中有長生不死藥。師曰饒經八萬劫。終

是落空亡。呂不憤而去。至夜飛劒脇之。師前已知以法衣蒙頭。坐於方丈。劒邊數匝。師用手指之。劒即墮地。呂以謝罪。師因詰曰。半升鑊內即不問。如何是一粒粟中藏世界。呂於言下有省。乃述偈曰。毀破葫囊折斷琴。此生不向汞中尋。今朝悟得黃龍法。始覺從前枉用心。文出仙苑遺事也。

蘇學士常親佛印。

蘇學士者。姓蘇名軾。字子瞻。號東坡先生。因謫黃州曰。築坡而居。號東坡也。常親佛印者。佛印即南康郡。雲居山。了元佛印字覺老。饒州浮梁林氏子。世本儒業。幻歲出家寶積寺。禮沙門日用為師。試法華經受具遊廬山。謁開先暹禪師。得法之後年二十八。先住江州承天。後居廬山歸宗與黃州對岸。於師酌酢章句。及住金山寺東坡遷杭州太守。復往來問道。值佛印入室。印云這裏無端明坐處。坡云。借和尚四大為座。印云。老僧有一問。若答得與汝四大為座若答不得即輸腰間玉帶。披即解帶置案上云。請和尚問。印云。四大本空五陰非有。端明向甚麼處坐。坡無語。印召侍者。留下玉帶永鎮山門印以衲裙酬之。坡賦二絕云。病骨難堪玉帶圍。鈍根仍落箭鋒機。會當乞食歌姬院。換得雲山舊衲衣。又云。此帶閱人如傳舍。流傳到我亦悠哉。錦袍錯落渾相稱。乞與佯狂老萬回。

韓文公。終禮大顛。

韓文公者。姓韓名愈字退之。諡文公。為刑部侍郎也。因唐憲宗元和己亥十四年正月。帝遣中使杜英奇。持香華往鳳翔府法雲寺。護國真身塔所。請釋迦文佛指骨入內帝御安福門迎拜。留禁中供養三日。五色光現百僚稱賀歷送諸寺釋部威儀太常。長安。萬年。音樂旌幡鼓吹偉盛殊特刑部侍郎韓愈。上表陳諫。引古言今。稱帝壽國祚之不延永。帝大怒。以表示宰輔。將抵以死。裴度。崔羣。為解曰。愈言訐悟。罪之誠宜。然。非內懷至忠。安能及此。願少寬假。以來諫諍。帝曰。愈言我奉佛太過。猶可容之。至謂東漢奉佛已後。天子咸天促。言何乖刺耶愈人臣狂妄敢爾。於是戚里。諸王舊臣。皆為愈哀請。遂貶潮州刺史。愈。到郡之初。以表哀謝勸帝哀封泰山。久而無報。鬱鬱不樂。聞郡有大顛禪師。道德名重。以書招之。三招而大顛至。顛之言論超勝。留數十日。或入定數日方起。愈甚敬焉。師辭去。愈祀神海上。及登靈山。造師之廬問曰弟子軍州事繁。省要處乞師一句。師良久不顧。公罔措。時三平為侍者。乃敲禪床一下。師云作麼。平云。先以定動。後以智拔。公乃拜三平而謝曰。和尚門風高峻愈於侍者處得箇入路。自此以大顛為師也。終禮大顛者。始則毀佛。終乃禮之。後遷袁州刺史。復造顛廬施衣二襲。而請別曰。愈也。將去師矣。幸聞一言卒以相諭。顛曰。吾聞易信人者。必其守易改。易譽人者。必其謗易發。子聞吾言而易信之矣。庸知復聞他說。不復以我為非哉。遂不告之愈。知其不可有聞。乃去至袁州。孟簡尚書。知愈與大顛遊。以書抵愈嘉其信嚮愈答簡書。稱大顛頗聰明識道理實能外形骸以理自勝。不為事物侵亂。雖不盡解其語要。且自胸中無滯礙。因與之往還也。

文出韓子集。

裴公。奪笏於石霜。

裴公者。姓裴名休字公美。河東濟源縣人也。潭州石霜山慶諸禪師。乃新塗陳氏之子。出家後。到瀉山作米頭發明大事。次住石霜山。裴公來參。師拈過裴公笏問公曰。在天子手中為圭。在公手裡為笏。在老僧手內喚作甚麼。休無對。師曰。乃留下笏。在寺作山門中景致也。

房相。問法於國一。

房相。問法於國一者。訛也。原是崔趙公問。弟子今欲出家得否。師曰。出家乃大丈夫事。非將相之所能為公有省也。師諱道欽。蘇州崑山朱氏子。始初業儒。年二十八。遇潤州鶴林素禪師。勉剗落乃戒之曰。汝乘流而行。逢徑即止遂往南邁玄宗天寶三載。抵臨安東北一山。問樵者曰。此徑山也乃駐錫焉。其山有龍淵。而龍王現身為人。獻其地與師。乃成伽藍。至代宗大曆三年詔至闕下帝親瞻禮帝謂忠國師曰。朕欲賜欽師一名。國師欣然奉詔。乃賜號國一禪師後辭歸徑山。至是十二月示疾。說法而逝帝。賜諡大覺禪師也。

妙善不招駙馬成佛無疑。

昔宣律師。居終南靈感寺行道。感天人給侍。師問天曰。吾聞觀音大士。於娑婆大有因緣。顯化何地最勝。天曰。菩薩示現無方。而肉身降跡香山為勝。師曰。香山今在何處。天曰。嵩岳之南二百餘里三山並列。中為香山。即菩薩之地。山之東北。乃過去有王。名妙莊嚴主。夫人名寶德。王無太子惟有三女。長妙顏。次妙音。小妙善。三女之中二女已配唯第三女進止容儀。超然拔俗常服垢衣。不華飾。日止一食。不茹葷辛。齋戒修行。無有退志。王謂妙善曰。汝今出幼當招駙馬。妙善曰。愛河浪闊苦海淵深。豈貪一世之榮。而沉多劫之苦志求出家。修行學道王怒。擯後花園絕其飲食令母苦勸而招駙馬。妙善曰。虛空有盡我願無窮。王聞大怒。詔白雀寺尼。僧惠真。領去寺內。種菜。設計勸勉回宮。妙善曰。豈不聞障人出家萬劫受芒。汝等敢違佛門利益。甘受三塗業報。尼曰。我奉王命非干我事。妙善不允。堅欲出家。尼奏王。王大怒令軍圍寺。盡斬尼眾火焚僧房。公主被龍神。攝在香山之下。毫髮無損。結菴而居草衣木食人莫知之。已經三載時王。因是毀寺殺僧罪業故。感迦摩羅疾寢息不安。醫治不瘥。榜詔四方人治之。時有異僧曰。吾有神方可療王疾。王曰。汝有何藥。僧曰。用無嗔人手眼合藥服之即瘥。王曰。此藥難得。僧曰不難。今王國內。西南有香山絕頂。有一仙人修道行滿。此人無嗔。求之必與。王令侍臣持香入山。拜仙人曰。君王有疾敢勞僊人。求其手眼以救王命當令發心。僊人聞已。刀剗其兩目。斷其雙手。付與侍臣。爾時大地悉皆震動侍臣迴國。令僧合。藥。王乃服而病愈。其王嚴駕至香山。拜謝瞻禮。王見僊人無有手眼。身不完具。王及夫人左右窺視。深生哀念。僊人形相頗類我女。僊人曰我即妙善是也。兒奉手眼上報父恩。王聞之抱持大哭。

王曰朕乃無道。使令我女受大苦痛。僊人曰。吾非苦痛我捨肉眼得金剛眼。捨凡夫手得金色臂。誓願不虛必得是果。於是天地震動僊人乃現千手千眼。大悲觀世音菩薩。身相端嚴光明晃耀。巍巍堂堂如星中月。王於夫人合國人等。皆發善心歸向三寶。菩薩遂入三昧。端然入滅矣。

六祖相遇客人。聽經頓悟。

六祖大師者。二字惠能也。父姓盧。母李氏。誕生之時。於貞觀十二年戊戌。二月八日子時毫光騰空異香滿室。黎明有二僧造謁。謂師之父云夜光生兒專。為安名。可上惠下能也。其父曰。何名惠能答曰。惠者以法惠施眾生。能者能作佛事。言畢而去進之不見也。師不飲乳。夜遇神人灌以甘露。祖本貫范陽郡。後流遷於嶺南。新州為百姓。其父早亡老母孤遺。移來南海艱辛貧乏。於市賣柴度日。時有一客買柴。使令送至客店收去。能得錢却出門。傍有一客誦金剛經。能聞經云。應無所住。而生其心。心即開悟。後參五祖黃梅傳道。出世曹溪。故號為六祖也。

禪道若無況味。聖賢何肯歸依。

況者比類之義。又深也。以禪道比類將來若無淵深之味而古今之聖賢。何肯信向歸依者也。

華林。感二虎隨身。

潭州。華林善覺禪師。常持錫杖夜出林麓。七步一振錫。一稱觀音名號觀察使裴休。訪問之曰。師還有侍者否。師云有兩箇。祇是不可見客。裴曰。在甚麼處。師喚大空小空。時二虎。自庵後而出裴覩之。而驚怖。師語二虎云。有客且去。二虎哮吼而迴裴問師曰。作何行業。感得如此師乃良久。會麼裴曰。不會。師云。山僧常念觀世音菩薩。

投子。有三鴉報曉。

舒州投子義青禪師。李氏子。而七齡詣妙相寺出家。初習百法論。後入洛中聽華嚴五載。次講至諸林菩薩偈曰。知一切法即心自性。忽有省曰。法離文字寧可講乎。後參浮山圓鑑先夢得俊鷹畜。之。既覺而青至。以為吉兆。至一日問。外道問佛。不問有言不問無言。世尊良久。汝如何會。青擬語。山以手掩青口。於是開悟拜起。山曰。汝妙悟玄微耶。答。設有妙悟也須吐却。迷為登聖之梯杭。悟是墮凡之坑阱。初祖曰亦不除愚而就智。亦不拋迷而從悟。山以太陽皮履布襪付之。初開山慈濟先有記曰。吾塔若紅是吾再來也。其後邦人而修師塔。忽作瑤瑤色。未幾青領院事。投子山素無水。住後一日澗自泉生。郡守賀云。名再來泉也。其有三鴉。每至五更報曉。人皆稱讚是師道德所。感禪者日增道望日遠。異苗蕃茂。果符前識者也。

李長者解經。而天厨送食。

李長者。諱通玄。乃唐朝宗枝也。太原東北人。身長七尺餘形貌紫色眉長過目。鬚鬢如畫髮紺而旋螺。唇紅而齒密衣大布縫掖之制。戴樺皮冠腰不束帶。足不躡履。

冬無皴皸之患。夏無垢膩之侵。博達古今。洞精儒釋。開元七年春。賣新華嚴經。曳筇自定襄至并部孟縣之西南。同穎鄉大賢村。高山奴家。止於偏房中造疏。演暢華嚴。不出戶庭。幾于三載。高與隣里。怪而不測。每日食棗十枚。栢葉餅一個。餘無所須。後移南谷馬家古佛堂側。立一小土屋。間處宴息。棗餅亦然。又賣其論併經。往韓氏庄路。逢一虎。玄撫其背。以所負經論搭虎脊背。馱往上龕中去。虎弭耳前行。其處無水。拔老松去可百尺餘。忽成池。水深丈餘。呼為長者泉。室無脂燭。每夜秉翰。於口兩角出白色光尺餘。俄有二女。韶顏皆雅。每日饋食一盂。于土龕前。玄食已。撤器而去。凡經五年。論成四十卷。連經總八十卷。次決疑論四卷。於開元十八。

三月十八入滅。光照太虛。斑鹿白鶴悲于塔邊也。

須菩提打坐。而帝釋散華。

須菩提。在岩中宴坐。諸天雨華。讚歎尊者。尊者問曰。空中雨華。乃是何人。云何讚歎。天曰。我是梵天敬重尊者。善說般若。者云我於般若。未說一字。汝云何讚歎。天曰。尊者無說。我亦無聞。是真般若。尊者一日說法之次。帝釋雨華。尊者乃問。此華從天得耶。從地得耶。從人得耶。帝曰。弗也。者云。從何而得。帝乃舉手。尊者云。如是如是。

達磨。執履西歸。

達磨者。乃南天竺。香至國王第三之子。姓刹帝利。本名菩提多羅也。因二十七祖。般若多羅。至其國。受父王供養。得所施珠。試其所言。祖謂之曰。汝於諸法。已得通量。夫達磨者。通大之義也。宜名菩提達磨。磨問祖曰。我既得法。當往何國而作佛事。祖曰。汝雖得法。未可遠遊。且止南天竺國。待吾滅後六十七載。當往震旦。設大法藥。獲菩提者不可勝數。直指上根。慎勿速行。衰於日下。又汝到時南方勿住。彼處唯好。有為功德。不見佛理。汝縱到彼。不可久留。磨於是恭。稟其教。服勤左右垂四十年。待祖順世。演化本國。爾後念震旦緣熟。行化時至。來辭於姪。王為具大舟。汎海東行。三周寒暑。達于南海。時當此國。梁普通元年九月二十一日也。有廣州刺史蕭昂。迎禮。表聞武帝。問答不契。航葦渡江。至少林面壁九年。後得神光。立雪斷臂。傳授衣法。磨知化緣事畢。欲返西天。於是入滅。熊耳。當梁大通二年十五日也。建塔於定林寺。魏遂以其喪。告梁武帝。贈寶帛。以祭禮供養。後三載。魏使宋雲者。奉使西域迴。遇祖于葱嶺。手攜隻履。翩翩獨逝。雲問祖何往。答曰。西天去。雲至洛陽。具說前事。門人起壙。隻履存焉。時魏孝莊帝。詔取遺履。供養於少林寺。梁武帝聞祖化跡。親為製碑。至唐代宗。諡號圓覺大師。塔曰空觀。

普化。搖鈴騰去。

鎮州普化和尚。不知何處人。受秘傳心。於盤山寶積禪師也。唐咸通元年。將示滅。乃入市。謂人曰。乞我一箇直裰。或與皮襖。或與布衫。皆不受。振鐸而去。臨濟。令人送一棺。師歎曰。臨濟小廝兒。饒舌。便受之。遂辭眾曰。普化明日。東門外迴也。

。郡人。相牽出城外。師。應聲曰。今日不合青鳥。乃曰。明日南門外遷化。人亦送之。又曰。明日。向西門外方吉。人送漸稀。出已還返。人意稍怠。第四日自擎棺出北門外。振鐸入棺而逝。郡人奔走出城。揭棺視之。了無踪跡。唯聞空中。鐸聲漸遠。莫測其由。頌曰。三界為旅亭。四生為徑路。生來似著衫。死去如脫袴。不歡亦不哭。無新亦無故。不拘造化成。一切由吾作。

羅漢。來參於仰山和尚。

仰山者。乃羅漢。稱為小釋迦再來也。得法於淪山祐禪師。號為仰宗。有九一六種圓相。以為宗旨。後有一梵僧來參仰曰。問云。還識字否。山曰。隨分。僧乃右旋一匝云。是甚麼字。山於地上。書箇十字。僧又左旋一匝云。是甚麼字。山乃改十字。作卍字。僧畫一圓相。以兩手托如修羅掌。日月勢云。是甚麼字。山書圓相。圍却卍字。僧作婁至勢。山曰。如是如是。汝善護持。僧禮拜畢。出門騰空而去。時有一道者。請問仰山云。五日前。問和尚。還識字的僧。是何處人。山曰。汝曾見否。道者云。正見出門騰空而去。山曰。此是西天羅漢。故來探吾宗旨也。

嶽帝。受戒於思大禪師。

思大者。燈錄校證。無有嶽帝受戒。於思大禪師之文。本是嵩嶽元[土*圭]禪師。生伊闕李氏。幼歲出家。於高宗永淳年間。受具戒於閒居寺。習毗尼。謁安國師。頓悟玄旨。遂結廬于嵩嶽之龐塢。是年一日。有異人。即嵩嶽之神。峩冠袴褶而至。從者太多。偉甚。稱謁大師。師觀其非常。乃諭之曰。善來仁者。何為而至。彼曰。師寧識我耶。師曰。吾觀生佛。等吾一目。豈分別耶。彼曰。我此嶽神也。能生死於人。師安得一目我哉。師曰。吾本不生。汝焉能死。吾視身與空等。視吾與汝等。汝能壞空與汝乎。苟能壞空及汝。吾則不生不滅也。汝尚不能如是。又焉能生死耶。嶽神稽首曰。我亦聰明正直。於餘神。詎知師有廣大之智辯。願受正戒。令我度世。師曰。汝既乞戒。即既戒也。所以者何。戒外無戒。又何戒哉。神曰。此理也。我聞茫昧。特求師戒。我為門下弟子。師即設座。秉爐正几曰。付汝五戒。若能奉持。即應曰能。不能曰否。神曰。謹受其教。師曰。汝能不姪乎。神曰。我亦娶也。師曰。非謂此也。言無羅欲也。神曰能。師曰。汝能不盜乎。神曰。何乏我矣。焉有盜取哉。師曰。非謂此也。言饗而福淫。不供而禍善也。神曰能。師曰。汝能不殺乎。神曰。實司其柄。焉能不殺。師曰。非謂此也。言有濫誤疑混也。神曰能。師曰。汝能不妄乎。神曰。我正直。焉有妄乎。師曰。非謂此也。言先後不合天心也。神曰能。師曰。汝能不飲酒乎。神曰。吾受祭。奠。焉能不飲。師曰。非謂此也。言不得亂性也。神曰能。師曰。如上。是佛五戒也。神即作禮辭去。師乃門送。而且觀之。見儀衛逶迤。如王者之壯。嵐靄烟霞。幢幡環珮。凌空而隱沒矣。

徑山。至今猶是龍王打供。

杭州徑山道欽禪師。蘇州崑山朱氏子。初服儒教也。其年二十八。遇素師。師謂曰。觀子神氣溫粹。真法寶也。求為弟子落髮。素曰。汝乘流而行。遇徑即止。師遂南行。抵臨安。見東北一山。問樵者。此是何山。樵者曰。徑山也。乃駐錫焉。西遇危峰之北。石岩數座。有一老翁致敬曰。願捨此居為師駐錫之所。師同南進。上至五峰之間。有一大湫。謂師曰。吾若去時。此湫當漲。留一穴水。幸勿填之。我時常來言訖而隱。於是雲霧晦冥。風雨大作。連夜不息。及曉。雨霽。湫水盡涸。漲沙遂平。唯留一湫尚存。謂之龍井。師居之。常有異人。而來獻供。已而隱之。每日如此。盛知皆是龍王。令人送供者哉。

雪峰往昔能使木人開山。

福建雪峰義存禪師。泉州南安豐氏子。師生而惡葷茹。襤褸間聞鐘梵之聲。見旛華必動容欣喜。十二出家。十七落髮。師事慶玄律師。初參德山玄鑑禪師。問曰。從上宗乘中。事學人還有分也無。山打一棒曰。道甚麼。師舉似岩頭曰。我當時如桶底脫相似。頭喝曰。豈不聞從門入者。不是家珍。師曰。他後如何。即是他時。一一從自己胸中流出。始是蓋天蓋地。師大悟曰。始是鰲山成道也。木人者。即木毬也。師凡喚僧。必以木毬。毬去。彼僧自來。若乞檀施。附字於毬上。毬徑至檀越家。一一送施而來。智門祚頌。雪峰毬。孰辨機。一千五百幾人知。眨起眉毛千萬里。須是吾門獅子兒。

此皆已驗之因由。切莫自生於退屈。

所謂結前之義。比前來十餘之聖賢。皆是以經効驗有如是之因。感如是之果也。切莫退屈者。退者。却去也。屈者。拗折也。乃科家勸勉行人。各可自生退却屈拗也。古德云。彼既丈夫。我亦爾。不應自輕自謾。而退屈者也。

銷釋金剛科儀會要註解卷第一

銷釋金剛科儀會要註解卷第二

姚泰三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

野狐。尚聽百丈法。

洪州百丈懷海禪師。福州長樂人也。得法於馬祖。每上堂有一老人聽法。隨眾散去。一日眾退唯老人不去。師問汝是何人。老人曰。某非人也。乃野狐耳。先於過去迦葉佛時。曾住此山集眾演法。有學人問大修行人還落因果也無。某對曰。不落因果。遂五百生墮野狐身。今請和尚代一轉語破疑。解脫野狐身。師曰。汝試問來。老人曰。大修行人還落因果也無。師拈轉曰。不昧因果。老人於言下大悟。方知不落因果。是撥無斷見。不昧因果是隨流得妙。所以惺悟作禮曰。某已脫野狐身。住在山後。乞師依亡僧殯送。師令維那白推告眾云。食後送亡僧。大眾聚議一眾咸安。涅槃堂亦無病人。何故如是。師領大眾至山後岩。以杖挑出一死野狐。乃依法火葬埋矣。

螺螄。猶護金剛經。

唐時。所有待制。船至漢江阻風。波濤洶湧滿船驚怖。急將平昔持誦金剛經一卷。拋棄江中。遂得風恬浪靜。待制曰。深憶此經。受持年遠鬱鬱不樂。經涉兩月方到鎮江。見船尾後百步。而有一袍。似裘之狀。出沒無時。眾人疑慮。待制令一漁人取來。乃螺螄輾成一團。剖而外濕內乾。待制用手分開視之。即是所持之經毫髮無損。待制驚喜拜而頂受歎曰。漢水會於九江。至南徐有數千里。舟船往來豈有數目。然未聞所持之經。自彼至此。螺螄一見而不捨。其為名耶。利耶。財耶色耶。將必脫輪迴。免死生者也。嗚呼。萬物之中。最靈者人也。有畢竟不聞是經。有聞而不見見而不信。信而為名利所繫而後信者不若螺螄也。

十千游魚。聞佛號。化為天子。

金光明經佛告菩提樹神。昔流水長者。於天自在光王國內。治眾生病苦已。長者妻名水肩藏。有二子。一名水滿。二名水藏。長者與二子。到一大澤中見枯涸無水。魚將死至。生大悲心。時有樹神示現半身。語長者。言此魚可憐汝可與水。長者曰。魚有幾何。答言。此魚十千。日曝水少將入死門。長者遶池經行。魚隨視長者尋取樹枝覆於池上用作陰涼。四面覓水忽見一河。名曰水生。長者悲喜至大王所。具拜告王說如上事。王令自選有力大象二十頭。於其城中復借皮囊。至河馱水速到池邊瀉水而滿。選一力大之象令子白於祖父家中所用之食。悉已運至池邊。安置池內。長者依教所說。高聲稱念。南無寶髻如來應供等十號。及唱十二因緣。以此之故。十千游魚聞法得食。化生忉利皆為天子。各悟前因悉來酬謝。十千天子各持瓔珞至於長者之家以十千天妙瓔珞置於頭邊。十千瓔珞安於足邊。左脇右脇亦然。又雨四華。作天音樂。

早旦王問羣臣昨夜何故有如此瑞。羣臣對曰。說如上因。詔令長者問如上緣。長者奏王。恐十千魚而得生天。待臣至池驗魚死活復來奏王。遂到池邊見魚悉死。多有四華徧滿池中。還白大王。是十千游魚。定生忉利天。王聞歡喜。長者欣然。佛告大眾。此長者。我身也。長子。即羅睺羅。次子即阿難。樹神。即今善女天也。十千游魚。即今十千天子是也。

五百蝙蝠聽法音總作聖賢。

昔佛正法之時有五百蝙蝠穴於枯樹。時有商人附火樹下。常有道人誦阿毗達磨論故走火燒其樹。五百蝙蝠貪聽法音。被火焚斃次夕。見五百人來禮拜曰。向蒙法力今脫惡報。皆生人中悉皆聰慧。棄家學道俱登聖果。其後。迦尼色迦與脇尊者。招集五百賢聖。於迦濕彌羅國。作毗婆論。其五百賢聖。即五百蝙蝠。因識宿命遂。共作論。以酬法力之恩也。

蟒。聞懺。以生天。

昔梁武帝。后郗氏國母。薨後數月。帝追悼之。晝則忽忽不樂。宵乃耿耿不寐。聞外有聲。視之乃一蟒耳。睽眊呀口。以向於帝。帝大驚謂曰。朕宮嚴謹。爾必崇也。蟒作人言曰。蟒則昔日郗氏。妾以生存嫉妬六宮其性慘毒害人多矣。故罪謫蟒之身。無食充口。無窟安身。苦不可勝。鱗甲小虫。咬噬肌肉。猶似錐刀帝聞已。嗚呼感嘆。忽爾潛去。帝次日大集沙門。問其所由。寶誌公曰。若非禮佛懺悔莫能救濟。遂採藏經集成十卷依法禮懺。乃聞宮中異香許久。忽見雲上有一天人。容儀美麗謂帝曰。吾蟒後身。蒙帝法力。生忉利天也。再三致謝言訖而隱不現也。

龍聽法。而悟道。

龍者。乃龍女也。於時下方。多寶世尊。所從菩薩。名曰智積。白多寶佛言。當還本土釋迦佛告智積曰。且待須臾。此有菩薩名文殊師利。可與相見論說妙法。可還本土爾時文殊。與無量三乘之眾。從海湧出來詣靈山智積言。仁者於海宮中說何法要文殊答曰。唯說妙法華經。智積言頗有眾生修行此經。速得佛否。文殊言。有娑竭羅龍王女。年始八歲。智慧利根。善知眾生諸根行業。得陀羅尼。諸佛法藏悉能受持。深入禪定了達諸法。於剎那頃發菩提心。得不退轉。慈念眾生猶如一子。智積言。我見釋迦如來。於三千大千世界乃至無有如芥子許。不是佛捨身命處。而求佛道。不信此女於須臾頃而得成佛。爾時龍女有一寶珠。奉上於佛。即受之龍女謂智積菩薩。尊者舍利弗言。我獻寶珠。世尊納受。是事疾否。答言甚疾。龍女言。以汝神力觀我成佛。復速於此。當時眾會皆見龍女。忽然之間變成男子。具菩薩行。即往南方無垢世界。坐寶蓮華成等正覺。號曰。華僊如來也。

彼物尚能領悟。況人何不回心。

此是結前之義也。彼之異類一聞妙法。尚能領悟得道。而況我等為人。其性最靈。何不回轉心華向道也。

或有埋頭喫飯。而空過一生。

乃是科家。伸後人之病也。或有一等緇白。雖居釋教門中。不修如來戒定慧。只是徇俗而打關。埋頭喫飯度日而已。警策云。可惜一生空過。後悔難追。教理未嘗措懷。玄道無因契悟。豈不哀哉也。

或有錯路修行而不省這意。

此一節。廣伸禪病也。雖在禪門學道。不得明師指教。偶遇偏見之師。授與邪法。錯路而修不省大道也。所以永明云。或起殊勝知解。而好肉剜瘡。或住本性清淨。而執藥成病。或尋文探義。而飲客水。或守靜閒居。而坐法塵。或認昭昭靈靈。而為自己。或認著識神。而為本來人長沙禪師頌。學道之人不識真。只為從前認識神。無量劫來生死本。痴人喚作本來人。此明真理之中。但起毫釐執著之見。即是錯路而修也。

豈識菩提覺性。箇箇圓成。爭知般若善根。人人具足。

乃是結前。埋頭喫飯。錯路修行之義也。斯二種人。豈識菩提。人人具足哉。豈識者。即爭知也。菩提覺性者。即般若善根也。個個圓成者。即人人具足也。文之異。而義同矣。

莫問。大隱小隱。

若明此一段太事。大隱亦可。小隱亦可。若不明者。大隱小隱。總是徒勞也。大隱者。居塵不染對境無心。不欣聖位不重己靈。如是之人方可大隱也。若是初心行人。須居小隱。所以白樂天云。大隱居朝市。小隱入丘樊。丘樊大冷落朝市大囂喧。不如作小隱隱作留司官。

休別。在家出家。

佛讚淨名云。雖為白衣。奉持沙門清淨律儀。雖處居家。不著三界。示有妻子。常修梵行。雖有眷屬常。樂遠離也。麻谷。南泉謁徑山路逢一婆子。乃問。徑山路。向甚麼處去。婆云。驀直去。谷云前頭水深過得否。婆答。不濕脚。谷云。上岸稻好下岸稻怯。婆曰。揔被螃蟹喫了也。然此婆子。論作在家人說話。何得能奉律儀。修梵行。善知過河不濕脚。螃蟹喫了稻。雖有在家模樣。不可作在家人論也。

不拘僧俗。而只要辨心。

心者。有四。其一肉團心。五臟中是也。其二賴耶心。能分別是也。其三緣慮心。能緣外境是也。其四堅實心。即本覺菩提心是也。此心聖凡本具。所以云。只要辨心也。昔有一僧參米胡。路逢一婆子。僧問。婆子有眷屬否。婆曰有僧云。在甚麼處。婆曰。山河大地若草若木。皆是眷屬僧云。莫作師姑否。婆曰。汝見我是甚麼人。僧云俗人。婆曰。汝不是僧。僧云。汝莫混濫佛法好。婆曰。我不曾混濫佛法。僧云。汝恁麼說話豈不是混濫佛法。婆云。你是男子。我是女人。豈曾混濫。似這婆子。如此說話雖是俗人。此心已辨了也。

本無男女。而何須著相。

此明般若真智外。幻境緣空也。若以識見分別。有差別相。若以實智觀之。諸法洩然豈分男女之異哉。本無男女者。且如淨名室中。有一天女散華。此女即法身大士現身也。華至諸菩薩身邊。即皆墮落。以菩薩惑習永斷。所以墮落也。華至二乘身上。便著不墮。以二乘人惑習未盡。所以便著也。女言。結習盡者華不著身。未盡者。華乃著身也。女又曰。我止此室十二年來。祇聞佛功德香。不聞二乘之香。舍利弗言。汝何不轉女成男。天女曰。我從十二年來。求女人相了不可得。當何所轉。此明一切諸法無有定相。譬如幻師。化作男女等相。幻無實體。當何所轉。即時天女以神通力。令舍利弗化為天女身。女自化為舍利弗。而問舍利弗言。汝何不轉女身成男子。舍利弗以女相答言。我今不知何故變為女身耶。天女曰。汝今能轉此身。一切女身悉當能轉。如舍利弗非女。而現女身。一切女人亦復如是。雖現女身。而非女也。是故佛說。一切諸法非男非女。即時天女。還攝神力。令舍利弗身。還復如故。天女。問舍利弗言。女身色相今何所在。舍利弗言。無在無不在。天女曰。一切諸法亦復如是。無在無不在也可謂。本無男女也。以神力故。變自身為舍利弗變男相作女身到這裡。任是天眼龍睛。覷他不著。所謂。千手大悲難摸[打-丁+索]。爍迦羅眼覷無門。是以科家道。本無男女。而何須著相者也。

未明人妄分三教。了得底同悟一心。

此明三教所顯者。皆是一個道理也。未明此道。妄分有三。劉謐先生曰。嘗觀中國有三教者。自伏羲氏畫八卦。而儒教始於此也。自老子說道德經。而道教始於此也。自漢明帝夢金人。而佛教始於此也。於是中國。而有三教之序也。未明人者各執己見互相是非。了得底者。原無二也。大抵。儒以正設教。道以尊設教。釋以大設教。觀其好生惡殺。則同一仁也。視人猶己。則同一公也。懲忿窒慾禁過防非。則同一操修也。雷霆眾瞋日月羣盲。則同一化風也。由粗迹而論。則天下之理。不過善惡二途。而三教之意。無非要人去惡遷善。所以為善者降祥。為惡者受殃。古德云。天下無二道聖賢無兩心。此言同悟一心者。心能作佛。心能作眾生。心作天堂。心作地獄。心異則千差競起。心平則法界坦然。若了諸法皆空。無非一心實相。故云。同悟一心也。

若能返照迴光。皆得見性成佛。

乃結前之義也。在家出家。僧俗男女。俱無實體。若能返照。不逐假相五蘊根塵然後迴光。自悟本者之性。故結云。皆得見性成佛也。

又況人身易失。佛法難逢。

此下之文。歎人身容易失。美大法難逢也。易失者身如朝霜曉露。倏忽即無岸樹井藤。豈能長久。難逢者。罕遇也。大法難逢龜值木。勝緣罕遇芥投針。譬如優曇華。實為希有也。華嚴經云。寧地獄中多劫受苦常要見佛聞法不願離三途。而生無佛法

處矣。

欲超六道之周流唯有一乘之徑捷。

此勉行人。欲超六道須仗一乘也。六道者。即天。人。修羅。地獄。餓鬼。畜生。是也。欲要超越六道。免逐周流者。唯有一乘。是為捷徑之法門也。一乘者。顯般若真空也。所謂。真不立。妄本空。有無俱遣不空空。即中道一乘。乃為徑捷哉。

須求正見。莫信邪師。

乃科家指示後人。欲究一乘。須得明師指教。方纔無咎也。正見者。直顯中道。不落二邊也。邪師者。不體正道。妄傳邪法也。圓悟禪師示眾云。嗟見末法之流。拍盲野狐種族。自不曾夢見祖師之道。妄傳達磨以胎息傳人。謂之傳法救迷情。以至妄引。從上年高宗師。如安國師。趙州之類。皆行此氣得道。及誇初祖隻履西歸。普化空棺而去。皆謂此術有驗遂至渾身解脫。謂之形神俱妙而去。愚人厚愛此者。怕臘月三十日懺惶。兢傳歸真之法。除夜望影。喚主人翁。以卜日月。聽樓頭鼓驗玉池水。覘眼光。以為脫生死法。此真誑謊閭閻。捏偽造窠。貽高人嗤鄙復有一種邪見之徒。假託初祖達磨。行此胎息說趙州十二時別歌。龐居士轉河車頌。遞互指授密傳行持。以圖長年。及全身脫去。或希三五百壽。殊不知真妄想愛見也。本是善因。返招惡果。不覺墮在荒草。而豪傑俊穎之士。高談大辯之人。往往而信之。是為邪師也。古德云。歸空邪妄誑愚癡。運氣施功透頂皮。捏目生華稱佛現。糊窻傳法怕人知。通風定與三千棒。泄漏親遭八百鎚莫學這般男女輩。生逢王難死阿鼻。

悟了方是入頭。行得始能脫俗。

既是正見修行。直須以悟為期。徹法源底。了悟真智。方是入頭處也。脫俗者。既悟此理。須要稱理而修。如說而行。始能脫得俗諦。之生死也。永嘉云爭似無為實相門一超直入如來地也。

步步踏著實地。頭頭頂掛虛空。

此明行人。既悟此理。了死脫生。不離日用尋常。故行時。腳踏實地。頭上頂掛虛空。不離喫飯穿衣。揔是西來妙意。可謂。念念釋迦出世。步步彌勒下生。分別現文殊之心。動止運普賢之行也。

用時。則萬境全彰。放下。則一塵不立。

修行之人。到此田地。能應眾緣。不隨諸有。萬境全彰。一貫之理。可謂。法法不隱藏。古今常顯露。山河及大地。全露法王身也。一塵不立者。若是收來一念元空。諸緣不昧。古德云實際理地。不受一塵萬行門中。不捨一法。

超生死不相關之地。了鬼神覷不破之機。

此明行人。修行之驗也。果能於諸法中。得大自在。便能超越生死。鬼神難拘。古人道。若論此事。離心意識參。出聖凡路頭學。千聖難測量五眼窺不見。故云。生死不相關。鬼神覷不破也。

是凡是聖。而同箇路頭。或冤或親。而共一鼻孔。

此明向上一事。凡聖同途。冤親一體。故云一箇路頭。一箇鼻孔也。傳大士曰。眾生與南無殊。大智不異於愚。何須身外求寶。身田自有明珠正道邪道不二。了知凡聖同途。迷悟本無差別涅槃生死一如。究竟萬緣空寂。推求意想清虛。無有一法可得。倏然自入無餘。

如斯實悟。尚滯半途。

如斯者。乃指法之辭也。斯者。此也。指前來如此真實領悟。猶是第二頭說話也。喚作途路之談。未得到家。故云。半途也。

休沉向上三玄要了末後一著。

休沉者。乃科家。與後人拈情。休認前來悟處。皆是三玄邊事。不可執著也。三玄者。體中玄。句中玄。玄中玄。此三玄因機而說。未是聲前之道。故云。休沉向上三玄也。末後一著者。言當人動靜一著子。超出語言玄妙。似世尊拈華。迦葉微笑。以目前見理分明。謂之末後一著。又如達磨安心。神光覓心。了不可得。亦謂末後一著。此是明佛明祖。末後一著也。若論行人末後之。事平生所作行業。要在臨終捨命之際一念於理相當。洞明真性。安然脫去者。此是行人末後一著。故云。休沉向上三玄。要了末後一著也。

且道。即今喚那箇做末後一著。

此是審察之辭。急要行人著意參詳。向下露矣。

青山低處見天闊 紅藕開時聞水香

此二句。明宗發揚末後一著也。若是行人。向見天闊處。聞水香時。見聞不昧此理。豈不是末後一著。所謂三平禪師。頌云。見聞知覺本非因。當體虛玄絕妄真。見相不生癡愛業。洞然全是釋迦身。此是末後句之榜樣者哉。

棄却瓢囊擊碎琴 如今不戀汞中金

自從一見黃龍後 始覺從前錯用心

此四句。元是洞賓。見黃龍。悟道之偈。科家取來。與行人拈情解疑。言洞賓已得神仙。而參黃龍發明真性。始知仙道。未出三界。縱活千歲。不免沉淪。所以。棄却瓢囊。汞金不戀。自知從前所學仙法。錯用而矣。此述神仙與天齊壽。點鍊成金。尚問道而歸禪。何況尋常生死凡夫。豈可錯過者也。

始知生死是無常 莫道先從老者亡

大限到來無定準 後生年少也隄防

此是舉前之義者。既明自性真心。方知生死無常也。前二句。警策行人。後二句。行容上義。生死無常者。始自生之少壯。老必形容遷改。病疾摧殘。死即氣絕神往。故云無常。莫道先從老者亡矣。不可定謂老者先亡。少者後亡。若是大限到來。就是後生難逃死苦。故云。莫待老來方學道。孤墳多是少年人。

富貴貧窮各有由 宿緣分定莫剛求
不曾下得春時種 空守荒田望有秋

此四句偈。是如居士。勸在家人。種福田頌前二句是法。後二句是喻。各有由者富貴貧窮。各有分定。大藏經通偈云。欲知前世因。今生受者是。欲知後世果。今生修者是。取以目前觀之。人生貧富貴賤。壽夭榮枯。種種不同。無非宿業所踐如前生布施。恩惠於人。今生富貴前生慳貪。障人布施。今生貧窮前生殺生害命。今生壽夭前生不殺。今生壽長。古德云。富貴貧窮各有緣。身遭危厄總由天。功勳運退翻為罪。善行時衰返作愆。祿少非千愚共魯。家豪不在智和賢。古來貴賤皆由命。萬事無過聽自然。不曾下種者。猶如春無所種。秋無所收。前世不曾種福。今生豈能得福。故云。空守荒田望有秋。此言人生在世。須要廣種福田。種瓜得瓜。種豆得豆。故曰。春種一粒粟。秋收萬顆子。人生為善惡。果報亦如此。

修喇修喇。摩訶修喇

此科淨口業真言。向下十句之文。是科家所立提綱。於每科經文之前。安立南嘉孩之辭。提舉經義。而不亂也。

普供養。我牟尼。

此科普供養真言。普供十方三世。一切諸佛。然後供養我牟尼者。即本師釋迦牟尼佛。是矣。

將欲誦經。先安土地。

此科。安土地真言。凡欲讀誦此經。必先安慰土地以求加護也。

金剛菩薩永護壇儀。

此科。八金剛。四菩薩也壇儀者。即壇場軌儀也。准千手千眼。觀自在菩薩儀軌經說。今以金剛為外護。菩薩為內護。如此則外魔不能侵。內魔不能起。以斯內外俱淨可謂修習誦持也。

云何梵畢。發願謹受持。

此科。發願文。稽首三界尊歸命十方佛。我今發弘願。持此金剛經然後作云何梵。請佛說法矣。

一相元無垢 體性離塵緣 專心持四句
且要誦真言

此四句。乃科家。復於每段經文之前安此四句。以為要旨。如衣有領。而衣則順故曰。要旨也。前二句。頌理。有何修而不修。持與不持也。所謂一相者。無相之相。名為一相。直指法身真理。元無煩惱垢染。故云。體性離塵緣也。後二句者。既是受持此經。須當先念真言。斯真言者。是諸佛而密用之心印。持之則功德難量。誦之則現生獲益。故須誦念也。

金剛經啟請。

若有人受持金剛經者。先須至心念淨口業真言。然後啟請八金剛。四菩薩。名號。所在之處。常當擁護。

此明行人。凡欲誦經。祈求加護者哉。

淨口業真言。

修唎修唎。摩訶修唎。修修唎。薩婆訶

誦此真言者。一切口業悉皆清淨。不誦真言以恒河水漱。亦不淨也。

安土地真言。

南無三滿哆。母馱喃。唵度嚧度嚧。地尾薩婆訶

此言土地者。即堅牢地神也。凡有三寶建立道場。誦經坐禪講解之處。此堅牢地神。稟報上天。常來擁護。故乃誦此真言也。

普供養真言。唵誝誝曩。三婆嚩。鞞日囉斛。

此明行人。念真言時。運心作觀想。此所供之物。用淨法界嚩字真言。及以吉祥手印。加持二十一遍。以為清淨法食。自然周徧法界。手印者。以右手大拇指。與無名指相捻。餘三指皆捨散。次念變食真言。娜謨薩縛怛他孽多。縛盧枳帝。唵。三婆嚩。三婆嚩。吽。行人念此真言。或三遍七遍或二十一遍。由此真言之力。其所供物。自然變成種種諸天餘餚。饌。皆有五種色香上味。一如須彌山。後念此普供養真言。承斯真言之力。自然普供十方世界。故云。此食色香味上供十方佛中奉諸賢聖。下及六道品。等施無差別。隨感皆飽滿。

請八金剛。

奉請青除災金剛

奉請辟毒金剛

奉請黃隨求金剛

奉請白淨水金剛

奉請赤聲火金剛

奉請定除災金剛

奉請紫賢金剛

奉請大神金剛

青除災金剛者。即青色金剛。能消災厄也。辟毒金剛者能降伏一切惡毒鬼神。及惡龍獸。損害一切有情也。黃隨求金剛者。即黃色金剛。能令一切所求皆得遂意。為求遷官延壽。福德聰明。錢財妻子。伏藏寶珠。仙藥神通等也。白淨水金剛者。即白色金剛。能清濁水。為除惡業重罪煩惱等。種種災難官事口舌。鬼魅所著惡星凌逼等也。赤聲火金剛者。即紅色金剛。為求賢聖加護。天龍歡喜。說法辯才。言音清雅也。定除災金剛者。即碧色金剛。能除諸毒灾障。即彼出世間法。欲速滿足福德智慧也

。紫賢金剛者為求聖賢位。皆得遂意也。大神金剛者。為求廣大神通。亦得遂意者哉。

請四菩薩。

奉請金剛眷菩薩

奉請金剛索菩薩

奉請金剛愛菩薩

奉請金剛語菩薩

金剛眷者。此菩薩。有廣大眷屬也。金剛索者此菩薩。手持胃索。能縛魔魅也。金剛愛者。此菩薩。能慈愛有情。無不度脫也。金剛語者。此菩薩。能以軟語。勸化眾生也。

發願文。

發願者。教中有行願二途。如云。有行無願。行必茫然。有願無行。願為虛設。須假行願相稱。方得無咎。故乃發願也。

稽首三界尊。歸命十方佛。我今發弘願。持此金剛經。上報四重恩。下濟三途苦。若有見聞者。悉發菩提心盡此一報身。同生極樂國。

此節之文。未及誦經先須發願。所謂三界尊十方佛者。先禮釋迦一佛。次禮十方諸佛也。發願持經者。先發四弘誓願。後乃受持此經也。上報四恩。下濟三途者。此明發願所以。將此歸佛誦經功德。用報四重之恩。普濟三途之苦也。見聞發心者。以今發願持經。是自利之義也。見聞發心。是利他之義也。盡此報身。同生極樂者。斯即總伸回向。凡有誦持見聞讀誦。從此世界報身命盡。神識定生極樂國也。

云何梵。

梵者梵語唐言淨也。即梵天離欲空居清淨之義也。世界始成之際。劫初之時。光音天人。來生人間。所出音聲還是梵音。宛轉曲折之音。古時都講維那。於此八句。請法師講說也。

云何得長壽。金剛不壞身。復以何因緣。得大堅固力。云何於此經。究竟到彼岸。願佛開微密。廣為眾生說。

長壽不壞者。即第一請問也。此文出大般若經長壽品。佛告迦葉言。欲得長壽者。應當護念一切眾生。同一子想。生大慈悲喜捨。授不殺戒。以是因緣。則得壽命無量也。金剛不壞身。文出金剛品。佛言如來身者。是常住金剛不壞身也。復以何因緣。得大堅固力者。即第二請問也。佛言我於往昔以護法因緣。今得成就。金剛堅固。不壞之身也。云何於此經。究竟到彼岸者。即第三請問也。文出名字功德品。佛言。若有人聞大般涅槃經典。依教修習。能斷煩惱。及諸魔魅。不墮惡趣。故到彼岸也。願佛開微密。廣為眾生說者。即第四請問也。文出四相品。開微密者。即口密。謂請佛。廣為眾生說法矣。

開經偈。

無上甚深微妙法 百千萬劫難遭遇
我今見聞得受持 願解如來真實義

前二句。讚美妙法。難遇難遭也。無上者。出世之因。獨為最上。更無過此者也。甚深者。不同世間之法。泛常浮淺易遇易知。此出世之法。深奧而難遇難解。微妙而難測難思。可謂。萬劫難逢龜值木。千生罕遇芥投針。後二句。慶幸發願。我今得遇斯經。如貧得寶。似渴逢漿。願解者。即希募仰望之義。願要曉解。如來真實之理也。

恭聞法身無相。非相可觀。至理絕言。非言所及。

此下之文。是科家所立。以長行為略釋也。法身無相者。即法身無為。不墮諸數。故云。無相。雖言無相。不同斷滅之無。一向全無也。此即無相之相。名為實相。故云。非相可觀。如云。三光猶未照。五眼尚難窺。至理絕言者至者是揀別之義。不同對事之理而有名相言說。名是言之路。相是心之路。法身至理。既無名相。故乃絕言也。如云。言語道斷。心行處滅。是矣。

蓋以。因興四願。果滿三身。酬願現身。彰言化物。

前節明理中絕言忘相。此節明事上。四願三身。科家意謂蓋以我釋迦佛。於因地中。興起四願。即四弘誓願也經歷三大阿僧祇劫。方成佛果。乃感三身也。三身者。即法報化是也。佛初成道乃現三身。一毗盧遮那。即清淨法身也。二盧舍那。即圓滿報身也。三釋迦牟尼。即千百億化身也又化身所被之機。優劣不同。故能被之化身。復有三者。一大化身現千丈。被大乘四加行等菩薩也。二小化身現丈六。被三資糧位菩薩與二乘。凡夫也。三隨類化身。即三根普被。六趣皆霑。如為拘尸羅長者。現三尺身是也。酬願現身者酬昔因中之願。故現三身。須假彰顯言教。化生利物。物雖性分本有。必假明師指示。故曰。譬如暗中寶。無燈不可見。佛法無人說。雖慧莫能了也。

我釋迦聖主。利物情深。愍娑婆流浪之鄉。讚嚴土常樂之界。

前文。總顯諸佛出世。皆因四願而現三身也。此獨言釋迦。居此穢土。以利物情深。故處娑婆梵語娑婆唐言堪忍。此五濁惡世。有種種苦。一切眾生。甘心忍受。不生厭離。故云堪忍。如水之東流。波浪之相接。去而不返。滅而復生。佛愍此苦。諄諄勸導也。讚嚴土者。如大彌陀經。而釋迦如來。廣說殊妙奇特之事。又說四十八種清淨大願。十方恒河沙數諸佛。讚歎阿彌陀佛。不可思議功德。又小彌陀經中。六方諸佛。出廣長舌。說誠實言。汝等當信是稱讚。不可思議功德也。嚴者。莊嚴也。其土之中。宅宇宮殿。樓閣池流。華樹。等。悉以無量雜寶。百千種香。而合成之。此是一種莊嚴。其餘莊嚴。亦有無量。常樂者。無央數劫常受快樂。故云。讚嚴土常樂之界也。

國名極樂。佛號彌陀。四十八願弘深。百萬行門廣大。

小彌陀經云。爾時佛告長老舍利弗。從是西方過十萬億佛土。有世界名曰極樂。其土。有佛號阿彌陀。今現在說法。舍利弗。彼土何故名為極樂。其國眾生。無有眾苦。但受諸樂。故名極樂也。四十八願者。願有通別二願。前來四願。諸佛共發。為通願也。此則別願。如藥師佛十二上願。亦別願也。今四十八願者。無量壽經云。過去久遠劫前。有佛出世。名曰錠光。乃至五十三佛。名世自在王佛。其佛廣為法藏比丘。說二百一十億佛剎莊嚴之事。而法藏比丘聞已。皆悉覩見。遂取諸剎中。無量無邊莊嚴中。最上微妙清淨殊特莊嚴。總為四十八種。而成四十八種大願。此願則總二百一十億。佛剎莊嚴也。百萬行門廣大者。爾時法藏比丘發是願已。是故入三摩地。經歷阿僧祇劫。行菩薩行。故云。廣大者矣。

雙明真化。應接高低。地前地上皆生。是聖是凡俱往。

雙明者明真應身。化應身。即勝應劣應也。應接者。有能應所應。能接所接。高低普應也。地前地上皆生者。佛告彌勒云。此界有七百二十億。不退轉地菩薩。往生彼剎。次如彌勒者。皆當作佛。及修習少功德者。不可勝計。皆當往生也。聖凡俱往者。意云。不但地前地上菩薩往生。乃至四聖六凡。俱同往生彼剎也。

彌陀緣願。於是彰焉。淨土真詮。由斯顯矣。

彌陀緣願者。緣即因緣。是彌陀於世自在王佛所。初聞法出家等因緣也。願者。即四十八種大願也。於是者。即指法之辭。指經中所說。彰然而明。顯然而著矣。所謂真詮者。即實有之說。故曰真詮者矣。

經來自久。久缺宣傳。奉報佛恩。當明經旨。

乃是科家。指金剛經。自漢唐而來。故曰自久。雖有註釋偈頌者。未有結歸指示安養。故云。久缺宣傳也。奉報佛恩者。此是科主致斯科文。略顯淨土法門者。只是用報釋迦如來。開導之恩也。當明經旨者。以行人。雖達此法門之高勝。必須當要發明經中旨趣。此是自問。下文自答者也。

透關妙達如來境 及第高登本分鄉

此二句。乃是結類前義之辭也。科家意云。佛祖言教。只明唯心淨土。本性彌陀。行人不明自己靈光。透過語言文字。故云關也。若得根塵頓脫。靈光獨耀。西方東土。淨穢何殊。室地荊棘。本來不異。此謂妙達如來境也。及第者。如禹門三級浪。魚跳過者。成龍而去。謂之及第。以此比類將來。須要行人。妙達佛心。單明自性也。本分者。自性分中。本有之極樂。故云。本分鄉也。

佛在靈山莫遠求 靈山只在汝心頭

人人有箇靈山塔 好去靈山塔下修

此四句。是科家。當面拈出本有之靈山。本有之佛性。要人莫向外求。遠指佛在靈山。近指佛及靈山總在汝心。是謂心佛不二也。人人有者。乃科家。廣為開示。不

但一人獨有此佛此山。乃至四生六道。人人皆具也。好去靈山塔下修者。要人努力勤修。向五蘊身中。識取無位真人也。下文而顯。勤修之驗矣。

外道天魔皆拱手 梵王帝釋為呈祥
願今合會諸男女 同證金剛大道場

此四句。明行人識得自心是佛。於二六時中。行住坐臥。心心念念。對境無情。好也是佛。惡也是佛。若能如是。感得外道天魔。拱手歸降。梵王帝釋。呈祥獻瑞。所謂。天龍恭敬。神鬼欽崇。願今合會者。行人既有如斯利益。普令合會男女眾等。同證心佛不二法門。金剛般若大智。故云。同證金剛大道場也。

早起忙忙直到昏 不愁生死只愁貧
饒君使盡千條計 直至無常不稱心

此四句。明一切眾生。貪染無厭。法句經云。舍衛國中。有一婆羅門。自造前雅後堂。涼臺溫室。老年八十。猶自經營。佛觀老人不久命終。佛生憐愍。令其聞法。存沒皆益。遂往其家慰問老翁。得無勞倦。復問此何房室。老翁答曰。前雅待客。又問。此何所安。答曰。後堂自處。東西廂房。男女大小。財物僕使居之。夏上涼臺。冬潛溫室。唯此距陽此含未了。佛言。久聞宿德。思遲談講。吾有要偈。存亡利益。特來勸勉。答曰。欲得暇隙。後日再來。共相論之。再三止佛。佛即回去未遠。老翁自授屋椽。椽落翁頭而死。一家啼哭。佛言。愚之甚也。死在目前。尚不回心。何由出離生死。故云。直至無常不稱心也。科主。引經之義。比類一切羣生。從早旦至昏夜。不念生死。只愁貧窮。使心用計。直至無常。不稱其心矣。

般若大教六百餘卷。佛如來金口宣。

此一節。乃提綱之文義。發明八部般若。共六百有二卷。總二十萬偈頌。唯般若大智。演說八十一科。獨顯真空之理也。佛金口宣者。其餘六百卷。多有佛勅聲聞人。轉教菩薩所說。此一卷金剛經。是佛親口自說。故云。佛如來金口宣哉。

六朝翻譯。東土流傳。

六朝翻譯者。言此一卷金剛經。歷六朝翻譯也。一姚秦三藏鳩摩羅什。於弘始五年。在長安草堂寺。譯成十五紙。名金剛般若波羅蜜也。二元魏菩提流支三藏。於天平二年。在洛陽。譯成十四紙。亦名金剛般若波羅蜜也。三陳朝真諦三藏。於太康元年。在金陵郡。譯成十四紙。名金剛斷割般若波羅蜜也。四隋。笈多。開皇十年。於洛陽。譯成十六紙。亦名金剛斷割般若波羅蜜也。五唐玄奘法師。於貞觀二十二年。在玉華宮。譯成十八紙。名能斷金剛般若波羅蜜也。六唐義淨。於證聖二年。在佛授記寺。譯成十二紙。亦名能斷金剛般若波羅蜜也。故云。六朝翻譯也。翻者。翻梵言。成華言。故曰翻也。譯者。以彼之有。譯此之無。故曰譯也。東土者。以西天指此國。為東土也。譯出此經。傳於天下。教法通行。故謂流傳也。

頻頻持誦。四句真詮。無為福勝。果報利人天。

此文。明此經流通之處。若有行人。慇懃持誦。只以四句之偈。乃是無為之福。所得功德。世世生生。常在人間天上。受用無盡。故云。無為福勝果報利人天也。此經中。凡五處。以七寶布施功德。皆不及四句之福。布施是有漏。持經是無漏。故云。無為福勝也。

稽首三界主 大孝釋迦尊 累劫報親恩
積因成正覺

稽首者。周禮有九品。此即一也。稽者。以首至地。稽留少時。如臣拜君之禮也。大孝者。呈上句。兼讚詞云。大孝釋迦之尊也。轉句。行容大孝之因。佛於無量劫中。在四生十二類。處處行孝。如闍提。割肉供親。睽子。侍盲父母。鸚鵡。銜穀等之大孝。至於成佛。迦維省父。忉利寧親。舉愛道之床足。擔淨飯之金棺。謂累劫報恩也。結句。乃大孝之果矣。茲以累劫孝行之因。今感成佛之果。儒謂。孝乃百行之先。釋謂。孝為萬行之本。故云。積因成正覺也。

此經。乃大乘教。菩薩摩訶薩。人之所修。

此經者。指此金剛經。乃大乘終實之教也。大以揀小為義。乘以運載得名也。大乘有二種。一大乘始教。但說諸法皆空。未盡大乘法理。故名為始。以始入大乘也。又五時中。第三方等大乘。方正平等。三根普被。四教並明故。二大乘終教。說如來藏隨緣成阿賴耶識。緣起無性。一切皆如。定性二乘。無性闡提。悉當成佛。方盡大乘至極之說。故名為終。又名實教。以稱實理。故名為實。此般若經。即五教中。終實教攝也。菩薩者。即地前地上菩薩也。地前菩薩。修大乘始教之法。地上菩薩。修大乘終實教之法也。教中道。菩薩清涼月。常遊畢竟空。眾生心水湛。菩提影現中。

般若為六波羅蜜之最勝者也。所以。名為般若波羅蜜。

以施戒忍進禪智之六度。唯智般若波羅蜜為總也。如有女人端正巨富。若無夫主所守護者。易為惡人之所凌辱。布施等五度。亦復如是。若無般若威力之所攝持。易為魔壞。故云。最勝者也。所以者。因此智度。為六度之主。故立此般若波羅蜜。以為題名也。

故下經云。如來為發大乘者說。為發最上乘者說。

引經之義證此。釋成上文。此經乃為大乘菩薩人。所修而說也。為發最上乘者。釋成上文。般若為最勝。佛為最上乘圓頓教菩薩人。而說也。

以此佛說。大般若經。有六百卷。凡一十六會。此經。乃第五百七十七卷。給孤獨園。第二處。第九會。說也。

乃是科家。敘佛說此般若。卷數處所會名。如斯來例。明白者矣。

所以道。

昔日如來金口演 至今拈起又重新

所以道者。是科家自謂。既是佛說般若。我所以科文又道也。昔日者。明佛在給孤獨園。說此般若金口親談。至今者。自佛說經之後。至大宋第十四帝。理宗淳祐二年。立此科儀。如佛在世。重宣一遍相似。故云。至今拈起又重新者也。

此經佛說數千年 無量人天得受傳

憶得古人曾解道 更須會取未聞前

前二句。明此經。自佛說此經以來。至宋淳祐間。三千二百二十餘年。故云數千年。詣我大明嘉靖。四千年有餘。此經受持傳寫。或人我天。而有無量無邊傳之不盡。故云。流通天上人間。普徧微塵剎海也。後二句。顯衲僧境界。憶得古人者。言此經。人人有一卷經。莫向外求。要人聲前領旨。句外明宗。故永明云。若欲研究佛乘。披尋寶藏。一一消歸自己。言言冥合真心。但莫執義上之文。隨語中生解。只須探詮下之旨。契會本宗。則無師之智現前。天真之道不昧矣。

人間陽壽真難得 一寸光陰一寸金

莫待老來方學道 孤墳盡是少年人

此四句偈。歎世無常也。初句。嘆光陰易度。壽不久留。次句。勉人。過一寸光陰。如一寸金相似。須要貴重覺照。不可空消歲月。虛喪光陰。不見古人道。尺璧非寶。寸陰是競。三句。意謂。修行不在老少。生死豈在朝夕。古德云。一盞孤燈照夜臺。上床脫了襪和鞋。三魂七魄夢中去。未委明朝來不來。結句。說出生死。不揀年少。所以。孤墳多是少年人也。

在家菩薩智非常 鬧市叢中作道場

心地若能無罣礙 高山平地總西方

起句。言在家之人。行菩薩六度者。是有智之人。如維摩龐居士是也。故如居士曰。身不出家。心出家者。教中謂之菩薩。所謂。在欲行禪知見力。火中生蓮終不壞。般若經云。菩薩俱有妻子眷屬。而修菩薩行。或有菩薩。先受五欲。而後厭捨。勤修梵行。或有菩薩。方便善巧。為欲成熟諸有情故。示受五欲。而實無染著。次句呈上義。言非常人智之所以。要行人向鬧市叢中。為修道之場。可謂。是非海裡安身。荊棘林中著脚。後二句。是科家。分明指示。徹底掀翻。若心地。於諸緣無染。於萬境無情。了無罣礙。或隱高山。或居平地。總是西方淨土。所謂淨土周沙界。云何獨指西。心心常不昧。處處是阿彌。故曰。高山平地總西方。

金剛般若體如如 翠竹黃華滿路途

八百餘家呈妙手 大家依樣畫葫蘆

初句。言謂。智之大體。即是真如。蓋真如體上。自有本智。能知動靜也。次句。指出真如智體。徧在一切色非色處。所謂。青青翠竹。總是真如。鬱鬱黃華。無非般若。三句。言八百餘家者。羅什門下。有八百學徒。秦主勅僧[(丰*力)/石]等。八百

沙門。咨受什旨。翻譯經論。三百八十卷。八百人中。有四聖。道生。僧肇。道融。僧叡。又有十哲。加曇影。慧嚴。慧觀。僧[(丰*力)/石]。道常。道標。於弘始五年。在草堂寺。譯出此經。故云。八百餘家。所言呈妙手者。美八百家。善通華梵。單譯重翻。度語潤文。依經繩墨。文義精明。皆合佛意。故褒云妙手也。結句。言依樣畫葫蘆者。是貶也。謂八百人。雖皆妙手。總是依經解義。如依樣畫葫蘆相似。科家要人。向如來所說經文之外。薦取本有之智。且道。何者是本有之智。金剛般若體如如。翠竹黃華滿路途。是矣。

金剛般若。人人本具。割斷智為初。白雲散處。一輪顯露。

前文總判六百卷般若。此文別判此經題目。金剛般若波羅蜜經八字。故以法喻雙彰。指歸當人也。割斷智為初者。約喻義以為名。以金剛鋒利。故能斷一切。喻般若智最利。能斷煩惱。即六譯中。第三真諦。第四笈多。同譯為斷割。第五玄奘。第六義淨。同譯為能斷也。白雲散處者。前文。言金剛般若是體。割斷為用。此二句。言用之功效。故喻雲散月出。妄盡真顯耳。

影落千江。無來無去。諸人薦取。凡聖一同居。

呈前妄盡真顯。如雲散月孤。此文喻若。水澄月映。來去無情。水不曾天上邀月來沉於水。月不曾天上而來投於水底。如云。心如皎月連天淨。性寂寒潭徹底清。所以無來無去也。後二句。是科家。分明指示。我前來如此。法喻分明。說出此理。汝諸人何不薦取去。方知凡聖一體。事理無別。故云。一同居也。

摩訶大法王 無短亦無長 本來非皁白

隨處現青黃

摩訶大者。乃華梵兼舉也。法王者。指般若智為王。於一切法自在。內不為根識所埋。外不為塵境所惑。故云自在。此心王之體。無長短之相。無皁白之色也。隨處現青黃者。此之心王。雖無色相。內含三類種子。遇境逢緣。而能變現。根身器界之法。故云。隨處現青黃也。

【經】金剛般若波羅蜜經。

此經。以法喻名題。金剛是喻。般若是法也。金剛者。金中精堅者也。剛生金中。百煉不銷。取此堅利。能斷壞萬物也。梵語般若。唐言智慧。性體虛融。照用自在。能斷絕貪嗔痴煩惱。一切顛倒之見也。梵語波羅蜜。唐言到彼岸。不著諸相。得證涅槃。即到彼岸。若著諸相。輪迴生死。即是此岸。欲至彼岸。須憑般若也。經者。徑也。此經。乃見性成佛之徑路也。

宗鏡云。只這一卷經。六道含靈。一切性中。皆悉具足。

宗鏡二字。以古金剛註文。元是如居士顏丙。所註經題之文。只這一卷經。六道含靈。乃至明了自性是也。從免逐輪迴。不為六根六塵。乃至心華發明在甚麼處。此之一段。是宗鏡所說之文。乃科家。善能點化。裁長補短。續成一段文義。祇是於

人發明自性也。只這一卷經者。不但六道具足。乃至情與無情。悉皆具足。華嚴經云。有一大經卷。量等三千界。在一微塵中。一切塵亦然也。優曇老祖頌曰。一卷真經念處真。言言流出盡黃金。幾多紙上尋文義。錯過西來佛祖心。是也。

蓋為受身之後。妄為六根六塵。埋沒此一段靈光。終日冥冥。不知不覺。

此是科家。自伸問答之辭。曰既是此經具足。如何不似聖人。放光動地。故答。蓋為受身之後。妄被根塵埋沒。妄者。非真實之有也。心經云。是故空中。無色。無受想行識。無眼耳鼻舌身意。無色聲香味觸法。此明般若體上。既無根塵。故云。妄為六根六塵埋沒。古人道。可惜無價之寶。隱在陰入之坑。何日得靈光獨耀。迥脫根塵去也。終日冥冥者。言此眾生雖具此經。背覺合塵。迷己逐物。故云。不覺不知也。

故我佛。生慈悲心。願救一切眾生。齊超苦海。共證菩提。

故者。所以也。因眾生本具。此段光明。迷惑不知。所以佛興四無量心。慈能與樂。悲能拔苦。願救一切眾生。起四弘誓願。化五乘眾生也。苦海者。以生死苦無邊。故喻如海。故我佛出世。種種言教。普令齊超苦海。共證菩提之道也。

所以在舍衛國。為說是經。

所以者。結前也。為說者。生後也。茲因前來眾生。以本有之經。埋沒不知。所以為說此經。發明本有之智也。

大意。只是為人解粘去縛。直下。明了自性。免逐輪迴。不為六根六塵所惑。

大意者。明佛說此金剛經。大端主意。要人解去。我人眾生四相。及於我所。直下明了真空之性。超出輪迴。不被根塵所惑也。粘縛者。眾生認我。則六根粘湛。妄認我所。則六塵拴縛。我尚空無。根塵何有。我法兩空。故云。解粘去縛也。我粘既解。法縛既去。自性既明。輪迴自免。六根六塵。自然不能所惑也。

若人具上根上智。不撥自轉。是胸中。自有此經。

此是科家。勉勵行人也。若是上根之人。不撥自轉者。靈機活落。不勞指撥。不假佛祖言教。向自己胸中。拈出此經。可謂。不從千聖借。豈向萬機求。如云。一生慵懶作。憎重祇便輕。他家學事業。余持一卷經。無心裝標軸。來去省人擎。應病則說藥。方便度眾生。但自心無事。何處不惺惺。斯亦胸中。自有此經也。

且將置三十二分。於空間無用之地。亦不是過。

乃是科家。與人拈情也。恐人向此經上作活計。故將此三十二分。置於空間之地。亦不是過。欲使行人。離言說。捨筌罟。直下薦取本有真經矣。

如或未然。且聽山埜。與汝打葛藤去也。

此是科家。先奪後縱也。未然者。如或未薦本有之經。且聽山埜。與汝鋪舒梗槩。註解分明。如云。若有中流之士。未能頓超。且於教法留心。溫尋貝葉。精搜義理。傳唱敷揚。報佛恩德。故云。打葛藤去也。凡有語言文字。謂之葛藤也。

夫金剛經者。自性堅固。萬劫不壞。況金性堅剛也。

金剛者。標喻也。以自性堅固萬劫不壞。故比況金性堅剛。引喻論云。帝釋金剛寶。能滅阿修羅。智碎煩惱山。能壞亦如是。

般若者。智慧也。

梵語般若。唐言智慧。是故如來。以智慧力。鑿人我山。以智慧因。取煩惱鑛。以智慧火。煉成佛性也。

波羅蜜者。登彼岸義也。

梵語波羅蜜。唐言到彼岸。迷則此岸。悟則彼岸者矣。

見性得度。即登彼岸。未得度者。即是此岸。

此乃解釋登彼岸之義也。若見自性。度生死流。登涅槃之岸也。

經者。徑也。我佛。若不開箇徑路。後代兒孫。又向甚麼處進步。

諸家解釋。經之一字。以貫攝常法。四字註解。今科家。以徑之義。而釋經者。引喻指示。如遠行人。依徑路而進。則無顛險迷錯。此比修道行人。依經中般若智而修。則得成佛。故云。我佛若不開箇徑路。後代兒孫。向甚麼處進步也。

且道這一步。又如何進。

撒手懸崖下。分身萬象中。頭頭元是道。法法現真容。

看取下文提綱。

此一著語。分明指示。要人著眼薦取。

此經深旨。無相為宗。顯妄明真。

此是科家。將此經深旨。從頭解釋。以無相為宗。即無住也。以明真為用。顯妄體本空。真理自顯也。此經深旨者。即所詮真理。不屬有為。故云無相。顯妄者。不言斷妄明真。却云顯妄明真者。蓋妄即真。故如波即水。不必離波求水。故云。顯妄明真也。

提綱要旨。劍鋒微露。掃萬法之本空。

提綱要旨者。以般若真空。為此經提綱緊要之旨。如網有綱繩。眾目不亂也。劍鋒者。喻般若大智慧劍。能斷眾生我人壽者四相。掃除凡夫二乘。人法執情。故云。掃萬法之本空也。

心華發明。照五蘊之非有。

心華者。心喻理。華喻身。人人本具此心。被五陰身蓋覆。所以不明此心。今以此經般若智。照破五蘊非有。顯出真心之體。故經云。觀自在菩薩。行深般若波羅蜜多時。照見五蘊皆空。度一切苦厄是也。

直得雲收雨霽。海湛空澄。

雲收者。喻人空理也。呈上照五蘊之非有。而空我執之情也。雨霽者。唯顯一色晴空。譬般若智顯也。海湛者。喻法空理也。言大海波浪。以喻諸法。今言海湛者。

波浪息矣。喻諸法皆空。則法執破矣。故上文云。掃萬法之本空也。空澄者。海既澄清。十方虛空。現於海中。空海不分。虛融湛寂。上下交映。朗然無別。此是人法兩空。混元之體相也。

快登般若慈舟。直到菩提彼岸。

此是科家誠勉修進之義。快者。速疾也。慈航者。喻般若智。為慈航也。菩提彼岸者。喻本覺真心也。要人登般若之舟。而出生死苦海。直到涅槃之彼岸矣。

且道心華發明。在甚麼處。

乃是科家。徵審前義之辭。前文以般若智。掃除萬法。心華發明。照破五蘊。此云發明之後。向甚麼處安身立命。此是問義。要人著眼。

太湖三萬六千頃 月在波心說向誰

此是科家。伸答上文之義。分明指示安身處。唯要學人自惺也。誌書云。五湖者。一太湖。二謝陽湖。三洞庭湖。四丹陽湖。五官亭湖。又名彭蠡澤。今鄱陽湖是也。太湖周五百里。有三萬六千頃。水面長八百餘里。只見日月出沒水上。故云。月在波心也。說向誰者。喻上文。心華發明向甚麼處。到此言語道斷。心行處滅也。如云。月到天心處。風來水面時。一般清意味。料得少人知。

法王權實令雙行 電捲風馳海嶽傾

霹靂一聲雲散盡 到家元不涉途程

法王者。言佛於諸法自在。謂之王也。出現世間。說權實教。以權智能說法。以實智能證理。非權無以說法。非實無以證理。前二十年言權教。後二十年言般若。權實並進。故云。令雙行也。電捲者。明佛說般若時。直顯真空。掃除萬法。如電捲風馳。海竭山碎也。霹靂一聲者。喻般若現前。心外無法。如雲散長空。心月獨朗。唯一真智。無證無修。本來具足。所以。到家元不涉途程也。

西方淨土人人有 不假修持已現前

諸上善人如見性 阿彌陀佛便同肩

前二句。言淨土唯心不從外得。人人皆有。不待修持。自然現前。所以淨名云。心淨即佛土淨是也。後二句。言自性彌陀。若能見得。不離動用。故傳大士云。夜夜抱佛眠。朝朝還共起。起坐鎮相隨。語默同居止。纖毫不曾離。如身影相似。欲知佛去處。只這語聲是。

無始無明幻色迷 夢魂生死幾千迴

一條直路超三界 但念彌陀歸去來

無明者。乃十二因緣之首。此流轉門也。無始者。言最初無明不覺生三細。境界為緣長六祖。自無明緣行。行緣識。識緣名色已來。名為幻色。是無明所幻之色。既有一迷。執之為我。便有所。因我所故。起惑造業。受種種身。過去因。現在果。現在因。未來果。相續不斷。死了生。生了死。如夢中作夢相似。不知幾千迴。只在

三界無因得出。故科家。慈悲太切。指出方便之門。故云。一條直路超三界。無曲邊也。此法門。名為橫出三界。但有信願念佛。決定往生。故云。但念彌陀歸去來也。

銷釋金剛科儀會要註解卷第二

釋音

- 爰 (音原為也於也)。
握 (音岳)。
帙 (音直小囊也書衣也)。
蓀 (音部草名)。
鐫 (音鐫鑽也尖□錐也)。
愔 (音因安和貌悅貌)。
[疊*毛] (音□毛布)。
鑿 (音作穿也)。
纂 (音纂沮類也又鑽上聲)。
莒 (音臣草名也)。
碩 (音石天也)。
懇 (音墾悲也誠也信也)。
涖 (音士水涯也)。
肘 (音帶臂節也)。
閭 (音浪)。
苑 (音遠養禽獸園也)。
挨 (音矮推也)。
拶 (音雜逼丨也)。
瞥 (音撇目丨也)。
剩 (音勝不啻也)。
誦 (音肴言不恭謹也)。
訛 (音囫謬也舛也)。
緌 (音利)。
刎 (音吻割也)。
矜 (勤經二音)。
潺 (音說丨湲流貌)。
鬪 (音獨丨婁頭也)。
瞽 (音婁鬪婁也)。
瑗 (音願玉名也)。
滯 (音致凝也淹也)。
筋 (音斤肉之力)。
疲 (音皮乏也勞也)。
鑊 (音活鼎丨也)。

娛 (音魚樂也)。
掣 (音徹挽也)。
汾 (音焚)。
隰 (音習下濕也)。
啖 (音淡)。
鱠 (音貴魚膾細切肉也)。
萼 (音鄂花鄂也)。
庖 (音袍)。
廩 (音迷牛迷也)。
絆 (音辨羈 | 也)。
鰲 (音別俗鼈也)。
啄 (音卓鳥食也)。
罩 (音掉)。
撤 (音摺剝也)。
陂 (音[(白-日+田)/升]澤鄣也池也)。
雱 (音滂雪盛貌)。
譴 (音欠謫問也責也)。
廐 (音救 | 馬舍也)。
箴 (音罩箴也)。
脇 (音協身左右腋下也)。
誕 (音旦大也天子生曰降旦)。
餌 (音貳食也餅也饊也)。
齡 (音零)。
鄂 (音惡口中上惡也)。
詰 (音乞治也問罪也)。
軾 (音式車前轡又兵車也)。
姬 (音基皇帝居其水以為姓)。
偉 (音葦)。
訐 (音結攻人之陰私也)。
悟 (音悟相觸也逆也)。
蕃 (音煩茲也息也又音番屏也)。
躡 (音聶踐也)。
筇 (音窮竹名為杖)。
皴 (音逡皴也)。
蹕 (音軍足折裂也)。
弭 (音米息也忘也止也)。
葦 (音委葭也)。
諡 (音示謙行之號又音益笑貌)。

褹 (音鐸補鐸被衣裳也)。
塢 (音五村五也)。
袴 (音褲[月*(幺/土)]衣也亦作)。
逶 (音威迤也行貌)。
迤 (音以邐也又音移)。
嵐 (音蘊大風也)。
湫 (音啾水多又音秋)。
涸 (音霍水竭也盡也)。
襁 (音講 | 褓負兒衣也織縷為之廣八寸長二尺以負兒於背二也)。
褓 (音保小兒衣也)。
轍 (音褶車行迹也)。
洵 (音凶)。
蝓 (音編 | 蝓亦名蠟[虫*墨]亦名仙鼠又名服翼)。
蝠 (音幅蝠 | 也)。
斃 (音被仆也斃也止也敗也壞也)。
薨 (音轟王逝也)。
悼 (音到懼也儀禮云七一日悼也)。
啞 (音雜)。
嚙 (音交齧也)。
緇 (音支黑色也)。
謐 (音密靜也)。
倏 (音束光動也)。
捷 (音節)。
閭 (音廬)。
貽 (音移玄□也)。
[口*(強-厶+口)] (音痴)。
[口*縛] (音縛)。
鞮 (音襪)。
嗑 (音爛)。
娜 (音那上聲美貌)。
謨 (音模議謀也)。
餽 (音肴饌也)。
孽 (音業妖也又姓也)。
冑 (音絹佳也係取也)。
隙 (音乞壁孔也裂也門也)。
叡 (音泣明也聖也智也與睿同)。
[(丰*力)/石] (音略利也)。
鄱 (音婆豫章有鄱陽縣)。

蠡 (音离旬傳有谷离主谷又音鹿)。
距 (音巨鷄距也)。
酢 (醋昨二音)。
誅 (音蟲累也)。
萋 (音長詩曰隰有長楚蔓生如桃)。
囿 (音由)。
奩 (音連香車也)。
衡 (音迥真也正也)。
諄 (音衡誠衡正也)。

銷釋金剛科儀會要註解卷第三

姚秦三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

法會因由。

斯謂。標舉提綱科文釋義之辭。乃依昭明太子所判。謂之法會因由分第一。言此說法之會。皆因佛入城。乞食之由也。

教起根源。

此四字。就是解釋法會由因之義也。法即教法。會即人天眾會。欲得教法興起。必須會集人天。因由。即根源也。

如是法。我佛宣。

此科。如是我聞。今言我佛宣者。當爾之時。佛將入滅。阿難請問四事云。經首當安何名。佛言。安如是我聞。是佛親口自宣說也。

舍衛國中。乞食為先。

此科。一時佛在舍衛國。與千二百五十人。入舍衛大城乞食。故云。乞食為先矣。

次第乞已。本處安然結跏趺坐。終日默無言。

此科。佛入城中。次第乞食。佛心平等。不揀貧富。令人均種福田也。本處安然者。此科還至本處。飯食已訖。結跏者。此科收衣鉢洗足已。敷座而坐。即敷尼師壇而坐也。終日者。佛乃無言入定也。前乞食。以資色身壽命。此入定以資法身慧命。又乞食令他種福。說法令他覺悟。是利他之道。入定乃返本還源。自受法樂。是利己之道也。

金剛般若智 箇箇體如然 白雲消散盡
明月一輪圓

起句。是法喻齊彰。乃唐梵雙舉。呈句。明般若之智。人人本具也。白雲消散者。以般若智。照破五蘊。能空四相。猶如白雲消散盡。而顯明月當空也。

姚秦。三藏法師鳩摩羅什。譯。

姚秦者。即後秦姚氏也。三藏者。即經律論。三藏也。法師者。傳譯弘通之人也。鳩摩羅什者。略梵語。具云。鳩摩羅琰耆婆。此云童壽。謂童年。有老成之德。什者。以斯法師。深通此方文字。華梵兼舉。故稱羅什。譯者。翻梵語。成華言也。

○法會因由分第一。

【經】如是我聞一時佛在舍衛國(至)洗足已敷座而坐。

註曰。如是者。指法之辭也。如是之法。我從佛聞。一時者。說此般若之時也。舍衛者。即波斯匿王。所居之國也。祇樹者。祇即匿王之太子。祇陀。名也。樹是祇陀所施。故云祇樹也。給孤者。有一長者。名須達拏。常施孤獨貧窮。故云給孤獨也。園者。惟祇陀太子有園。長者欲買建寺。太子戲曰。若布金滿園。我當賣之。須達運金。布八十頃園而滿。是太子不受其金。同建精舍。請佛說法。故曰。祇樹給孤獨園也。大比丘者。言得道之深。乃菩薩阿羅漢之類也。千二百五十人者。優樓頻螺等五百人。那提三百人。伽耶二百人。舍利弗一百人。目犍連一百人。耶舍長者五十人。故云。千二百五十人俱也。爾時者。彼時也。佛為三界之尊。故為世尊。食時者。正當午前。將行乞食之時也。著衣持鉢者。著僧伽之衣。即二十五條大衣也。持鉢。而持四天王。所獻之鉢也。入城者。寺在城外。故云入也。乞食者。佛是金輪王子。尚自乞食。為欲教化眾生。捨離憍慢也。又為後世比丘。不積聚財寶也。於其城中次第乞者。如來慈悲。不擇貧富。平等普化也。還至本處者。乞食而歸也。飯食已畢收衣鉢洗足者。謂收起袈裟。於鉢盂。然後洗足。以佛行則跣足。住則必洗也。敷座者。乃敷設高座而坐入定也。天台智者頌曰。法身本非食。應化亦如然。為長人天福。慈悲作福田。收衣息勞慮。洗足離塵緣。欲證三空理。加趺示入禪。

調御師。親臨舍衛。威動乾坤。阿羅漢。雲集祇園。輝騰日月。

調御者。十號之一也。親臨者。降臨赴感。有威可畏。有儀可則。即正容悟物也。梵語阿羅漢。華言殺賊。謂殺煩惱賊。即千二百五十之眾。如雲而來集於祇園。各各神通變化。光明洞達。故云輝騰日月也。

入城持鉢。良由悲愍貧窮。洗足收衣。正是宴安時節。

入城次第行乞。是佛悲愍之心。令其種福。洗足者。前入城行乞。是利他之意也。此收衣宴坐。是利己之意也。故云。宴安時節也。

若向世尊。未舉已前薦得。猶且不堪。開口已後承當。自救不了。

此是科家。以祖師門下之機。單明向上一路。若向世尊未舉已前會得。可謂。釋迦不出世。四十九年說。達磨不西來。少林有妙訣。於斯薦得。猶且不堪。若向世尊開口已後承當。依文解義。紙上鑽研。思慮而知。意解而會。故云。自救不了也。

宗鏡急為提撕。早遲八刻。何故。

科家意云。我前來與諸人。提持此事。還是遲了一時也。一時者。八刻為一時。又云。晝夜十二時。總一百刻。每時八刻。還有四刻。在子午卯酉時中也。何故者。重審之辭也。重審上義。何故不堪。何故不了。又遲八刻者也。

良馬已隨鞭影去 阿難依舊世尊前

良馬者。昔外道問佛。不問有言。不問無言。世尊良久。外道讚歎曰。世尊大慈大悲。開我迷雲。令我得入。乃作禮領會而去。阿難白佛言。外道得何道理。稱讚而去。佛言。如世良馬。見鞭影而行。科家引此之義答之。若向世尊未舉已前。會得此

理。如外道向默領悟。似良馬已隨鞭影去也。若向世尊開口處。承當此理。如阿難依舊向世尊。言上尋討也。

乞食歸來會給孤 收衣敷座正安居
真慈洪範超三界 調御人天得自如

前二句。頌佛儀範。後二句。令人做效。悉獲利益。真慈者。讚佛也。佛真三界之師。四生之父。若人做效承襲乞食。說法利生。即得超出三界。調伏御化一切人天。一切有情皆成佛道。得自如也。

西方寶號能宣演 九品蓮臺必往生
直下相逢休外覓 何勞十萬八千程

前二句。依教而修。若能專心。持念彌陀聖號。必得往生九品蓮臺也。後二句。消歸自己。莫向外求。直下相逢。自性彌陀。唯心淨土。優曇云。自性彌陀無別念。佛行佛坐佛同眠。自從這裡相逢後。彈指高超八萬千。

百歲光陰瞬息迴 其身畢竟化為灰
誰人肯向生前悟 悟取無生歸去來

前二句。歎無常迅速。身不久留。如目睛一瞬。氣息一出。言百歲光陰。剎那便過也。其身畢竟者。此身畢竟化為灰塵。識心隨業牽去也。後二句。既是此身不久。終歸變滅。好向生前悟取此心。不生不滅。真常真樂。故云。悟取無生歸去來也。

善現啟請。頓起疑心。合掌問世尊。云何應住。降伏其心。

此科。昭明太子。判此一段經文。為善現啟請分第二。蓋善現請佛說法。為眾決疑。故立此名也。頓起者。言善現這一啟請。即為當來有情眾生。所以頓然而起疑心。請問世尊。而為決通也。合掌者。此科長老須菩提。在大眾中。即從座起。偏袒右肩。右膝著地。合掌恭敬而白佛言。希有世尊。如來善護念諸菩薩。善付囑諸菩薩也。云何應住者。此科世尊云。善男子。善女人。發阿耨多羅三藐三菩提心。云何應住。云何降伏其心也。

佛教如是。仔細分明。水消北岸。無花休怨春。

此科佛言善男子。善女人。發阿耨多羅三藐三菩提心。應如是住。如是降伏其心。佛答。如是安住理中。如是降伏煩惱。說得仔細明白。無有藏隱。須菩提於此。領解佛意。故應云。唯然世尊。願樂欲聞也。水消北岸者。此總科須菩提。問安住降伏。佛答如是住。如是降伏。如陽春一布。萬物生輝。水消北岸。花發南枝也。無花休怨春者。科家意云。佛如此酬答。太煞分明。汝等後人。不悟如來所說之旨。似枯木無花。蕉芽敗種。莫怨春光。不曾與你。自恨無枝葉。莫怨太陽偏也。

金剛般若智 莫向外邊求 空生來請問
教起有因由

前二句。叮嚀切囑。此般若智。當人本具。莫向外求。後二句。明須菩提。這一問佛。是為當來眾生。起教之因由也。

○善現啟請分第二。

【經】時長老須菩提在大眾中(至)唯然世尊願樂欲聞。

註曰。長老者。以德長年老也。須菩提解空第一。於此般若。是當機人。欲發起此經。為眾請也。從座起者。請佛說法。恭敬之儀也。右膝著地者。文殊問般若經云。右是正道。左是邪道。今欲說般若正道。用正去邪也。諸佛希有者。如優曇華三萬年開金華一次。乃得一現耳。善護念者。為護念根熟菩薩。記云。根熟者。三賢已上菩薩。信根成熟。永無退轉。佛即護念也。善付囑者。為付囑根未熟菩薩。記云。十信菩薩。信根未成熟故。付者。將小付大。囑者。囑大化小。如此護念付囑。即希有事也。善男女者。即未發大乘心之凡夫也。阿耨多羅三藐三菩提者。即發無上正等正覺心也。云何應住降伏者。須菩提意云。雖發此心。未知修何等觀。降伏煩惱。故發此二問。一問眾生發無上心欲求般若。云何可以安住諦理。二問降伏惑心。云何可以折攝散亂。見思塵沙煩惱也。善哉者。佛深許。須菩提所問奇妙。故云善哉。是佛讚歎。須菩提能知我意。善教諸人。不起妄念也。汝今諦聽者。諦則諦審明白。汝當了達聲塵本來不生。勿逐語言。詳審而聽。應如是住者。佛答須菩提。既發菩提心。應當安住諦理。降伏惑心也。唯然者。乃須菩提領諾之辭也。聞佛所答。如是發心。如是應住。如是降伏。即便領解。故應之唯然也。如夫子云。參乎。吾道一以貫之。曾子聞之曰。唯。即應之速而無疑也。願樂欲聞者。蓋為眾生請問。而發起此教也。

昔奇哉之善現。讚希有之慈尊。悲憐濁世眾生。咨決菩提心要。

此是科家。讚美須菩提奇哉。昔日請佛說法。讚歎希有。如優曇華三萬年方始一現。故云希有也。悲憐眾生者。是他善現慈愍之心。為五濁惡世有情眾生。咨請佛決通。菩提心之總要。故云奇哉也。

可謂。一經正眼。三藏絕詮。千聖不傳。諸祖不說。

一經正眼者。即爍迦羅金剛堅固眼也。明經中須菩提。問發菩提心。云何應住。云何降伏。佛答。應如是住。如是降伏。單顯菩提心。為金剛經正眼也。三藏絕詮者。似此菩提心。三藏之文。詮註不及。故云絕詮也。千聖不傳者。呈上正眼絕詮之道。可謂。向上一路。千聖不遊。如云。父母未生前。凝然一相圓。釋迦猶不會。迦葉豈能傳。

如是降伏。扁舟已過洞庭湖。護念叮嚀。何啻白雲千萬里。

科家意云。此理。既是三藏絕詮之道。諸祖不傳之旨。今日世尊說個如是降伏。早是扁舟已過洞庭湖。於理中去之遠矣。護念叮嚀者。科家云。如來說個護念。說個付囑。不止白雲萬里而矣。如云。聲前一句口如眉。佛祖從來總不知。

為甚麼如此。

此是科家。重審上義。因其扁舟已過。白雲萬里。下文伸答。

毗婆尸佛早留心 直至而今不得妙

言此菩提心。自過去毗婆尸佛。至釋迦牟尼佛。以心傳心。佛佛授受。西天四七。東土二三。至今不斷。謂之傳心。端的此心。有何傳受。可謂。少林九年。垂一則語。直至而今。諸方賺舉。故云。不得妙也。

問處孤高答處深 妙圓真淨不須尋

瞥然如是知端的 默契菩提大道心

此四句。頌經文之義也。問處孤高者。即須菩提所問。云何應住。今既發菩提心。便要修菩提行。然後成菩提道。欲修此行。未知以何諦。安住即是。又問欲修菩提行。十使煩惱妄念之心。於一剎那頃。有九百生住異滅。相續不斷。以何等法降伏妄心。如此二問。其實孤高也。答處深者。佛答應如是住。如是降伏其心。乃全體顯露。如即真如之理。是即允許之辭。三諦真如之理。三諦融通。應當稱理而修。方纔許是。世尊答此。兩個如是。其實深也。妙圓真淨者。明問處甚深。答處微妙。顯密圓融。真實清淨之道。故云。妙圓真淨也。不須尋者。指示行人。向佛答處會取。再不須別處尋求也。瞥然如是者。明須菩提。向佛兩翻答處。就知端的。默識心通。領其旨趣。即得契合菩提大道也。

阿彌陀佛元無相 遍界明明不覆藏

文潞尚然修淨土 東坡猶願往西方

前二句。明阿彌陀佛。不住有為。不住無為。故云無相。遍界明明者。言彌陀法身。周遍法界。無有覆藏也。後二句者。引古勸今也。文潞公姓文。諱彥博。守洛陽。嘗致齋。往龍華寺。瞻禮聖像。忽見像毀墮地。略不加敬。但瞻視而出。傍有僧曰。何不作禮。曰像毀矣。吾何禮乎。僧曰。先德道。譬如官路土。人取以為像。智者知是土。凡人謂像生。後乃於行時。還將像填路。像本不生滅。路亦無新故。公聞之有省。蓋悟無生之生。幻相宛然。生之無生。真性湛然。無生法忍。自然契矣。由是慕道專念彌陀。期生淨土。晨香夜坐。未嘗少廢。每發願曰。願我常精進。勤修一切善。願我了心宗。廣度諸含識。每見一切人。則勸念佛。誓結十萬人緣。同生淨土也。如居士讚曰。知君膽氣大如天。要結西方十萬緣。不為一身求活計。大家齊上渡頭船。東坡者。姓蘇。名軾。字子瞻。號東坡居士。宋元祐初。除翰林。遷內翰。初參東林總禪師。與論無情話有省。遂獻投機偈曰。溪聲盡是廣長舌。山色無非清淨身。夜來八萬四千偈。他日如何舉似人。公謫黃州。又謫惠州。仍被命遷儋州。南行之日。攜阿彌陀佛像一軸。人問何故事。答曰。往生西方公據也。時作者咸曰。東坡篤信無疑。實淨土之果人也。母夫人程氏歿。以簪珥遺物。命工胡錫。畫彌陀像。自製贊曰。佛以大圓覺。充滿十方界。我以顛倒想。出沒生死中。云何以一念。得往生淨

土。我造無始業。本從一念生。既從一念生。還從一念滅。生滅滅盡處。則我與佛同。如投水海中。如風中鼓囊。雖有大聖智。亦不能分別。願我先父母。及一切眾生。在在為西方。所遇皆極樂。人人無量壽。無去亦無來。然先生云。既以一念生。還從一念滅。生滅滅盡處。則我與佛同。此同金剛三昧經云。因緣所生義。是義滅非生。滅諸生滅義。是義非生滅。然東坡四句。與經符合。可謂冥契佛心者矣。

纔出胞胎又入胎 聖人觀此慟悲哀
幻身究竟無香潔 打破畫瓶歸去來

纔出胞胎者。五母子經云。時一沙彌。七歲出家得道。自識宿命。而笑曰。故我一身。令五母悲惱。為第一母子時。鄰家亦生小兒。與我同年。然我命短。母見隣子即悲惱。為第二母子時。天命早亡。母若見人乳兒。即為悲惱。為第三母子時。十歲而亡。母見人兒類我食時。即為悲惱。為第四母子時。少年先死。母見同輩娶妻。即為悲惱。為第五母子時。七歲出家。我母憶念。即為悲惱。故云。纔出胞胎又入胎也。聖人悲哀者。見六道眾生。妄念不止。輪迴不息。故慟悲哀也。幻身究竟者。因幻化而成。有七種不淨。一種子不淨。此姪慾身。從無明貪愛。煩惱為種子。二愛生不淨。此身從父母。赤白滴和合。托識其中。三住處不淨。此身處母胎。生臟之下。熟臟之上。四食噉不淨。在母胎中。唯食母血。五初生不淨。此身產時。與血俱出。臭穢狼籍。六舉體不淨。此身薄皮之內。膿血徧一切處。七究竟不淨。此身死後。胖脹爛壞。骨肉縱橫。狐狼食噉也。今言此身。從生至究竟。無有香潔。所以大覺璉云。屎尿渠膿血聚。筭來有甚風流處。九孔常流不淨坑。六門盡是狼籍鋪。打破畫瓶者。昔有一初果人。托陰有昏。不知宿命。後納一妻。房事無休。夫出遠行。素供一僧。忽來。問主在否。曰。不在。僧欲迴。婦留齋。向僧具訴上事。僧曰。但向他道。汝須陀洹人。太甚貪之。如此三說。夫聞之宿命即通。遂乃愧乎。從此止息。晏坐不臥。妻却怨恨曰。厭汝頻繁。孰言止息。夫言汝不知道。我知道了。妻每問此。夫必此答。妻會父母共問此。夫亦如此答。夫以畫瓶。令妻抱持云。汝若能知此中何物。吾便依汝。妻遂愛惜如寶。一時偶失足撲落地。渾身糞穢。妻甚嫌惡。夫曰。吾識破汝。亦如畫瓶。其妻省悟。遂捨紅塵。歸向佛道。故云。打破畫瓶歸去來也。

大乘正宗。指示叮嚀。空生意分明。如是應住降伏其心。

此科昭明太子。判此一段經文。為大乘正宗分第三。此經以菩提心。是大乘中之正宗。蓋佛教菩薩六度。令一切眾生滅度。故立此名。指示叮嚀者。言佛重重切囑之義。前分言應如是住。如是降伏。此又言應如是降伏其心。故云叮嚀也。空生意分明者。言須菩提蒙佛叮嚀。其意開廓分明。以大乘菩薩。六度圓修。三觀一體。普令含識。皆證菩提涅槃也。如是應住者。此科佛告須菩提。諸菩薩摩訶薩。應如是降伏其心。此中不言安住。單言降伏者。既是降伏妄心。必然安住大乘。即是真心者也。

四生六道。無我無人。誰歸滅度。拈來却在心。

此科經中。所有一切眾生之類也。四生者。即胎卵濕化也。六道者。即天。人。阿修羅。地獄。鬼。畜生也。無我無人者。此科如是滅度無量無邊眾生。實無眾生得滅度者。何以故。須菩提。若菩薩。有我相。人相。眾生相。壽者相。即非菩薩。科主意云。既四生六道。無我人等四相。即是不顛倒心。誰歸滅度。了生佛一如。即是常心。故云。拈來却在心。即第一義心也。故慈氏頌云。廣大第一常。其心不顛倒。是也。

獨坐寂寥寥 平地起波濤 風來波浪起
水漲見船高

前二句。言大乘正宗。所顯涅槃妙心。生佛具足。本無滅度。故世尊前來。收衣宴坐。故云獨坐寂寥寥也。平地起波濤者。因善現啟請。世尊應機而訓云。菩薩應如是。降伏其心。所有一切眾生之類。我皆令入無餘涅槃。即是平地起波濤也。風來波浪起者。科家意云。波浪因風而起。此大乘正宗涅槃妙心。因問而有說也。故云。水漲見船高也。

○大乘正宗分第三。

【經】佛告須菩提諸菩薩(至)眾生相壽者相即非菩薩。

註曰。此言大乘正宗者。以九類生。悉入涅槃。故為此經之宗也。佛於此。招告當機。菩薩如是降伏其心者。言降伏見思二惑。塵沙煩惱之妄心也。所有一切眾生之類者。一切者。是總標也。眾生者。是別列九類眾生也。凡有生者。皆謂之眾生。上至諸天。下自蠢動。不免乎有生。故云。一切眾生也。眾生雖無數無邊。不過九種。下文所言是也。若卵生者。如大而金翅鳥。細而蟣虱是也。若胎生者。如大而獅象。中而人者。小而貓鼠是也。若濕生者。如魚鼈龜鼃。以至水中極細虫是也。若化生者。經云。如上而天人。下而地獄。中而人間。米麥果實等。所生之虫皆是也。上四者。謂欲界眾生也。若有色者。色謂色身。謂初禪天。至四禪天。諸天人但有色身。而無男女之形。已絕情欲矣。此之謂色界也。若無色者。謂無色界諸天人也。此在四禪天之上。唯有靈識。而無色身。故名無色界也。若有想者。此謂有想天。諸天人也。以天人唯有想念。不復有色身故也。自此以上。皆謂之無色界也。若無想者。此謂無想天。諸天人也。在有想天之上。此天人。一念寂然不動。故名無想天也。若非有想。若非無想者。此謂非想非非想天諸天人也。此天。又在無想天之上。其天人。一念寂然不動。故云非有想。然不似木石。而不能有想。故云非無想。此天。於三界諸天。為極高。其壽為極長。不止八萬劫而已。我皆令入涅槃者。我者佛自謂也。如來指示。三界九地眾生。各有涅槃妙心。令自悟入無餘涅槃。而滅度者。言滅盡習氣。度生死海。同證圓滿清淨涅槃也。如是滅度。乃至實無眾生得滅度者。言九類生。雖業果不同。無非自業緣而生。故實無此眾生也。此菩薩發心化之。而得涅槃。實無一眾

生入涅槃者。以本無眾生故也。言第一義中無生可度。即真常心也。若見可度。即生滅心也。良由一切眾生。本來是佛。何生可度。可謂。平等真法界。佛不度眾生也。何以故者。明上實無眾生得滅度者所以也。若菩薩有我相等者。是佛招告當機。如菩薩。心存四相。未能直下頓空。即非菩薩。以有能所故。同於眾生者哉。

涅槃清淨。盡令含識歸依。四相俱忘。實無眾生滅度。如斯了悟。便能脫死超生。其或未然。依舊迷封滯殼會麼。

涅槃者。即圓滿清淨。真常湛寂之理也。佛令菩薩。應如是降伏其心。運以慈力。令一切九類含識之眾生。悉令歸向涅槃。故云我皆令入涅槃也。四相者。即我人眾生壽者。即四顛倒也。今以大乘。離四相四顛倒。故云。四相俱忘也。四相既無。無生可度。無佛可成。何滅度之有哉。可謂隨順眾緣無罣礙。涅槃生死等虛花也。如斯了悟者。科家意云。行人如此了悟我人等四相。無涅槃滅度之執。豁然大悟。便能超出二種生死。證大涅槃也。其或未然者。其或於此四相。不能了達。依舊被無明之所封蔕。生死胎殼之所纏縛也。會麼者。審察也。如上所言。會麼不會也。

生死涅槃本平等 妄心盡處即菩提

此二句。是伸答上義也。果能會得真常之道。生死涅槃。元無異體。菩提妄想。悉是假名。可謂。癡愛成解脫真源。貪嗔運菩提大用。妄想興而涅槃現。塵勞起而佛道成也。

頂門具眼辨來端 眾類何曾入涅槃
絕後再甦無一物 了知生死不相干

此四句。頌經中之義也。頂門具眼者。言。佛具爍迦羅金剛正眼。能照一切諸法。皆悉空寂。以空寂故。諸法平等。能辨善現來例端由。世尊付囑諸菩薩。護念諸菩薩。應如是住。如是降伏。此是辨來端之義也。眾類何曾者。世尊又於此理上。指出一條活路云。菩薩應如是降伏。所有一切眾生。令入涅槃。又云。實無眾生得滅度者。故云。眾類何曾入涅槃。絕後再甦者。此明實無眾生得滅度者。謂之絕後再甦。無有一物。無涅槃可入。無生死可出。方是了知生死不相干之地。可謂。撒手到家人不識。更無一物獻尊堂也。

七重寶樹人人有 九品蓮花處處開
不涉一程親見佛 圓音時聽悟心懷

此四句。言唯心淨土。本性彌陀也。七重寶樹。九品蓮花者。即極樂世界之境也。人人有。處處開。乃直指蓮邦而不遠。只在當人也。不涉一程者。此明自性彌陀不離方寸。唯心淨土豈向外求也。圓音時聽者。不但只是見佛。又能時時聽法。可謂。松風澗水琅琅語。盡是潮音與梵音。此無情說法之義也。

擲却閻浮似草鞋 更無一物可開懷
靈明一點輝千古 超日光歸去來

此四句頌。歎世勸人也。閻浮草鞋者。言眾生貪著五欲等種種之樂。如一隻破草鞋相似。最為鄙賤。五欲之中。無有一物。可作開懷為樂之法也。靈明一點者。此這一點靈明。輝天鑑地。耀古騰今。全超威音之前。獨步劫空之後。可作開懷之法。明超日月之光。故云。超日月光歸去來者也。

妙行無住。日月分明。本體離根塵。四維上下。朗耀無窮。

此科昭明太子。判此一段經文。為妙行無住分第四。言菩薩所行之行。於一切法。心無住著。故云妙行。不即不離。故曰無住也。日月分明者。呈上妙行無住。已達三輪體空。謂施者受者。及所施物。悉皆如空。如此指示。似日月光。甚是分明也。本體離根塵者。此之妙行。不住六塵。不著六根。內外根塵。皆悉空寂。故云。本體離根塵也。四維上下者。此科菩薩。不住相布施。其福德不可思量。所施之福。稱理而周。猶如虛空。四維上下。朗然明耀。無窮無盡。不可思量者矣。

世尊指教。一一分明。空生信受。鶯來處處春。

此科世尊指教。即指教菩薩。無住相布施。但應如所教住。當依佛教。行無所住。必得悟入。故云。一一分明也。空生信受者。即領荷之辭。菩薩既不住相布施。不著六塵。其福猶如虛空。法法皆為布施。塵塵盡是菩提。故喻如鶯來處處皆春。那裏不是發生之處。所以云。色自色兮聲自聲。新鶯啼處柳烟輕。門門有路通京國。三島橫斜海月明也。

摩訶般若宗 性相體皆同 四生并六道
盡在默然中

摩訶般若者。指此大般若智為宗也。性相者。即性相二宗。於此般若事理雖殊。同一法界真心。故云體皆同也。四生并六道者。明四生六道。從一法界真心變現。而有十法界之異也。故云。盡在默然。心體之內也。

○妙行無住分第四。

【經】復次須菩提菩薩於法(至)菩薩但應如所教住。

註曰。此分大意。言菩薩行施。於法不生執著。謂之妙行。於五塵等法。其心不住。謂之無住也。復次者。此乃敘經。明佛再說也。亦乃連前起後之辭耳。於法應無所住者。此明菩薩行布施之時。皆應無住。不見我為能施人。不見他為受施者。不見中間有物可施。三輪體空。謂之無相布施也。何以故者。此徵問之義。佛答須菩提。若菩薩不住相布施。其福德不可思量。又云。東方虛空可思量不者。佛乃引喻證法也。四方四隅上下。總為十方。佛問十方虛空。可思量不。須菩提答。不可思量。佛所以借此虛空無邊。喻所行布施稱理而周。故所獲功德。亦不可思量也。佛又云。菩薩但應如所教住者。此誠勸菩薩。當如佛所教。而安住於大乘也。傳大士頌曰。若論無相施。功德極難量。行悲濟貧乏果報不須望。凡夫情行劣。初且略稱揚。欲知檀狀貌。如空遍十方。

住相布施。猶日月之有窮。不著六塵。若虛空之無際。自他俱利。福德難量。

科家意云。布施有二種。有拙施。有巧施。此住相布施。人天受福。福盡還墜三途。以有為之法。必有窮盡。如日月有出有沒。故云有窮也。謂之拙施。可謂。住相布施生天福。猶如仰箭射虛空也。不著六塵者。此明不住六塵之相。謂之巧施。若十方虛空無有邊際。不住相布施亦無邊際也。自他俱利者。此明菩薩無住明布施。心無取著是自利。亦是理觀也。能行布施。廣濟貧乏。是利他。亦是事觀也。二事兼行。故云。福德難量也。

豁然運用靈通。廓爾縱橫自在。且道還有住著處麼。

運用靈通者。明菩薩。運用施度。通於五度。即戒。忍。進。禪。智。故云靈通。外則不著六塵內。觀六度圓修。故云。廓爾縱橫自在也。且道者。科家徵問前義。上來既是如此。這裡還有住著處麼。到頭霜夜月。任運落前溪。

妙體本來無處所 通身何更有蹤由

此二句。答前無住所也。妙體者。明此真心之體。已絕色相之形。謂之體妙。從本已來元無處所。有名呼不得。無位可安排。通身者。明法身無相。徧界絕蹤。可謂通身無向背。徧界不曾藏。傳大士曰。有物先天地。無形本寂寥。能為萬象主。不逐四時凋。

運心檀度契真常 福等虛空不可量

無影樹頭花爛熳 從他採獻法中王

此四句。頌經義也。初句。明菩薩行施。以般若大智。運一檀度。攝後五度。智度論云。一念之中能行六般若波羅蜜。故云。契真常也。福等虛空者。果能六度圓修。三諦齊運。如空性無際。施福無邊。故云。不可量也。無影樹者。無影樹。喻真諦。花爛熳。喻俗諦也。採獻法王者。行人果能真俗併用。此是大乘圓修之法。從他採獻般若法王。可謂。法中王。最高勝。恒沙諸佛同共證者哉。

步步頭頭皆是道 彌陀元不住西方

法身徧滿三千界 化佛權為十二光

此四句。是科家指示行人。斯道不可心外別求。步步踏著實地頭頭頂掛虛空。皆是其道也。彌陀者。此明自性彌陀。不在西方可。謂一句彌陀有悟由西方不向外邊求。頭頭盡是歸家路。了了方知不用修。法身徧滿者。此理徧滿世界。總是一箇法身。何勞妄起知見。分別淨穢也。化佛者解難釋疑。有難云。既是一箇法身。如何又有十二光佛名號。故答意云。雖有十二光佛不同。亦是化佛權為也。十二光佛者。無量壽佛。無量光佛。無礙光佛。無對光佛。炎王光佛。清淨光佛。歡喜光佛智慧光佛。不斷光佛難思光佛。無稱光佛。超日月光佛。總是一佛。所化也。

道過邛山古墓排 淮陰功業事堪哀

貧富貴賤皆如夢 夢覺來時歸去來

此四句偈。嘆貴賤如夢也。道過邙山者北邙山在河南洛陽。皆前代天下官員。命終皆葬於此。新墳舊塚。遍地排列。行人路過此山。嗟而自嘆。似淮陰侯韓信。功高天下。位至王侯。當得常在世間。永享榮華則可。何故今朝亦葬於此。惟伴一堆土塚而矣。故云事堪哀也。後二句。總嘆意云。不獨韓信一人如此。就是貧者。上無片瓦根椽蓋覆。下無卓錫之地容身。富者。家有四海之地寶有千庫之盈。貴者。三公之位。萬鍾之祿賤者。使作傭賃。奉侍尊長。雖貴賤差別不同。總是一個無常大夢也歸去來者。乃科家誠勉。令人向夢中醒悟覺世浮花。放下萬緣單提一念。觀想彌陀。同登淨土。故云歸去來。

如理實見。分明說破。空生意如何。

此科昭明太子。判此一段經文。為如理實見分第五。此言不以身相見佛者。此名稱理之見。理本無見。以無見之見。名為實見也。分明說破者。言佛說若見諸相非相。即見如來。是佛分明說破了矣。不曾隱藏也。空生意如何者。此科佛問須菩提。於意云何。可以身相見如來。不。言前分中。說無住相布施。是成佛之因。恐善現執著疑佛果是有為身相。故佛問云。可以三十二相身。見如來法身不。不者。乃不定之辭也。

地水火風。四大和合。雲來雲去。本更無他。漚生漚滅。元非一與多。

此科須菩提。答佛之義。世尊不可以身相得見如來。何以故。如來所說身相。即非身相。佛告須菩提。凡所有相。皆是虛妄。若見諸相非相。即見如來。此言須菩提。悟佛問義。故答。不可以身相見如來。科家意云。身相者。地水火風。和合而成。故喻如雲去雲來。漚生漚滅。即是凡所有相。皆是虛妄也本更無他者。言法身無相。元非一又非異。不墮於諸數。即是若見諸相非相。即見如來也可謂。雲去雲來天本淨。華開華謝樹常存。

如如真妙理 湛湛自然觀 圓明真實見
隨處得安然

言如如者。即事即理。故稱之為如如也。真妙理者。即法身無妄之理矣。亦本覺真心。即般若實相也。湛湛自然觀者。喻法身非相。湛寂凝然。萬境雖殊。真心無異。故云。自然觀也。圓明真實見者。行人若能於佛所說。凡所有相皆是虛妄。若見諸相非相。若能於此。真實見得此理。所以處處即得安然。可謂。姪房酒肆尋彌勒。滿目青黃更是誰。一切世法無非佛法。一切煩惱總是菩提也。

○如理實見分第五。

【經】須菩提於意云何(至)若見諸相非相即見如來。

註曰。此分經義。明稱理真實。而見法身也。因前分中。以無相布施求成佛之因。恐善現起疑。執佛果有為身相。認為法身。佛乃呼須菩提。而問之云。可以三十二相。見如來法身。不。須菩提悟佛問義故答云不也。又白世尊云。不可以身相得見如

來。須菩提意云。色身即有相。法身即無相。今言身相者。即地水火風。假合而成也。法身者。即無形段相貌。故答云。不可以身相見也。何以故者。徵問前義。言須菩提自問。何故不可以身相見如來。乃自答云。如來所說身相。非是真實。應緣而現。故云即非身相。謂無有真實身相也。佛告者。是佛招告須菩提。印可之義。不但如來身相是虛妄。乃至十法界諸相皆然。故云。凡所有相。皆是虛妄。若見諸相者。佛恐須菩提。聞說虛妄。離相別求真佛。故云。若見諸相非相。了相體本空。即見如來可謂。無明實性。即佛性。幻化空身即法身。法身覺了無一物。本元自性天真佛傳大士曰。如來舉身相。為順世間情。恐人生斷見。權且立虛名。假言三十二。八十也空聲。有身非覺體無相乃真形。

金身顯煥。巍巍海上孤峰。妙相莊嚴。皎皎星中圓月。

此科。可以身相。見如來之義也。讚佛相好。微妙莊嚴。可謂。身色如金山。端嚴甚微妙。如淨瑠璃中。內現真金相。者矣。

然雖如是。畢竟非真。經云。真非真恐迷。我常不開演。

此科。凡所有相。皆是虛妄之義也。科家意云。然雖金身顯煥如此。是應化之身。約法身上。畢竟非真也。真非真恐迷者。此言凡夫。錯認八識為真理。楞嚴經云。陀那微細識習氣成瀑流。真非真恐迷我常不開演。論云。阿陀那識甚深細。一切種子如瀑流。我於凡愚不開演。只恐分別執為我。溫陵曰。梵語陀那華言執持。謂執持根身種子。起現行故。即第八阿賴耶也。含藏種子為習氣。積生識浪為瀑流。湛由是分。結由是起也若以為真。恐迷妄習而自誤。以為非真。恐迷自性而外求。故權小教中。不開演也。

且道。意在於何。

此是科家。徵問之義也。既云身相非真畢竟如何即是。下文伸答。顯露而矣。

一月普現一切水 一切水月一月攝

此二句。真妄不分。心境一體也。意云色身不離法身。法身不離色身也。一月普現者。言一月喻法身。一切水喻萬境。故法身遍在一切境上。優曇頌曰。境智如如絕證修。更無間事滯心頭。情盡見除消息斷。一輪明月掛中秋。所以道。以一統萬。一月普現一切水。會萬歸一。一切水月一月攝。

報化非真了妄緣 法身清淨廣無邊

千江有水千江月 萬里無雲萬里天

此四句。頌經義。經云。凡所有相皆是虛妄。故云。報化非真也。問云。既報化非真。何必用耶。答云。雖分報化元一法身也。因機有妄緣分別。故有報化之應若了妄緣。元一清淨法身。何有分別之說也。千江有水千江月者。呈初一句。機喻千江。月喻法身有水此月皆現。實非天上真月。故云。報化非真了妄緣也。萬里無雲者呈第二句。法身清淨廣無邊也。

人命無常呼吸間 眼觀紅日落西山
寶山歷盡空回首 一失人身萬劫難

前二句。嘆人命不久留。時不可待。後二句。引喻勉人。不可錯過也。人命無常者。如朝存夕亡。剎那異世。故喻如紅日落山。須臾便沒。寶山歷盡者言人從無。量劫。得個人身。如須彌山。輥芥投針相似。今此身。喻如一座寶山。有人於此寶山中。若取寸草焚向爐中。烟氣到處土木瓦石。樓臺殿閣悉作黃金。因名為寶山。既是經過遊歷此山。不可空手而歸。若不取一草一葉歸家。可謂癡人矣。喻人不以此身。修戒定慧。不但空迴。又恐一失人身。萬劫難復者也。

稽首彌陀真聖主 身乘七寶紫金臺
四十八願常無間 攝受眾生歸去來

前二句言能禮之機起觀。觀所禮之佛。故稽首而禮。佛身相好寶座莊嚴。佛身乘七寶金臺。一一觀想分明瞻禮。此名俗諦禮也。後二句。言四十八願者佛因中。曾發此願攝受眾生。佛為能攝。機為所攝。以佛因中發願。故果上不捨因門。願云。若有眾生稱我名號。禮我形像。不生我國者我決不成佛。故云。因該果海。果徹因源也。

正信希有。一念無差。心外休取法。心若取法。凡聖皆差。

此科昭明太子。判此一段經文。為正信希有分第六。蓋如來滅後。後五百歲。信解受持此經者。名為希有也。一念無差者。若能於一切法不信。唯信般若。名為正信。名為希有。故云。一念無差也。心外休取法者。此言三界唯心。萬法為識。性宗云。出真心外。無片事可得。又云。未達境唯心。起種種分別。達境唯心已。分別即不生。若能如此。豈肯心外求法也心若取法者。言四聖六凡。各有取著之執故雖一理。所證有差。若無取著。有何差別。此明若心取相。則著我人。若取法相。亦著我人。故云。凡聖皆差也。

心若無念。却被雲霞。圓明一點。春來樹樹華。

此科。若取非法相。即著我人。眾生壽者。行人。若執著非法相。一向執空都無一法。名為無事界。成斷滅空無。乃無想天之種類。故云。即被雲霞也。可謂不見一法存無見。大似浮雲遮日面。不知一法守空知。還似太虛生閃電。圓明一點者。此科是故不應取法。不應取非法之文。言。行人到此。已破人法二執。證二空之理。不生偏見。雙眼圓明圓則無不包容。明則無不照徹。若識得此一點圓明之心。如春普至大地生輝。故云。圓明一點。春來樹樹華也。

邪心俱蕩盡 正信勿生疑 念念無差別
處處發真機

邪心蕩盡者。即前第四分中。菩薩行施不著六塵。第五分中。無相見法身佛。故名邪心俱蕩盡也。正信者。即此第六分中。唯信般若。名為正信。於前無住布施。無相見佛。心不生疑。故云勿生疑也。念念無差者。行人已證人法二空。心無四相。凡

聖無差。故乃念念無差。處處真機發現矣。

○正信希有分第六。

【經】須菩提白佛言。世尊(至)如是言說章句生實信不。

註曰。此分之名。為正信希有分。以須菩提。聞前無住行施。即是因深無相見佛。即是果深。既談因果。切恐如來滅後。末法惡世之中。迷鈍眾生。得聞如是言說章句。心生疑惑不能生信。故發此問。望佛決疑。令生實信者哉。

【經】佛告須菩提莫作是說(至)能生信心以此為實。

註曰。莫作是說者。言佛恐壞末世眾生。實信之心。故且告之。以莫作是說。我滅度後後五百歲。即二千五百年後。當末法惡世之時。若有人。修戒定慧三學者。於此般若章句。能生信心。以此為實也。

【經】當知是人於一佛二佛(至)無法相亦無非法相。

註曰。當知是人者。即指末世眾生能信此法。不於一佛二佛等。種諸善根。必於無量諸佛所。種諸善根也。聞是章句。乃至一念生信者言此眾生聞是大乘般若章句。一念生淨信者。信此般若能除煩惱。能成出世功德。如來以五眼六通悉知悉見。是諸眾生得無量福德。何以故者徵審前義。是諸眾生。無復我相等者。此人已離四相人執。證人空理也。無法相亦無非法相者。此人已破法執。證法空理也。既證人法二空。方於般若生信者焉。

【經】何以故是諸眾生(至)即著我人眾生壽者。

此文返釋前義。前來人法二空。即能生信。此即未離人法。不能生信也。若心取相等者。心起妄念。執著四相。即是人執也。若取法相。非法相者。執心外有法。故著四相。即是法執也。此人於般若章句。必不生信也。

【經】是故不應取法(至)法尚應捨何況非法。

註曰。是故者。總結上義。以是之故不應取法。是遣法執之情。不應取非法是遣空執之情。有無俱遣。語默兩忘。信心清淨也。以是義故者乃指上文。所言之義也。佛常謂。汝等比丘。當知我之說法。如船筏之譬喻。未得渡河須借船筏。既渡之後竟當捨却。汝等比丘亦復如是。未悟真性須借佛法。既悟之後佛法當捨。佛法向當捨去。何況凡夫。外道之法。猶當捨去也。傳大士頌曰。渡河須用筏。到岸不須船。人法知無我。悟理豈勞詮。中流乃被溺。誰論在二邊。有無如取一。即被汙心田。

因勝果勝。信心明了無疑。人空法空。真性本來平等。直饒名相雙泯。取捨兩忘。要且猶存筏見。嘆。

因勝者。即前四分中無住行施。不著六塵也。果勝者。即前五分中。無相見佛也。信心明了者。即此六分中。信此因勝果勝。於般若章句。明了無疑也。人空者。即無四相人執也。法空者。即無不取法相等。之法執也。真性平等者。行人若能。於一切諸法不著。可謂。了達諸法實性本來平等。也名相雙泯者。人執有人空名相。法執

有法空名相。此二雙泯也。取捨兩忘者。取於善法。捨於非法。此二兩忘也。要且猶存筏見者科家意謂。佛說。我之說法。如筏之喻。法尚應捨。何況非法。佛雖能所兩遣猶有遣遣之情尚存。故云。猶存筏見也。咦。此是科家。當人不讓之義。此喝掃踪滅跡。掃去世尊筏見可謂。眼中撥去黃屑。觸處縱橫鳥道玄也。

彈指已超生死海 何須更覓渡人舟

此二句。答上文之辭也。言世尊說法。如筏之喻渡人。科家把住猶存筏見。此答出不存之意。故云。彈指已超生死海。何須更覓渡人舟。此是不涉修證。不立階級。不施一功成就楞嚴之夫定。不披一字。徧覽普眼之真經。四句之義頓融。百非之路杳絕也。

善根成熟信無疑 取相求玄轉背馳
一念頓超空劫外 元來不許老胡知

前二句。依經。解義也。言此眾生。於無量千萬佛所。種諸善根。薰習成熟。今聞此經信解受持。而心無疑惑也。取相求玄者。若是善根不具。取著人空之名相。法空之名相。執著四相。而欲求玄妙之理。轉求轉遠。轉逾背馳也。後二句。以衲僧巴鼻一念頓超空劫那畔。無佛無祖。那個道理。不可心思不可言議。故云。不許老胡知。可謂發迦不出世。四十九年說。達磨不西來。少林有妙訣。

頻伽尚能知歸向 孔雀猶聞得化生
時節因緣休蹉過 樓頭畫鼓恰初更

前二句。指出異類尚能念佛。往生淨土也。宋元祐間。長沙郡人養鸚鵡鳥。俗呼為八八兒。偶見僧念阿彌陀佛。隨口稱念。旦暮不絕。因與僧久之鳥亡。僧具棺葬。俄葬之處。見青蓮華一枝。掘出。其根從鳥舌根中生出。頌曰。有一靈禽八八兒解隨僧口念阿彌。死埋平地蓮花發。我輩為人豈不知。樂土本無三惡道。禽聲渾是佛宣流。當機未盡眾生界。啼斷春風卒未休。又頌。鸚鵡頻伽繞樹鳴。妙音和雅正堪聞。殷勤不斷緣何事。曲為勞生昧己靈。後二句。勸人不可蹉過時光也。懈怠耕者經云。有一耕夫見佛行過。心中雖喜不去禮佛。或謂何不禮佛。乃曰。耕田未竟。種又未下。若要見佛須待閒暇。佛告阿難。佛難值遇。懈怠如此。斯人已蹉過六佛不得度者。非但今日也。科家意云。有等不精進人。正與此耕夫一般。善人勸云。何不念佛便推托云。因衣食故。終日忙忙未暇念佛。科家道。縱汝晝忙夜豈忙乎。故云。樓頭畫鼓恰初更。此時間靜。正好念佛。若不肯念。只是懶惰。豈非蹉過者哉。

勢至觀音悲滿懷 寶瓶楊柳灑三灾
誓隨淨土彌陀主 接引眾生歸去來

此四句菩薩悲心。勸修淨土也。大勢至菩薩。乃於恒河沙劫前有佛名超日月光佛。彼佛教我念佛三昧。以念佛心。得無生忍。今於此界攝念佛人。歸於淨土也。觀世音菩薩者。於無數恒河沙劫。有佛出世。名觀世。音如來。我於彼時。發菩提心。彼

佛教我。從聞思修。入三摩地。初於聞中。入流亡所。所入既寂。動靜二相。了然不生。忽然超越世出世間。今我身成三十二應。入諸國土教化眾生。彼佛授我。觀世音號也。悲滿懷者。此二菩薩。以四無量盈滿其懷。普化懷生也。寶瓶楊柳者。是二菩薩之器用也。三災者有大小不同。大三災者。至一大劫盡火燒初禪。水滄二禪。風刮三禪也。小三災者。至一小劫盡。刀兵疫病饑饉也。菩薩以不思議神力。能以柳頭一滴之水。徧洒三災。故云。紫竹岳阿。觀世音九蓮池畔現童真。楊枝一點天甘露。散作山河大地春。又云。慧日破諸暗。能伏災風火後二句。菩薩本願也。悲華經云。彌陀於恒河沙劫前。有轉輪王。名無諍念王。有大臣。名曰寶海而生一子。出家成道。號寶。藏佛入定放光照十方國。光中現無量淨穢國土。王見是已發願云。願我成佛時。國中無三惡道。皆真金色。種種莊嚴。佛告王言。汝於西方過一恒河沙阿僧祇劫。是時世界轉名安樂汝當作佛。號無量壽如來。第一太子不眴號觀世音。第二太子尼摩。號大勢至。是以二大菩薩。皆承往昔誓願。依隨彌陀聖至。而接引眾生。往生淨土。菩薩受記經云。德藏菩薩句佛言。觀世音。大勢至。二大士。於何國土。成等正覺。佛言。阿彌陀佛。正法滅後。觀世音成等正覺。號普光功德山王如來。彼佛國土。號曰。眾寶善集莊嚴。入涅槃後。得大勢。即於其國成等正覺。號善住功德寶王如來。劫國教化。皆悉無二。此三聖同垂金臂。接引眾生。皆生淨土者矣。

無得無說。誰為安名。空生意分明。如來所說。無始無終。

無得無說者。此科昭明太子。判此一段經文。為無得無說分第七。蓋以須菩提答佛之問。無有定法得阿耨菩提。無有定法可說。故名無得無說也。誰為安名者。此科。佛問菩提有得耶。佛法有說耶。須菩提領解佛意。即安箇名。為無得無說也。空生意分明者。此科。佛問須菩提。於意云何。如來得阿耨多羅三藐三菩提耶。如來有所說法耶。此問。佛恐須菩提起疑云。前說無相見佛。如何樹下成道也。無法可說。何故四十九年說法也。故發此問。須菩提言。如我解佛所說義。無有定法得菩提。無有定法可說。此是空生意分明處也。如來所說無始無終者。此科。佛問有得有說。正顯無得無說之理。故云。無始無終也。意云。通三際而無始無終。括十方而無邊無際。乃清淨法身無為之理也。

雲生晚谷。月照長空。千法萬法。皆從一法生。

此乃分明指出。無得無說之理。如雲生晚谷堪對暮雲歸未合。遠山無限碧層層。長空雲掃。明月獨輝也。千法萬法皆從一法者。此科。一切賢聖。皆以無為法而有差別之。義言四聖六凡。十法界差別之法。皆從一無為理而生。可謂千途盡向於彼生萬法皆從於此出。洞千古之淵源。造萬像之模則。

取捨皆難得 無心體自然 本來常寂寂
無說亦無傳

此四句。明經中無得無說之理。故佛說得阿耨菩提。則有取有捨。所以難得也。無心者。言須菩提。答佛之問。無菩提可得。無佛法可說故云無心體自然也後二句。歎美之辭其實菩提之道。本來寂寂。無說無傳。也可。謂有口說不。得無言心自明。
○無得無說分第七。

【經】須菩提於意云何(至)皆以無為法而有差別。

註曰。此分之義。妨疑而問。向說不可以身相見佛。恐須菩提起疑云。既非身。相見佛。云何釋迦樹下得道。諸會說法耶。此分佛順疑以問之。言菩提有得。而意顯無得也。言佛法有說。而意顯無說也。故名無得無說分。佛問須菩提。於意云何。如來得菩提耶。如來有所說法耶。須菩提言。如我。解佛所說義者。言空生領解佛旨。乃云第一義中。無有定實之法可得。無有定實之法可說奈以根器有利鈍。學性有淺深。隨機設教。對病用藥。但不執著自契中道。豈有定法可說也。何以故者。徵問前義也。如來所說菩提之法。皆不可取。即無得也。不可說。即無說也。非法者。此法為眾生而設。非有真實之法。故云非法也然亦假此法。開悟眾生。又不可全謂之非法。故云非是非法也。總釋上文。無定法之義也。所以者何者。此乃釋呈上文。不可取。不可說。非法非非法也。意謂。一切賢聖所證者。即不可取。不可說。無為之理也。而有差別者。蓋於無為法。得之淺者。則為賢人。若須陀洹之類是也。於無為法。得之深者。則為聖人。若佛與菩薩是也。此所以有差別也。傳大士頌曰。菩提離言說。從來無得人。須依一空理。當證法王身。有心俱是妄。無執乃名真。若悟非非法。逍遙出六塵。

得亦非。說亦非。能仁機輪電掣。取不可。捨不可。空生舌本瀾翻。且道無為法。為甚麼有差別。

此文。言菩提之道。得也。不是。說也不是無有定法今世尊。說箇菩提有得。正顯無得。說個佛法有說正顯無說。可謂。世尊說法之機輪。如長空電掣相似。東湧西沒。無有定止也。須菩提言。如來所說法。不可取。不可說。可謂舌本瀾翻。如海口鼓浪。航舌駕流相似。所以舌上起風雷。眉間藏血刃也。且道無為者。此是科家出手眼。令人詳審。既是一無為理。如何又有差別也。

萬古碧潭空界月 再三撈漉始應知

此二句。答上問辭。明無為中。有差別所以。如萬古碧潭空界月相似。月印澄潭光水不分。看時似有。取之則無。愚者不知水中撈取。枉費工夫徒勞無益。以喻無為中。差別之道。理事難分。心境不二。欲言其有不見其形。欲言其無聖以之靈也。可謂。昭昭於心目之間。相不可覩。晃晃於色塵之內。理不可分也。

雲捲秋空月印潭 寒光無際與誰談
豁開透地通天眼 大道分明不用參

前二句。言一色晴空。明月獨朗。喻菩提之道。無得無說。如心月孤圓。光吞萬像。光非照境。境亦非存也。後二句。指示行人。正恁麼時。祇須著眼不可錯過。若於此境此時。豁開通天正眼。豈非大道分明。無得無說。不用參詳也。故寒山云。吾心似秋月。碧潭光皎潔。無物堪比倫。教我如何說。

西方勝境無明暗 不比人間夜半深
五鼓分明當子位 一輪正滿對天心

前二句。言西方境界勝妙。無有晝夜明暗。以菩薩之人。各有身光。故不屬明暗也。不比此娑婆國土人間。有晝有夜也。後二句。形容無明無暗。不比人間所以。夜六時都與子時一般。晝六時都與午時一般。故云當子位也。一輪正滿者。言晝夜常明。無有明暗也。對天心者。即午時者矣。

休插龍釵與鳳釵 莫將胭粉汗唇腮
法身清淨元無垢 體露堂堂歸去來

此四句。單誠女人情好莊飾不知法身本淨也。初二句。言龍釵鳳釵。頭上之莊飾。脂粉面門之莊飾。意云。如此莊飾。雖是美好。要且不常辰莊午變。少壯則老也。可謂玉帶暫時華。金釵非久飾。張翁與鄭婆。一去無消息。後二句。指出法身本淨。不假莊飾。亦無老少。不遷不變。不更不改。描之不成。畫之不就。本來現成。法身清淨。元無垢染。萬劫不壞。千古常存。故云。體露堂堂歸去來也。

銷釋金剛科儀會要註解卷第三

銷釋金剛科儀會要註解卷第四

姚秦三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

依法出生。法法皆真。元從一法生。四生六道。情與無情。

此科昭明太子。判此一段經文為依法出生分第八。蓋一切諸佛。及阿耨菩提。皆從般若經。大智理中出生。故云。依法出生也。法法皆真者。既從真如理中。流出佛果菩提。則一切有情無情。法法具真理。言諸法攬理而成。故法法皆是真理。可謂。出真理之外。無片事可得也。元從一法生者。言諸佛法身。及所證菩提。無不從此般若一理而生。故般若稱為諸佛之母。皆依般若而修。乃得成佛也。四生六道者。此釋上文。法法皆真。從一法而生之義。言四生六道。即六凡也。四聖含於其間。情與無情。即三世間也。

山河大地。體露分明。泥牛吸水。黃河徹底清。

山河大地體露分明者。呈前法法皆真之義即總含四法界也。可謂。若人欲識真空理。心內真如還徧外。情與無情共一體。處處皆同真法界也。泥牛吸水者。前文依教而說。此中教外別談。宗門以泥牛木馬表正位中事。此言泥牛吸水。顯正中有偏。從體起用。以無說中。而有說也。黃河徹底清者。此水本渾。却言能清。表偏中有正。攝用歸體。以有語中而無語。妙在體前。可謂。海底泥牛銜月走。岩前石虎抱兒眠。

山河如掌平 無壞亦無成 千差與萬別

金剛界內生

此四句。言經中一切諸佛。及阿耨菩提法。皆從此經流出所以。初二句。言無情世界。雖有山高河下之異。於般若理上無一無別。故云。如掌平也。縱山有崩裂。水有枯竭。於般若理上。亦無成壞也。後二句。呈前之義。總言十法界之相。雖有千差萬別不同。其實從一法界真心建立。故云。金剛界內生。可謂。眾生見劫盡。大火所燒時。我此土安隱天人常充滿。此言金剛界內。無有成壞之相也。

○依法出生分第八。

【經】須菩提於意云何(至)所謂佛法者即非佛法。

註曰。此分名依法出生分。然依般若法。出生佛果菩提也。如來於此。招告當機。須菩提於意云何。佛意欲顯無為之福。先將有漏之福。問於善現。若人以滿三千世界。盡是七寶以用布施所作得之福德。其福德寧為多不。下文須菩提乃答云。甚多世尊。善現謂。大千七寶。寶多福勝。故曰甚多也。何以故者。自徵問甚多之義。是福德者。即事福也。即非福德性者。非般若福德種性。不能成就菩提。此但住相布施。唯成有漏之因。只得人天福報也。是故如來說福德多者。於世間事福。乃云多也。佛

又招告須菩提言。若復有人。於此經中。此經者。指此般若人人俱有。箇箇周圓。上至諸佛。下及螻蟻。亦具此經。即妙圓覺心是也。無物堪比。有人於此經中。受持四句偈等。受者。直下承受。持者。時時行持。更為他人分別解說。其福勝彼。七寶布施之福。只得人天有漏之報。此言四句之偈。以少況多。四句功德既云無邊。況一經功德豈可思議者哉。言其因經悟性。四句現前。福等太虛。歷劫不壞。只至成佛。永無退轉。故云其福勝彼。可謂爭似無為實相門。一超直入如來地是也。古今論四句偈者不一。各執己見。初無定論。但依銅碑記云。天親菩薩昇兜率宮。請益彌勒。如何是四句偈。彌勒云。無我相。無人相。無眾生相。無壽者相是也。何以故者。佛意自徵自釋。招告善現。何故於此經。受持四句。為人。講說。所得福德勝於大千世界七寶布施也。佛乃自答云。一切諸佛。及所證菩提等法。皆從此經出。言此經之功。極大無窮非指此一經文字語言。乃指實相般若之心也。所謂佛法者。佛於此再呼須菩提。而告之。所謂佛法者。乃指上文。所謂阿耨菩提法也。佛恐人泥著。此佛法。故云。即非佛法也。非是真實有此佛法。乃假名為佛法而已。蓋謂佛法本來無有。唯假此法。以開悟眾生耳。如來所說佛者。令人覺也所說法者令人悟也。若不覺不悟執取心外佛法者即非佛法也。傳大士頌曰。寶滿三千界。寶持作福田。唯成有漏業。終不離人天。持經取四句。與聖作良緣。欲入無為海。須乘般若船。

寶滿三千。財施有盡。偈宣四句。法施無窮。發生智慧光明。流出真如妙道。

寶滿三千者言財施潤眾生之身。無飢寒苦。得歡喜樂。只是人間天上之福。為有漏之果福盡墮落。依舊沉淪。故云。有盡可謂住相布施生天福。猶如仰箭射虛空也。偈宣四句者。言法施潤眾生之心。令聞法者。心生歡喜見性明心。超凡入聖得證菩提。聽者既證菩提。說者豈不成道。故云法施無窮也。發生智慧光明者。此釋呈上文。法施無窮所以。言聞法之人。發生本有智慧光明。又能向自性中流出真如妙道。故經云。一切諸佛及阿耨菩提。皆從此經出也。

所以稱揚德勝。了達性空。徹諸佛之本源。豁一經之眼目。還見四句親切麼處。

所以稱揚者言佛告須菩提。稱揚能持四句功德。勝彼七寶布施之福。言持經得見自性。聞法乃證菩提。發生智慧光明。流出真如妙道。又能了達自性本空真心清淨。爾得洞徹十方諸佛根本之源。豁開一經之眼目。即指經中般若智為眼目也。還見四句者。此是科家徵問之辭。發明四句親切之義。此中自問。下文自答也。

真性洞明依般若 不勞彈指證菩提

此是科家。答上親切之義也。言真性洞明者。行人果能洞達明了真性。必依般若大智修持。速證菩提。此言不勞彈指者。般若即一心也。豈心外又有菩提可證。故云。不勞彈指證菩提。可謂彈指圓成八萬門。剎那滅却三祇劫。

徒將七寶施三千 四句親聞了上根

無量劫來諸佛祖 從茲超出涅槃門

初句。頌財施有盡以七寶布施人天受福。還有墮落也。次句。頌法施無窮。上根之人聞四句義。心離四相證我空理。直至成佛永無退轉。故云。四句親聞了上根也。後二句。呈前法施無窮。從上佛佛祖祖。見性得道。皆因法施證入涅槃。可謂。十方薄伽梵。一路涅槃門。

慧燈不滅魔難入 智鏡常明夢不侵
堪嘆浮生瞌睡漢 從他萬劫恣昏沉

前二句。警行人以智慧。破內外惑也。言慧燈不滅者以法相宗中。因位名慧。言慧能揀擇。故於地位中。善能揀擇。大小性相邪正真妄諸法一一揀擇分明。以慧治內惑。以燈能破外暗。使外魔不能入。內魔不能侵。可謂慧燈不滅也。智鏡常明者。法相宗中果位名智。以智能決定。故法身本智。如大圓鏡。內外洞明。無不照徹。故云。智鏡常明。幻妄之夢不侵也。後二句。讚歎一切眾生。不悟本有智慧。被無明煩惱蓋。覆。終日冥冥不覺不知。故云瞌睡漢也從他萬劫者既不明此智慧。從劫至劫。生死永沉。往來六道。流轉無窮。何止萬劫而已哉。故云。從他萬劫恣昏沉也。

頭髮焦然乾竹釵 兩肩擔水又擔柴
一生貧賤多辛苦 厭惡女身歸去來

此四句。形容女人身為苦器。盖有三監。五障。不得自在。又有如此。貧窮下賤。逼迫身心。何不早念彌陀。捨此貧窮困苦之身生於淨土極樂之界。此娑婆世界不但女人有如此苦。盡三界二十五有六道眾生天有五衰之苦。人有八苦交煎。何啻兩肩擔水擔柴之苦耶。若生西方永離八苦。無諸惡道。但受諸樂。直至成佛。永無退轉者矣。

一相無相。本自如然。不在口宣傳。五果四向。誰後誰先。

此科昭明太子。判此一段經文。名為一相無相分第九。盖四果人。雖有差別不同。同證一實相之理。實相者。無相也。本自如然者。本來自具真如妙理也。不在口宣傳者。其實此真如妙理。口欲談而詞喪。心欲緣而慮忘。理圓言偏言生理喪也。五果四向者。即五不還果也。是第三果阿那含人。居五淨居天。斷惑有五種那含果也。四向者。即第四果人。離四向證四果也。誰後誰先者。言五果四向人。有利鈍不同斷惑出三界。利根者。先斷先證。鈍根者。後斷後證也。

絲毫不掛。萬法周圓。圓明彌滿。無心照大千。

此論前來五果四句。有先後。有利鈍。斷惑出三界證四果差別不同也。今言絲毫不掛。似最上頓宗。了萬法本空。真心本淨。無惑可斷無果可證。故云萬法周圓。似真如徧於萬法故法法周備。圓滿具足也。圓明彌滿者。此喻本有真心靈光獨耀。如中秋月。普照十方。可謂。一點靈明通宇宙。那分西竺與曹溪。

五果并四向 本體元無相 兩目不相似
鼻孔都一樣

五果者。即五種那含果也。四向者。即四果阿羅漢向。向者。往也。將往四果出三界也。本體元無相者。雖五果四向差別不同。以真如本體理上。元來無相也。兩目不相似者。呈前五果四向。從凡至聖。修證階級各各不同。如人兩目。左右必不相似。一般也。鼻孔一樣者。言所悟真理。實然不異。故云。鼻孔都一樣也。

○一相無相分第九。

【經】須菩提於意云何(至)色聲香味觸法名須陀洹。

註曰。此分之義。敘得果之疑因也。從上無為法。不可取說而來論云。向說無為法不可取說。云何聲聞各取自果。如證而說也。此下顯斷疑之義。蓋四果雖差別不同。同證一實相理。故云。一相無相也。梵語須陀洹。華言入流。佛於此招告當機。須菩提。於意云何。佛恐四種羅漢。不知以無念為宗。尚萌所得之念。故設問告之云。須陀洹能作是念。我得須陀洹果不。意云。汝能作。得果得道之念不。須菩提答之云。不也。言不作。得果之念也。須菩提復向佛說。須陀洹人所得之實。故稱世尊。何以故者。乃徵問之辭。以何意故。名須陀洹。此人名為入流。言得入聖人之流斷三界八十八使見惑。離四趣生。證初果位。故云入流也。而無所入者。言此人。心無所得之念。不入六塵境界。斷除人我執著之相。以無取心。契無得理。故名須陀洹也。傳大士頌曰。捨凡初入聖煩惱漸輕微。斷除人我執。初始證無為。緣塵及身見。今者乃知非。七返人天後。趣寂不知歸。

【經】須菩提於意云何(至)而實無往來名斯陀含。

梵語斯陀含。此云一來。即第二果阿羅漢也。佛於此招告當機。須菩提於意云何。佛恐於所得果上心有所得之念。故設問告之於汝心意云何。斯陀含能作是念。我得斯陀含果不。佛意云。汝能作。得果得道之念不。須菩提答之云。不也。言我不作。得果之念。須菩提復向佛說。斯陀含人所得之實。故再稱世尊。何以故者。徵問義。以何意。故名斯陀含。此斯陀含者。名一往來。蓋以欲界有九品思惑。前六品已斷。後三品未斷。更須於欲界。一往天上受生。一來人間受生。不復再來人間也。而實無往來者此人證無為果時。而心無所得。不見有往來之相。故名斯陀含也。

【經】須菩提於意云何(至)而實無不來名阿那含。

梵語阿那含。此云不來。即第三果阿羅漢也。佛於此招告當機。須菩提於意云何。佛恐此人。於所得所證。心有執取之念。故設問告之云。阿那含能作是念。我得阿那含果不。佛意云。汝能作得果得道之念不。須菩提答之云。不也。意云。我不作所得之念。須菩提得向佛言。阿那含人。所得之實。故稱世尊。何以故者。自徵問義。以何意。故名阿那含。此阿那含名為不來。蓋此人。於欲界思惑已斷。更不來欲界受生。故名不來也。而實無不來者。此人已悟人法俱空。心無所得。而實無不來之相。故名阿那含也。

【經】須菩提於意云何(至)即為著我人眾生壽者。

梵語阿羅漢華言殺賊。名含三義。其一殺煩惱惑使。其二後報不來。其三應受人天供養。又名無學。以三界內見思煩惱已盡。究竟真理。無法可學。故名無學。即第四果阿羅漢也。佛於此招告當機須菩提於意云何。此阿羅漢能作是念。我得阿羅漢道不。佛恐此人。心有所得之念。故問云。汝能作。得道得果之念不。須菩提答之云。不也。意云我不作得道之念。須菩提復向世尊說。無所得之實。故再稱世尊。何以故者。自徵問義。以何意故名阿羅漢。此阿羅漢。實無有法。名阿羅漢。此人自初果。至四果。皆因證此無為之體。實無有法可取可捨。既無取捨。境智俱亡。豈有得果之心。我心既空。無得道念。故名阿羅漢。須菩提又稱世尊。若阿羅漢作是念。我得阿羅漢道。即著我人眾生壽者。意云。若阿羅漢。於道有得。於法有取。作得道之念。有所得之心。即我相未除。是凡夫。行則著我人眾生壽者也。

【經】世尊佛說我得無諍三昧(至)我是離欲阿羅漢。

此言須菩提。再稱世尊云。佛說我得無諍三昧。人中最為第一。是第一離欲阿羅漢者。乃是善現明佛先許。我得無諍三昧。言無諍者。一念不生。諸法無諍也。梵語三昧。此云正定。離諸邪定故也。人中第一者。言得此無諍。精妙之處。於諸弟子中。最為第一也。然善現所證之果。不過無學。而世尊獨稱第一者。以無諍故也。第一離欲者。以三界煩惱貪心。即名為欲。以善現微細四相。皆以滅盡。愛染不生。故云。離欲阿羅漢也。世尊我不作是念者。須菩提復向佛說。無所得之念。故再稱世尊。我不作是念。我是離欲得道果者。以須菩提。外不取離欲之名。內不執所得之果也。

【經】世尊我若作是念(至)而名須菩提是樂阿蘭那行。

此明須菩提恐大眾不知去所得心。是以啟咨世尊。至於再四。我者。即須菩提自稱也。我若作是念。我是得道得果阿羅漢。世尊則不說我須菩提。是樂阿蘭那行者。梵語阿蘭那。此云無諍。我若作是念。世尊則不應。記我無諍之行。最為第一。以我須菩提實無所行。蓋以心無所得。離三界欲。證四果法。得無諍三昧。方受須菩提名。所以佛許須菩提。是樂阿蘭那行者。傳大士頌曰。無生即無滅。無我復無人。永除煩惱障。長辭後有身。境亡心亦滅。無復起貪瞋。無悲空有智。憫然獨任真。

人天往返。諸漏未除。道果雙忘。無諍第一。超凡入聖。從頭勘證將來。轉位回機。透底盡令徹去。委悉麼。

人天往返者。言初果人。七生天上。七生人間斷三界八十八使見惑盡方證初果。言二果人。一生天上。一生人間。斷欲界五趣雜居地中。前六品思惑盡。方證二果。言三果人。一往天上。斷欲界後三品思惑盡。方出欲界再不來欲界受生。方證三果。居五不還天。斷後八地中。七十二品思惑盡。方出三界。故云。人天往返也。諸漏未除者。言六根發識。六塵牽引。皆為漏也。凡夫漏於有為。二乘漏於無為菩薩漏於中道。今正言初果。二果三果及四果。阿羅漢。雖斷三界內。見思二惑得出三界。已是

漏在界外。尚滯偏空。墮於無為。故云。諸漏未除也。道果雙忘者。言阿羅漢。已斷見思二惑。證無為理。遣去得道得果之執。方稱無諍第一之行。故云。道果雙忘。無諍第一也。可謂。迷悟到頭俱莫戀。眼中金屑無難留。超凡入聖者。言初果至於四果。無諍三昧。阿蘭那行。謂之從頭勘驗次第。皆是斷惑證果而來也。轉位回機者。此科家拈情意云。阿羅漢雖是從凡入聖得證無為。住在二乘。灰心泯智。捨有趣無。精進研窮。滅受想定。須要轉去二乘之位。回滯小乘之機。於此發菩提心修菩薩行。謂之轉位回機。將前滯小之意盡令透底徹去纖毫不存可謂。眼中撥盡黃余屑。觸處縱橫鳥道玄。還委悉麼者。乃科家審問之辭。要人著眼也。似我如上所說。汝諸人會麼。下文伸答是也。

勿謂無心云是道 無心猶隔一重關

此二句。是同安察禪師。頌心印偈中。末後兩句。科家引來比無心之義。言初果不入六塵。不著聖流無心也。二果不著往來之相。無心也。三果不著不來之相。無心也。四果不著有無之相。無心也。涅槃經云。阿羅漢已離子縛。以因中為子。即八十一品思惑。故得無心也。無心猶隔者。此阿羅漢果縛猶存。執涅槃果。有苦依身在。有說涅槃之苦。依著法身故隔一重關也。故大論云。二乘雖破三毒煩惱。不了了盡。如香在器中。香雖去而餘氣猶存。若乳母衣。久故垢著。以淳灰水洗淨。雖無有垢。而垢氣猶存。此喻二乘。既有餘習。故謂之隔關也。

果位聲聞獨善身 寂然常定本非真

回心頓入如來海 倒駕慈航逆渡人

前二句。行容二乘行相。如獐獨跳。不顧本羣。唯能自利。不能利人。所以獨善其身也。雖是寂然常在定中。非是大乘真實之道。無餘涅槃。故云非真也。後二句。指示大乘真實之道。謂二乘人。回小向大。發菩提心。行菩薩行。回二乘人趣寂之心。頓入如來妙覺果海也。從妙覺海。倒駕慈航逆流而出。即返入塵勞。分身九界。興慈運悲。廣利有情。故云。逆渡人也。

樓頭畫鼓五更闌 爭奈眾生被眼瞞

不見性天光燦燦 但於夜後黑漫漫

此四句。明大地眾生從晝至夜。只貪世事。不明真性。眼被色牽。耳隨聲轉。鼻舌身意亦復如是。闌者盡也。言五更之闌。謂五更將盡而天明也。眾生被眼瞞者。言眾生。盡此一夜。只貪睡眠。及至日間。又被色轉。不知日用見聞。皆是當人自性。所以被眼瞞也。後二句。謂被眼瞞之義。不見性天者。言世人。只知貪眠見色。被物所迷。不知見色即是見心。聞聲即是聞性。所以不見性天之道也。但於夜後者。既不明性天之道。只管向外馳求。迷頭認影。如處長夜夢寐莫曉。故云。夜後黑漫漫者矣。

極樂國中真快樂 永無八難及三災
常聞天樂空中響 敢勸眾生歸去來

此四句。歎西方境勝。令人歸向也。初句。言生西方人。蓮華化生。思衣得衣。思食得食。無生死苦。無憂悲苦。故曰快樂。可謂稱身瓔珞隨心現。盈器酥醃逐念來也。次句。言彼國眾生。無諸眾苦。即八難三災也。八難者。一地獄難。二餓鬼難。三傍生難。四盲聾瘡癰難。五世智辯聰難。六佛前佛後難。七北拘盧洲難。八無想天難。故云八難也。三災者。大三災。即水火風也。小三災。即刀兵疫病饑饉也。淨土無有此苦。故云。永無八難三災也。三句。言彼佛國土常作天樂。又云。彼佛國土微風吹動。諸寶行樹及寶羅網。譬如百千種樂。同時俱作。故云。天樂空中響也。四句結頌。乃是科家慈心太切。既是淨土如此之樂。娑婆如此之苦。我今普勸汝等眾生。急早念佛。同歸淨土。優曇頌曰。老來死至怎生醫。樂土風光誰得知。到者同名無量壽。因從此界念阿彌。故云。敢勸眾生歸去來也。

莊嚴淨土。錦上添花。徒勞任算沙。然燈昔日。授記無差。

此科昭明太子。判此一段經文。為莊嚴淨土分第十。蓋菩薩以清淨心。不住六塵。均修萬行。莊嚴法身淨土。故名莊嚴淨土也。錦上添花者。言此法身淨土。人人本有。如錦相似。菩薩復假萬行莊嚴。如錦上添花。乃是稱性莊嚴淨土也。徒勞任算沙者。此是科家。與人拈情。恐人向莊嚴處認著。既是法性本有淨土。何假莊嚴。故云。徒勞任算沙也。然燈昔日者。如佛問須菩提。如來昔在然燈佛所。於法有所得不。須菩提答云。於法實無所得。佛言。如是如是。以實無有法可得。是故然燈於我授記。汝於來世。當得作佛。科家意謂。似此實無有法可得。方是於理。無有差錯也。可謂。分明不受然燈記。自有靈光耀古今。

因風吹火。末後拈華。誰人會得。迦葉便笑他。

此科因然燈授記。而言無法可得。故云因風吹火。所以世尊末後拈華。做做成風也。誰人會得者。此言世尊。既因然燈授記。無法可得。所以末後拈華。誰人會得。唯有迦葉破顏微笑。會得無說無傳。本有之道。所以便笑他也。

莊嚴生淨土 金粟眼中沙 初生全泄漏
末後又拈華

前二句。拈情也。莊嚴生淨土者。前來有為教中。菩薩以六度萬行。為莊嚴法身淨土。佛恐須菩提。執著實有莊嚴。故問云。菩薩莊嚴佛土不。此須菩提。即以大乘理答之云。莊嚴淨土者。即非莊嚴是名莊嚴。此明自性之土。不在莊嚴。自性無相。量等虛空。如何莊嚴也。佛又云。菩薩生清淨心。不著六塵。應無所住。而生其心。方是莊嚴淨土。科家意云。須菩提。雖然稱理莊嚴。還有此莊嚴之念。所以云。金屑雖貴。落眼成塵。故云。金粟眼中沙也。初生全泄漏者。此是科家。把住世尊之義。言真淨界中。本無諸佛出世。今生梵宮。已是漏泄真機。謂初生時。周行七步。目顧

四方。一手指天。一手指地。天上天下。唯吾獨尊。古德云。指天指地語朗朗。送語傳言出畫堂。使者尚能多意氣。主人應是不尋常。此貶傳言送語。漏泄真機。故云。初生泄漏也。末後拈華者。言佛住世四十九年。談經三百餘會。即是應機而說。至理本來無言。所以末後拈華。迦葉微笑。世尊云。吾有正法眼藏。涅槃妙心。付囑迦葉。汝善流布。勿令斷絕。此明拈華。雖顯無言之道。爭奈付囑。已落第二門頭。豈非漏泄也。

○莊嚴淨土分第十。

【經】佛告須菩提於意云何(至)於法實無所得。

註曰。此分之名。為莊嚴淨土分者。以菩薩修六度萬行。布施戒定慧等。一切善法。皆名莊嚴。外不染六塵。內無我人相。不著斷滅。故名淨土也。時佛於此招告當機。須菩提於意云何。於汝心意如何。又云。如來昔在然燈佛所。於法有所得不。此乃佛恐須菩提。疑佛因中。昔受然燈之記。於法實有佛果菩提所得。故與此問也。須菩提向佛答云。不也。世尊。如來在然燈佛所。於法實無所得。意云。於般若真空理上。實無所得之法也。傳大士頌曰。昔時成善慧。今日號能仁。看緣緣是妄。識體體非真。法性非因果。如理不從因。謂得然燈記。寧知是舊身。

【經】須菩提於意云何(至)即非莊嚴是名莊嚴。

佛於此招告當機。須菩提於意云何。菩薩莊嚴佛土不。佛意。恐須菩提起疑。前來既言法不可取。云何諸菩薩。以修六度萬行。取莊嚴淨土耶。故佛問之。汝謂菩薩修行六度莊嚴。欲取佛淨土不。須菩提自答云。不也世尊。意云。不取相莊嚴。佛土。故稱世尊也。何以故者。乃是自徵之義。以何意故。菩薩不取相莊嚴佛土。又答云。莊嚴佛土者。即非莊嚴。是名莊嚴。須菩提意云。此莊嚴佛土者。謂菩薩修六度萬行。造寺寫經。布施供養。此是著相有為莊嚴。故云。即非莊嚴也。若菩薩。心常清淨。不向外求。任運隨緣。一無所得。行住坐臥。於道相應。故云。是名莊嚴佛土也。傳大士頌曰。掃除心意地。名為淨土因。無論福與智。先且離貪瞋。莊嚴絕能所。無我亦無人。斷常俱不染。顯脫出囂塵。

【經】是故須菩提諸菩薩(至)應無所住而生其心。

是故者。乃結上起下之辭也。以前文云。菩薩於法實無所得。又不取相莊嚴佛土。以是之故。佛再告須菩提。諸菩薩摩訶薩。應如是生清淨心。佛意勸勉菩薩。應當如是。生真如無染清淨之心也。下文。顯生清淨心。所以不應住色者。即不住六塵境。是生清淨心也。應無所住者。即不住六塵。不住善惡。不住凡聖。不住生死涅槃等也。而生其心者。即是諸佛清淨心體。不生不滅。不增不減。盡十方世界。獨露此一箇真心也。

【經】須菩提譬如有人(至)佛說非身是名大身。

梵語須彌盧。此云妙高。以此山四寶所成。曰妙。獨出眾山。曰高。又名山王者。謂在眾山之中。故稱王也。佛以此為喻。故招告須菩提言。譬如有人。身如須彌山王。於意云何。是身為大不。佛意。以人身高大。如須彌山。實無此理。謂之非喻而喻。比況真性無相。色裹太虛。雖須彌山。不足比其高大。故託大身。所以為問。故云。是身為大不。須菩提答之云甚大。以須菩提。深悟佛義。遂有甚大之對。故再稱世尊也。何以故者。乃自徵之義。以何意故。名之為大。又恐大眾未曉。重為辯之曰。佛說非身是名大身。言非身者。即法身也。真心也。以謂法身。心量廣大。等虛空界。無形無相無可比類。方名大身。傳大士頌曰。須彌高且大。將喻法王身。七寶齊圍遶。六度次相隣。四色成山相。慈悲作佛因。有形終不大。無相乃為真。

如來續焰然燈。實無可得之法。菩薩莊嚴佛土。應無所住之心。諸妄消亡。一真清淨。

如來續。焰者。即釋迦因中為善慧仙人。獻華於然燈佛。證無所得法。然燈佛授記云。汝於來世當得作佛。號曰釋迦。故云。續焰然燈。實無所得之法也。菩薩莊嚴者。菩薩以無所住心。不住六塵。生清淨心。莊嚴法身淨土也。諸妄消亡者。即不染六塵。諸妄消亡。唯顯一真清淨無染之道也。

昔究法華妙旨。親感普賢誨言。清淨身心。安居求實。冥符奧義。豁悟前因。直得心法兩忘。根塵俱泯。且道莊嚴箇什麼。

此是科家。舉自證驗他也。言我昔究法華妙旨。至八百身功德處經云。得清淨身。如淨瑠璃。眾生喜見。其身淨故。三千大千世界眾生。生時死時。上下好醜。生善處惡處。悉於中現。於此有疑。然後作觀思惟。親感普賢菩薩誨語云。汝有身心在。未得身根清淨。科主於是。清淨身心。安居靜室。復起觀智以求實相。忽然有省。冥符經中奧義也。豁悟前因者。即科主自悟前世之因也。心法兩忘者。此明豁悟前因所以也。直得心忘四相。法忘二執。內根不生。外塵自泯也。可謂。心是根。法是塵。兩種猶如鏡上痕。痕垢盡時光始現。心法雙忘性即真也。且道莊嚴者。乃科主徵問之義。竟云。既是心法兩忘。又莊嚴箇什麼。可謂。虛空無面目。何用巧粧眉也。

彈指圓成八萬門 剎那滅却三祇劫

此二句。以顯大乘圓頓境界。初發心時便成正覺。於一念之間。頓成佛道。不經三阿僧祇劫而修。當下圓成八萬法門佛事。可謂。爭似無為實相門。一超直入如來地矣。

正法眼中無所得 涅槃心外謾莊嚴
六座空寂無人會 推倒須彌浸玉蟾

前二句。頌如來受記然燈。以正法眼藏涅槃妙心。佛佛授受。祖祖相傳。不立文字。名為教外別傳。雖有傳而無法可傳。雖有授而無法可受。故云。正法眼中無所得也。既是正法眼中。無有所得之法。即今涅槃心外。謾說莊嚴淨土也。此言即心之道

。心外無法。可謂。有燈堪照世。無法可傳人也。後二句。牒經文義。經云。應如是生清淨心。不應住色聲香味觸法生心。既是不住六塵。却是六塵空寂。顯出涅槃妙心。爭奈無人領會。如推倒須彌相似。玉蟾即月之別名。以日月遶須彌行。故有晝夜之隔。今言推倒須彌。日月同處。不分晝夜。亘古常明。既是天上之月常明。水中玉蟾亦常浸也。境喻六塵。既是空寂。涅槃妙心常顯。即心即境。寂照不分。故云。推倒須彌浸玉蟾也。

百歲光陰一剎那 凌晨淨口念彌陀
看經讀誦無休歇 必免當來過奈河

此四句。歎時光易度。剎那不停。何不念佛看經。禮佛行道。堅持一念之真。勿逐六根之妄。必免當來不墮三途。可謂。誦一卷經通身慶快。念千聲佛滿口光明。

造論弘經大辯才 馬鳴龍樹及天台
圭峰乃至清涼老 總勸西方歸去來

造論弘經者。即馬鳴龍樹。各造諸部之論。弘大乘經也。天台。圭峰。清涼。弘宣大乘諸部經典也。皆具戒定慧。有大辯才也。馬鳴菩薩。依楞伽經。勝鬘經。密嚴等經。而造起信論。佛性論。寶性論。以弘諸大乘經。而起信論中。其末結歸曰。復次眾生。初學是法。欲求正信。其心怯弱。以住於此娑婆世界。自謂不能常值諸佛。懼謂信心難可成就。意恐退者。當知如來有勝方便。攝護信心。謂以專意念佛因緣。隨願得生他方佛土。常見於佛。永離惡道。大論云。此菩薩道成劫。號大光明佛。今乃助化。示居八地。父名盧伽。母名瞿耶。又名功德日菩薩也。龍樹菩薩。乃依八部般若及諸空宗經典。而造大智度論一百卷。中論四卷。十二門論一卷。亦弘大乘經也。入楞伽經。佛告。大慧汝當知。善遊涅槃後。未來世當有。持於我法者。南天國土中。大明德比丘。厥號為龍樹。能破有無宗。世間中顯我。無上大法寶。得初歡喜地。往生安樂國。後造大智度論。中云。佛是無上法王。諸大菩薩為法王臣。諸臣所尊者。唯佛法王。是故菩薩。應當念佛也。後曇鸞法師。一夕室中。見梵僧謂曰。吾龍樹也。居淨土久矣。以汝同志。故來相見。鸞曰。何以見教。樹曰。已去不可及。未來未可追。現在今何在。白駒難以回。言訖不見。曇集眾念佛而終也。天台智者大師。製造法華玄義二十卷。涅槃疏。金光明疏。天台止觀。及四教儀。淨土十疑。拆攝二門。師於新昌大石像前告滅。弟子請問生方。曰吾諸善友。皆從觀音而來迎我。及夜見有佛至。臨終說諸法門。令唱無量壽經。及觀經題目。及顧大眾合掌讚曰。四十八願。莊嚴淨土。華池寶樹。易往罪人。火車相視。一念改悔尚得往生。況戒定慧熏修。聖行道力。實不唐捐。言訖稱三寶名。安然而滅。後有僧求知生方。乃夢觀音金容數丈。智者從後而告僧曰。汝心有疑。決不得生。故知智者。已生西方決矣。信不誣哉。圭峯。釋經造疏鈔。亦勉入念佛。求生西方。清涼國師。製造華嚴疏鈔。百有餘卷。普賢菩薩。教善財發十大願。清涼曰。若有行人。於此大願。受持讀誦。是人

命終。一切諸根。悉皆壞散。一切親眷。悉皆捨離。一切威勢。悉皆是失。唯此願王。不相捨離。於一切時。引導其前。一剎那中。即得往生極樂世界。到已即見阿彌陀佛。生蓮華中。蒙佛授記。言於十方世界。以智慧力。隨眾生心。而為利益。不久當坐菩提道場。成等正覺。拔彼眾生。得生彼國。總十有四頌。皆勸念佛往生淨土也。

無為福勝。四句堪誇。如塵比數沙。住相布施。凡聖皆差。

無為福勝者。此科昭明太子。判此一段經文。為無為福勝分第十一。以持經功德。顯般若智能出生佛果菩提之法。故名無為得福勝也。四句堪誇者。以持經四句功德。勝前七寶布施功德。故云堪誇也。如塵比數沙者。此科如恒河中。所有沙數寧為多不。須菩提答言甚多。以此喻有為布施福多也。住相布施者。此科佛說以沙數七寶。布施於人。得福雖多。乃是住相有為人天之福。未出有為。福盡墮落不免輪迴。故云凡聖差也。

無來無去。月照簾下。無根樹子。常開四季華。

此科若人於此經中。受持四句偈。為他人說。而此福德。勝前大千世界七寶布施之福。以持經見性成佛永無退轉。所以無來無去無生無滅。此顯般若真空無為之道。如月當天。光通玉戶。千江普應。一月無虧。故云。無來無去。月照簾下。可謂。家家門掩蟾蜍月。處處鶯啼楊柳風也。無根樹子者。此明般若真智。無形無相。如無根樹子。常開四季之華。可謂。枯木花開。漏出先天境界。冷灰豆爆。衝開鼻祖玄關也。

四句絕堪誇 河沙數漸多 算來無一法
靜處娑婆訶

前二句。牒持經功德最勝。故云。四句絕堪誇也。若人能持四句之功德。勝過恒河沙布施之福德。故云。河沙數漸多也。後二句。科家恐人。聞四句福勝。於此執著。故與拈情。雖四句功德。勝過七寶布施之功。若以真空理上算來。無有一法可得。不如有人。於寂靜處。受持一娑婆訶功德。速到彼岸也。梵語娑婆訶。此云速疾到彼岸矣。

○無為福勝分第十一。

【經】須菩提如恒河中(至)而此福德勝前福德。

註曰。此分經文。佛欲顯無為福勝。故先以恒河沙數等恒河。問之云。須菩提。如恒河中所有沙數。如是沙等恒河。乃至寧為多不。此恒河者。正云殑伽河。此翻云從天堂來。周圍四十里。佛多近此。以取為喻。蓋因眾人而所常見。故取為譬喻也。然佛以此恒河沙數等恒河。問於須菩提寧為多不。欲使先悟此沙之多數。然後以持經之四句。比之猶多。故乃問之也。須菩提領解佛義。答云甚多。世尊。但諸恒河尚多無數。何況其沙。意云。以恒河中沙數。一沙即為一河。是諸河中。各有其沙。河尚無數。何況其沙也。佛乃復告當機。須菩提。我今實言告汝。若有男子女人。以七寶

。滿爾所恒河沙數。三千世界。以用布施。得福多不。佛乃重顯無為之福。勝有為之福也。前第八分中。以大千世界七寶布施之福問之。此分。以恒河沙數大千世界。七寶布施之福。問之云。得福多不。佛意。重顯持經是無為福。倍倍轉勝也。須菩提答之云。甚多。世尊。佛告須菩提。若男子女人。於此經中。乃至受持四句偈等。為他人說。而此福德。勝前福德。佛意。受持此經四句之偈。即自見性。得證菩提。又為他人。講演解說。教人見性。成無上道。永出輪迴。高超三界。所以勝過前來。以恒河沙數七寶布施之福。蓋謂有相福德。未出三界也。智者頌曰。恒河數甚多。沙數更難量。舉沙齊七寶。能持布施漿。有相皆為幻。徒言智慧強。若論四句偈。此福永為長。

滿積恒沙七寶。周回布施三千。福德分明。因果不昧。能宣四句之偈。勝前萬倍之功。用真智以照愚。如急流而勇退。且道。退後如何。

前四句。牒經文之義也。以滿積恒河沙世界七寶。布施於人。此但受人天之福。未出有漏。修有漏因感有漏果。故乃福德分明。因果不昧。先標喻文。後以法合也。後四句。顯受持此經於人宣說四句之偈功德。勝前七寶布施功德。萬倍之多也。用真智者。此形容持經功德勝之所以。此言持經。以顯真智。當人自性也。照破愚惑。如明來暗[冰-水+射]。智起惑亡。故云照愚也。如急流勇退者。喻眾生心內。雜思妄惑。如急流之水相似。若是行人。大智現前。妄惑勇退也。且道退後者。此是科家自徵問義。向下伸答是也。

象踏恒沙徹底過 大千沙界百雜碎

此二句。答上問之義也。教中有兔馬象。三獸渡河之喻。兔喻聲聞。浮水而過。馬喻緣覺。入水而過。象喻菩薩。徹恒河底而過。河喻真空之理。三人雖悟一理。見有深淺。此金剛經。窮諸法底蘊。若大乘菩薩。用真智以照愚。如急流而勇退。直得諸法皆空。大千粉碎。可謂。一人發真歸源。十方虛空悉皆消殞也。

重增七寶滿恒沙 如棄甜桃覓苦瓜

豁悟真空元不壞 百千三昧總虛花

此四句。總是拈情也。前二句。以世界七寶。布施於人。是有為福。不能見性。如棄甜桃覓苦瓜相似。後二句。直指本源。若是行人。受持此經。悟真空理。元來不壞。此真空者。即實相真空。不同斷滅之空。即指色相之上當體全空。故云真空也。此理無成無壞。故云不壞也。傳大士頌曰。有物先天地。無形本寂寥。能為萬象主。不逐四時凋。若能悟此一段真空。就是百千三昧。也是空中之花。三昧只為遣有。今既悟真空。一切有為事法決定無有也。可謂大千沙界海中漚。一切聖賢如電拂。

百歲光陰撚指間 奔馳不定片時閑

煩君點檢形骸看 多少英雄去不還

起句。歎光陰迅速。如撚指間便過也。二句。歎每日奔波不定。無有片時之閑也。後二句。令人省會。向自己形骸之上。檢點看。多少英雄一去不還也。傳大士頌曰。精魄隨陰路。游魂入死關。只聞千萬去。未見一人還。寶馬空嘶立。庭花永絕攀。早求無上道。應免四方山。

勢至悲光絕點埃 塵塵剎剎現如來
真心量與觀音等 接引眾生歸去來

前二句。頌二菩薩。光明各照千佛世界。其中人民。有急難恐怖。官詞苦楚。一切惡事逼迫。一心歸命。光照之處悉皆解脫也。勢至者。言菩薩有大勢力。拔濟眾生。但有稱名禮拜。菩薩即至其前。故云勢至也。絕點埃者。讚菩薩悲光熾盛之極。一切眾生肉眼。仗菩薩光。即得徹見十方世界。塵中之剎。剎中有佛。於眾生說法也。古德云。高超淨土捨娑婆。一步歸來快樂多。常寂光中都坐斷。塵塵剎剎是彌陀。後二句。美此菩薩。心量行願。與觀世音菩薩。無二無別。隨逐彌陀化主。接引眾生。同歸淨土也。

尊重正教。誰敢輕慢。塔廟在身邊。人人本有。箇箇皆然。

此科昭明太子。判此一段經文。為尊重正教分第十二。以此經所在之處。則為有佛若有弟子。持誦此經。即為三寶俱在。感得天人供養尊重持經之人。故云尊重正教也。誰敢輕慢者。此言三寶既在。天人尚重。誰敢輕而不信。慢而不敬也。塔廟在身邊者。乃科家。分明指出此塔。在人身邊。不可遠尋也。故經云。隨說此經乃至四句偈等。當知此處。一切世間。天人阿脩羅。皆應供養。如佛塔廟。若是經典所在之處。則為有佛。言其般若之智。是佛法身舍利。故云塔廟在身邊也。人人本有者。言此塔廟。既在當人身邊。人人本具。不從外得。故云本有。不假修成。本來自然。故云。箇箇皆然者耳。

金剛寶藏。體自周圓。若還信受。拈來自檢看。

此是科家。分明指示。上云。塔廟在身。人人本有。今乃教人。受持此個金剛寶藏。周徧法界。圓裹十方。頭頭顯現。法法全彰。眼見耳聞。無非寶藏。故云。體自周圓也。若還信受等者。科家意云。我今如此分明指示。汝若信受此法。爾試拈來自家檢點看。是也不是者哉。

起坐皆尊重 常親塔廟前 如如元不動
處處得安然

前二句。牒經文義。云若是經典所在之處。則為有佛。如佛塔廟。若是有人。受持此經。於四威儀中。常自尊重保守。如親在塔廟之前相似。塔廟者。唐梵兼舉。梵語塔波。唐言廟塚。又云。藏佛舍利。謂之塔。供佛形像。謂之廟也。後二句消歸於理。而得自在。若是行人。不隨境轉。其心如如不動。於四威儀中。安然自在也。

○尊重正教分第十二。

【經】復次須菩提隨說是經(至)則為有佛若尊重弟子。

註曰。此分經文。名尊重正教分。以般若是諸佛母。能出生佛果菩提。一切諸法。但能持誦四句之偈。乃感天人尊重供養。故云。尊重正教也。佛於是再呼須菩提云。此經隨其所在之處。若有人受持讀誦為人演說。乃至一四句偈。則其功德利益。甚深廣大。當知此處。感得天人阿修羅。皆應供養。如佛塔廟。即為有佛。以般若是如來法身舍利。經云。佛告藥王言。若經卷所住之處。皆應起七寶塔。極令高廣嚴飾。不須復安舍利。此中已有如來全身。若有人得見此塔。禮拜供養。當知是人。皆近阿耨菩提是也。何況有人盡能受持者。上云。持四句之功。如佛真身。舍利寶塔。在於此處。何況有人。盡能具足受持讀誦此經全文。當知此人。即能成就無上佛果菩提第一希有之法也。若是經典所在之處者。佛意云。此般若經典。即法寶也。則為有佛。即佛寶也。尊重弟子。即僧寶也。故云。經典所在之處。即三寶共居也。尊重弟子者。又因經勝。故當尊重。學居師後。故稱弟。解從師生。故稱子也。傳大士頌曰。恒沙為比量。分為六種多。持經取四句。七寶詎能過。法門遊歷處。供養感修羅。經中稱最勝。尊重似佛陀。

慈愍三根。隨說乃人天敬仰。受持四句。皆應如塔廟尊崇。常行無念之心。實為希有之法。如何是最上第一句。

此文。牒經中之義也。佛說此般若經。以慈愍之心。隨三種根器。說三乘教法。又隨說者。若有行人。隨其所在之處。解說此經。或受持讀誦。但以四句。乃感天人敬仰。如塔廟尊崇。似佛與大弟子。現在之說也。常行無念之心者。若是行人。常行無念。即心離四相。境絕六塵。以無著之心。讀誦講演。實為成就最上第一。希有微妙之法也。最上第一者。乃是科家徵問之義。經云。最上第一希有之法。故問云。如何為第一句。下文。伸答而顯露也。

非但我今獨達了 恒沙諸佛體皆同

此二句。答上之辭也。科家。以永嘉證道之文。比此中第一句之義。此理非但我今獨自達了。至於恒沙諸佛。所證一體皆同也。此乃分明指示。果能如是之人。親證實到此理。方得如是受用。可謂。十方薄伽梵。一路涅槃門。

說處隨宜不滯空 勸持四句為流通

天龍覆護尊如塔 功德無邊讚莫窮

此四句。牒經之義也。經云。隨說是經。乃至四句偈等。科家意云。若是行人。隨其所在之處。隨順機宜。觀根逗教。而說四句之偈。令聞法者。不滯偏空。直取中道佛果菩提。復勸行人。受持四句。流通無盡也。天龍覆護者。若有人。受持四句流通之處。感得天龍覆護尊敬供養。如佛塔廟。功德無邊。讚揚無有窮盡也。

百歲光陰老盡人 青山綠水至如今
開眸認取來生路 莫學愚頑錯用心

前二句。歎人生百歲。七十者希。言百歲光陰。為人壽老盡之處。此歎人壽不長。命不久留也。唯有青山綠水。古今長在。純陽云。惟有兩般長不改。青山依舊水長流。開眸認取來生路者。科家勉人。山水雖長。劫盡崩枯。唯有本來真性。萬古常存。無去無來。無生無滅。故云。開眸認取來生路也。又叮嚀云。莫學愚頑錯用心。意云。莫學愚癡之人。迷而不省。頑而不信。只管錯用心機。廣置田園。多修宅舍。古德云。眼視仙庄境色幽。前人田土後人收。後人收得休歡喜。還有收人在後頭。若如此省悟。必不錯用其心也。

念佛臨終見寶臺 寶旛寶盖滿空排
彌陀勢至觀音等 合掌相隨歸去來

此四句。明念佛之人。有此效驗。若是行人。從初發心念佛。直至臨終更不退志。乃見七寶金臺自至。又有寶旛寶盖滿空排布。彌陀勢至觀音三聖。垂光接引此念佛人。合掌相隨。同歸淨土。

如法受持。誰敢謾他。須菩提。意如何。我今為汝。一一言破。

此科昭明太子。判此一段經文。為如法受持分第十三。以須菩提。雖聞前來種種深義。而未知經名何等。云何受持流布。故乃請問經名。佛答。是經名為金剛般若波羅蜜。汝當奉持。又恐於般若上。而生執著。故云。即非般若。以顯法性本空。不可取著。復於般若。無有所說。方為如法受持也。誰敢謾他者。科家意云。既是法無所說。般若非名。如此受持者。誰敢謾他也。須菩提意如何者。此分經文。佛問須菩提。總有三箇於意云何之問。初問。如來有所說法不。二問。世界所有微塵是為多不。三問。可以三十二相見如來不。下文伸出所以也。我我為汝一一言破者。此明佛以三次。問於意云何。乃告須菩提云。諸微塵。如來說非微塵。是名微塵。如來說世界。非世界。是名世界。故云。一一言破也。

白雲散處。月照禪河。文殊不遠。休巡山土坡。

上二句。科經文云。須菩提。不以三十二相。見如來法身。故云。白雲散處也。月照禪河者。既不著相見法身。即是真空實相。無相可觀。如月照禪河。光水一體也。下二句。科經中。以恒河沙身命布施。不如受持此經四句偈等。其福甚多。今云。文殊不遠者。以文殊表智。喻此經。四句偈。即是當人本有真智。能趣菩提無漏果也。故杜順祖師。送弟子遊五臺山偈曰。遊子漫波波。臺山禮土坡。文殊只這是。何更覓彌陀。故云。文殊不遠。休巡山土坡也。

如法謹受持 福勝等須彌 白雲消散盡
明月始光輝

前二句。頌經文之義也。如法者。科家意云。若是行人。不執般若之名。不著有法可說。方是如法受持。稱理而修。其福勝過須彌山之高廣。以持經是無為福。能成勝果。故云。福勝等須彌也。後二句。以白雲消散盡。喻經文云。不著有法可說。不著有世界微塵。不著三十二相。故如白雲消散盡也。明月始光輝者。既於一切法。不生執著。獨顯實相真理。如明月當空。性天朗耀。故云。明月始光輝也。

○如法受持分第十三。

【經】爾時須菩提白佛言(至)世尊如來無所說。

註曰。此分經文。名如法受持也。以須菩提。既聞此經。實為希有之法。未知此經。以何為名。所以白佛。當何名此經。我等云何受持流布。佛乃答之云。是經名為金剛般若波羅蜜。以是名字。汝當奉持。如是答者。佛意謂前所問答。種種義理。不過安住降伏。能斷能空。總是金剛般若波羅蜜之義。一經大體。一題盡矣。此約俗諦之說。故有此名也。以是名字。汝當奉持。佛乃叮嚀。尊奉行持也。所以者何者。佛自徵問。以何所以也。佛又呼須菩提云。佛說般若波羅蜜。即非般若波羅蜜。意云。我所說者。對機之談。如來恐人生斷滅見。不得已而強安其名也。可謂恐人生斷見。權且立虛名。若約真諦之義。妙明本性。湛若太虛。體既尚無。何名之有。故云。即非般若波羅蜜也。佛於是。再呼須菩提。於意云何。如來有所說法不。佛恐須菩提。聞佛說此經名。疑法有說。故乃問云。如來有所說法不。須菩提。即會佛義。答云。如來無所說。意云。佛雖有說。隨順俗諦。故有是說。若約真諦。實無所說。是真說。故云。無所說也。故下經云。若有人言如來有所說法。即為謗佛是也。傳大士頌曰。名中無有義。義上復無名。金剛喻真智。能破惡堅貞。若別波羅岸。入理出迷情。智人心自覺。愚者外求聲。

【經】須菩提於意云何(至)為他人說其福甚多。

註曰。佛於此再告當機須菩提云。於汝心意如何。此三千大千世界。所有微塵。是為多不問之。須菩提領解佛義。答云。甚多。故稱世尊也。佛又呼須菩提言。諸微塵等。此一節大意。由前來。以滿恒河沙數。三千世界七寶布施得福而來。謂前寶施得福雖多。不離性執貪等。煩惱染因。有為福報。未出有漏。故佛以大千世界微塵為喻。塵界乃無情之物。無記所攝。不生貪等煩惱染因。返顯前來寶施。是煩惱染因。以能成就煩惱果報。況持說此經。是遠離煩惱因。能趣菩提果。而豈不勝耶。又云。非微塵非世界者。以非貪等煩惱。塵界染因也。是名微塵是名世界者。乃是無記微塵世界也。以無記猶無情。謂不起善惡等情念也。佛又告須菩提言。於意云何。可以三十二相見如來不。意云。以我色身三十二相。見如來法身不。須菩提即會佛義。答云。不也世尊。不可以三十二相見如來。意云。寶施感者。三十二相即應身佛也。持經所感者。即無相法身佛也。故云。不可以相見如來也。何以故者。佛自徵問。以何意故。不以三十二相見如來。佛自答云。如來說三十二相。者是如來應身也。即是非相

者。是如來法身也。是名三十二相者。以應身即是法身。以法身全是應身。亦不妨說三十二相也。此言寶施之福。縱能成佛。但是應身之相。不及受持演說功德。能成無相法身也。佛又呼須菩提云。若有善男子。善女人。以恒河沙等身命布施者。此言前文。以七寶布施為外財也。今乃以身命布施。為內財也。縱捨身命布施。而不見佛性。於理無益也。若復有人。於此經中。乃至受持四句偈等。為他人說。其福甚多者。此顯持經。倍勝財施之福。能見性成佛。證無為果。出生一切菩提法也。傳大士頌曰。施命如沙數。人天業轉深。既掩菩提相。能障涅槃心。猿猴探水月。蘭[廿/礪]拾花針。愛河浮更沒。苦海出還沉。又頌曰。經中稱四句。應當不離身。愚人看似夢。智者見唯真。法性無前後。無中非故新。蘊空無實相。憑何見有人。

大覺尊。本來不立一字。而直指人心。須菩提。無端特請標名。而強生枝節。縱使析微塵如世界。無相可求。施身命等河沙。無法可說。且道。奉持箇什麼。咄。

此節之文。明佛出世。只是於人傳心。本來不立一字。昔佛將入涅槃時。文殊請佛再轉法輪。佛言。吾四十九年。未道著一字。以佛言雖有說。正顯無說。嘗云。始從鹿野苑。終至跋提河。於其二中間。未曾說一字。故云。不立一字。直指人心也。須菩提無端者。乃科家顯手眼把住說話。意云。言如來無所說法。而今無端。却又請標名題。所以強生枝節。如鉢盂上安柄。可謂虛空無面目。何用巧粧眉也。縱使析微塵如世界者。乃牒經類釋也。即佛告須菩提。諸微塵。如來說非微塵。是名微塵。以類下句如來說世界。非世界。是名世界。故云。如世界也。無相可求者。以世界之相。即眾塵所積之相。今云。析一微塵。為七分極微塵。又析一極微塵。為七分極微塵。以鄰虛塵。實虛空性。更不可析。以同虛空故。既同虛空了不可得。豈能成就世界耶。既不能成就世界。故云。無塵相可求也。施身命等河沙者。科家意云。經中施河沙身命。不如說四句法。直饒你施身命等河沙。求其說法亦不可得。此言。至理超名相之階。真智出思議之外。言語道斷。心行處滅。故云。無法可說也。且道奉持者。科家令人審察。若是有相有說。可言一箇奉持。既云無相可求。無法可說。且道如何奉持耶。可謂。直饒眼似流星。未免口如橛櫓也。

金剛寶劍倚天寒 外道邪魔俱腦裂

此二句。所顯無受持之義也。科家以金剛王寶劍。喻般若智。此智之外。更無片事可得。除一心之外。更無有法。可傳可受也。如寶劍光寒。羣魔膽碎。所謂大丈夫。秉慧劍。般若鋒兮金剛焰。非但空摧外道心。早曾落却天魔膽。是也。

箇裏本無元字脚 空中誰敢強安名

等閒點出金剛眼 照破魔王八萬城

前二句。頌經中之義也。言般若無名。真空無相。所以科家。當陽顯示。不隱絲毫。故云箇裏本無一字。所說真空理上。誰敢安名。可謂。有名呼不得。無位可安排也。後二句。若是行人。於般若真智。直下會得。如等閒點出金剛正眼。此金剛眼。

即當人本有之智眼。斯眼若開。能破一切眾生。八萬四千塵勞煩惱之惑。故心經云。照見五蘊皆空。度一切苦厄。所以照破魔王八萬城也。

百歲光陰不自驚 老來何物作前程
只憑經卷三千藏 莫把虛華過一生

前二句。歎人生在世。只有百歲光陰。從朝至暮。惟貪名利。不肯自驚。光陰有限。世數無多。一旦老來。欲將何物。而作前程路費。如行路客。先辦資糧。不遭飢餓之苦。喻人修道。必免三途之難。古德云。三分光陰二早過。靈臺一點不揩磨。貪生逐日區區去。喚不回頭爭奈何。似此之人。亦是前程未辦也。後二句。頌辦前程所以。要令行人。向日用間。不可唐喪光陰。虛延歲月。須是精勤六念。謹守一心。誦三藏之玄文。究五乘之奧義。故云。只憑經卷三千藏也。莫把虛華過一生者。乃科家誠勉行人。莫認三界虛華。以為實有。可惜一生空過。後悔難追。可謂。迷誦千經只是少。悟來一念也須多。故經云。一切有為法。如夢幻泡影。如露亦如電。應作如是觀。

般若現前無罣礙 橫身宇宙莫疑猜
虛空拶破難藏覆 大道分明歸去來

初二句。明三界之法。從一般若出生。今云。般若現前。諸法悉空。即是般若。故云無有罣礙。可謂。山河及大地。全露法王身也。橫身宇宙者。言此般若既無罣礙。所以橫身宇宙。充滿太虛。可謂豎窮三際。橫遍十方。故云。莫疑猜也。後二句。言般若大用現前。將十方虛空。悉皆消殞也。大道分明者。謂般若現前。山河大地。明暗色空。無纖毫可得。古人云。浮生易過休空過。大道難明要講明。故云。大道分明歸去來也。

銷釋金剛科儀會要註解卷第四

銷釋金剛科儀會要註解卷第五

姚秦三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

離相寂滅。誰為分別。有口也難說。五百世中。割截支節。

此科昭明太子。判此一段經文。名離相寂滅分第十四。以佛說離一切相。發菩提心。即是聞此經典。離我人等四相。即名諸佛。證寂滅理。因此立名。為離相寂滅也。誰為分別者。既是離相寂滅。即是離人法二執之相。是名寂滅實相。既無人執之見。又有甚麼分別之情。所以[口@昆]圖無內外。和融上下平也。有口也難說者既說寂滅之理。心空四相。必離人執。即無分別心。離法相。離法執。有何所說。故云。有口也難說。所謂言語道斷。心行處滅也。五百世中者。此文伸出上義。離相寂滅所以也。誰為分別者。無人執也。有口也難說者。無法執也。因無二執。故菩薩能行忍。如佛昔為歌利王。割截身體。非此一世無有二執。於五百世中。為忍辱仙人。皆無二執。故能行忍。所以割截支節也。

而無一念。妄生虛說。成道證果。雲散家家月。

而無一念妄生虛說者。此明如來是真語者。實語者。如語者。不誑語者。不異語者。意云。如來非但五百世中。行此難行難忍苦行之事。又於無量劫來。而無一念誑妄言說。此顯佛語皆是真實。而無虛妄。又言。佛說眾生有樂。決定受樂。佛說眾生有苦。決定受苦。如云日可冷月可熱。眾魔不能壞真說。善維經云。諸婆羅門。因共立制。不與佛食。若與佛食者。罰金錢五百文。時佛入城乞食。人皆閉門。空鉢而出。有一女人。以破器盛臭糞。出門棄之。見佛空鉢。此女即生信心。欲興供養。思此臭食。恐未肯取。佛知彼意。即受其施。而授記言。十五劫中。天上人間。受福快樂。不墮惡道。後得男身。出家學道。成辟支佛。諸婆羅門云。佛為食故。妄語如此。佛即出舌覆面。上至髮際。語婆羅門言。汝見諸經書中。頗有此舌作妄語不。婆羅門。禮佛悔過。以此較之。佛無妄語。故有長舌之相也。成道證果者。謂佛從五百世中。已離人法二執。及一切相。如此修進。今得成道證果。現十法界身。隨類說法。如雲散長空。家家有月。此顯。處一座而十方俱現。演一音而沙界齊聞。故云。雲散家家月。廣智大師曰。雲散家家月。情燭處處彰。無依無用處。便是法中王。

離相即非說 古今常寂滅 而無一念心

任汝分支節

離相者。離我人眾生壽者之四相也。即非說者。既離四相。更有何法可說。故云。即非說也。古今常寂滅者。既無四相。於法無說。亘古亘今。不遷不變。唯一實相之理。故云。常寂滅也。而無一念心者。言如來。既無人法二執。雖被他人。節節支

解。而不起一念之心。我被汝割截我之身分。了無一念分別計執。若有一念分別彼我之心。則有嗔恨生焉。既無嗔恨。人法皆空。即證無生法忍。故云。任汝分支節。永嘉曰。我師得見然燈佛。多劫曾為忍辱僊。

○離相寂滅分第十四。

【經】爾時須菩提聞說是經(至)離一切諸相即名諸佛。

註曰。此節經文。名為離相寂滅分也。以須菩提。聞說此經。深解義趣者。深解前來施捨身命所成之福。不如受持演說四句之勝。今聞此經。感傷深恩。遂悲泣流涕。讚言希有。自謂從昔以來。雖得慧眼。理證人空。未聞此經甚深之義。又云。若人得聞此經。信心清淨。則生實相者。意謂。得聞是經。即信般若。不信諸法。是謂信心清淨。心既清淨。實相生焉。故云。則生實相。或者問永明曰。何等名為諸法實相。答曰。所謂諸法。畢竟空無所有。以是無有者。名為諸法實相也。當知是人。成就第一希有功德者。意云。此人得聞是經。證實相理。成就法身功德。故謂第一希有也。須菩提。又稱世尊。是實相者。即是非相。是故如來說名實相者。所謂實相無相。即是非相。如太虛空。無一形相。正如水中鹽味。色裏膠青。決定是有。不見其形。實相亦爾。故云。是故如來說名實相也。須菩提又云。我今得聞如是經典。信解受持。不足為難。乃至若當來世者。意云。我今值佛得聞是經。不以為難。而未來眾生。得聞是法。信解受持。是為希有。信解受持者。心無狐疑。曰信曉了義理。曰解。欽承不慢。曰受。佩服不厭。曰持。未來眾生。如斯信解受持。實為希有也。又云。何以故。此人無我相等者。此言須菩提。徵問前義。以何意故。得聞是經。實為希有者。斯人依此經修。不起我人眾生壽者四相也。所以者何。以無我相。即是非相。非相者。即實相也。離一切相。即成正覺。故云。即名諸佛也。無著云。此人無我相等。顯示無人取之執也。我相即是非相者。顯示無法取之執也。離一切相者。顯示無空空相之執也。當知是人。離相清淨。解悟三空。不著二邊。不處中道。一切無住。契合實相。究竟涅槃。即名諸佛也。傳大士曰。空生聞妙理。如蓬植在麻。凡流信此法。同火出蓮華。恐人生斷見。大聖預開遮。如能離諸相。定入法王家。

【經】佛告須菩提如是如是(至)無眾生相無壽者相。

佛云。如是如是者。乃允許之辭也。長水曰。從爾時須菩提。聞說是經。下至離一切相。即名諸佛。皆是空生之言。於中大意。有其六種。一聞法悲泣。二信心生實相。三對彰難易。四明無我人。五法執兼亡。六盡成佛故。如斯皆是誠諦之言。故佛印云。如是如是也。又云。若人得聞是經。不驚不怖不畏。是人甚為希有者。以大乘之法。難信難解。此人若聞經中。無我人等四相。不驚聞諸法空不怖。聞空空不畏。當知是人。實為希有也。又云。何以故。須菩提。如來說第一波羅蜜等者。佛自徵問。以何意故。此人聞法不生驚怖。甚為希有。故告須菩提言。如來說第一波羅蜜。以顯因中最勝。前云。是人聞經。信解般若。即為第一希有。因聞般若。即生實相。希

有之法。此法無與等者。故名第一。若悟非相。於法無著。即達彼岸。以俗諦中。利益眾生。故說第一波羅蜜也。了悟人法俱空。即無生死可度。亦無彼岸可到。以真諦中法性本空。故又說。非第一波羅蜜也。又恐人執著二邊。以第一義中。離俗離真。即事即理。故云。是名第一波羅蜜也。又云。忍辱波羅蜜。如來說非忍辱波羅蜜。是名忍辱波羅蜜者。忍辱者。六度之中。第三是也。安受曰忍。毀害曰辱。故云忍辱也。前云。捨身命之福報。是生死之苦因。不及持說之福。此之忍行。捨身命不成苦因者。何耶。蓋此之行忍。能達諸法無我。到於彼岸。故云。忍辱波羅蜜也。如來說非忍辱波羅蜜者。即遣執著。以俗諦中。若能行忍辱之行。忍於能忍。此名執著。若以真諦之中。了能行之行。皆不可得。故云非也。是名忍辱波羅蜜者。此一句。後人妄添。姑且解之。若是行人。不住能忍之行。將不住之心。亦乃不存。方為忍辱波羅蜜也。佛又云。如我昔為歌利王。割截身體者。佛自引昔。以證今也。如是忍行。我昔曾行。故引歌利之事。而證之。梵語歌利。此云極惡王。謂如來因地修行。證初地菩薩。脩忍辱行。在於山中宴坐。遇歌利王。出城遊獵。王乃至山。困倦憩息。睡醒不見左右彩女。遂親入山。見彼眾妃彩女。圍遶禮拜仙人。王乃大怒問曰。云何忍情。觀我女色。仙人曰。於諸女色。實無貪著。王曰。云何見色不貪。仙人曰。專心持戒。王曰。何名持戒。仙人曰。忍辱即是持戒。王乃將刀。割仙人耳鼻手足。問曰痛否。仙人曰。不痛。王亦節節支解。問曰。痛否。仙人曰。實不痛。其時輔相大臣。諫曰。彼之大士。逢此患苦。顏色忻然。無所搖動。奈何大王如此加害。王遂休止。爾時王者。即憍陳如是也。仙人者。即釋迦是也。以仙人行忍辱行。雖被加害。略無嗔恨。蓋能了達我人眾生壽者四相皆空也。又云。何以故者。此是重徵上義。佛意云。以何意故。無我人相也。佛自云。我於往昔節節支解時。若有我人四相。應生嗔恨。返顯前義。無有四相。則無嗔恨也。佛再告須菩提云。又念過去。於五百世。作忍辱仙人。於爾所世。無我等者。佛自引過去。五百世中。作忍辱仙。以證歌利王事。自明行忍。非止一世也。故舉五百世中能忍之迹。以顯佛無妄說。前不云乎。而無一念妄生虛說。以佛行忍行。非唯無苦。亦乃有樂。所言樂者。以心離四相。二執皆空。證無生法忍也。傳大士頌曰。暴虐唯無道。時稱歌利王。逢君出遊獵。仙人橫被傷。頻經五百世。前後極時長。承仙忍辱力。今乃證真常。

【經】是故須菩提(至)皆得成就無量無邊功德。

是故須菩提。菩薩應離一切相。發菩提心。是故者。結前起後之辭也。結前累世行忍住忍辱仙。以無我人。得成菩提。今得成佛。故令發菩提心。菩薩應離一切相。發無上菩提大道也。不住色相生心等者。言發菩提心菩薩。不住色聲香味觸法六塵。即是離一切相也。應生無所住心者。言此菩薩心無所住。即能住菩提也。若心有住者。此菩薩。若心於法有住。則非住菩提佛道矣。是故佛說菩薩心。不應住色布施。是故者。結前菩薩所行六度。皆是無相布施。其福量等法界。不可窮盡。以色為六塵之

首。施為六度之初。故云。不應住色布施也。佛又告須菩提言。菩薩為利益一切眾生故。應如是布施者。此菩薩如是行施。為利羣生。悉皆行無相布施也。如來說一切諸相。即是非相等者。此言如來自說。遣執著也。六祖曰。如來說。我人等一切諸相。皆無實體。畢竟破壞。非真實有。即是非相也。一切眾生盡是假名。若離妄心。即無眾生可得。故云。即非眾生也。集解云。一切諸相者。即是法境也。即是非相者。顯法空也。一切眾生者。即是人境也。即非眾生者。顯人空也。因此菩薩離一切相。故云。二執皆空也。佛又呼須菩提。如來是真語等者。言如來所得菩提妙果。如理而證。離於言說。何故累稱持說功德。勝於布施等福耶。然。佛於無所證而證。於無可說而說。所證所說無不當理。恐善現未達此義。故仍告云。如來是真語者。真語者。即佛說菩提法也。實語者。即說小乘法也。如語者。即說大乘法也。不異語者。即說授記事也。不誑語者。即不誑眾生也。如來所說五種之語。悉是真實。無有虛妄。故壽命童子經云。日月星辰可墜地。山石從地可飛空。海水淵深可令枯。佛語決定無虛妄。是也。佛又告須菩提。如來所得法。此法無實無虛者。如來自證云。我所證之法。本離言說。故云無實。對機有說。故云無虛也。佛又呼須菩提云。若菩薩心住於法而行布施。如人入暗。即無所見者。此明菩薩行施。乃教化眾生也。若住於法而行布施。不達三輪體空。名為住法布施。若教眾生住著於法。無由得見真性。故喻如人入暗。則無所見也。若菩薩行於布施。不著於法。若達三輪體。

若離名。了達依正。皆不可得。全體真空實相。如斯義趣。前云。一恒河沙數身命布施功德。不及受持四句偈等。為他人說。其福甚多。善現既聞此義。故感悟悲流雨淚也。仙人垂慈弘忍等者。言如來。最初因他。作忍辱仙。於五百世中。行忍辱行。以了人法二空。故得無生法忍。雖被歌利王。割截身體。如雪刃謾斬虛空相似。謂此菩薩。了達此身如空也。如是印可其詞者。言佛印證許可須菩提。前來所言。於理切當。故云。如是如是。印許能離一切諸相也。意云。此人無我人四相。是人空也。我相即是非相。是法空也。離一切相。即名諸佛。是空空也。故云。能離一切諸相也。未審感悟處等者。此是科家徵問前義。且道須菩提感悟之理。有何奇特處。下文伸答顯露也。

豁開慧眼明如日 返照微塵世界空

此二句。乃答上文之義也。以須菩提聞說般若。豁開慧眼。證無我人四相。空一切法。如杲日當空。

百歲光陰石火光 回頭何不早思量
無常相請宜推托 免向閻君論短長

前二句。歎人生百歲。光陰迅速。如石火之光。不可久留也。奉勸諸人。何不回頭急早思量。此身既是不久。何不急早念佛求生淨土。捨不堅身。證真常身也。後二句。誠勉行人。若依念佛法門。出離生死苦海。得生極樂世界。縱有無常相請。當可

推托。不能拘喚。免入閻君之手。豈可更論短長。可謂。了鬼神覷不破之機。超生死不相干之地。

真樂真常真淨土 寶池寶樹寶華開
無寒無暑無凋變 歸去來兮歸去來

此四句。明指西方境界也。以彼阿彌陀佛剎中之人。壽命皆無央數劫。一生遂補佛位。同證一常樂我淨。即真淨土也。不遷不變是名真常。無二死苦是名真樂。八自在是名真我。煩惱滅盡是名真淨土也。有七寶池。七重行樹。四色蓮華。無冬寒夏暑。春榮秋凋之變。如斯快樂之處。普勸諸人。何不早離穢土。徑往蓮邦。優曇頌曰。一心念佛自相安。冷眼常將世境看。會得目前真淨土。此心更不涉多端。

持經功德。福多難比。三時喻不齊。住相布施。終須有退。

此科昭明太子。判此一段經文。為持經功德分第十五。以持經功德。勝過三時布施功德。故以此為名也。福多難比者。言三時捨恒河沙。身命布施功德。福報雖多。是人天福。未能見性。難比持經功德。以受持此經。為人解說。即能見性成佛也。三時喻不齊者。牒經文義。明經中初日分。即寅卯辰時也。中日分者。即巳午未時也。後日分者。即申酉戌時也。有人如是。一日三時。捨無量身。經無量劫。而行布施。不如聞經生信。福德之勝。何況書寫受持讀誦。為人解說。展轉勝彼百千萬億倍。故云。三時喻不齊也。住相布施者。言三時捨身命布施。不達三輪體空。但得人天之福。終須有退。以未明真性。心生住著。故有退也。

無漏智慧。頓證菩提。花開花[冰-水+射]。日東月落西。

此科須菩提。若有人。受持此經。為人解說。皆得成就不可思議功德。如是人等。即為荷擔阿耨菩提。此言無漏智慧者。即是般若無漏智慧。不漏落二執。二障之中。故名無漏清淨智慧。永明云。我法皆空。故契玄旨。以我空故。煩惱障斷。以法空故。所執障消。煩惱障斷。證真解脫。所執障消。獲大菩提。然後。行滿因門。心冥果海。故云。無漏智慧也。頓證菩提者。言能持此經。見無漏智。則為荷擔阿耨菩提。故云。頓證菩提也。花開花[冰-水+射]者。此是科家。分明悟示。既明無漏智慧。頓證菩提。以布施持經。如花開花[冰-水+射]。日東月落西相似。其無漏智。如樹常存。豈有開[冰-水+射]。如天本淨。豈有日月明暗。故云。花開花[冰-水+射]。日東月落西也。可謂。雲去雲來天本淨。花開花[冰-水+射]樹常存。

此經功德勝 誰人解受持 寒山逢拾得
拍手笑微微

此四句。以顯此經。是大乘教。須得大乘人。方可受持。經云。若復有人。聞此經典。信心不逆。其福勝彼。三時布施之功又明此經。是何等人。能解受持。下句指出寒山即文殊。拾得即普賢。此二菩薩。方堪受持也。以此二人相逢之際。拍手而笑。方顯離言之道。不落文字。真空無相之理也。

○持經功德分第十五。

【經】須菩提若有善男子善女人(至)為發最上乘者說。

註曰。此分名為。持經功德也。於是。佛乃招告須菩提言。若有男子女人。一日三時。以恒河沙等身命布施。如是無量百千萬億劫以身布施者。只得人間。天上之福受盡此福。還復墮落也。若復有人聞此經典。信心不逆。其福勝彼者。佛意云。若人暫聞此經。信心歸敬。所獲之福。勝前捨身命之福。以此經深明實。相。人法二空。所以勝也。何況書寫受持讀誦。為人解說。其福倍倍轉勝也。傳大士頌曰。眾生及壽者。蘊上假虛名。如龜毛不實。似兔角無形。捨身由妄質。施命。為迷情。詳論福與智不及受持經。告須菩提以要言之。是經有不可思議等功德者。佛意云。以此經捷要言之。此經顯般若智體。不可以心思言議。豈可稱量。則其功德廣大無邊。非凡情所能測也。如來。為發大乘者說。為發最上乘者說者。意云。此經所談。乃真空實。相之道。非樂小法者所可得聞。故曰。為發大乘菩薩心者。乃說此經。通指行門三教。即通。別。圓。三等之人。為發最上乘者說者。單指圓教之人也。

【經】若有人能受持讀誦(至)以諸華香而散其處。

只得人空。未得法空。而有四相所在。故於此經。不堪聽受讀誦講演。豈能擔。荷無上菩提。以斯之人。愛樂小法。不信大乘最上法也。佛又呼須菩提云。在在處處若有此經等者。斯言所在之處。若有此般若經。一切天人。皆應供養。當知此處即為是塔。以般若經是如來法身。舍利。寶塔。故感天人恭敬作禮。以諸華香而散其處。凡有受持此經。即如佛塔。一切天人。即以華香而散。持經之處。供養此人。可謂。一人辨心。諸天辨供。是也。傳大士頌曰。徧計於先了。圓成證此時。須乘無礙慧。方便勸人持。此經所在處。寶塔未曾離。法身常在內。諸天共歸依。

布施千萬億劫之身。福深於海。為發最上大乘者說。擔重如山。慶快撩起便行。且請依前放下。何故。

此文。乃牒經中之義也。經云。一日三時。捨恒河沙數。身命布施。經千萬億劫。所得福德。如海之深廣言所獲之福甚多也。為發最上者牒經中義。經云。若復有人。聞說此經信心不逆。所得功德如山之高大。豈一人而擔荷也。慶快撩起者。此亦牒經之義。慶者喜也。快者暢也。亦是拈情。科家意云。若是大乘之人。聞說此經。領荷如來最上之法。暢然喜慶直下承當。般若之智。匪從人得。云者。慶快撩起便行也。且請依前放下者。科家恐人執著。又與拈了也。上云。擔。荷便行者。似有一物在。故且請放下這一物。方是脫洒也。昔有嚴陽尊者。問趙州。一物不將來時如何。州云放下著。嚴陽曰。一物也無。放下甚麼州云。不放下擔著去。嚴陽。豁然大悟也。何故者乃科家審問放下之義也。

大力量人元不動 等閑抹過上頭關

此二句。是科家答上文之義也。若是大力量人。不向佛祖語言上解義。不去擔荷菩提。只於自己脚跟下承當。可謂。離心意識參。出凡聖路頭學以般若智人人本具。不從千聖借。豈向萬機求。故云。等閑抹過上頭關也。

倒握吹毛掃異踪 頓令心地盡開通
鋒鋌獨露毗盧頂 凡聖齊教列下風

此四句。頌上文。大力量人。不動之義也。以金剛寶劍。比喻此理。科家意謂。這箇大力量人。以金剛王寶劍。掃除佛祖玄妙。剪去異見邪踪。狐疑淨盡纖芥不存。頓使各人。心地開朗。法性融通。不容取捨聖凡。那許欣經厭施。總是不平之義。盡教掃除。頓令二際平等。事理一如。故云。盡開通也。下二句。伸出開通之義。梵語毗盧此云遍一切處。即是鋒鋌獨露。以喻此理。遍在一切有情無情。色非色處之上。正恁麼時。不見有四聖。六凡之別。故云。凡聖立下風也。可謂。掃除佛祖見。截斷聖凡情也。

百歲光陰燭在風 誰人心與佛心同
修行速往西方去 足下蓮華步步生

前二句。歎此娑婆世界。眾生壽命短促。喻如風中之燭。朝夕難保。比況生死無常也。誰人心與佛心同者。以此界人心。惟好造惡。不修十善。唯佛一人。慈心無量。故云。誰人心與佛心同也。後二句。言眾生。但肯依佛教法。專心持念彌陀聖號。即得往生西方淨土。蓮華化生。面禮彌陀。親蒙授記。行時以蓮華襯足。住時於菩薩為伴。證不退位。即與佛心。同為一體。故云。足下蓮華步步生也。

十念圓成一念回 三心果滿九蓮開
塵勞念佛同時去 歸去來兮歸去來

十念者。即十氣念佛也。一念者。即臨終一念也。若有行人。盡此平生。信向西方。每日十氣。稱念阿彌陀佛。圓滿成就。臨命終時。於一念頃。即得往生極樂世界故云。十念圓成一念回也。三心者。謂深心。至誠心。回向發願心。且此三心。當得上品上生也。蓮開。即上品上生也。其餘者。有七日開者。有四十九日開者。有經八萬劫開者。故云。九蓮開也。塵勞念佛者。即在家念佛之人。若能忙裏偷閒。專心念佛。皆得同時。生西方去。故云。歸去來兮歸去來。古德云彌陀甚易念。淨土甚易生。但能誠一念。俱登上品中。

能淨業障。塵體雙亡。五百億難量。恒沙諸佛。承事供養。

此科昭明太子。判此一段經文。為能淨業障分第十六。蓋謂此人。今生若為人輕賤。是人先世罪業今被輕賤。有犯不校。常行般若觀。罪即消滅。故立此名為能淨業障也。塵體雙亡者此科能持此經。先世罪業。即為消滅。當得菩提也。斯言塵者。即八萬塵勞煩惱也。體者。以無明為體能生塵勞煩惱。今以持經般若智力。能滅罪業則得菩提。故云。塵體雙亡也。八百億難量等者。此科佛曾於然燈佛前。得值八百四千

萬億那由他諸佛悉皆供養承事。無空過者也。

而今成道。萬法齊彰圓明果滿。春來日漸長。

乃是科家。言佛今成道。因供養諸佛功德。方成道果始得萬法齊彰。隨機應物。可謂。處一座而十方俱現。演一音而法界齊聞也。圓明果滿等者。此言佛今成道。即三祇果滿萬行周圓。得究竟果也。春來日漸長者。此一句。顯本分家風。若是行人。能持此經。所得功德。比供養諸佛功德。即勝百千萬億分之福。以持經能見性成佛所以得福最勝。如春來日長。大地自然之道。可謂。春到洞庭南北岸。鳥啼西嶺月生東。

業障本來無 心差轉見殊 若悟三空理
何處不如如

此四句。牒經中之義也。前二句言經中為人輕賤。先世罪業。以此罪業真心之上本來無有。因心有差。隨妄所造。以真如不守自性。忽起無明。妄現根身器界。三細。六粗。次第而生。起惑造業。故見差殊之相也。後二句。若悟三空者。即經中能持此經罪即消滅。得證菩提即悟人空法空。人法俱空理也。即悟三三空。證實相智所以。法法無非般若。頭頭總是真。如可謂乾坤盡是黃金國。萬有全彰淨妙身。

○能淨業障分第十六。

【經】復次須菩提若善男子(至)果報亦不可思議。

註曰。佛呼須菩提云。若人受持此經。為人輕賤者。是人前世曾作罪業。當墮地獄。餓鬼。畜生。阿修羅道。永無出期。以今生止被人。輕賤而已。大論云。先世重罪。應入地獄。以行般若故。現世輕受。譬如重罪應死。有勢力護。則受鞭杖而已。以今世人輕賤故者。此人持經。雖被輕賤。不著我人。常修觀智。則前生罪業。而為消滅當來之世。成就菩提也。傳大士頌曰。先身有報障。今日受持經。暫被人輕賤。轉重復還輕。若了依他起。能除遍計情。常依般若觀。何慮不圓成。佛又呼須菩提云。我念過去。於無量阿僧祇劫。於然燈佛前者。梵語阿僧祇。此云無數時。梵語那由他。此云萬萬數。謂十億。為一洛叉。即百萬也。十洛叉。為一俱胝。即千萬也。十俱胝。為一那由他。即萬萬數也。佛自念云。經無數劫。於然燈佛已前。供養無數諸佛功德。只是求福而已。不若持此真經。見自本性。永離輪迴。是故。供佛功德。雖百千萬億分。不及末世。持經功德一分。故以筭數譬喻。所不能及也。末世之人。徒知事佛。而不知佛究竟之理。盡在此經。所以持說功德甚大。昔梁武帝。造寺布施。供佛設齋請問達磨。有何功德。祖云。實無功德。帝曰。何以無有功德。祖云。此但人天小果。有漏之因帝曰。如何是真功德祖云。淨智妙圓。體自空寂。如是功德。不以相求。後人不了此義。以供佛修福。以為功德。不知功德在法身中。非在修福所求。所求之福。不及功德供佛不及持經也。佛復云。若人於後末世。受持此經功德。我若具說者。佛意云。於我末世持此經者。上雖校量。供無數佛功德。不及持經。一分

功德。猶是略說。若更具說此經功德。乃是大乘之法。即本有智也。或有人聞心即狂亂者。恐有樂小法之人。聞此大乘。心則迷悶狐疑不信也。以道大機小。難臻其妙。故生狐疑。當知是經義者義即般若之智。此般若智。不可思議也。果報亦不可思議者果報即所得功德也。因般若智而悟真性。其所得佛果菩提功德。故不可思議也。

宿業緣墮惡道。今人賤而罪即消。供諸佛誦此經。功德勝而喻莫及。只如無著無相底。還有果報也無。

宿業惡道者。此科為人輕賤。先世罪業應墮惡道。今世人輕賤常持此經。直下見性。而罪即消滅也。供佛誦經者。此科佛曾於然燈佛前。供養八百四千萬億那由他諸佛不及持經功德之勝。而譬喻所不能及也。只如無著無相者。此顯真空無相無著之理。無有誦經。可以滅罪。亦無供佛可以得果也。還有果報者。此是科家徵問之辭。似此無相法身。實無果報可得。所以永嘉道。無罪福。無損益寂滅性中莫問覓。比來塵鏡未曾磨今日分明須剖析。下文伸答也。

妄心滅盡業還空 直證菩提超等級

此二句答上文之義也。直如無著無相法身之理。既無罪福。豈有果報。妄心滅盡罪業還空。可謂罪性本空由心造。心若滅時罪亦亡也。直證菩提。既罪性本空。即是菩提。不假施功用行。斷惑明真。直下見性。超過五十二位。修進階級者矣。

惡因誰住罪誰招 真性如空不動搖

曠劫無明俱蕩盡 先天後地寂寥寥

初句牒經中之義。經云。是人先世罪業。應墮惡道。科家意云。惡業之因。是誰造作。受罪之果。是誰招感。若論法相宗說。乃是無明妄惑。六識施設。而為能造。八識含藏。而為能招。故云。業果能招引滿牽也。今科家不然。雖有因果罪業。招感分明。猶如水上之波。雖有動搖之相。乃是境風妄起妄滅。本無實體。此真如之性。如太虛空。湛然清淨。本不搖動也。若以衲僧門下。罪業本空因果非有。可謂。真不立。妄本空。有無俱遣不空空也。後二句牒經之義。以今世人輕賤故。先世罪業則為消滅。得證菩提。科家意云。若行人修般若觀。受持此經將曠劫虛妄無明。盡情掃蕩。獨須般若真空。猶如大虛本自空廓。故云。先天後地寂寥寥也。

百歲光陰似水流 無窮無盡幾時休

不如先證菩提路 悉免輪迴得自由

前二句。歎人生一世。止是百歲之期。死而復生生而復死。喻如水流。前後相續無有門斷。故云。無窮無盡幾時休也。後二句。勉人修進。意云。既是生死無窮。行人須當修大乘法。證菩提道。若以小乘之法。雖修人天因果。九次第定。乃是未出輪迴。不得自在。不如先證大乘。初發心時便成正覺不被生死纏縛。不被塵勞染汙。故云。悉免輪迴得自由。

歸去來兮歸去來 一靈休更入胞胎
化生花上身金色 目擊金容歸去來

初二句即科家。慈心太煞分明指示言謂兩個歸去來者。乃是說了又說。恐人不信。故故嚀再囑也。一靈休更者。此明一靈真性。即中有身。若去父母邊投胎時最初起憎愛二種心。入胎中有七種不淨。一種子不淨謂此姪欲身。從貪愛煩惱。無明種子而生也。二受生不淨謂此身。從父母赤白二滴和合。識投其中也。三住處不淨。謂此身。處母胎生臟之下。熟臟之上。而住胎十月也。四食噉不淨。謂在母胎中。唯食母血餅也。五初生不淨。謂此身產時。頭向陰門。與血俱出。臭穢狼籍。如兩山相夾落草如活牛剥皮也。六舉體不淨。謂此身薄皮之內。膿血徧一切處也。七究竟不淨。謂此身。始自初生。漸漸更改。少而壯。壯而復老。老而復死。胖脹爛壞。骨肉縱橫狐狼食噉也。以此色身。有如是之苦。故云。一靈休更入胞胎也。後二句。科家指一條出生死路。不入胞胎。故指西方世界。若人念佛。於彼國土蓮華化生。身如金色。即得面見阿彌陀佛聞法受記。證不退位。故云。目擊金容歸去來。古德頌曰。好念彌陀歸去來。遙登九品托蓮胎。華開親覩天真佛。一段光明遍九垓。

究竟無我。四大全空。五蘊假立名。通達萬法。處處皆空。

此科昭明太子。判此一段經文。為究竟無我分第十七。蓋佛說一切法。無我。等相。言辭雖同其義則別。以前來但問能住能降之法。只是破情顯智所破之情。即無我人等四相粗執。所顯之智。即般若之智。自此之下忘智顯理。破我人等四相細執。恐菩薩將入證道。謂我能安住。我能降伏。存此分別之心。便是我也。故下文云。如來於然燈佛所。若有法可得。而證菩提。即為有我。無法可得。無道可證。是名無我。又云。若菩薩通達無我法者。故立此名為究竟無我也。四大全空者。言此苦依身。以地水火風四大和合而成。五蘊虛積而有。凡夫妄計。假立為我。此我若無。四大五蘊亦空也。通達萬法者。此科如來。實無有法。得證菩提。故得受然燈記。又云。如來者。即諸法如意是故如來。說一切法皆是佛法。若菩薩。通達無我法者。即無我人四相之法。如來說名真是菩薩。故。能於一切法。處處皆空也。上云。四大五蘊全空為正報。空即人空也。此云通達萬法為依報。空即法空也。

青山綠水。雲起長空。諸人薦取。黃鸝啼曉風。

此是科家。發明前來通達萬法處處皆空之義。以青山綠水雲起長空。那裡不是通達此理可謂。山河草木揚真諦。風月樓臺演妙音。以目前。明暗色空。皆彰此道。諸人薦取者。此是科家慈心太切。分明指出。萬法之上。聲色之中。令人薦取似黃鸝啼處是聲也。曉風是境也。若是行人。向聲色上會得。見是何人。聞是何物。豈不是通達萬法。可謂鐘鳴鼓響。無非觀音入理之門。栢短松長盡是毗盧一真境界。昔古德誦法華經。聞鶯啼有惺。偈曰。諸法從本來。常自寂滅相。春至百花香。黃鸝啼柳上。

受記本無言 真慈大覺宣 四相非四相
菩提果自鮮

前二句。牒經中之義。佛自云。我於然燈佛所。實無有法得阿耨菩提。方得授記。故云。授記本無言也。此乃佛自宣說。我若有法得菩提者。然燈佛即不於我授記。故云。大覺宣也。後二句。亦牒經中之義。若菩薩。見有眾生可度。有法可得。菩提可證。見有淨土可嚴。皆有能所。不達性空悉著四相也。非四相者。謂菩薩不見有一眾生實滅度者。實無有法。得阿耨菩提。於真淨土即非莊嚴。故無我人。四相也。菩提果自鮮者。菩薩既不著四相。於佛果菩提。自然新鮮也。可謂。有無俱坐斷。獨露一真空也。

○究竟無我分第十七。

【經】爾時須菩提白佛言(至)多羅三藐三菩提心者。

註曰。此分經文。為究竟無我者。以菩薩心。無我人四相。方契無法可得。無菩提可證。故名究竟無我也。須菩提白佛言。善男子。善女人。發阿耨菩提心。云何應住降伏者。以善現前來。於第二分中。初問此義至是復問者。何耶。然則問辭雖同。其義則別。蓋初之問義。但問能住。能降之法。此之而問。恐菩薩。將入證道。心有執著。謂我能安住大乘。我能降伏煩惱。我能滅度眾生。存此分別之心。障却無住之道。故重復此問。故云。云何應住。云何降伏其心也。佛告須菩提。若善男子。善女人。發菩提心者。當生如是心。佛意云。若人欲發。無上菩提之心。當生無著無住。湛然清淨之心也。我應滅度一切眾生等者。佛了真空無相。則能所俱寂。雖度眾生已得滅度。而不起能度眾生之一念。亦不見所度之眾生。故曰。無一眾生實滅度者。則能住能降之心。自此滅矣。方具四心。言謂我應滅度一切眾生者。即廣大心也。滅度一切眾生已者即第一義心也。而無有一眾生實滅度者。即常心也。既具常心。自無四相。即不顛倒心也。何以故者佛自徵問。以何意故菩薩無有眾生可度者。以離四相故也。意云。若菩薩有我相等。即非菩薩者。此一節文義。與前同。但前來。是破情顯智。所破之情。即無我人等四相粗執。所顯之智。即般若真智。自此之下。忘智顯理。破我人等四相細執。由此賢位。漸入聖階。故佛返顯菩薩。心離四相。雖終日度生。而不見有一眾生可度也。所以者何者。此是重徵上義。以何所以不見有生可度也。佛乃再告須菩提言。實無有法。發阿耨菩提心者。佛恐菩薩誤認。當生如是心者。以為真實是心。亦非真性中本有。故此說破。亦為非實。故云。真空理中。本來無相。實無有法發阿耨多羅三藐三菩提心者。蓋實際理地不受一塵。一法不立。何有於法也。傳大士頌曰。空生重請問。無心為自身。欲發菩提者。當了現前因。行悲疑似妄。由智最言真。度生權立我。證理即無人。

【經】須菩提於意云何(至)如來者即諸法如義。

此節之文。由前實無有法。發菩提心者而來。意謂。無發心者。則無菩薩。云何釋迦。於然燈佛所名曰善慧仙人。布髮掩泥。獻華於然燈佛。行菩薩。行得授記耶。佛恐善現有此之疑。故舉問之云須菩提於意云何。如來於然燈佛所。有法得阿耨菩提不。須菩提答言。不也。世尊。善現答義云。如我解佛所說義者。彼時善慧於然燈佛所。實無有法所得菩提。離諸分別取著。因悟無法可得。故得受記。佛言如是如是者以善現既會法無所得。佛許其說乃印證云。如是如是。而又返後告云。須菩提。實無有法得阿耨菩提。欲令善現。知法無得。深契至理也。偈曰。菩提性本空。云何說有得。無說無得者。是真菩提因。佛復云。若有法。如來得阿耨多羅三藐三菩提者。然燈佛則不與我授記。乃至當作佛。號釋迦牟尼者。蓋如來所證妙果。乃是心地法門。實無所得之理。離諸名相。無有取著也。今云受記者。即無授記中。而論授記此即無生之記也。善慧以無所得心。得無生智。即無生記者也。何以故者。徵起之辭。以何意故。前云。實無有法。得菩提果。故受然燈之記。遂去疑云。既無佛果。豈有佛法耶。下文釋。答如來者。即諸法如義。如者即真如也。不偽曰真。不異曰如。蓋了諸法皆如如理。非虛非有不變不遷。通徹三世。橫亘十方。此顯真如佛即真法體。若有所得。即非佛菩提也傳大士頌曰。法性非因果。如理不從因。謂得然燈記。寧知是舊身。

【經】若有人言如來得阿耨(至)如來說名真是菩薩。

此節經文。乃是防難。佛謂若有人難言。既如來即諸法如義如是則為有佛。實有法在。何故前云。實無有法可得佛果菩提。故佛乃呼須菩提。而自答云。實無有一法。佛得阿耨菩提。蓋法性本具。豈從外得也。佛再招須菩提。而告之曰。如來所得阿耨菩提。於是中無實無虛者。以如來所得菩提。忘情而證也。無實者此理非有為相也。無虛者。即真如體也。無著云。虛實是有無斷常二邊。此二俱遣。中道自然契矣。故云無實無虛。是故如來說一切法者。此是結前徵釋之義也。因是之故。如來說一切法。結前如來者。即諸法如義也。皆是佛法者。結前無實無虛之法也。佛又呼須菩提。所言一切法者。即俗諦法也。即非一切法者。即真諦理也。是故名一切法者。即不住真俗。中正之道也。然此真。如非別有法。即一切色等諸法也。此法離性離相。即真如體。故一切法皆是佛法也。此真如體雖不離於諸法。然於諸法亦不可取著。故云。即非一切法。是名一切法。永明云。如來真如。即一切法真如。一切法真如。即如來真如也。佛仍呼須菩提言。譬如人身長大。意云上說如來所證真如之體。遍一切處。可謂。長大又恐善現。起長大之見。故佛重設喻徵之曰。譬如人身長大。以世俗諦中。故有大小之問。豈非真實為大。乃虛名為大身而矣。須菩提答之云。世尊。如來說人身長大者。善現因喻有悟答曰。非大身。以真諦之中無大無小。故云。即非大身也。是名大身者。以真俗不二。有無互顯。即第一義法身也。佛又告須菩提菩薩亦如是。此如是者乃指上之辭。以菩薩若住是言。我當滅度無量眾生者。此菩薩心有執著

。自言我能滅盡煩惱。能度眾生。而有四相。亦有能所。即非菩薩也。何以故者。徵起上義。佛謂須菩提言。以菩薩實無有法可得。心離四相。而不見有一眾生可度。達一切法。悉皆空寂。本來不生。不見有生死。不見有涅槃。故云。實無有法名為菩薩也。是故佛說一切法無我。無人。無眾生。無壽者。是故者。結上文。之義。乃謂實無有法。名為菩薩。此菩薩已離四相。雖云滅度一切眾生。而無有一眾生實滅度者。以真空無相。實無有法。故佛說一切法。無有四相。其所顯者真空無相法也。佛又呼須菩提云。若菩薩作是言我當莊嚴佛土。是不名菩薩。佛意云。若是菩薩。修行六度。欲去莊嚴佛土。見有淨土可嚴此人未離四相。即是法執。不達法空。是不名菩薩也。言佛土者。即心土也。以佛土無相。如何莊嚴若有莊嚴。即四相未除。是凡夫見也。何以故。如來說莊嚴佛土者。即非莊嚴。是名莊嚴者佛意云。以何意故。莊嚴佛土如來復以離相無為。即莊嚴佛土。又以佛土本來清淨。何假莊嚴。故云。即非莊嚴也。今云莊嚴佛土者。以俗諦中。可說莊嚴也。即非莊嚴者。以真諦中。何莊嚴之有也。是名莊嚴者。以第一義中。嚴而非嚴。無嚴而嚴。真俗雙顯。即中道莊嚴也。佛又呼須菩提。若菩薩通達無我法者。如來說名真是菩薩此節雙結上義。無我即無人執。無法即無法執。以法界混然。身土平等。向無佛道可成。無眾生可度。故云。通達無我法者。二執既無。二空之理自然顯矣。既具二空。即真菩薩也。傳大士頌曰。人與法相待。二相本來如。法空人是妄。人空法亦除。人法兩俱實受記可非虛。一切皆如幻。誰言得有無。

妄盡還真。眾生何曾滅度。法空無我。菩提本自圓成。直饒遇然燈印證而不疑。已隔來世。況釋迦重審而方悟。轉涉途程。且道不涉途程底人。脚跟還點地麼。

初一節文。牒經中之義也。以須菩提。問安住降伏佛答云。菩薩發阿耨菩提心者當生如是心。降伏煩惱諸妄。安住大乘真理。妄心既盡。真空自顯。故云。妄盡還真也。眾生何曾滅度者。亦牒經義。以菩薩既滅妄心。已離四相。雖滅度一切眾生已。而無有一眾生實滅度者了真空理中。生死涅槃尚不可得能度所度眾生亦空。故云。眾生何曾滅度也。法空無我者。亦牒經義。此菩薩已證法空人空之理。通達無相之道。以實無有法得證菩提。故受然燈之記汝於來世作佛。故云。菩提本自圓成也。直饒遇然燈印證不疑者。此牒經義。謂以實無有法。得阿耨菩提。是故然燈佛與我授記。當得作佛。號釋迦牟尼。此是印證不疑之言也。已隔來世者。此是科家把住世尊。料揀之義。意謂。雖是印證分明作佛。爭奈已隔來世。又過一生。方得成佛。若乃直下成佛。早是遲了八刻。更待來世轉沒交涉。況釋迦重審而方悟者。此牒經義。因須菩提聞說。實無有法得阿耨菩提。故得授記作佛。遂疑既無佛法。豈有佛果耶。故釋迦重審云。何以故如來者。即諸法如義。是真佛真法也。須菩提於此方悟。諸法皆如如佛也。轉涉途程者。乃科家把住說話。如斯悟去。轉涉途程。費力不少也。且道不涉途程者是科家徵問之辭。上云。印證不疑已隔來世。重審方悟轉涉途程。即今不涉途程

之人。脚跟還點地麼。此問要人直下承當。不涉修證可謂。迢迢空劫勿能收。豈與塵機作寄留也。

丈夫自有衝天志 不向如來行處行

此二句。乃答上文。不涉途程。脚跟點地之義也。言丈夫者。即本來人是大丈夫。具衝天志不拘凡聖。獨步千方得大自在。故名丈夫也。不向如來行處行者。此言丈夫天然尊貴。不假修持。不隨他人脚跟所轉。不受他家處分。故云。不向如來。修進地位階級而行。可謂。相好巍巍大丈夫。一生無智恰如愚從來佛祖猶難望地獄天堂豈可拘。

直指單傳密意深 本來非佛亦非心
分明不受然燈記 自有靈光耀古今

前二句。發明大丈夫漢。不向如來所悟所證處履踐也。故科家云。直指單傳密意深者。以直指當人心體。本來是佛單傳法印。密意甚深。非中下可知。本來具足。非佛非心。原無名相。可謂。有名呼不得無位可安排也。後二句。言此道無說無傳故如來於然燈佛所。因無法可得。無菩提可證。故得受記。今云分明不受然燈記者。以此理。雖授記而無記可受。自有一段靈光。輝天鑑地。耀古騰今。古德云。父母未生前。凝然一相圓。釋迦猶不會。迦葉豈能傳。故云。自有靈光耀古今也。

百歲光陰一夢中 老來不與舊時同
眾生好似風無定 搖落桃花滿地紅

前二句。歎一切眾生。時光雖有百年猶如一夢相似。而四大形骸漸有改變。以童顏貌壯。乃至老耄故。云。老來不與舊時同也。後二句。以眾生從生至死。喻如之風無有定止。或是東風而便西風。喻似眾生。恰見朱顏綠鬢。不久白髮滿頭也。搖落桃花者。喻如人生似花開。人。死如花[冰-水+射]。此警生死無常。覺悟早修也。謂電光易滅。石火難留。落花無返樹之期。去水絕歸源之。日。人之生滅事可同然萬法皆空何不悟矣。故云搖落桃花滿地紅也。

不知誰解巧安排 捏聚依前又放開
莫謂如來成斷滅 一聲遠續一聲來

此四句。元是川老禪師。頌二十七分無斷無滅之義。科家借來發明此分經文也。初句問云。此真如理。不知誰解巧安排。意云。人有機謀巧妙。能所見識善能造作。謂之安排也。次句。呈上安排之義引公案之文證明。昔睦州和尚示眾云。裂開也在我。捏聚也在我。時有僧問曰。如何是裂開。州云。三九二十七。菩提涅槃真如解脫。即心即佛我且恁麼道。汝又作麼生僧曰某甲不與麼。州云。盞子落地。榍子成八片。僧問。如何是捏聚。州乃斂手而坐。川老借此之義述成四句。意謂。睦州用處。雙眼圓明這邊那邊應用不缺。有巧妙之智也。如實際理地。不受一塵。無法可得。無佛可成。無記可受也。正放開時。似今時門頭不捨一法。有法可得。有佛可成。有記可受

也。三句。以須菩提。聞佛前來於然燈佛所。以無法可得。無菩提可證。故得受記。善現疑云。既說於法無得。於道無證。即是無有佛法。如何過去諸佛。因聞法悟道耶。今言。實無有法。豈非佛果成其斷滅也。佛答云。如來者。即諸法如義。故不成斷滅矣。故云。莫謂如來成斷滅者。此是與人拈情。莫說如來無法可得。無果可證。無生可度。無土可嚴。如同捏聚了無一物。謂之斷滅。此本有法身之理。遍一切處。無時不現。無處不周。如同裂開。法法全彰。而豈有斷滅也。可謂法身遍在一切處。一切眾生及國土。三世悉在無有餘。亦無形相而可取也。一聲還續一聲來者呈上無斷滅之義。如空谷應聲相似。空谷無聲呼之即應。以喻此理。無有斷滅。故云。一聲還續一聲來也。

銷釋金剛科儀會要註解卷第五

銷釋金剛科儀會要註解卷第六

姚秦三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

一體同觀。萬法無差。凡聖共一家。如來五眼。照耀塵沙。

此科昭明太子。判此一段經文。為一體同觀分第十八。以恒河沙世界國土中。所有眾生若干種心。如來以智眼悉見。又云。如來說諸心皆為非心者。以如來智入眾生心。既□□心差別。即十法界。同一真心也。故立一體同觀之名也。萬法無差者。此言萬法。總該十界。依正之法。如來以法眼。觀一切諸法。無非真空實相。故無差別也。如云。若人欲識真空理。心內真如還遍外。情與無情共一體處處皆同真法界也。凡聖共一家者。言此四聖。六凡染淨十界。皆從真如妙道流出。故云凡聖一家。既共一家。即是一體。張拙秀才云。光明寂照遍河沙凡聖含靈共一家也。如來五眼者。即肉眼。天眼。慧眼。法眼。佛眼也。傳大士頌曰。天眼通非礙。肉眼礙非通。法眼唯觀俗。慧眼直緣空。佛眼如千日。照異體還同。圓明法界內。無處不含容。此之五眼。通該十界。而優劣有殊。如經所說。五眼皆如來所具。無非佛眼也。照耀塵沙者。如來以五眼。悉見恒沙世界。眾生之心也。

三心洞徹。本性無涯。春來日暖。無樹不開華。

三心洞徹者。言如來。洞徹三心。而不可得。蓋三世之心。過去已滅。未來未至。現在不住。皆是虛妄生滅。故求之不可得也。唯有本來之性。無有邊涯。以妄心盡處。即是真性。一切諸法。無不彰顯此心也。春來日暖者。此是科家分明指示。一體同觀。萬法無差之義。如陽氣初回。春來日暖。柳塘花塢。暖日和風。三草二木暢茂調達。春意無私。乾坤普徧。故云。無樹不開華。以喻如來具此五眼。觀眾生心。一體無差也。

如來具六通 三心不可窮 筭沙無億數

到此體皆同

前二句。牒經文之義。六通者。即前五眼之義。文出般若經一神境通者。能震動十方變一為多。變多為一等。此即身如意通也。二天耳通者。能過人天耳。如實能聞種種音聲也。三他心通者。能知十方。諸有情類。心心所法也。四宿命通者。能知十方。有情之心。年月日時。劫量處所。名姓死生。自他等事也。五天眼通□。能見十方有情無情色像死生善惡等報□□漏盡通者。能知十方有情。自他漏盡。不盡等也。今云。如來以六通。觀恒沙世界眾生若干種心。反三心皆不可得。故不可窮也。三心既空。真心自顯也。後二句。亦牒經義。指歸一體。佛以六通。悉見恒沙眾生之心。即非真心。故以筭沙無數億世界。眾生心佛。悉了知一一體空。絕十法界之相狀。皆不

可得。無非真空實相。故云。到此體皆同也。

○一體同觀分第十八。

【經】須菩提於意云何(至)如是世尊如來有佛眼。

此分名為。一體同觀。如來以五眼。觀眾生妄心。皆不可得。無非實相。故云一體也。因須菩提聞佛前說。菩薩不見彼是眾生。可度。不見我是菩薩為能化。不見淨佛國土。如是則不見諸法。名為諸佛如來。然則如來具足五眼。豈都無所見耶。此敘善現疑因。下顯所斷也。佛問須菩提。如來有肉眼不。須菩提答云。如是世尊。如是者。領其問義。如來有肉眼。意云。肉眼者。見障內色。名為肉眼也。肉眼具五義。一見粗不見細。二見近不見遠。三見明不見暗。四見前不見後。五見障內色。不見障外色。故五義也。若是多生。已種清淨善根凡夫具足宿命肉眼。見百由旬。二乘肉眼。同凡夫見百由旬。菩薩。肉眼。見三千世界。佛之肉眼。與菩薩同見三千世界。又能見人中無數世界。已上總肉眼也。佛復問。如來有天眼者。於肉眼邊引清淨天眼。見障外色名為天眼。如阿那律是也。若佛天眼。能見諸佛所有細色。淨名云。唯佛世尊得真天眼。照見恒沙佛土不以二相。智論云。凡夫天眼。見一四天下。小聲聞見小千界大聲聞。見中千界。阿那律。見三千界緣覺小者。見中千界。大者見大千界。菩薩天眼。遠見一切世界。已上總明天眼也。佛仍云。如來有慧眼者。以根本智照真理故。以能照真理。故名慧眼也。若二乘慧眼。唯見生空菩薩慧眼。俱見二空。不能窮盡。如來慧眼。窮盡無餘。已上總明慧眼也。佛亦云。如來有法眼者。即後得智。能說法度人也。後得智者。從根本智後。方得其名。能達俗明真。名為法眼也。華嚴鈔云。二乘法眼。但見無常苦空等諸法總相。粗觀不能細觀。若要不知根欲性殊。非真法眼也。菩薩法眼。了知根欲性殊。及一切法。若總若別。若粗若細。無不窮盡也。佛之法眼。所知障盡。無法不知。無生不度。故云。法眼也。佛又云。如來有佛眼者前四在佛。總明佛眼。又見佛性圓極。名為佛眼也。涅槃云。九地已前聞見佛性。十地眼見佛性。而未了了。於自身中。十分見一。故知隔羅穀見月。如來佛眼。無不窮盡。所以圓極淨勝。無如佛眼也。

【經】須菩提於意云何如恒河中(至)未來心不可得。

佛問須菩提。以一恒河中所有沙。一沙對一恒河。有如是沙等恒河。實無量無邊之多。又以諸恒河中所有沙數。一沙對一佛世界。此沙數世界。實無量無邊不可說之多也。又以沙數世界國土中。所有眾生有若干種心。如來悉知悉見。以此則知佛眼所見。爾所國土中。眾生心念。無量若干如來悉知。以顯佛眼圓明了知纖毫無惑。無不知見也。佛又云。何以故者。徵問上義。以何意故。如來悉知若干種心也。佛意云。如來說諸心者即眾生若干種心有染有淨。既有染淨之相。即俗諦也。非心者妄識本空妄心空處即真心。是真諦也。是名心者。真心不滅。不屬有無。真俗二諦。即第一義心也。佛又云。所以者何者。徵釋上文。非心之義也。意云本覺不知。隨妄流轉。故

有三世之念。謂思念前事者。為過去心。過去已滅了不可得。思念今事者。為現在心。現在無住了不可得。思念後事者。為未來心。未來未至了不可得。三世推求俱是虛妄皆不可得。即非常住真心。即為依也心。虛妄心若一念有生滅心。即成六十二種邪見。九百種煩惱。若悟無法無相。平常真心。即法體空寂不生不滅。但起念時。莫執莫斷。不取不捨。即三際無踪一念圓具。則生死涅槃平等無二。妄心本空真心顯矣。傳大士頌曰。依他一念起。俱為妄所行。便分六十二。九百亂縱橫過去滅無滅。當來生不生。常能作此觀。真妄坦然平。

五眼悉圓明。如揭日曜恒沙之世界。三心不可得。似撥火覓滄海之浮漚。縱使窮諸玄辯。竭世樞機。到此總須茫然。且道是何標格。

初一節文。牒經之義。眾生之心。佛眼悉知悉見。不獨佛眼圓明。照十法界。如來五眼一一圓明普照。故舉喻云。如揭日照恒沙之世界。揭者高舉也。如日昇空高下俱照也。如云。佛眼如千日。照異體還同。所照之境雖多達境本空同歸真空實相也。三心不可得者。亦牒經義即過去心。現在心。未來心。悉皆虛妄了不可得。故舉喻云。欲尋此妄心無有處所。如撥大覓滄海之浮漚。火中決定無水漚。妄心定無形跡。以顯妄念本空。不可尋究也。本淨偈曰。見道方修道。不見復何修。道性如虛空。虛空何所修。徧觀修道者撥火覓浮漚。但看弄傀儡。線斷一時休也。縱使窮諸玄辯者。是科家發明此心。至極之處。難以開口。三世諸佛話會不及。歷代祖師忘鋒結舌。一大藏教不曾談著一字。千七百則公案未嘗動著絲毫。故德山焚却鈔疏舉火云。窮諸玄辯。若一毫置於太虛。竭世樞機。似一滴投於巨壑遂乃焚之。以此心。言說不得。所以到這裏總須茫然也。且道是何標格者。乃科家徵問之義。此心以何標指格量。向下顯露者哉。

直饒講得千經論 也落禪家第二籌

此二句答上問之義也。以此心。三世推尋了不可得所以。三際求心心不有。心不有故妄元無。妄元無處即菩提。生死涅槃本平等。到此田地。口欲談而詞喪。心欲緣而慮忘。故云。直饒講得千經論也落禪家第二籌也。昔德山宣鑑禪師。精究律藏。於性相諸經。貫通旨趣。嘗講金剛般若。時謂之周金剛。曾言同學曰。一毫吞海海性無虧纖芥投針針鋒不動。學與無學唯我知焉後聞南方禪道頗盛。師意不平乃曰。出家兒。千生學佛威儀。萬劫學佛細行。尚不得成佛。南方魔子。敢言直指人心見性成佛。我常棲其窟穴。滅其種類。以報佛恩。遂擔青龍鈔疏出蜀。至澧陽路上。見一婆子。因歇息。買餅點心。婆子指擔云。這個是甚麼文字。師曰。青龍鈔疏。婆云。講何經耶。師曰。金剛經婆云。我有一問。汝若答得。吾施一齋。若答不得。別處去買。婆問云。金剛經道。過去心不可得。現在心不可得。未來心不可得。未審上人點那個心。師無語。婆云。饒汝講得千經論。一向臨機下口難遂指往參龍潭信禪師。發明心地。將所持青龍鈔疏。併平昔所集文字。以火焚之。方知此心出言教外。所以釋迦云。吾

四十九年。未嘗說一字。達磨曰。直指本心本來是佛。不立文字教外別傳。使人不泥文字名相也。

心眼俱通法界周 恒沙妙用沒踪由
雲收海湛天空闊 明月蘆華一樣秋

前二句。牒經義。以如來了三心不可得。同一真心。又以五眼。照十法界。同觀一體。故以三心。五眼體用雙彰能所圓融。充徧法界。無處不周無時不徧也恒沙妙用者。言此心。雖具足恒沙性德妙用真空體用周徧法界。以實相妙理亦不可得故了然無有踪由也後二句。舉喻明宗。顯上真心周徧。理事不分之義喻如雲收顯一色晴空。海湛印森羅萬象天空映水之澄海闊涵空之相。故天水不分上下一體也明月蘆華者。此言明白二字。月即是明。蘆華是白。月與蘆華明白不分同為一色。喻如心眼俱通周徧法界。事理無礙。故云。明月蘆華一樣秋。

荒郊日落草風悲 試問骷髏你是誰
或是英雄豪傑漢 回頭能有幾人知

此歎世人。生必有死。死必葬於郊外。行人往來。至日落時。四望無人。惟聞草風悲聲。此一句言境也次句是科家問義。故云。試問骷髏你是誰也。後二句。答上問義。此等骷髏或是英雄豪傑。如三齊王韓信神機大將。似楚霸王項羽蓋世英名。臨終未免無常命盡同歸下土也。回頭能有幾人知者。此言骷髏既死。神識奔往不能回頭。知他是何等人。或富貴。或貧窮。古德云。我道無你言有。無常來。都空手。故云。回頭能有。幾人知也。

末法娑婆人苦灾 互相食噉惡如豺
刀兵疫病遭饑饉 厭離閻浮歸去來

釋迦牟尼佛。一代之教典其法有三。正法一千年。像法一千年。人多解脫禪定。多聞修福。受諸快樂也末法一萬年。以解脫禪定多聞修福俱無。人多苦惱。惟好鬭諍。故云。末法娑婆人苦灾也。互相食噉者呈前入苦灾之義。一切眾生造十惡業。輪轉五道。經百千劫。於多生中。互相殺害。遞相食噉。如人死為羊。羊死為人是也。刀兵疫病者。呈前末法入苦灾之由刀兵。疫病。飢饉。即小三灾也。瑜伽論云。末法將盡。有三種小三灾出現。謂飢饉。疫病。刀兵也。飢饉灾者。至人壽三十歲時。方始建立。當爾之時。精妙飲食不可復得。唯煎朽骨共為醯會。若遇一粒稻。麥粟稗等子。重若摩尼寶珠藏置箱篋。而護惜之。因此飢饉有情之類亡沒殆盡。此之饉灾經七年七月七日方乃得過彼諸有情。起下厭離。由此因緣。壽不退減。饉灾遂息也。至於人壽二十歲時。本起厭患。今乃退捨爾時多有疫氣。相續而生。彼諸有情悉多殞沒。如是病灾。經七月七日方乃得過。彼諸有情。起中厭離。由此因緣。壽量無減。病灾乃息又至人壽十歲時。本起厭患。令還退捨。爾時有情展轉相見。各起猛利殺害之心。由此因緣隨執草木。及以瓦石皆成刀劍。更相殘害。經一七日方乃得過。復有三種最

極衰損。謂壽量衰損。依止衰損資具衰損。且壽量衰損者謂極至十歲。依止衰損者謂其身量極至一磔。或復一握。資具衰損者。唯以粟稗為食中第一。以髮褐為衣中第一。以錢為莊嚴中第一。五種上味悉皆隱沒。謂酥蜜甘蔗油鹽皆變其味。爾時有情。起上厭離。不復退減。又捨惡壽量增長善壽量由此因緣。漸增至八萬四千歲。如是二十減。二十增。合為四十中劫。是時諸趣有情。次第盡沒。故結句意云。何不念佛。捨此之若。出離三灾生極樂國。永無此苦也。

法界通化。似有還無。箇箇本無殊。圓明一點。無來無去。

此科昭明太子。判此一段經文。為法界通化分第十九。蓋法界者。即理事無礙法界也。以布施福德無故。事理圓融也。既不住相。所以變化有為之福。通作無為之理。故云。法界通化也。似有還無者。此七寶布施因緣果報分明不昧。故云似有。於真空理上。了福德無有。故云還無。猶如雲起。虛空常存實有。浮雲似有還無也。箇箇本無殊者。此句呈前以福德無故。似有還無。即真空理。人人本具。箇箇不無。及十法界眾生。均秉同賦。下文形容無殊所以也。圓明一點者。此理既是箇箇無殊。這點圓明。無所從來。亦無所去。可謂真淨明妙虛徹靈通。無去無來冥通三際。卓然獨存者也。

搬柴運水。好用工夫。松稍月朗。衣穿露寶珠。

此是科家慈心太煞。分明指示。圓明一點。在日用間。或搬柴。或運水。皆是神通妙用工夫。石屋詩云。古人為道入山中。日用工夫在己躬。添石墜腰舂白米。攜鋤帶雨種青松。擔泥拽石何妨道。運水搬柴好用工。驢懶借衣求食者。莫來相伴老禪翁。松稍月朗者。乃科家借事顯理。發明事理無礙之道。可謂。月篩松影高低樹。日照池心上下天。悟心云。江月照。松風吹。永夜青霄更是誰。霧露雲霞遮不得。箇中猶道不知歸。衣穿露寶珠者。此引繫珠喻。指示圓明一點。譬如有人至親友家醉酒而臥。時親友以無價寶珠。繫於衣下。其人不知。甘受貧窮。後至衣穿破壞。露出此珠。其人歡喜。以此珠貿易所須。得大富貴。六道眾生亦復如是。佛從塵點劫中。而將此理指示。不覺不知輪轉生死。今乃遇佛。開悟自性。方得道果。喻如事法體空。真性自顯。故云。衣穿露寶珠也。古德頌曰。昔年衣裡曾繫珠。今日云何不覺知。後逢親友還指點。猶如久病遇良醫。

珍寶滿盈剎 福德等難量 若到無福地

方知滋味長

初二句牒經義。以七寶。滿大千世界。以用布施。所得福德。利益難量。以是因緣得福甚多。即佛事門中不捨一法也。後二句。亦牒經義。以福德無故。如來說得福德多。以布施時。心無執著。希望福德。此明無相施。即無為福。故云。若到無福地。方知滋味長。即實際理地不受纖塵也。

○法界通化分第十九。

【經】須菩提於意云何若有人滿(至)如來說得福德多。

註曰。此節經文。名法界通化分。因須菩提。疑上之心既有住著。是為妄心顛倒。以此妄心。修諸福德。亦是顛倒。不明善法。故佛斷疑問之。捨大千真寶布施。其福甚多。若執著福德實有。即為住相。其福有盡。故如來不說得福德多者。此乃人天小果。有漏之因。終不免輪迴。畢竟有墮落。所以不足為多也。以福德無者。以離相布施。乃清淨無為稱性之福。性如虛空。其福無量。若能施之人。以佛智為本。修布施行。悉皆離相。不見福為實有。故如來說此人所得福德甚多。天台智者頌曰。三千大世界。七寶滿其中。有人持布施。得福乃如風。猶勝慳貪者。未得達真宗。終須四句偈。知覺證全空。

布施因緣。實人天有漏之果。無為福德。超凡聖通化之功。噫。有為雖偽。棄之則功行不成。無為雖真。擬之則聖果難證。且道不擬不棄時。如何是聖諦第一義。

初一節牒經義。若人以滿大千七寶布施因緣。得人天福。是有漏果。福盡墮落也。次一節。言無為福勝者。以布施之人。心無住相。了達三輪體空。不執福德實有。以福德無故。所以變化有為之施。成於無為之福。是為無漏因果。故能超凡聖通化之功也。噫者。嘆辭也。有為雖偽者。偽者假也。以布施雖是有為假法不實。以諸佛菩薩若非檀波羅蜜。不能成就佛果菩提。自利利他之功行。所以六度之中。以布施為首也。無為雖真者。以無為之道。雖是真實人人本具。如有行人執著無為。心生擬度。不肯依法修進。則聖賢菩提妙果。難以得證。可謂。法身非相。瞻有相而見法身。道果無修。速勤修而成道果。且道不擬不棄者。乃科家徵問之義。意云。即今不擬無為。依理而證。不棄有為。假施以行。二法俱備。如何是聖諦之理。聖諦者。即中道也。此之問義。要人即二邊。而顯中道也。

達磨當機曾直指 廓然元不識梁王

此二句。答上問頭。如何是聖諦第一義。此義梁武帝曾問達磨。如何是聖諦第一義。磨云。廓然無聖。帝曰。對朕者誰。磨云不識。帝不契。磨遂渡江。至少林九年面壁也。科家意云。此聖諦之理。達磨曾直指云。廓然無聖。以此理中。聖名了不可得。故云廓然。元不識梁王。非但梁王不識。縱使從上諸佛諸祖。也無他識處。所以云。從來共住不知名。運用相將任麼行。自古上賢猶不識。造次凡流豈得明。

寶施囊中福倍常 華開錦上最難量

就中撈倒空王殿 露柱燈籠盡放光

初二句。牒經義。一法一喻也。寶施囊中者。以七寶滿三千界布施於人。乃是有為之福也。又云。福倍常者。雖行布施。達福德無故。了福性體空。成無為之福。故云福倍常也。華開錦上。此喻七寶布施。如一段錦。達此布施福德性空。而不住相。似錦上又添其華。所以即有為施。而成無為之理。事理俱融。真俗不二。是故稱性福

德最難量也。後二句。呈前之義。以不住福德也。空王殿。即理也。撈倒者。即不住那邊之理也。露柱燈籠。即事也。放光者。以無情之物放光。即事而能顯理也。若是行人。布施不住福德。無為離相。二邊不住。中道不安。所以道。那邊不坐空王殿。爭肯耘田向日輪。

郊園又是一翻春 骷髏縱橫白似銀
日炙風吹休懊惱 骷髏總是利名人

此四句。歎人生浮世。生死無常。其中富貴貧窮。貪名逐利。皆是常情之事也。起句。言郊外園材。又是一翻春光造化之境也。次句。謂人死葬於郊外。骷髏縱橫。如銀之白。此言人死敗壞之相也。三句。此身既壞。白骨猶存。狼籍遍地。又被風吹日炙。科家勉云。不須懊惱者。生必有死。成必有壞也。結句。言此骷髏。悉是爭名奪利。慳慳之人。可謂。人間富貴華間露。紙上功名水上漚。古德云。名利數人皆作夢。高強幾箇土中埋。前思後想頻頻歎。多少英雄去不迴。此頌娑婆眾生。而有敗壞之苦。後偈指歸淨土。永無逼迫之苦也。

淨土永無三惡道 寶方寂靜不輪迴
金繩界道經行處 好念彌陀歸去來

起句。所謂淨土。永無地獄餓鬼畜生。三惡之道也。次句。寶方寂靜不輪迴者。此言清淨之義。以彼國土無有女人。又不經營衣食買賣交易。所以寂靜也。生彼國者。唯住正念。遠離諸根分別顛倒妄想。即得壽命無量。不受輪迴故也。三句。又以彼國所行徑路。皆是瑠璃之地。無有墻壁街巷。故用黃金為繩。以界道傍。為經行處也。末句。科家意謂。西方既無三惡之道。亦無輪迴之苦。其國清淨快樂無窮。故勉云。好念彌陀歸去來。所以優曇頌曰。平生好結淨方緣。懶把工夫去說禪。一句彌陀無別念。不教一箇喪黃泉。

離色離相。無住無依。法界普光輝。無得無說。無是無非。無來無去。無相無為。

此科昭明太子。判此一段經文。為離色離相分第二十。蓋如果不應以具足色身見。又不應以具足諸相見法身也。此達三十二相。了不可得。即真空實相故。離色離相為名也。無住無依者。因離色故。即無住。因離相故。即無依。既無住無依。即真空之理也。法界普光輝者。此理既離色相。盡十方徧法界。總是一箇智境所現。物物頭頭。皆為一段光明。故云。法界普光輝也。無得無說等者。此科經文。如來不應以具足色身見。又不應以具足諸相見法身也。以法身無有色相。所以無得無說。無是無非者。此心不是有。此心不是無。以此心不屬二邊也。無來無去者。此心不屬未來。不屬過去。不屬現在。即三際俱無。故云無來無去也。無相無為者。以此心無有相狀。無有作為。不以諸相見。

澄潭月朗。石人戴帽歸。

此二句。乃科家。發明離色離相之義。以澄潭月朗。喻如法身清淨。明白一色。如寒潭皎月。靜夜鐘聲。隨扣擊以成聲。觸波瀾而不散也。石人戴帽者。宗門以石人表理。無情識也。戴帽歸者。表無功用中。能作功用。此喻法身離相。即色相而見法身。至理絕言。借微言而彰至理者哉。

知得如來意 玄空不復尋 具足非具足
聲色兩分明

前二句。出如來本意。佛意欲令眾生。不可在色相上見如來。若人達色相本空。而不住著。不妨色相全體。即法身也。既即色相全體。即是法身。不復離色相外別求玄空。故云。不復尋也。後二句。牒經義。若人會得具足色身。即非具足色身。具足諸相。即非具足諸相。行人若向聲色兩處。會得分明。全體即是法身。古德云。一切聲是佛聲。一切色是佛色。所以溪聲常瀉空王偈。山色全彰古佛身。故云聲色兩分明也。

○離色離相分第二十。

【經】須菩提於意云何(至)即非具足是名諸相具足。

註曰。此節經文。名離色離相分。以須菩提。聞佛前來所說。如來者。即諸法如義。乃無為真如之佛。又聞次前所說。變化有為而成無為。乃是無之法。是故起疑云。既是佛法無為。云何佛身。有八十種好。三十二相。而可見耶。佛為斷此疑。故有是問。云佛可以具足色身見否。善現領會佛義。答云。如來不應以具足色身見。意云。如來法身。故非色身可見矣。以法身離相離名。絕於視聽之表也。何以故者。徵問之義。以何意故。法身非色身可見。善現即云。如來說具足色身者。乃為眾生現身說法。故云。具足色身。即俗諦也。即非具足色身者。以如來法身。故非色身可見。故云。即非具足色身。即真諦也。是名具足色身者。以法身未嘗離色身。即俗也。以色身未曾離法身。即真也。以真俗併顯。即為中道。故云。是名具足色身也。佛又問須菩提云。如來可以具足諸相見法身否。善現即解問義。答云。如來不應以具足諸相見。意云。如來法身。亦非諸相可見也。何以故者。徵問之義。以何意故。法身不以相見。即云。如來說諸相具足者。以如來。為利眾生。降跡人間。現具足相。為生說法。即俗諦也。即非具足者。然則現相說法。其體元空。了不可得。故云。則非具足。即真諦也。是名諸相具足者。以法身不離諸相而現。即俗也。以諸相不離法身而生。即真也。以真俗互顯。雖相而無相。雖說而無說。即二邊顯中道。故云是名諸相具足也。

有相有身。如來莊嚴具足。分賓分主。空生解辨親疎。直得賓主兩忘。色相俱離。如何是主中主。

此文牒經之義。有相者。即如來三十二莊嚴相也。有身者。即如來十八種好。具足身也。分寶者。即如來具足色身。具足諸相。乃應身也。分主者。如來即非具足色身。即非具足諸相。乃法身也。空生解辨親疎者。以空生領解佛意。向佛答云。此法身。不以色身見。不以諸相見。此是親切之處而言也。又云。如來具足色身。具足諸相。乃疎遠而論也。此之寶主。是為教中之說也。若論衲僧門下。實難湊泊。非言可及。如臨濟會下。有二僧對面相顧。齊下一喝。有僧請問臨濟。此一喝還有寶主也無。濟答云。寶主歷然也。可謂一喝分寶主。照用一時行。此是極妙窮玄。言辭路絕也。直得寶主兩忘。色相俱離者。乃科家與人拈情。令人離此二途。別行一路。寶主兩忘者。以臨濟宗旨。寶者事也。主者理也。直得事理兩忘也。色相俱離者。要人離了三十二相。八十種好。二俱不立也。如何是主中主者。此是科家。要人直下承當主中之主。即法身向上一著也。

君臣道合無回互 認得分明不是渠

此是科家答上之義。君臣道合者。即寶主不分也。無回互者。即事即理也。認得分明不是渠者。將此寶主事理。直饒認得分明。猶且不是。不可認著。可謂眼中撥盡黃金屑。觸處縱橫鳥道玄。昔僧問曹山。五位君臣旨訣。山云。●正位。即屬空界。本來無物。○偏位。即屬色界。有萬像形。[○@(-/?)]偏中正者。捨事入理也。[○@(?/-)]正中偏者。背理就事也。



兼帶者。冥應眾緣。不隨諸有。非染非淨。非心非偏。故曰。虛玄大道。無著真宗。從上先德。推此一位。最妙最玄。要當詳審辨明也。君為正位。臣為偏位。臣向君。是偏中正。君視臣。是正中偏。君臣道合。是兼帶語也。時有僧問曰。如何是君。山云。如德尊寰宇。高明朗太虛。僧曰。如何是臣。山云。靈機弘聖道。真智利羣生。僧曰。如何是臣向君。山云。不墮諸異趣。凝情望聖容。僧曰。如何是君視臣。山云。妙容雖不動。光燭本無偏。僧曰。如何是君臣道合。山云。混然無內外。和融上下平。山又云。以君臣偏正言者。不欲犯中。故臣稱君。不敢斥言是也。此吾法之宗要者哉。

端嚴相好紫金身 正眼看來總不真

要會問酬親的意 蘊空無我亦無人

前二句。牒經之義也。端嚴相好者。即如來三十二相。八十種好也。紫金身者。即如來妙色紫摩金身也。雖是端嚴相好。若以金剛爍迦羅。堅固正眼看來。總是不真

。非是清淨法身。真如妙理。此法身者。三光猶未照。五眼尚難窺。如來相好之身者。乃感報應化之身。因修萬行而得。非根本智。故曰不真也。後二句。是科家。分明指示。審問行人。若要會得佛與須菩提。如斯問酬親切端的之意。須是五蘊皆空。四相非有。亦要了盡能空之法。方是人法兩忘。始會問酬之義也。

圓音唱處響清清 試聽金剛一卷經
薦取眾生方外句 秤錘是鐵太分明

初二句。言如來說法。一音普應也。圓音者。以佛演談般若大法音聲響亮清徹。要人向聞聲處會取。即是此一卷經。眾生隨類各得所解。十方世界眾生悉皆得聞。各解其義。故云圓音也。若有行人信受此法。試聽此一卷金剛般若經。其中所說實相般若。自性法身。四聖六凡。依此而出。即如來所證所說圓音之義。實有不可思議微妙功德也。故令試聽。不可錯過也。後二句。科家慈心太煞。分明說破。直下薦取。不可向色相。文字上領會。故叮嚀誠勉。薦取方外之句。即指此經般若大智。人人有分。又恐不知重為宣說。秤錘是鐵。太甚分明。何曾隱諱。迷人只知喚作秤錘。忘却本身原來是鐵。一切眾生妄認諸法。不知諸法。原是般若智慧而生。故云。秤錘是鐵太分明也。

陌下桃花春又開 風吹殘杏雪飛垓
紛紛落處誰人悟 笑指靈雲歸去來

此四句頌。科家要人。向見色處會取。即是此理也。前二句。言陌桃花春又開者。不但桃花開綻。又被風吹殘杏。其花飛處。如雪相似。紛紛亂落。誰人悟得此花落時。唯有靈雲一覩便知。豁然大悟。方知花有開謝。樹木常存。一切諸法亦復如是。法有生滅。性無生滅。所以靈雲見桃花而悟道。此乃見色明心。就路還家。故云。笑指靈雲歸去來。其文出傳燈錄。靈雲見桃花。忽然大悟。偈曰。三十年來尋劍客。幾回葉落又抽枝。自從一見桃花後。直至而今更不疑。大滄曰。從緣入者。永無退失。汝善護持。玄沙云。諦當甚諦當。敢保老兄未徹在。靈雲曰。師兄還徹也未。玄沙休去。

非說所說。不在分別。本性離言說。

此科昭明太子。判此一段經文。為非說所說分第二十一。蓋佛謂須菩提言。說法者。無法可說。是名說法。故立此名也。不在分別者。言說法者。是俗諦。非說者是真諦。今以非說所說。乃二諦融通。不分真俗之別。故云。不在分別也。本性離言說者。此科佛謂須菩提云。若有人言如來有所說法。則為謗佛。不能解我所說故。須菩提說法者。無法可說。是名說法也。蓋本性空寂。離諸相貌。言詞相寂滅。不可以言說。故云本性離言說也。

潺潺綠水。出廣長舌。圓音落落。無間無歇。休將耳聽。紅爐飛片雪。

此一節文。呈前本性。離言說之義乃顯無情。善能說法也。潺潺綠水出廣長舌者。即無情說法。以高山流水。悉皆說法。所以東坡。看無情說法話有省。偈曰。溪聲便是廣長舌。山色無非清淨身。夜來八萬四千偈。他日如何舉似人也。圓音落落無間無歇者。亦是無情說法之義。乃明暗色空風動塵起。山河草木圓音無間。可謂塵說剎說熾然說。三世十方一時說。何曾間斷。故云圓音落落無間無歇。昔古德。聞殿角鈴鳴而惺。偈曰。銅唇鐵舌太尖新。樓閣懸來不記春。言外百千三昧法。因風說與箇中人也。休將耳聽紅爐飛片雪者。是科家。將前無情所說之義。八字打開。兩手分付。要人離心意識。領會。出凡聖路頭字。故云。休將耳聽也。此理若將耳聽終難會。眼裏聞聲方得知。如紅爐飛片雪相似。言此大冶紅爐。豈容片雪飛過。以喻至理豈能容得言說取捨。意路分別。所以非思量處。識情難測。真如法界。無自無他。此亦是紅爐不容片雪之義也。潭州長髭曠禪師。初參石頭和尚。頭問從甚麼處來。曠云嶺南來。頭曰。大庾嶺頭有鋪。功德成就也未。曠云。成就久矣。只欠點眼在。頭曰。莫要點麼。曠云。特請。石頭垂下一足示之。曠便作禮。頭曰。汝見甚麼便禮拜。曠云。某甲見處。如紅爐上一點雪也。

我心本非有 無心說向誰 所說非所說
為被上乘機

起句。我心本非有者。以不著相好。即是法身。故云非有也。次句。既不取著。即是無心。若無有心。向誰所說。故云無心說向誰也。後二句。意云。似此無言無相之道。雖如來所說一代時教。只為眾生不明此理。故有所說。若以真空理上。元無一字。故云非所說也。如斯說與非說。唯被大乘之機。非小乘人。而可擔荷。故云。為被上乘機也。

○非說所說分第二十一。

【經】須菩提汝勿謂如來(至)如來說非眾生是名眾生。

註曰。此分名為非說所說之義也。佛因須菩提。疑如來色身相好。既不可得見。如何為人說法耶。為斷此疑。故有是問。云汝勿謂如來作是念。我當有所說法。莫作是念。何以故者。此是佛自徵問。以何意故。無法可說也。若有人言。如來有所說法等者。意云。如來悲願深重。隨感而應。於無說而說。雖說而無說。眾生不達此理。謂佛有說。是為謗佛。不能解佛所說故。以如來說法四十九年。皆是應機而說。於真空理中。未嘗談著一字也。所以諸法寂滅相。不可以言宣。若執佛有法可說。即不解佛義也。佛又告須菩提云。說法者。無法可說。是名說法者。佛意云。前來有說。則為謗佛。今云說法者。乃應機而說。即俗諦也。無法可說者。以稱理而言。即真諦也。是名說法者。今於無說中。為生有說。不妨稱性而說。乃於有說而顯無說。是真說。即中道也。爾時慧命須菩提。白佛言世尊。爾時者。當起問之時也。慧命者。以善現解空第一。與般若空慧相應。以慧為命。故稱慧命也。頗有眾生於未來世。聞說

是法。生信心否者。善現聞佛前云。色身乃非身之身。說法乃非說而說。既身說俱妙。恐聞者難信。所以有此疑問。故云。生信心否也。佛答須菩提之問。彼非眾生者。即凡夫眾生。於此般若。不能生信也。非不眾生者。即聖體眾生。於此般若。能生信解也。又解云。彼非眾生者。非凡夫眾生。即大乘之人。能信無說中真說。於般若智。能生信解也。非不眾生者。正是凡夫眾生。聞說此法。豈能信解者哉。存此二解。智哲再詳也。何以故者。佛自徵問前義也。佛又呼須菩提言。眾生眾生者。此牒前文。彼非眾生。非不眾生也。如來說非眾生者。牒前非是凡夫眾生。是大乘人。即聖體眾生能生信解也。是名眾生者。牒前是凡夫眾生。豈能信解此法也。

如來無所說。慈雲甘露灑濛濛。慧命未嘗聞。明月清風空寂寂。正恁麼時。且道是何境界。

如來無所說者。即經云。無法可說。是名說法。以無說之說。乃為真說。故喻如慈雲普覆。甘露均霑。所以慈雲遍布於十方。甘露悉濛於大地也。慧命未嘗聞者。以須菩提聞佛所說。領解深義。雖說而無說。乃為真說。聞而無聞。乃為真聞。故喻如明月清風。乾坤普照也。所以淨名云。夫說法者。無說無示。其聽法者。無聞無得。大品云。聽如幻人聽。說如幻人說。無聽於無說。是名真實法也。正恁麼時者。科家意云。正當無說無聞。且道是何境界。此即徵問之義。向下發明也。

欲得不招無間業 莫謗如來正法輪

科家意謂。恐人聞佛。說此圓頓法門。無說無得。疑而不信。故此叮嚀誠勉。當慎口業。免墮三途。故經云。若有人言。如來有所說法。即為謗佛。所以科家云。欲得不招無間業。莫謗如來正法輪。以般若是諸佛之母。即眾生之性。有情無情。從此而生。故稱正法也。永明壽云。實相及般若。三毒元無異。若能信受者。法利廣無邊。若有謗般若。罪過莫大焉。現世受殃禍。生身陷地獄也。以此般若。是世出世間。凡聖之母。猶如大地。無物不從地生。若謗般若。則謗一切三寶佛地般若。以十法界。從般若中來。若無般若威光。實無一塵可立也。今引謗此般若。現世獲報者。可誠後來不信者也。唐時。勾龍義。閬州人。長慶三年。於郾縣傭力自給。以邑人有疾。乃往省之。見寓金剛經。毀謗斥而止之。言便瘡。醫不能愈。五六年。每聞鄰人念此經。而自責曰。我前謗此經故瘡。若能愈者。終身敬奉。每念經時。倚壁聽之。疑若念得純熟。一日偶入寺中。逢一老僧禮之。僧問何事。遂指口云瘡。僧以刀割舌下。便能而言。音與念經。正如鄰人之聲。久訪此僧不見。忽於壁上。見畫像須菩提。曰此是割舌之僧也。

道本無言喚不醒 藥因救病出金瓶
可憐億萬人天眾 依舊歎歎側耳聽

此偈。起句是法。次句是喻。科家意云。其實大道之理。本無言說。六凡四聖。悉皆具足。眾生迷而不知。所以世尊廣說諸經。借有言說。以顯無言之道。而教化之

。有情眾生。悉皆茫然。而莫曉解。故云。喚不醒也。藥因救病者。譬如妙藥。因人有病。方出金瓶與之令服。諸病皆愈。佛說此法。亦復如是。因眾生有貪瞋癡病。不識自性。故有言說。指示真性。普令開悟。除煩惱病。故云。藥因故病出金瓶也。後二句。可憐億萬者。歎機不醒之義。如世尊在靈山會上。一日陞座良久。文殊白槌云。諦觀法王法。法王法如是。世尊便下座。此顯無言之道。合會聽眾。或人。或天。而有億萬之數。悉皆不知也。依舊默默者。乃科家。歎此聽眾。都向世尊言語中尋討。不能於言外。薦取無聲之道。所以喚之不醒。故云依舊默默側耳聽也。默默者。即癡相之貌也。

鼓聲集眾下林泉 莫學金剛問普賢
高坐猊臺傳秘要 妙通一指老僧禪

前二句。引宗門古德。乃證無言之道。昔高僧上堂云。鼓聲纔動大眾雲臻。無限天機一時漏泄。不辜正眼便合歸堂。更待繁詞沉埋宗旨。縱然釋迦不出世。古今常自說。達磨不西來。少林有妙訣。所以。鐘鳴鼓響。無非觀音入理之門。栢短松長。盡是毗盧一真境界。故云。鼓聲集眾下林泉。此顯聞聲見色。皆是其道也。莫學金剛問普賢者。此是科家拈情。爾時世尊與諸天人。說法已畢。會中有金剛藏菩薩。即從座起。而白佛言世尊。普賢菩薩。廣大行門。不可思議。唯願世尊。略為說之。使諸菩薩依而行之。佛言。若說普賢行門。經於塵劫說之不盡。欲要得知。汝入法界藏身三昧。觀察方乃知之。于時金剛藏菩薩。入定周徧觀察普賢行門。盡空遍界。猶如微塵。無量無邊。不可說。轉不可說。行門微細。猶如雨點。莫能知之。還從定出白佛。讚歎普賢行門廣大。窮之不盡。不知邊際。佛言。普賢行願。即諸佛行願之本。唯佛與佛。乃能知之。況汝一人。豈能窮乎。故云。莫學金剛問普賢。返顯離言之道。非言所及也。後二句。呈上無言之道。迥超語言也。高坐猊臺傳秘要者。以善知識坐獅子座。傳授心要不立文字。即心是佛。莫向外求。故云。傳秘要也。妙通一指者。即是傳秘要之義。昔俱胝和尚。凡有人。問佛問祖。問禪問道。俱胝即以一指指示之。如是三十年。只如此行。再無他說。此顯道本無言。令人向豎指處會取。即動用中顯道。故云。妙通一指老僧禪也。

有病有危終退墮 不生不滅不輪迴
西方淨土常安樂 無苦無憂歸去來

前二句。以淨穢兩土。苦樂相校也。有病有危者。以此穢土。人有八苦。天有五衰。人間天上。福盡壽終。退墮三途。故云。終退墮也。不生不滅者。以淨土之人。無有生死。得大涅槃。壽命無央數劫。一生即補佛位。然後得入不生不滅涅槃。故云。不輪迴也。後二句。言西方之快樂也。以西方淨土。凡所云為。皆悉如意。無三途八難之苦。有百千無量之樂。故云。常安樂也。又無貧窮之苦。亦無衣食之憂。黃金為地。白玉成池。四色蓮華。萬億受用。普勸諸上善人。何不急早念佛同生淨土。共

證菩提。故云。無苦無憂歸去來也。

無法可得。情識難量。本體露堂堂。包含法界。相與無相。

此科昭明太子。判此一段經文。名為無法可得分第二十二。蓋以佛於阿耨菩提。無有少法。可證可得。故立此名也。情識難量者。既是菩提無法可得。非凡夫二乘。妄情妄識所可測量。故云。情識難量也。本體露堂堂者。科家恐人錯過。分明說出無法可得之道。本有之體。顯露堂堂。普天匝地。無處不周。無時不現。所以徧法界而無外。析鄰虛而無內也。包含法界相與無相者。此一段無法可得之理。本體堂堂。總統包含。三種世門四種法界。有相無相悉在其中。所以道。色虛空含法界。端嚴具足威神大也。

行住坐臥。仔細參詳。知音勘破。炎天降雪霜。

科家恐人。於包含法界處。深奧難明。又別指一條活路。却向四威儀中。檢點此理。不要放過。故云。行住坐臥。仔細參詳。蒲室頌曰。行住坐臥絕隨緣。日用何妨涉正偏。無影樹頭風浩浩。夜明簾外月涓涓也。知音勘破者。科家意云。若是知音具眼者。於包含時行住處。校勘得破信得及。便知道。冷灰中豆爆。枯樹上華開。熱烘烘處還生津潤。冷水冰時恰要溫和。便可指南作北。顛拈倒用。於諸法中。得大自在也。所以寒山詩云。樂甚無為國。逍遙不住家。都緣山色好。轉見世情賒。六月炎天雪。三冬嶺上華。早來塵累盡。何處發根牙。

無為所得法 得法何所持 無有少法故

三藐三菩提

前二句。牒經之問義云。阿耨菩提。為無所得耶。意云。既是無為無所得法。云何所持也。後二句。亦牒經義。佛答云。乃至無有少法可得。是名阿耨菩提。意云。既是無有少法可得。豈有所持者矣。既無得無持。乃真菩提。故云。無有少法故。三藐三菩提也。

○無法可得分第二十二。

【經】須菩提白佛言(至)是名阿耨多羅三藐三菩提。

註曰。此節經文。名無法可得分。以須菩提。聞前第十三疑中。如來實無有法。得無上菩提受然燈記。云何却有修證。故疑而問之云。佛得阿耨菩提。為無所得耶。佛答云。如是如是。此是如來。允許善現之問。又云。我於無上菩提。無有少法可得可證。是名阿耨菩提。謂性中。無有少法可得無有所得。則蕩然空寂。不可以形相求。不可以言說顯。但說名為無上正等正覺而已也。智者禪師頌曰。諸佛大覺智。覺性本無涯。佛因有何得。所得為無耶。妙性難量比。得理即無差。執迷不悟者。路錯幾河沙。

法無可得。是名阿耨菩提。道無可傳。直指涅槃正眼。只如得而無得。傳而不傳。畢竟是何宗旨。

首初一節。牒經之義云。乃至無有少法可得。是名阿耨菩提也。次一節。引宗教。以從上佛祖。不立文字。即心是佛。所以僧問德義禪師曰。向上一路千聖不傳。和尚還傳也無。答云。鐵丸驀口塞。難得解吞人。頌曰。舉體露堂堂。十方無罣礙。千聖不能傳。萬靈咸頂戴。擬欲共商量。開口百拶碎。此即是直指涅槃妙心。金剛正眼也。只如得而無得者。黃龍南禪師云。大覺於然燈佛所。無一法可得。方證菩提。而得受記作佛。故云。得而無得也。傳而不傳者。昔阿難。請問迦葉尊者。世尊傳金襴袈裟外。別傳個什麼。迦葉召云阿難。阿難應諾。迦葉云。倒却門前剎竿著。阿難於言下大悟。方知此道。只在當人分上。本無傳受。故迦葉云。昔如來將般涅槃。以正法眼。付囑於我。我今將隱。於雞足山入定。以待彌勒。復將此法。付囑與汝。汝善傳持。勿使斷絕。而說偈曰。法法本來法。無法無非法。何於一法中。有法有不法。阿難作禮。故云。傳而不傳也。畢竟是何宗旨者。此是科家徵問之義。既是無得無傳。畢竟是何宗旨。下文伸答是也。

三賢尚未明斯旨。 十聖那能達此宗

此二句。答上問義。以上無得無傳之道。縱使三賢十聖。不能明了通達也。三賢者。即住行向。謂之三賢位也。十聖者。即十地菩薩。謂之十聖位也。今言未明未達此宗者。以顯教外別傳之旨。深奧難知。地上菩薩。尚然未達。其他小聖轉更茫然也。所以積行菩薩。[曝-京+恭]腮鱗於龍門。上德聲聞。杜視聽於嘉會也。

從來無說亦說傳 纔涉思惟便隔關

語默離微俱掃盡 寥寥獨坐古靈山

前二句。牒經之義。經云。無有少法可得。此無得中豈有所說。既是無說豈有所傳。所以云。千聖不傳。諸祖不說。故云。無說無傳也。纔涉思惟者。科家意云。此無說無傳之道。汝等諸人。若是擬議思惟云。既言無說。今三藏之教。豈非說乎。歷代諸祖聯芳續焰。豈非傳乎。若如此見解。便於此道。隔千山萬水。遠之遠矣。故云隔關也。後二句言。語默離微者。乃肇公。離微體妙品之義。即是出微入離二門。以此道。語則涉於微。默則涉於離也。科家意云。若於此道不涉思惟。超出語默離微之外。方是無說無傳之道。故云。語默離微俱掃盡矣。寥寥獨坐者。若於語默離微處掃盡。自然純清絕點。纖塵不立。毫髮不容。淨盡無餘。全歸威音那畔。空劫已前。更有何法。可說可傳乎。故云。寥寥獨坐古靈山。昔僧問明辯禪師曰。語默涉離微。如何道不犯。師曰。橫身三界外。獨脫萬機前。是也。

爐中裊裊試拈香 普請天龍降道場

功德無邊應有報 莊嚴淨土事難量

前二句。事也。科家意云。欲求淨土。必須建立壇場。前來嚴淨之中。已設供養。祈禱三寶。伸請了畢。今復設爐然香。其煙氣旋轉裊繞。即柁曳貌。以再拈香普請者。所謂行人。晝夜六時。懺悔發願回向淨土。燒種種香。設種種供。普請八部天龍

。俱降道場。祈求加護。欲使外魔不入。內道可成也。後二句。理也。言行人。種種行道。所獲功德。無量無邊。應報佛祖之恩。莊嚴諸佛淨土。其事實難可校量也。

六欲諸天具五衰 三禪尚自有風灾
直饒修到非非想 也則不如歸去來

六欲諸天者。此諸天人。未離貪欲。古德云。四王切近忉利抱。夜摩把手兜率笑。他化自在眼相視。此是六欲諸天報。故曰六欲也。婆沙論云。總是十善八齋。故得生天。六欲諸天。六種不同。一者。若持不殺之戒。生四王天。二者。持不殺不盜之□。生忉利天。三者。持不殺不盜不邪淫。生夜摩天。四者持不殺不盜不邪淫。不妄語不兩舌不惡口不綺語。生兜率天。五者不殺盜邪淫。妄言兩舌惡口綺語。兼持八戒。生化樂天及他化自在天也。六天受福各各不同。福盡之時。而有五種衰相現前。謂一諸天嚴身具中。出五種音聲。善奏曲樂。人所不及。其命終時。樂音不奏。二諸天身光赫奕。晝夜相照。身無有影。其命終時。光昧影現。三諸天膚體細滑。入香池浴。纔出水時。水不著體。猶蓮華葉。命將終時。水便著體。四諸天種種境界。悉皆殊妙。漂脫諸根。如旋火輪不得暫住。其命終時。專著一境。不能捨離。五諸天身力強盛。眼不瞬動。其命終時。身體虛弱。眼便數動。此是諸天。五種衰相現前。則知福盡。墮落入於惡道。故云。六欲諸天具五衰也。三禪有風灾者。長阿含經云。此世界。至壞劫時。三灾欲起。此世間人。皆行正法。正見不倒。悉修十善。上求梵世。地獄餓鬼畜生。三途業盡。來生人間。聞此火灾。無有師法教之。皆自然而修十善。亦求上昇梵世。修羅亦求上昇。東西二洲。例此皆然。北洲聞知。求生欲界天中。修離欲故。方生梵世。若五逆十惡。謗方等般若。毀滅三寶。墮阿鼻獄中罪未畢者。以此娑婆地獄已壞。轉置他方阿鼻獄中受罪。此四大洲有情盡已。萬億四天下。皆同名為有情世間壞已。如是亦經十九中劫。次壞器世間。然後四洲有七日出現。天久不雨。萬物枯竭。泉源乾涸。眾生業力盛故。生大黑風。吹令海水兩皆披分。至於海底。攝取阿鼻獄中。日宮殿出。人間草木凋落枯死。萬物不生。復生大黑風。攝取第二日出時。小小溝坑河渠泉源。盡皆乾竭。海水漸下七百由旬。大黑風力。攝取第三日出時。四大河及阿耨達池。悉皆乾竭。海水漸漸下千由旬。大黑風力。攝取第四日出時。四大海水下六千由旬。大黑風力。攝取第五日出時。四大海水下七千由旬。悉皆乾盡。大黑風力。攝取第六日出時。地厚十六萬八千由旬。悉皆煙出。須彌及七金十寶等山。上至六欲天。下及諸大地獄。皆悉盡滅。大黑風力。攝取第七日出時。四天下六欲天。盡是大火。直至梵天以火燒壞經一中劫。此一四天下如此。則萬億四天下皆悉是火。壞劫。總經二十中劫。此世界壞。有其三種。即水火風也。壞者亦如前說。如是七次火灾後。世界復成。又被水壞至二禪天。從極光天。即生大雲。降注大雨。其器世界。如水化鹽。消鎔皆盡。彼水自竭為一水灾次復七火。灾度七火灾。還有一水灾。如是火灾。共經四十九翻。水灾滿至七次。復經七火灾後。世界復成。又被風灾

壞至三禪天。其風之力。吹散妙高須彌。何況餘小山也。第四禪天。雖無外灾。此等有情。生與殿生。命盡殿隱。如是器情世界。而有成壞。故云。三禪尚自有風灾也。非非想者。昔鬱頭藍弗。是舍利弗之先師。於山林中坐禪。有鳥鵲聲鳴。不得入定。移恒河邊坐禪。魚鱉弄藻跳水作聲。亦難入定。遂生惡心。嗔言發願云。於未來世。身入水中食於汝等。身飛空中噉於汝等。後得滅受想定生於非非想。壽命八萬四千大劫。禪定亦同。受八萬四千劫定與壽命。福報俱盡。命終之後。墮飛狸身。身同狐狸。傍生兩翅。入水吞魚鱉蝦蟇。飛噉空中鳥鵲之類。此之禪定。不出三界。未免輪迴。可謂一念嗔心起。八萬障門開也。不如歸去來者。若生淨土。尚不聞婦女之聲名。豈有三惡道之苦報。壽命無量一生補處。即證無生不受輪迴。故云。也則不如歸去來也。

銷釋金剛科儀會要註解卷第六

銷釋金剛科儀會要註解卷第七

姚秦三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

淨心行善。休教點污。此法離凡愚。是法平等。萬法皆如。

此科昭明太子。判此一段經文。為淨心行善分第二十三蓋以無我人等四相。修一切善法。即得菩提。故以為名也。休教點污者既無四相點污。名為淨心。所修之行自然清淨。方得菩提也。此法離凡愚者。以明此經。是離凡夫小乘愚法聲聞之教。以此聲聞。雖無我執之情。愚於法執之病。故教離也。是法平等者。此科是法平等。無有高下是名菩提。以此真理。在聖不增故曰無高。在凡不減。故曰無下。所以平等也。萬法皆如者。既云。凡聖平等。高下不分。一切萬法。皆如如理。故云。萬法皆如也。

青山綠水。與我何殊。金生麗水。蟾光滿太虛。

此是科家。發明前來。萬法皆如之義。故指青山綠水是無情法。於我自性本來不殊。所以云。情與無情共一體。處處皆同真法界。昔僧問慧濟和尚曰。如何是祖師西來意。濟云。青山綠水。僧曰。未來時還有意也無。濟云。高底高。低底低。頌曰。迷悟親疎總不干絲毫動處便多端。烏鴉綠綠原非染。白牯馴馴豈用看得理任從骸骨碎。窮源須到骷髏乾。青山綠水無窮意。多少禪流被境瞞。金生麗水者。在益州永昌郡。其水出金也。蟾有傳云。蟾蜍似蝦蟆。而祇三足也。張衡云。羿妻請西王母不死藥。竊之奔月中為蟾蜍。壽八千歲。頭上有角。額下有珠。丹書八字。科家借此二事。以顯情與無情。雖是一體。不可瞞預混濫。喻如麗水一星金。流沙混不得。又譬此理。不混分明。如蟾光月色。塞滿太虛。無有留礙。任運而轉。古德云。夜半金烏昇碧漢。天明玉兔上青峰欲窮一點靈明處。力在隨緣不住中。

淨心平等行 無下亦無高 善法非善法

何須口叨叨

前二句。牒經之義也。心無四相故名淨心。是法平等無有高下。修一切善法。即得阿耨菩提。故云平等行。無下亦無高也。後二句。既離四相而修。故名善法也。復遣執著。故曰。即非善法也。法既無法。說亦無說。故云。何須口叨叨矣。

○淨心行善分第二十三。

【經】復次須菩提是法平等(至)即非善法是名善法。

註曰。此節經文。名淨心行善分也。佛於此重複。次第招告須菩提言是法平等無有高下。是名阿耨菩提者。意云。明此法身菩提。在六道意內。亦不曾減下。在諸佛心中。亦不曾增高是名平等無上菩提也。以無我。無人。無眾生無壽者。佛意云。所

以名為菩提者。以真性中本來平等。故無我人四相。是名菩提也。修一切善法者。若離四相而修善法。於一切事無染無著於一切境不動不搖。於一切法無取無捨。於一切時當行方便。隨順眾生普令歡喜。皆悟菩提真性。此即名為修一切善法。即得阿耨菩提也。佛又呼須菩提云。所言善法者。牒上修一切善法。即俗諦也。如來說即非善法者。佛欲遣去執著善法之跡。即真諦也。是名善法者。以真俗無礙即菩提無漏之法。乃中道也。此答前今問義。菩提無得。今以正助修善。乃成正覺答之。正謂離四相成正覺。即正因佛性也。助謂修善法成正覺即緣因佛性也。達妄即真亦名助道也。傳大士頌曰。水陸同真際。飛行體一如法中何彼此。理上豈親疎。自他分別遣。高下執情除。了斯平等性。咸共入無餘。

法無高下。故諸佛心內眾生。時時成道。相離我人。故眾生心內諸佛。念念證真。所以道。念佛不礙參禪。參禪不礙念佛。至於念而無念。參而不參。洞明本地風光。了達唯心淨土。溪山雖異。雲月皆同。那裏不是平等之法。要知縱橫無礙處麼。

法無高下者牒經之義也。下文解釋。以諸佛所證菩提之心。凡聖平等。無有高下。悉皆具足。所以九法界眾生。總在諸佛心內所含以眾生所具之心。與諸佛所證菩提。本來無別。諸佛成道。即眾生成道。以眾生不會在諸佛心外。故時時成道。此乃心佛眾生。同一體也。相離我人者。亦牒經義。以眾生既離我人四相。即得阿耨菩提。所以下文解釋。眾生所證之心。即是諸佛所證法界真心。此心四聖六凡。均秉同賦。故諸佛總在眾生。所證心內所含。以眾生心諸佛心。本來無別。諸佛證真即眾生證真。以諸佛不在眾生所證心外。故云念念證真。此乃眾生所證之心。與諸佛之心同一體也。清涼曰。諸佛心內眾生。新新作佛眾生心內諸佛念念證真也。所以道。念佛不礙參禪者。以念佛法門。開十六種觀門而修。即思惟修。要在行人。收視返聽專注一境觀佛相好不得雜想。方契唯心淨土。自性彌陀也。參禪者。梵語禪那。此云靜慮。以此心寧靜能除思慮。亦思惟修。要令行人。單提一念屏却諸緣。外不見山河。內不執五蘊。十方世界獨顯一真心也。以此念佛參禪。名雖有殊。校其用心。皆是一也。故云。念佛不礙參禪。參禪不礙念佛。優曇頌曰。參禪念佛本來同。看破分明總是空。功到自然全體現。春來依舊百花紅。至於念而無念參而不參者。呈前參禪念佛。只要除妄盡即真。雖終日念佛。此真何曾有念。雖終日參禪。此理何曾有參。以此真心。離於參念也。古德云。念佛先須念自心。自心無念絕追尋。若言有佛有心念。笑倒南無觀世音。洞明本地風光者呈前不念不參之義。若是參禪。洞明本地風光。得見本來面目。即是參而不參之効驗所謂。渡河須用筏。到岸不須船也。若是念佛。了達唯心淨土得見自性彌陀。即是念而無念之効驗。可謂自家一箇彌陀佛。見了何須用念頭也。溪山雖異者。以溪水。有湖海江河淮濟之異。山有五嶽泰嶺之別。雖山水各異雲月。皆同。但有水處悉皆現月。但有山處無不起雲。所以道有水曾含月。無山不帶雲。以此溪山。喻如參禪念佛。名雖有異。雲月喻如念佛參禪。見理皆同也。那裏不是

平等之法者。乃科家總結上文。參禪念佛不相妨礙之義。既是雲月皆同處處普現此理。凡聖平等。有情無情。法法皆具故云。那裏不是平等之法。古人道。教演三乘佛所宣。禪分五派祖師傳。教明性海歸真理。禪唱宗風達本源。會得禪宗須合教。但明教旨自通禪。禪教兩般都拈却。萬里無雲一樣天要知縱橫不礙處者。是科家徵問。要人著眼。知道參禪念佛。見理不礙。性於諸法平等下文伸答顯露也。

處處綠楊堪繫馬 家家有路透長安

此二句。答上文不礙之義。分明指出隨流得妙。如處處綠楊堪可繫馬。家家有路皆透長安。此喻一切諸法。普彰此理。古德云。月到梧桐上。風來楊柳邊夜深人復靜。此境與誰言。可謂。頭頭顯現。物物全彰東西南北。豈用思量。所以道處處菩提路。門門古佛家。

山華似錦水如藍 莫問前三與後三
心境廓然忘彼此 大千沙界總色含

前二句。引宗。喻如是法平等。無有高下。此言法身真理如山花似錦。湛水如藍。皆是顯揚此道。可謂。山河豈木揚真諦風月樓臺演妙音也。莫問前三與後三者。科家分明指示。既是諸法顯理。何必更問前三後三之義。昔無著禪師。遊五臺至中臺之下。荒僻野處。文殊化一古寺。接他歇息。文殊便問。近離甚處著云。南方。殊曰。南方佛法。如何住持。著云。末法比丘。少奉戒律。殊曰。有多少眾。著云。或三百。或五百。無著却問。文殊此間佛法。如何住持。文殊曰。凡聖同居龍蛇混雜。著云。有多少眾。殊曰。前三三後三三。無著不契。却坐喫茶。文殊舉起。玻璃盞子曰南方還有這箇否。著云無。殊曰。尋常將什麼喫茶著無語至天明辭去。文殊令均提童子。送出門首。無著問童子云適來汝師道。前三三後三三。是多少數。童子召云。大德。著應諾。童子云。是多少數。著罔措又問此是何寺。童子。指金剛窟後面著回首視。化寺童子。悉隱不見。唯存空谷。所以雪竇頌曰。千峰盤屈色如藍。誰謂文殊是對談堪笑清涼多少眾。前三三與後三三。科家意謂既是山花似錦一草一木。無非文殊。無著又問。前三三後三三是多少。蓋不明凡聖同居龍蛇混雜之道。故云。莫問前三三與後三三。此責無著。錯過文殊也。後二句。顯此法身。無有高下之義心境廓然者。若了此心平等。心無凡聖之執。境無高下之見。所以忘彼忘此。事理圓融能所俱泯方知心色太虛。量周沙界。故云大千沙界總包含。

口裏叨叨念彌陀 心頭人我似干戈
其心若不從頭改 磕破骷髏當得麼

前二句。科家意謂。如今目前之人。雖是喫齋念佛。其實人我之心未除。雖終日念佛。不明念佛之性。然有念佛之名。而無念道之實。外相雖善。內心實惡故云。心頭人我似干戈。佛告獅子吼菩薩云。念佛參禪。有身寂靜。心不寂靜者。或有比丘靜處坐禪遠離四眾。心常積習貪嗔癡。是名身寂靜。心不寂靜也。心寂靜身不寂靜者。

或有比丘。親近四眾國王大臣。而常斷絕貪嗔癡。是名心寂靜。身不寂靜也。身心寂靜者。即諸佛菩薩也。身心俱不寂靜者。即一切凡夫也。雖然口裏念佛。其心之內人我干戈而不息也。後二句。科家誠勉學人。雖是念佛。須要斷妄明真。其心若不從頭改惡遷善。掃除人我。縱然磕破骷髏。禮佛念佛。終不得見性。亦有我人之心也。

世上愚人無智慧 唯知愛欲及貪財
何如一筆都鉤斷 好念彌陀歸去來

始初二句。言眾生愚迷無有智慧。唯知愛欲貪財。心上不生智曰愚。意內不發慧。曰癡。情染五欲。曰愛。執著財寶。曰貪。故云。唯知愛欲及貪財也。末後二句。科家誠勉離貪。若是念佛行人。而看不破財欲二事。現世皆為枷鎖纏縛。過去必入三途受苦。故教將此惡業因緣。一筆鉤斷。專心念佛。願生淨土歸去來也。

福智無比。二法周圓。塵沙結良緣。功行累劫。果滿因圓。

此科昭明太子。判此一段經文。名為福智無比分第二十四。蓋以三千世界七寶布施為福。不及持經四句之福。此福無比。以持經顯般若之智成就佛果。斯智無比故立名也。二法周圓者。以福智二法周圓。成兩足尊。此名自利也。塵沙結良緣者既是二法周圓自利。得成佛果。然後分身百億。入於塵沙世界。教化眾生廣結良緣。此名利他也。功行累劫者。呈前福智既已周圓。而又自他俱利。則知功行同佛三祇劫盡果滿因圓。即同佛之用也。

智燭普照。一月當天。圓明朗朗。無心鑒大千。

智燭普照者。既具福智二法。即同佛用教化眾生。如智燭之明。能除黑暗。似月當天。高低普照。此是平等之義。即平等性智也。一月者。能除諸暗為世光明。即成所作智也。圓明者。明之又明。故名圓明。即妙觀察智也。無心鑒大千者。此是佛果已證三身四智。無功用地。以無心利物。即大圓鏡智也。

般若真空性 福慧兩雙修 四句無為法
持念片時周

前二句。牒經之義。般若者。即智也。性。即理也。以如理智能斷煩惱。得證法身。即慧也其餘五度行檀。即福也。若復有人。以七寶布施為福。能持此經為慧。若人福慧雙修。受持四句無為之法。直下明了自性。即得成佛故云。持念片時周。以總持般若一念。即具足三身也。

○福智無比分第二十四。

【經】須菩提若三千大千(至)乃至算數譬喻所不能及。

註曰。此節經文。名福智無比分。因須菩提。前來聞佛所說。修一切善法。即得阿耨菩提。故起疑云。今佛所說善法。是無記性。豈得菩提耶。佛恐有疑。故乃斷之云。若復有人。以三千大千世界中。諸須彌山。皆七寶聚。以用布施。校之持說四句之福。勝前七寶布施。百千萬億分所不能及。故其福無比也。又諸佛所說法。雖屬名

句文身。似無記性而以四句般若之智了名句文身。皆悉體空即無漏善法非無記性。成菩提因。其福德勝此智無比也慈民偈曰。雖言無記法。而說是彼因。是故一法寶。勝無量真寶此說之義非唯是菩提因。亦由前來諸義勝故所以四句倍勝也。又以七寶布施。所得功德皆為住相。不出有為終須退墮。不如受持般若四句之偈。所得功德無有住相。得證無為成就佛果故勝前功德百千萬億。乃至不可以算數譬喻所及也。傳大士頌曰。施寶如沙數。唯成有漏因。不如無我觀了妄乃名真。欲證無生忍。要假離貪嗔。人法知無我。逍遙出六塵。

福等三千。施須彌之七寶。經持四句。耀智海之明珠。能令識浪澄清。頓使義天開朗。弘慈普濟。廣利無邊。夜半正明。還在何處。

福等三千者牒經之義。經云。若人以三千大千世界諸須彌山七寶之聚布施。所得之福。故云。福等三千也。經持四句者。亦牒經義。經云。若人以此般若乃至四句受持。為他人說。勝前之福。如耀海之明珠。以般若大智猶如大海。廣無不容。深無不納。世出世法無不包羅。又如明珠十方俱照。般若之光。亦復如是。一切諸法無不照明。故云。受持四句功德勝也。能令識浪澄清者。呈前受持般若四句功驗。喻如明珠能清濁水也。若是行人。以般若智現前。能令八識心海。波浪澄清。頓使第一義天。普現開朗。映徹。所以云。浩浩三藏不可窮。淵深七浪境為風。此言第八識為海。前七識為浪。被無始以來習氣境風。鼓動心海。故有波浪。今此般若神珠。投人心海。變濁為清了妄即真。方成智海。亦名薩婆若海。此第八識。至八地菩薩。方捨此識。始得澄清。所以轉八識。成四智。可謂。大圓無垢同時發。普照十方塵刹中。復以般若智珠。照諸法空。第一義天。朗然開現也。弘慈普濟者。前是自利。此是利他。復以弘慈運四無量心。酬四弘誓願。普濟眾生。故云。廣利無邊也。夜半正明者。玄中銘云。夜半者。子時也。彼時黑白未分。借為正位。正明者。即子時。正午月明。表正不坐正。夜裏虛明。借為偏也。科家意謂。夜半正明。還在何處者。欲顯入[廓-享+墨]垂手。曲為今時。下文伸答露也。

三身四智體中圓 八解六通心地印

此二句。是答上文之辭。三身者。即法。報。化。三身也。四智者。即成所作智。妙觀察智平等性智。大圓鏡智也。體中圓者。以法相宗中所說。轉八識為四智。束四智為三身。轉前五識為成所作智。轉第六識心王。為妙觀察智。轉第七識為平等性智。轉第八識。為大圓鏡智也。束四智為三身者。以成所作智。為報身。以妙觀察。平等性二智。為化身。以大圓鏡智。為法身。此三身。雖有三名。體中無異。故云。體中圓。即一體之中。圓具三身四智。如摩尼寶有圓滿相。有光明用。隨方現色相也。八解者。即八解脫也。六通者即六神通也。雖有八解六通。不離一心顯現。皆從法界真心。一體印出也。

寶聚山王筭莫窮 還如仰箭射虛空
洞明四句超三際 絕勝僧祇萬倍功

前二句。牒經義以須彌山王。七寶布施。得福雖是無窮。未离三界。故住相布施生天福。猶如仰箭射虛空。勢力盡。箭還墜。招得來生不如意。以天福盡還入三途也。後二句。以持經四句。洞明般若。一念頓超。過去未來。現在三際。又勝過三大阿僧祇劫。修證萬倍之功也。所以道。一念頓超空劫外。元來不許老胡知。

一毛頭上為拈花 笑倒傍邊老作家
要問相逢端的意 摩尼達哩吽發吒

前二句。是科家手眼。把住說話。昔古德示眾云。世尊於靈山會上。拈金色優波羅花示眾。唯迦葉破顏微笑。老僧於一毛頭上。拈出一朵。金色優波羅華汝等諸人還見得麼。故云。一毛頭上為拈華也。笑倒傍邊老作家者。科家意謂。似你這等示眾。喚作承機接響。做效成風。爭奈知音者哂。故云笑倒傍邊老作家也。後二句。科家拈轉話頭。別行一路。我不向世尊拈花處作活計。你要問寶主相逢端的之理。我只將一箇寶樓閣真言答之。摩尼達哩吽發吒。豈不是相逢處。所顯端的之意宗門所說。不貴語親只圖眼正。所以拈來無不是。用處莫生疑也。佛言。我於無量俱胝百千劫。雖行苦行。不得菩提。纔聞此陀羅尼。故加行相應。便成正覺決定無疑。善住陀羅尼經云。若人聞此呪受持。乃至聞名。或手觸之。或身佩之。或眼見。或書寫於紙帛壁上者。五逆四重謗佛毀法。乃至屠脍。盲聾貧窮。魔外邪見惡心。悉皆殄滅若聞名字受持者。定證無上菩提。世間國王大臣。等皆悉歡喜供養。見世具眾功德。離世眾苦。毒藥刀杖。水火惡獸。不能為害。無諸惡病。睡安覺安。臨命終時。心不散亂。諸佛現前隨意往生。諸佛國土。每於晨朝。念百八遍。若至十萬遍。見十方一切如來。二十萬遍。見一切佛土。一百萬遍。見一切佛。灌頂成就菩提此乃教中。所說之義也。

我憶彌陀如父母 彌陀觀我似嬰孩
心心念念常無間 父子相隨歸去來

大勢至菩薩云。我憶往昔恒沙劫中。有佛名無量光。十二如來相繼一劫。最後佛名超日月光。彼佛教我念佛三昧。十方如來。憐念眾生如母憶子。若子逝逝雖憶何為。子若憶母如母憶時。母子歷生不相違遠。若眾生心憶佛念佛。現前當來必定見佛去佛不遠。不假方便自得心開。我本因地。以念佛心。入無生忍。古德云。佛憶眾生勝母親。眾生憶佛合天真。子無逝逝歸來也。兩個分明是一人也。心心念念常無間者。優曇曰。若復有人決欲往生專持一念歷歷明明。祇此一念是我本師。祇此一念即是化佛。祇此一念是破地獄之猛將。祇此一念是斬羣邪之寶劍。祇此一念是開黑暗之明燈。祇此一念是渡苦海之大船祇此一念是出生死之良方。祇此一念是超三界之徑路祇此一念是本性之彌陀。祇此一念是唯心之淨土。安樂也如此念。病苦也如此念。生也如是念。死也如是念。故云心心念念常無間斷父子相隨同歸淨土。盖以彌陀如父。眾生

似子。若父子同體。決定往生也。

化無所化。機分小大。空生莫疑猜。四生六道。去住還來。

梁昭明。判此一段經文。為化無所化分第二十五。以佛無能度之心。亦不見有可度之機。如經云實無眾生如來度者。故立此名。為化無所化也。機分小大者。以心有二執。即名小乘。如經云。凡夫之人。以為有我。即我執也。以心無二執。即名大乘。如經云。如來說有我者。即是真我。故云。機分小大也。空生莫疑猜者。此科佛招須菩提。汝等勿謂如來作是念我。當度眾生。須菩提。莫作是念。實無眾生如來度者。此言於真法界中。平等無二。凡聖一如。無能度所度。故云。空生莫疑猜也。四生六道去住還來者。以因有我故起惑造業所以。妄分四生六道眾生。假名五陰實法。去來不住。輪迴不息。如車碾道。似蟻循環者也。

回光返照。面目明白。疑心頓歇。紅霞遍九垓。

此文呈前之義。前云。四生六道。雖有去來之動作。皆不離法界真心。行人若能一念。回光返照。不逐相見。不隨境轉。心無能所。所以得見本來面目。即真我也。又以疑心頓絕。能所兩忘。一道神光普天匝地。十方世界唯心所現。故云。紅霞遍九垓也。

大乘深奧理 解悟有多般 實我實無我

仔細好生觀

初句。言一真法界凡聖平等。四聖六凡。均稟同賦。故云。深奧也。次句。言凡聖雖是平等。爭奈解悟。而有多種不同。六凡迷之不解。故流轉六道。二乘悟之。執著偏空。菩薩深悟中道。執著中道。已上之人。同悟一箇真空實相。各見所解階級不等。如三獸渡河。深淺各異。故云。解悟有多般也。後二句。言實我者。即如來真我也。實無我者。即凡夫妄我也。仔細好生觀者。乃是科家叮嚀之意。要人於二我之中。仔細參詳觀看。不可錯過也。

○化無所化分第二十五。

【經】須菩提於意云何(至)如來說則非凡夫是名凡夫。

註曰。此分名化無所化。佛恐須菩提起疑。聞佛前云。是法平等無有高下。云何如來却度眾生。此是錯解故佛止云。汝等勿謂如來作是念。我當度眾生。實無有眾生如來度者。慈氏偈云。平等真法界佛不度眾生。以名共彼陰。不離於法界。論釋曰。名即眾生假名。陰即五陰實法也。此假名實法皆即法界。故云。不離於法界。既即法界凡聖一如。豈有眾生可度。故云。佛不度眾生。以一切眾生。本來是佛。所以心佛及眾生。是三無差別。故也。若有眾生如來度者。如來則有我人眾生壽者。意云。如來若謂。我為能度之佛。眾生為所度之機。此則著於四相也。反顯如來。心無能所永離四相。非度而度度而非度也。佛又云。如來說有我者。即佛之真我也。則非有我者。以佛無有妄我也。而凡夫之人。以為有我者。以凡夫之我。是我執也。佛復云。凡

夫者。如來說則非凡夫。論釋云。非凡夫者。即非生也。謂。即不生聖人之法也。魏釋經云。即毛道凡夫也。謂行人之心不定。猶如輕毛。隨風東西。故名毛道。無著云。小兒凡夫也。以癡。如小兒故也。天台智者頌。曰。眾生修因果。果熟自然圓。法船自然渡。何必要人牽。恰似捕魚者得魚忘却筌。若道如來度。從來度幾船。

無我無人。眾生自成正覺。不生不滅。如來說非凡夫。雖然箇事分明。爭奈當機蹉過。

此明如來。心無我人四相。即無能度也。以眾生自成正覺本來是佛。即無所度也。不生不滅者。言此理亘古常存。本不生滅。故如來說非凡夫。即不生聖法。故言其即心是佛。本來具足。故云。非凡夫也。雖然箇事分明者。科家意謂。雖然上文。說的此箇道理。真妄分明。聖凡平等。皆具一真法界。爭奈眾生。迷真逐妄。背覺合塵。於日用動靜之中。當機錯過。猶如持珠乞丐。懷寶迷邦也。

昔有僧問翠巖云。還丹一粒。點鐵成金。至理一言。轉凡成聖。學人上來。請師一點。師云。不點。僧云。為什麼不點。師云。恐汝落凡聖。且道不落凡聖底人。具什麼眼。

此僧問處。乃借事顯理。謂之倘不發問先家履踐無期得入。所以借道門之義而問也。昔真人謂道光曰。金丹者。乃先天真一之氣。非後天渣滓也。此之一氣。恍惚杳冥。視之不見。聽之不聞。搏之不得謂之一氣。蓋最初仙家。用九還七返之工夫。煉就金丹之大藥。此謂之內丹。若人服得一粒。即抽胎換骨。飛身輕舉。白晝昇天。可為仙也。借此以喻禪門佛祖。所說至理之言。微妙心體行人於言下會得。即能轉凡為聖。立地成佛如瓶中養鵝。一呼便出。壁上高僧。一呼便應皆是至理一言。轉凡成聖之樣子也。此僧又問。學人上來請師一點。乞望指教開示。可謂。自無安身處。未免告他人。師云。不點者。此是不答而答。分明指示。無言之道。不容開口也。僧云。為什麼不點者。此僧當頭錯過。不領其旨。所以。夜來丹鳳冲霄漢。失曉樵人逐鴈羣。師云。恐汝落凡聖者。此是落草之談。重重指示也。且道不落凡聖底人。具什麼眼者。乃科家發明上義。審問行人。於斯著眼。下文伸答是也。

直饒聖解凡情盡 開眼依前在夢中

此二句。答上之辭。要行人超出凡聖。別作生涯。意云。直饒聖解凡情俱盡。依舊夢中作夢。大槩要人。不許住著凡聖。復將不住之心。亦須掃除。方得脫灑自在。可謂。迷悟到頭俱莫戀。眼中金屑亦難留。

到岸從來不用船 坦然大道透長安

了知元不因他悟 面目分明總一般

此四句。頌上經義實無有眾生如來度者。以眾生本來具足。天真之理。踞涅槃岸。入不死鄉。豈假如來度之。故云。到岸從來不用船也。次句。以大道。坦然無修無證。人人有分箇箇圓成。故云。大道透長安。可謂。處處長安道。門門古佛家。三句

。眾生既具此道。了知元來。不因佛出。而悟此理也。結句。以佛於眾生。本來一體。故云。面目分明總一般。所以道。心。佛。及眾生。是三無差別。

前三三與後三三 擬議思量總不堪
饒汝識情俱絕斷 三生九劫更重參

初句。前三三後三三者。上文已載。昔無著文。入五臺山。華嚴寺金剛窟遇一老翁。牽牛而行。邀文入寺。翁喚均提童子應聲而出迎翁。縱牛引文陞堂。文見堂宇。皆耀金色翁乃踞床。指繡墩命無著坐。翁問曰。近離甚處。文曰南方來。曰南方佛法。如何住持。文曰。末法比丘。少奉戒律。曰多少眾。文曰。或三百。或五百。文却問此間佛法如何住持。曰龍蛇混雜。凡聖同居文曰。多少眾。曰前三三。後三三。翁喚童子。致茶并酥酪。文納其味。心意豁然。翁拈起玻璃盞問。南方還有這箇麼。文曰。無。曰將甚麼喫茶。文無對見日色晚遂問翁言。投一宿得否。翁曰。汝有執心在。不得宿。文曰。某甲無執心。翁曰。汝曾受戒否。文曰。受戒久矣。曰汝無執心。何用受戒。文辭退。翁令童子相送。文問童子。前三三後三三。是多少。子召。大德。文應。子曰。是多少。文。復問此為何處。曰金剛窟般若寺也。文。悽然悟彼叟。即文殊也。不可再見。即稽首童子。願乞一言為別。子云。面上無嗔是供養。口裏無嗔吐妙香。心裏無嗔是真寶。無垢無染是真常。童子言訖。與寺俱隱。但見五色雲中。文殊乘金色獅子。雲中往來。忽然白雲從東來。覆之不見也。明昭頌曰。廓周沙界勝伽藍。滿目文殊是對談。言下不知開佛眼。回頭只見翠山巖。科家引此問答。發明此中。不落凡聖之義昔文殊道。前三三後三三。與無著。分明指出。當人分上。一箇道理要人不落心思言議。直下會得。但涉思量擬度。於理即不堪也。縱汝離心意識。情量俱絕。於聲前領旨。句外明宗。亦不許認著更須三生九劫再參。始得相應也。

白髮雙親齒漸衰 勤供甘旨莫遲迴
試學昔日能仁氏 奉事尊堂歸去來

前二句。乃科家勸人奉孝行容老年之相。其間所用。老年之飲食衣服。為子者。或在家出家。則勤供甘美之食。出外則即迴早轉。所以論語云。父母在堂不可遠遊。遊必有方。欲至某處。不可過了時限。若過限迴來則遲。恐致父母生憂。故菩薩勸孝偈曰。堂上有佛二尊。懊惱時人不識。不用金彩莊成。非是檀香雕刻。祇看現世爹娘。便是釋迦彌勒若能供養得他。何用別作功德。不因父母所生。且道你身何得。母娘十月懷胎。多少辛勤勞役。及其坐草之時。性命懸絲危厄。須與子母相見。慙愧冤家解釋。不論是男是女。明珠寶珍怜惜。何期長大成人。全無孝義禮節。問著瞋目努睛應對如同抵敵父母彈指嗟吁。惆悵雙雙淚滴。君還如此為人。休問前程消息。我見不孝之人。虛空雷公霹靂。折罰現世貧窮。伶俜不度朝夕。勸君省定晨昏竭力和顏悅色。若要鳳髓龍肝。須得為他求覓。有無欸曲披陳。不可言前阻逆。在世甘旨無虧。死後不須追憶。君能如此用心。天地神明佑翼。若不富起有家。定須高官顯職。後二句

。指示行人。效佛行孝。故乃試學昔日能仁者。昔佛因地中。在於雪山為鸚鵡鳥父母皆盲常取好果。先奉父母。時有一田主。初種穀時。而發願言。所種之穀。要與一切眾生共噉。鸚鵡子。已知田主先有施心。故常取之。以供父母。餘諸眾鳥。榆穗滿地。主見如斯瞋心生惱。設羅捕之。鸚鵡被網。語主言。主先發好心。故敢未取。今何見捕。主曰。取穀為誰鳥曰。有盲父母。以穀奉之。主聞憐曰。自今已後。常於此取。畜生尚爾。孝養父母。豈況人耶。佛言。鳥者。我身是也。主者。舍利弗是也。父母梵王。摩耶是也。由曠劫以來。孝養父母。故今成佛。知恩報恩。得大涅槃。非但人道中。報父母之恩。於禽獸內。亦報其恩也。末句。奉事尊堂者。乃科家勉勵後人。如佛奉事尊堂。亦得成佛。故云。歸去來也。

法身非相。不在心懷。絕中間。與內外。聲色見我。未出輪胎。

昭明太子。判此一段經文。為法身非相分第二十六。以佛說。若以色見我。以音聲求我。是人行邪道。不能見如來。即不能見法身如來。故立此名法身非相也。不在心懷者。此科須菩提。白佛言。如我解佛所說義。不應以三十二相觀如來。悟此法身。不屬眼見耳聞亦乃心不可思。言不可議。故云。不在心懷也。絕中間與內外者。既悟法身。絕其中間六識。而內六根。外六塵。亦皆體空。故云。絕中間與內外。所以論引偈云。惟見色聞聲。是人不知佛。以真如法界。非是識境故也。聲色見我。未出輪胎者。若以音聲色相見佛此相即是應身。不是法身。無為之理。未免輪迴生死。以有相有為者。是輪迴生死之胞胎。故云。未出輪胎也。

若離聲色。難見如來。徒勞遠覓。文殊在五臺。

此是科家手眼。顯出已見。恐人離聲色處認著若離音聲色相。難見如來法身。要人即聲色。就是法身。所以相好。亦從法身中流出。若見相好。即見法身如來。長水曰。此一分。約假成真。故以不離相好。而見法身也。徒勞遠覓者。此顯文殊大智。即聞聲見色者是。不必遠覓五臺。日用之中何曾離却。昔無著問善財曰。我欲見文殊。何者即是。財曰。汝纔發一念清淨心。即是著曰。我發一念心清淨。為甚麼不見文殊。財曰。汝一念心清淨。就是文殊。何須更覓文殊。故云。徒勞遠覓也。

有相即無相 無相亦非真 兩處俱不立

一體是方親

前二句。以須菩提領佛問義。即答云。如是如是。以三十二相。觀如來法身。意云。若見相好。即見法身。故云。有相即無相也。次句。無相亦非真者。以須菩提。次答佛問。如我解佛所說義。不應以三十二相。觀如來法身。悟法身非相可見。故云。無相亦非真也。後二句。以真法界中。有相及無相。二法俱不可立。唯如如之體方是親切處。故云。一體是方親。可謂二邊俱不立。中道坦然平。

○法身非相分第二十六。

【經】須菩提於意云何(至)是人行邪道不能見如來。

註曰。此分之義。以須菩提。聞前第十七疑中云。法身不應以色身諸相見之。佛恐有疑故發此問云。可以三十二相觀如來不。佛意謂。三十二相者。即應身也。觀如來者。即法身如來也。此明佛之問義。可於應身相好中。觀見如來法身否。以此而問也。須菩提。領解問義。故答云。如是如是。以三十二相觀如來。意云。見三十二相即見法身。故云。如是如是。可謂。法身徧在一切處。一切眾生及國土也。佛恐須菩提。於應身中取著。而不達法體虛玄。故復以輪王。即如來遣疑。以輪王。與佛相好皆同。然以王相。因福而生。煩惱未斷。佛相從法身所現。無明永除。故凡聖不同。心體各異也。須菩提。深解法體。於是白佛云。如我解佛所說義。不應以三十二相觀如來。意云。不可以相觀法身。悟法身非相見也。爾時世尊。見須菩提深契法體。故說偈證之。若以色見我者。色即三十二相。我即法身真我。汝不可以眼。見我之法身。何以故。法身無色相。故不可以色見也以音聲求我者。即佛說法之音。故佛法身。不可以耳聞也。聲色者。即識心所緣之塵境。若以聲色。見聞我之法身者。是人行邪道。不能見如來。以如來法身者。非色非聲無形無狀。不可以智知。不可以識識。在凡不減。在聖不增。看時不見。悟時全彰。傳大士頌曰。涅槃含四德。唯我契真常。齊名八自在。獨我最靈長。非聲非色相。心識豈能量。看時不可見悟理即形彰。

妙相莊嚴。聖王相即如來相。法身周徧。如來身異聖王身。若向這裏。見得徹去。鷺倚雪巢。兔棲月殿。其或未然。

此文。牒經義。略釋如來報應之身。即三十二種妙相。萬德莊嚴也。轉輪聖王。外貌端嚴。亦具三十二相。所以即如來相。與佛則同也。若論佛之法身。周徧十方世界而不離此座。身徧塵剎。佛身充滿於法界普現一切眾生前。所以異於聖王。然以輪王。不明佛性。未出生死。但享[示*頁]福。有時而盡。故長水云。佛相從法身所現。王相以福因而出。凡聖雲泥。相同體異也。若向這裏見得徹去者。此是科家審問行人。若向如來身。與聖王身。或同或異。見得明白。通徹而去。如鷺倚雪巢。兔棲月殿。即遠觀似同。近覩則異。以鷺雪兔殿則同。動靜而有差別。喻輪王。與佛相好雖同。而輪王。與佛體用各異。可謂。雪裏鷺鷥飛起見。柳中鸚鵡語方知。其或未然者。科家意謂。果能於如來。聖王處。分辨不出。未能見徹。故云。其或未然也。

石火已揮天外去 癡人猶看月邊星

此二句。是科家。答上未然之義。迷理逐事。認妄為真。無擇法眼。其實點他。不能分辨。輪王與佛。色相雖同。其佛法身妙用。與輪王實異。故喻石火已揮天外去。而癡人不知。猶看月邊星是火。此罰錯認聖王相。為如來相。故云。癡人猶看月邊星。可謂。三汲浪高魚化龍。癡人猶辱夜塘水。

公案現成重審問 愛情翻欸錯承當

不應聲色行邪道 結罪無因見法王

此頌。牒上經義。略釋前二句。公案者普應國師云。所謂公案者。乃喻乎公府案牘。法之所在。而王道之亂治焉實係公府也。言公者。即聖賢一轍。天下同途之至理也。案者。乃記聖賢為理之正文也。所以有天下者。未嘗無公府。有公府者。未嘗無案牘書文。蓋欲取以為法。而斷天下之不正也。公案行。則理法用。理法用。則天下正。天下正。則王道治矣。夫。佛之教法。祖之機緣。亦目之曰公案。蓋非一人之臆見。乃會諸聖靈源。契合妙旨。三世十方百千開士。同稟之至理也。故謂之公案。今言現成公案者。即經文佛告須菩提。於意云何。可以三十二相觀如來不。須菩提言。如是如是。以三十二相觀如來。此之答者。即相好中觀如來法身。所謂之現成公案也。重審問者佛言須菩提。若以三十二相觀如來者轉輪聖王則是如來。此謂之重審問也。愛情翻欸錯承當者。初須菩提愛情執著。應身相好即是法身。而被如來以輪王喻之而難問。是須菩提翻其前欸。自謂錯解承當相好以為法身。而却云。不以三十二相觀如來。蓋自招呈錯認故云。愛情翻欸錯承當也。後二句。不應聲色行邪道者。即經文佛說偈言若以色見我。以音聲求我。是人行邪道。不能見如來。結罪無因見法王者。科家意謂。若以色相音聲。見佛法身者。即是邪見行於邪道。招結煩惱罪業之因。無由見佛法身。故云。結罪無因見法王也。

九年面壁自知非 不若抽身隻履歸
莫道少林消息斷 白雲依舊擁柴扉

前二句。明達磨九年面壁。顯示無言之道。獨露真常之旨。尚自知非。不若抽身西歸為妙。正如須菩提。翻欸自招錯認相好。以為法身一般。故云。不若抽身隻履歸也。後二句。莫道少林消息斷者。科家誠勉行人。莫道達磨隻履西歸。此土少林斷絕消息。無有斯道。但看白雲飄颻。淥水彎環。獨掩柴扉。達磨宴坐。何曾去也。若論這箇消息。自古至今。山河大地。情與無情。皆無間斷。微妙之理。故天寧楷禪師頌曰。一法元無萬法空。箇中那許悟圓通。將謂少林消息斷。桃花依舊笑春風。

三界忙忙何日省 六塵擾擾幾時休
西方一路超生死 齊念彌陀到地頭

前二句。歎此娑婆。有三界六道。一切眾生。於斯往來不息。輪迴生死。何日省悟。復被六塵色香味觸之法煩擾。造罪無邊何時休息。所以道。朝也忙來暮也忙。心猿意馬甚顛狂。六門深鎖牢拴閉。烈焰光中便得涼。後二句。讚美西方世界。乃出三界六道。輪迴生死之大路。故云。西方一路超生死也。汝諸人但肯齊心。念此一聲阿彌陀佛。皆得到於地頭。同生西方淨土蓮胎化生也。

無斷無滅。自古長存。不滅更不生。山河成壞。這箇安寧。

昭明太子。判此一段經文。為無斷無滅分第二十七。蓋佛說。發阿耨多羅三藐三菩提心者。於法不說斷滅相。佛意不以相好觀如來者。但令行人離取著之相。不同小乘斷滅之見。非謂諸佛菩薩。不從相好福德而成。欲以應身而修福德。故云無斷。欲

以智慧而證真身。故云。無滅。故立名為無斷無滅也。自古長存者。既是此理。無有斷滅。可謂自古長存也。不滅更不生者。上明如來所證菩提。不從福德而致。是則菩薩所修福德。欲成菩提之因。亦不能克果耳。佛意為斷此疑告曰。莫作是念。如來不以具足相。而得菩提。具足相。耶福德相也。蓋大乘所修福德之因。所得福德之果。但離取著之心。大乘方便經云。佛言一實。境界者。謂眾生心體。從本已來不生不滅。乃至諸佛心。菩薩心。二乘心。凡夫心。皆不生不滅真如相故。是名常作心。故云。不滅更不生也。下文引喻證之。山河成壞者。此顯不滅不生之理。世界有成住壞空。此菩提真心。本無生無滅。無成無壞。故云。這箇安寧。法華經云。眾生見劫盡。大火所燒時。我此土安隱。天人常充滿。又云。常在靈鷲山。及餘諸住處。溫陵曰。安隱者。即實報莊嚴土。亦云法性土也。靈山者。即己靈也。非形非器。故劫火莫能燒。亘古亘今。常住不滅。於斯明得。而穢土即淨土也。

無來無去。耀古騰今。人人本具。鍤石不換金。

此義。呈前不生不滅之理。非但無有成壞。亦無過去未來現在。三世之易雖無三世之易。亦不曾離却三世。故云。耀古騰今也。所以大方等大集經云。於一法不生二相。是名不來不去不住。以不住故。乃至無有作者。無有愛者。故云。無來無去也。人人本具者。結上不生不滅之理。雖人人本具此道。在當人分上。與佛無二。若不以相好而修福德。則所發菩提心。即成斷滅。此似鍤石也。若用相好而修福德。但不取著。即是真智。喻如真金。若執本具。不修相好福德。終不得證。如來法身。故云。鍤石不換金也。

不生亦不滅 無斷亦無常 常樂并我淨
非不好商量

此四句。顯無生無滅之理也。前二句。科家意謂生滅斷常。亦名四相生滅屬凡夫見。斷常屬外道見。四皆本空。即離四相也。華嚴疏云。生之無生真性湛然。無生之生業果宛然。是知。若即念存有念。即是常見。離生求無生。即是斷見。皆是不達實相。無生無滅之理。若證了無生。則無生無不生也。豈定執有生無生之二見乎。若悟此無生之理。四相皆除也。後二句。常樂并我淨者。既離上來四相。正好商量涅槃四德。所謂。凡夫迷自法。身徧計五蘊。是常是樂是我是淨。故佛令眾生。修無常苦空無我不淨以破之。而眾生依佛修無常苦空等。以證二乘尚迷真常真樂真我真淨故佛破其所執云。常計無常。樂計無苦。我計無我。淨計不淨。故又破其二乘。四倒之見而復示云。常是法身義。樂是涅槃義我是佛義淨是法義。然諸佛世尊。實有無量無邊之德。唯此四德。盡皆該之也。

○無斷無滅分第二十七。

【經】須菩提汝若作是念(至)於法不說斷滅相。

註曰。此分名無斷無滅之義也。以須菩提。聞佛前來不以三十二相。觀如來法身。恐有此疑。所以就疑問之云。汝若作是念。如來不以具足相故。得阿耨多羅三藐三菩提者。此敘須菩提之疑念云。不以具足相得菩提。正是所毀之相也。佛又招告須菩提。莫作是念。如來不以具足相故。得菩提者。誠其勿疑。重牒所毀之相也。佛復謂。須菩提云。汝若作是念。發阿耨菩提心者。說諸法斷滅。汝意謂。既不以具足相。而修福德。則所發菩提之心。即成斷滅之過。故佛仍言莫作是念。此是重重誠勉。勿疑也。佛又云。何以故者。佛自徵問上義。以何意故。莫作是念。下文出其所以云。發阿耨菩提心者於法不說斷滅相。蓋大乘菩薩。所修福德之因。所得福德之果。皆用具足相。而修福德。以證佛果。但不取著相好故。即真智慧也。有智慧故。即是真身。有福德故。即是應身。所以於法。不說斷滅相也。智者禪師頌曰。相相非有相。具足相無憑。法法生妙法。空空體不同。斷滅不斷滅。知覺悟深宗。若無人我念。方知是至公。

相非具而本具。常自莊嚴。法雖傳而不傳。何曾斷滅。昔世尊。於靈山會上。人天眾前云。吾有清淨法眼。涅槃妙心。付囑飲光。廣令傳化。且道當時傳箇甚麼。

初一節。謂相非具者。因前云。相好非法身。故須菩提一向執著。不以具足相得菩提。故云。相非具足。此即斷滅之謂也。而本具者。如來用具足相。而修福德。但不取著相好。即真智慧方證菩提。故不屬斷滅也。華嚴經云。雖知諸佛法身。本性無身。而以相好莊嚴其身也。而本具者。智慧真身也。莊嚴者。福德應身也。論云。具足福德莊嚴者。應身也。智慧莊嚴者。真身也。法雖傳而不傳者。以佛佛授受。祖祖相傳。然於實際理中。本無一法所傳。其理雖無所傳。然以性分之中。聖凡均稟。皆悉具足。故云。何曾斷滅也。下文伸出。無傳之義。昔世尊。於靈山會上等者。此明佛在靈山。末後拈花之事。文出梵天王請問決疑經。此中多說帝王之事。隱而不載。因梵天王獻金色優波羅華。世尊拈起示眾。人天罔知。唯有迦葉。破顏微笑。深悟此理。出於言外。故佛付囑曰。吾有清淨法眼。涅槃妙心。實相無相。微妙正法。今付飲光。汝善護持。廣令傳化者。科家引此。證明上來法無斷滅。亘古長存。無有所傳也。且道當時傳箇甚麼者。乃是徵問前義。佛與迦葉。有何所傳。向下伸答是也。

青蓮目顧人天眾 金色頭陀獨破顏

此二句。答上之義也。顯示不傳而傳。豈有斷滅。所以拈花微笑之處。默識心通。何曾斷滅也。

一燈能續百千燈 心印光通法令行
千聖不傳吹不滅 聯輝列焰轉分明

始初一句。以喻明教外別傳之旨。猶如一燈續百千燈。燈燈相續。然之不盡也。次句。心印光通者。正顯教外別傳之道。以西天四七。東土二三。至五派已來。佛祖相承。以心印心。代代相傳。徧十方國。流布無窮。此法門名無盡燈。若一菩薩開導

百千眾生。令發菩提之心。於菩薩道亦不滅盡。隨所說法。而自增益一切善法。是名無盡燈。謂之法令能行也。昔黃龍南。親行此令。十方諸佛無敢違者。歷代祖師。一切聖賢。無敢越者。無量法門。一切妙義。天下老和尚舌頭。始終一印。無敢異者。異則且置。印在甚麼處。非僧非俗。無偏無黨。兵隨印轉。將逐符行。所謂世尊拈花。迦葉微笑。達磨面壁。二祖安心。見花靈雲。疑情盡淨。擊竹香嚴。頓忘所知。盤山。肉案頭豁悟。彌勒。魚市裏接人。誠所謂。顛沛造次必於是。經行坐臥在其中。既有如是奇特。更有如是光輝。既有如是廣大。亦有如是周徧。汝等諸人。因甚却有迷悟。還知麼。幸無偏照處。剛有不明時。後二句。呈前之義。顯此道千聖不傳。諸祖不說。喻如一燈然百千燈。其光無盡。故云。吹不滅。以無傳之傳。至今不盡。所以聯芳列焰。轉更分明。可謂。自從少室聯芳後。五葉花開直至今。

一點靈光塞太虛 也非禪教也非儒
打成一片誰人會 具眼還他大丈夫

起句。明一點靈光。塞滿太虛。輝天鑑地。大安曰。汝等諸人。各各自有無價大寶。一點靈光。從眼門放光。照見山河大地。耳門放光。領采一切音聲。如是六門。晝夜常放光明。亦名放光三昧。汝等不少。各自珍重。故云塞太虛。次句。也非禪教也非儒者。明斯一點靈光。三教無別。同稟一心。傳大士曰。道冠儒履釋袈裟。合會三家作一家。識得箇中消息意。優曇元是白蓮華。可謂多生悟覺非千衲。一點靈明不在燈。後二句。雖具靈光打成一片。不分三教。能有幾人會得。須是具眼高流。行得之者。方到不分之地。古德云。也要看經也讀書。尊僧尊道亦尊儒。徽宗敬道心偏向。武帝欽僧性見殊。秦始坑儒儒豈滅。昌黎謗佛佛何除。

大明治世仁慈

主。三教同歸總一如。故云。具眼還他大丈夫也。

天樂簫韶花雨飛 他方遊歷聖初回
如雲海眾相迎接 目擊金容歸去來

前二句。顯示西方境致。天樂常響。天花常雨。彌陀經云。彼佛國土常作天樂。黃金為地。晝夜六時。雨天曼陀羅華也。他方遊歷者。以彼國菩薩。欲以上妙之物。供養十方無央數佛。於一剎那頃。徧禮十方諸佛聖賢。自然在於佛前供養。而供養畢。回來還似初時。故云初回也。經云。其土眾生。常以清旦。各以衣祴。盛眾妙花。供養他方十萬億佛。即於食時還到本國。飯食經行也。後二句。言此土念佛之人。發三種心。修三種行。臨命終時。正念直往。彌陀觀音勢至。無數化佛。百千聲聞。無量諸天。清淨海眾。如雲而至。迎接行人。坐金剛臺。如彈指頃。往生彼國。得生上品。親見彌陀授記作佛。故云。目擊金容歸去來。

銷釋金剛科儀會要註解卷第七

銷釋金剛科儀會要註解卷第八

姚秦三藏法師 鳩摩羅什 譯

隆興府百福院 宗鏡禪師 述

曹洞正宗嗣祖沙門 覺連 重集

不受不貪。知足常足。無罪亦無福。隨緣過日。切忌分訴。

昭明太子。判此一段經文。為不受不貪分第二十八。蓋佛說以菩薩不受福德。乃三界有漏果報。則不應受。故云不受。又以所作福德。不應貪著。乃是出世無漏果報。雖受而不貪著。故云不貪。故立此名。為不受不貪也。知足常足者。既不受有漏福德。即是知足。既不貪著無漏果報。即是常足。佛告獅子吼言。少欲者。不求不取。知足者。得少之時。心不悔恨。故云。知足常足也。無罪亦無福者。明此菩薩。知一切法無我。得成於忍。所作福德。不應貪著。即無福德可受。既是無福可受。即無罪可受。以了人法二執。罪福性空也。隨緣過日者。釋呈上文。知足常足。以此菩薩。不受福德。又不貪著。只是隨緣過日。龍潭信曰。任性逍遙。隨緣放曠。但盡凡情。別無聖解。所以道。飲啄隨緣過便休。知身倘寄若浮漚。自從識破娘生面。水牯元來却是牛。切忌分訴者。亦是釋呈。無罪亦無福。而此菩薩。既不貪著。於罪福之中。無有分別取捨之心。則所修功德。即成無漏清淨果報。故云。切忌分訴也。

千家一鉢。衲子活路。雖無一物。與眾生增福。

千家一鉢者。釋呈上文。隨緣過日之衲僧家。除三衣一鉢之外。分寸不蓄。著糞掃衣。餐腐爛食。不立烟爨。依法求乞。可謂。一鉢千家飯。孤身萬里遊。即衲子之活路也。故佛成道。至於涅槃。皆依樹下。三衣一鉢。隨緣乞食。古德云。有箇安樂法。傳從諸聖賢。但能依佛訓。何用置庄田。饑則托鉢乞。困來伸脚眠。絲毫念不起。受用福無邊。雖無一物者。美上隨緣過日之衲僧。雖是身貧無有一物。能與有情眾生。而為福田。所以淨名曰。施者。無一物可施。受者。無一物可受。而為福田。謂此真空妙道。施受與物。皆不可得。溫陵曰。普門之中。本無施受。所謂。三輪體空也。

不覺塵緣起 貪愛轉見深 若得迴光照

當生即不生

前二句。顯示無明最初生起之相。此屬生門也。因無明。熟習晦昧。故名不覺也。塵。即所緣之六塵。緣。即能緣之六根。以第六意識。能緣三世獨影境。故起能緣之識。塵即所緣之父母。為現量境。於六根發起六識。了別成種。無明為根。後起染著。便要貪取。因貪生愛。潤業受生。故於貪愛為生死根本。以此相續無有窮盡。故云。貪愛轉見深也。後二句。若得迴光照者。此名不受不貪。即還滅門也。顯此無明

。非實有體。如夢中人。夢時非無。及至於醒。了無所得。但能不逐六塵外境。其餘十一支。悉皆空寂。而迴光返照。本來面目。無欠無餘。故於當生。即是不生也。所以般若經。最勝天王白佛言。菩薩於無生法。而見有生。佛言。諸法無滅。是故無生。若行深般若。實知無明生十一支法。若斷無明。十一支皆盡。如人身若斷命則隨滅。邪見外道為求解脫。斷欲斷死。不知斷生也。生即無明妄念。若法無生。即無有滅。譬如有人塊擲獅子。獅逐人。而塊自滅。菩薩亦爾。但斷其生。而死自滅。若塊擲犬。犬惟逐塊。不知逐人。塊終不息。外道亦爾。不知斷生。終不離死。以菩薩。深知諸法生滅。故無生死也。

○不受不貪分第二十八。

【經】菩提若菩薩以滿恒河沙(至)是故說不受福德。

註曰。此分名為不受不貪也。因前分中菩薩行施。雖了福德性空。尚有所受之義。故佛告云。若菩薩。以滿恒河沙等世界七寶。持用布施。此述前分中菩薩。即第八分善現云。菩薩了福德性空。如來說福德多。至第十九分善現亦云。以福德無故。如來說福德多。此二布施。是菩薩功德。盖了有為布施性空故也。佛又云。若復有人。知一切法無我。得成於忍等者。顯此中菩薩。以有漏果報。則不應受無漏果報。雖受而不取著。又知一切法空。亦無我執。故獲無生法忍。所以勝前菩薩也。反顯菩薩。心有所著。所感之福。則成有漏。心若離著。即成無漏。故云。若復有人。知一切法無我。得成於忍。以法中無我人。二執俱空。故獲無生法忍。所以勝前菩薩。所得功德也。佛復再告須菩提言。何故此中菩薩。勝前菩薩。以諸菩薩不受福德故。不受有漏福報。所以勝前菩薩也。於是須菩提。復白佛言世尊。云何菩薩不受福德。以須菩提又疑云。菩薩既不受福報。云何能獲無生法忍也。佛答須菩提言。菩薩所作福德。不應貪著。是故說不受福德。意云。不受福德者。以有漏果報。則不應受無漏果報。雖受而不取著。故得法忍。故云。菩薩所作福德。不應貪著也。天台智者頌曰。布施有為相。三生却被吞。七寶多行慧。那知捨六根。但離諸有欲。旋棄愛情恩。若得無貪相。應到法王門。

有求有苦。八風五欲交煎。無著無貪。三明六通自在。便恁麼去。水邊林下月冷風清。不恁麼去。橋斷路窮。別通消息。還委恁麼。

有求有苦者。牒經中。以恒河沙七寶。持用布施。惟求福報。雖獲福報。而報盡還入三途。故有苦也。而現世被八風五欲交煎。亦是苦也。八風者。即利衰毀譽稱譏苦樂也。五欲者。即財色名食睡。謂之五愛欲也。因八風五欲交煎逼迫。溺愛不明。泛濫營求也。十誦律云。盜心有九。一者乞憐狀取。二者現威儀取。三者稱善知識取。四者以法伏人取。五者設巧計取。六者以錢出息取。七者軟語取。八者不與強取。九者與而復取。皆犯盜心。必入三途。豈非苦也。無著無貪者。牒經中。若復有人。知一切法無我。得成於忍。雖作無漏果報。亦不貪著。故得法忍。即不著相。乃得三

明六通。不被生死所繫。得大自在也。佛告獅子吼言。著能相生癡。癡故能生愛。愛故繫縛。繫縛故受生。生故有死。死故無常也。不著相者。則不生癡。不生癡故則無有愛。無有愛故則無繫縛。無繫縛故則不受生。不受生故則無有死。無有死故則名涅槃真常也。如是則豈非三明六通自在耶。三明者。一天眼智明。三乘諸佛。於天勝妙。得彼天眼也。二宿命智明。佛於三世境界。無有不知。不同二乘也。三漏盡智明。證見道時。遠離四漏。不同二乘所證也。六通者。一神境通。震動十方。變一為多。變多為一等。此即身如意通也。二天耳通。過人天耳。如實能聞種種音聲也。三他心通。能知十方諸有情類。心心所法也。四宿命通。能知十方有情心。日年□□處。名姓死生。自他等事也。五天眼通。能見十方有情非情。色係死生。善惡等報也。六漏盡通。能知十方有情。自他漏盡不盡等也。故云。三明六通自在也。便恁麼去者。呈上之義。於無著無貪處。便恁麼去。則向水邊林下。優游自在。凡聖情忘。不可住著。此是無作無為境界。可謂。觀月色以逍遙。聽泉聲而自在。所以佛慈云。參禪之法。別無奇特。祇要命根斷絕。疑情頓脫。屏却諸緣。痛著精彩。七穿八穴。百了千當。向水邊林下長養聖胎。然後出世利生。猶未出建化玄門之事也。不恁麼去者。此是科家手眼。別行一路。於無著無貪處。更進一步。故云。不恁麼去。不守無為境界。謂之向上一路。千聖不遊。所以橋斷路窮。不容履踐也。橋者。乃江河渡人之方便也。路者乃入王城之徑路也。以喻教中進道之方。有大小乘。從初發心。至成正覺。始以五品觀行。三種資糧。四加行。各有通途。津濟之橋梁。路即五十五位。真菩提路也。今科家意謂。不恁麼去者。以此理本來現成。不因修得。故不用此資糧之行。不行此菩提之路。所以橋斷路窮也。別通消息者。此理。不從千聖借。豈向萬機求。在聖不增。在凡不減。祇要行人。於行住坐臥。出不隨應。入不居空。外不尋枝。內不住定。撇開金鎖。打破玄關也。還委悉麼者。乃科家徵問之義。我前來如此說話。你還知麼。下文伸答是也。

老僧笑指猿啼處 更有靈踪在上方

此二句。答上橋斷路窮。別通消息之義也。言此理。既是本來現成。不假修證。所以橋斷路窮。超出方便。別有一段奇特處。今科家要人。向人境交參。猿啼之處領會。但能於聞聲見色。當人不昧。返聞自性。返見真理。即聲色上顯露真心。故云。更有靈踪在上方。所以永明曰。孤猿叫落中秋月。野客吟殘半夜燈。此境此時誰會得。白雲深處坐禪僧。

數行梵字雲中鴈 一曲無生澗底琴
德勝河沙渾不用 清風明月是知音

前二句。是科家。顯露無字真經。不落紙墨。故云。數行梵字。如雲中鴻鴈。次序排空。無有造作。以喻大乘圓融境界。雲騰鳥飛。塵說剎說。無不宣演此經。可謂。風柯月渚盡演真如。烟靄雲林咸宣妙法。又以前一曲無生。如澗水之聲。皆為琴韻。

水流風動。悉演摩訶。白雲為蓋。流泉作琴也。後二句。科家意謂。此金剛般若。若有受持讀誦。為人解說者。只以四句功德。勝過恒河沙數。實施之功德。若以無字真經。無生之曲。雲鳥飛騰。水流風動。情與無情。皆悉共演。所以受持功德雖勝。於此法界理中。渾然不用也。唯有清風明月。始是知音之者。於無情說法。無生琴韻。方堪聽受。知音賞鑒也。

春來秋去幾時休 堪嘆眾生又白頭
東廓郊中多古墓 北邙山下有骷髏

前二句。嘆光陰似箭。日月如梭。春去秋來。催人易老。故云堪嘆眾生又白頭。慈明禪師云。昨日作嬰孩。今朝年已老。浮生夢幻身。人命久難保。天堂并地獄。皆由心所造。南山北嶺松。北嶺南山草。一雨潤無邊。根苗壯枯稿。五湖參學人。但問虛空討。死脫夏天衫。生著冬月襖。分明無事人。特地生煩惱。後二句。嘆死亡也。有子孫者。新墳古墓。無子孫者。野棄屍骸。梵天琦云。富謂無貧日。貧思有富年。由來人作鬼。枉用紙為錢。白骨深泥下。青苔古墓前。虛空猶可料。生死莫知邊。

白侍文章世間稀 尚求兜率厭輪迴
我今奉勸文章士 念佛西方歸去來

前二句。引古為例。侍郎姓白。名居易。乃唐時人。贈尚書左僕射。善文章。晚節向佛。施所居宅。為香山寺。自號香山居士。經月不食葷。嘗述讚曰。十方世界。天上天下。我今盡知。無如佛者。巍巍堂堂。為天人師。故我禮足。讚嘆歸依。由是會昌初。有客舟遭風。漂至一大山。有一道士曰。此蓬萊山一院。鎖鑰甚固。曰此白樂天所居。在中國未來耳。樂天聞之。為詩曰。吾學真空不學仙。恐君此語是虛傳。海山不是吾歸處。歸即須歸兜率天。嘗立願曰。吾勸一百八人。同為一志結上生會。行念慈氏名。坐想慈氏容。願當來世必生兜率。晚歲風痺。捨俸祿三十萬。命工人杜宗鏡。畫西方極樂世界一部。高九尺。廣丈三尺。中彌陀。左觀音。右勢至。人天瞻仰。眷屬圍遶。花鳥池樹。栴檀莊嚴。弟子居易。焚香稽首。跪於佛前發願云。願此禮念功德。回施一切眾生。一切眾生。有如我老者。如我病者。離苦得樂。斷惡修善。隨願往生青蓮華上。重說偈曰。極樂世界清淨土。無諸惡道及眾苦。願如我身老病者。同生無量壽佛所。即儼然而化。故云。尚求兜率厭輪迴也。後二句。是科家舉例。勸今文章之士。皆效白侍郎。厭世念佛。同歸西方淨土也。

威儀寂靜。塔丈心路。不用巧分訴。行住坐臥。無盡無餘。

此科昭明太子。判此一段經文。為威儀寂靜分。言威儀者。即行住坐臥。四威儀中。是佛應身也。寂靜者。即佛法身也。以如來法身。無所從來。亦無所去。故立此名也。塔丈心路者。釋呈上義。或塔丈二字。恐書者悞之。應作曷仗。然有疑惑者。謂如來。昔行菩薩道時。不受福報。云何至果有去來相。使諸眾生供養獲福。如此疑惑。正是心路意識分別。故佛告之云。如來威儀應用。示有動作。而法身之體。如如

不動。故云寂靜。蓋如來法應之身。隱顯度生。非三乘聖賢。而可測量。故云。曷仗心路。可謂。非思量處。識情難測。真如法界。無自無他也。不用巧分訴者。既法身之理。在威儀之中。豈仗心路測量。不用分別去來之相。故云。不用巧分訴也。行住坐臥。無盡無餘者。以行住坐臥。釋下威儀也。無盡無餘者。釋上寂靜也。以法身之理。既不仗心路分別。於四威儀中。無欠無餘。可謂。放去虛空包不住。收來不見一毫踪。無邊妙用神通事。盡在尋常動用中。

無所從來。亦無所去。若人會得。全不費工夫。

無所從來。亦無所去者。此科佛謂須菩提。若有人言。如來若來若去。若坐若臥。是不解我所說義。何以故。如來者。無所從來。亦無所去。故名如來。此明法身無去來之相也。若人會得者。總結前來如此說話。若是行人。會得法身。無去無來。只在威儀動靜之中彰顯。其實省力。可謂。即石名山真省力。離波求水實應難。蓋離色身外無法身。離法身外無色身。永嘉云。無明實性即佛性。幻化空身即法身。故云。全不費工夫也。

人人具四大 我見萬法空 行住并坐臥
來去與真同

初句。明一切眾生。各有身相。乃是地水火風四大。以受想行識五蘊。假合而成。與如來三十二相。八十種好應身。四大名同。故云。人人具四大。次句。明如來雖具四大。有行住坐臥。與眾生應用不同。故云。我見萬法空。我見者。即執著義。以能見者是我。所見者是萬法。能見之我既無。所見萬法自空。人法既空。法身寂靜也。末二句。明如來。既了萬法皆空。證法身理。雖有應身相好。但為度生而現。故於行住坐臥。四威儀中。或來或去。無不與真皆同。若明此旨。洞達其源。方知動靜施為。經行坐臥。頭頭合道。念念歸宗。那裏不是平等一真法界。故云。來去與真同也。

○威儀寂靜分第二十九。

【經】須菩提若有人言(至)亦無所去故名如來。

註曰。此分。佛乃招告須菩提。以三稱如來者。皆顯法身真性佛也。佛云。若有人言如來。若來若去若坐若臥。是不解我所說義者。意云。若以來去坐臥。行容法身者。則是有相。故不解如來所說義也。以真佛無相。常住寂滅。本無來去動靜。可以行容。今佛。現有來去坐臥者。乃如來應身。為化眾生故。所以慈氏云。是福德應報。為化諸眾生。自然如是業。諸佛現十方。故也。何以故者。佛自徵問。何故不解我所說義乎。乃自答云。我所謂如來者。顯法性真佛也。以真佛無相。亦無來去。法身普徧。如如不動。偈云。去來化身佛。如如常不動。故無所從來。亦無所去。故名如來也。放光般若經云。如者。一無有二。以謂法性空故。如來者。法空義也。以法空故。而無有來。亦無有去。智者禪師頌曰。如來何所來。修因幾劫功。斷除人我見

。方用達真宗。見相不求相。身空法亦空。往來無所著。來去盡皆通。

坐臥經行。本自無來無去。威儀不動。寂然非靜非搖。

初一節文。牒經義也。如來應身。有來去之相。為化眾生。其法身無為。本無來去。所以肇法師云。解極會如。體無方所。明即應之真也。從真界起。水月頓呈。明即真之應也。次一節文。亦牒經義。威儀者。顯應身。若來若去。若坐若臥。即俗諦也。不動者。顯法身。無所從來。亦無所去。即真諦也。寂然非動非搖者。雙遮二邊。顯中道者也。

要解如來。所說義否。

此一句。是科家著力為人處。審問行人。解佛深義。而下文答出也。

隨緣赴感靡不周 而恒處此菩提座

此二句。答上問義也。此文出華嚴經。如來現相品。一切勝音菩薩。而說頌曰。佛身充滿於法界。普現一切如來前。隨緣赴感靡不周。而恒處此菩提座。科家。借後二句。顯如來應身。隨緣赴感。無處不周。其法身寂然。未離本座。可謂。處一座而十方俱現。演一音而沙界齊聞也。

巍巍不動法中王 那有獼猴跳六窓

笑指真空無面目 連雲推月下千江

前二句。頌經義也。明如來者。無所從來。亦無所去。顯法身不動。那逐根塵。故喻獼猴不跳六窓也。今言法中王者。起信論云。法身者。自體有大智慧光明。徧照法界。真實識知。自性清淨心。常樂我淨。清涼不變。自在不動。是明如來法身。於諸法中得大自在。故名法中王。行人若悟此理。六根門頭。放光動地。獼猴安然。六窓闐寂也。後二句。科家直指。法身無相。至理無形。有何面目。古德云。通身無向背。徧界絕形踪。科家末後。盡力提持。所以連雲推月。齊下千江。境智不分。人法一體。可謂。混淪無內外。和融上下平。

蘆花影裏一骷髏 半臥黃沙半土丘

骷髏但有心頭氣 爭名奪利幾時休

初二句。嘆人死屍骸送於郊外。骷髏遍地縱橫。日炙風吹。狼籍穢惡。醜不可觀。盡大地人。悉皆如此。所謂。昔時要笑紅顏。翻成灰燼。今日荒園白骨。變作泥推也。末二句。歎此骷髏。今朝如此零落。昔年三寸氣在。自恃豪強。爭名奪利。無有休息。丹霞先生詩云。自待烟霞物外求。何須谷口傲扁舟。三皇社稷今何在。五帝山河總是休。無限豪傑埋土塚。幾多文武臥荒丘。在生祇管爭名利。更不回頭向早修。

漢末殘唐甚苦哉 人心上下極相乖

貪婪虛偽那堪說 亂世如麻歸去來

此四句。科家歎時世澆薄。人心乖戾。言漢末者。即吳魏劉三國。後有五胡。及十六國。各霸為王也。殘唐者。有十國十王。皆僭偽之主。今言甚苦哉者。悲夫。時

者澆漓之世。人者浮薄之流。所謂貪婪虛偽。不可稱說。乃是科主痛切之言。故深嗟之。末句。亂世如麻者。言說主多則亂。兵戈遍地。男罷耕鋤。女罷機織。率土之民。十亡八九。古詩云。世亂兵荒殺氣紛。美人抱子入宮門。寧干壯士揮戈手。不負男兒結髮恩。玉貌花顏何處是。形骸血跡至今存。吾來傷感前朝事。為吊禾川烈女魂。歸去來者。科家意云。似此世亂如麻。不如念佛歸去。早離穢土。徑達淨邦。若是五逆十惡之人。臨命終時。勸令念佛。承佛願力。生於下品。華中受樂猶若天宮。故乃相勸。亂世如麻歸去來也。

一合相理。不在分別。處處任宣說。九年面壁。斬釘截鐵。

此科昭明太子。判此一段經文。為一合相理分。以須菩提答佛。若是微塵眾實有者。若世界實有者。此二節文。以顯界塵無性。以喻法應。無有一異之性。以顯圓融一合相理。故立斯名也。不在分別者。上所謂。一合相理。塵界一異。不可分別。故須菩提答云。非微塵。非世界。非一合相者。名為一合相。遣除一合相理。故云。不在分別也。處處任宣說者。以一合相理。豈有言說。世俗諦中。為化眾生故。有分別言說。所以處處任宣說也。九年面壁者。此一節。釋呈上文。不在分別。言謂達磨九年面壁。大有逕挺。不近人情。不涉言詮。單明真性。直顯第一義諦。實具斬釘截鐵之手段。

神光三拜。花開時節。分明點破。秤錘原是鐵。

此一節。呈前不在分別之義。昔達磨初祖。在少林面壁。一日謂門人曰。時將至矣。吾欲返西竺。汝各言所得。時道副云。如我所見。不執文字相。不離文字相。而為道用。祖曰。汝得吾皮也。尼總持云。如我所見。如慶喜見阿閼佛國。一見更不在見。祖曰。汝得吾肉也。道育云。四大本空。五蘊非有。而我見處。無一法可得。祖曰。汝得吾骨也。慧可禮拜。依位而立。祖曰。汝得吾髓也。復曰。昔如來正法眼藏。涅槃妙心。付與迦葉。展轉至吾。今付與汝。偈曰。吾本來茲土。傳法度迷情。一花開五葉。結果自然成。今科家言。神光三拜。領言外旨。是他時節因緣。正與一合相理。無二無別也。分明點破者。此節。呈前達磨面壁。神光三拜。分明顯露不言之道。恰似秤錘。原來是鐵也。

三千界微塵 俱來一念心 如來一合相

推倒大虛空

前二句。牒經之義也。以三千界微塵者。舉能喻之界塵。兼所喻之法應也。長水謂。界塵法應。皆是我法所緣之境。此境俱不離能緣一念之心。所以三界唯心。萬法唯識。故云俱來一念心也。如來一合相者。此二句。亦牒經義。結歸圓融不二之理。既云一合相理。即是不見虛空。唯見真如。所謂。除真心外。無片事可得。故云。推倒太虛空也。

○一合相理分第三十。

【經】須菩提若善男子善女人(至)須菩提言甚多世尊。

註曰。此一分文義。因前來二十九分中。應身有去來是異。法身無去來是一。佛恐善現有一異之見。故此分中設喻問之。先舉世界微塵一異斷疑。次舉言說我法離見。且初釋文。總有三科。一操界塵一異。以顯無性。二釋微塵。以喻應身無有異性。三釋世界。以喻法身無有一性。今且先標塵界為喻。故佛問云。以三千界碎為微塵。是微塵眾寧為多否。此喻界塵一異。以顯無性。今言世界者。喻法身也。微塵者。喻應身也。世界是一也。微塵是異也。碎界為塵。界無一性。以喻從法起應。法無一性。即異破一也。聚塵為界塵無異性。以喻應空。即法應無異性。即一破異也。此互破者。雙遮顯中。即非一非異也。故偈云。去來化身佛。法身常不動。於是法界中。非一亦非異。

【經】何以故若是微塵眾(至)則非微塵眾是名微塵眾。

此節經義。即第二科。釋微塵。喻應身無異性也。何以故者。徵前甚多微塵之義。若是微塵眾實有者。佛則不說是微塵眾。此言佛不說者。意顯塵體本空。故以喻如來應身。雖具足相好。而體實非真。故偈曰。應化非真佛。亦非說法者是也。所以者何者。徵釋前文界塵也。佛說微塵眾者。牒前佛說。碎為微塵也。若知碎世界作微塵。微塵全是世界。則塵無實性。故云。則非微塵也。以離性計而說微塵。故曰。是名微塵也。

【經】世尊如來所說三千大千(至)則非世界是名世界。

此節經義。言如來所說三千世界者。牒前以三千世界也。若知合塵為世界。世界全是微塵。則世界無實性。故曰。則非世界也。以離性計而說世界。故曰。是名世界也。所以塵無別塵。全界為塵。以喻應無別應。全法起應也。界無別界。聚塵成界。以喻法無別法。全應即法。此是雙照顯中道也。

【經】何以故若世界實有者(至)非一合相是名一合相。

此節經義。即第三科。釋世界以喻法身。無一性也。何以故者。徵前世界也。若世界實有者則是一合相。此以一合相理。返顯世界非是實有。則知一合相理。乃是界塵法應。圓融無礙之理。明矣。故偈云。世界作微塵。此喻是彼義也。如來說一合相者。以界塵法應。皆具足名相。即俗諦也。則非一合相者。以界塵法應。雖具名相。其性本空。即真諦也。是名一合相者。以法身。能一能異。非一非異。圓融無礙。即中諦也。

【經】須菩提一合相者(至)但凡夫之人貪著其事。

此節經義。言一合相理。不可說者。意云。若言法身是一。恐聞者定執為一。則不可說。若說應身是異。而聞者便執為異。則不可說。若謂法身非一。聞之者又執為非一。則不可說。若言應身非異。而聞者又執為非異。則不可說。此一合相理。亦不

可思議。但凡夫不了。自生貪著耳。傳大士頌曰。界塵何一異。報應亦同然。非因亦非果。誰後復誰先。事中通一合。理上兩俱捐。欲達無生路。應當識本源。

以世界碎如微塵。慈尊喻巧於玄要。立權名談其實相。凡夫意絕於貪求。

初一節。牒經義。明如來設教。為化眾生說種種法。恐諸眾生。未得通曉圓融之道。故引種種譬喻。令人易解。今此經中。以界塵喻法應者。故云巧也。所以聚塵成界。碎界為塵。喻全法起應。全應即法。巧之甚也。玄要者。玄妙總要也。然此一喻。總該世出世之八義也。能喻界塵。有非一非異能一能異之四義。法應亦有非一非異。能一能異之四義。如此八義。一喻明矣。豈非玄妙總要者乎。次一節。亦牒經義。明佛說四十九年法。有三乘五教。正眼觀來。都是權也。只是談其一乘實相。真空實際之中。道箇能一能異。非一非異者。皆世數而矣。真空之中。皆無此說。淨名曰。法身無為。不墮諸數。使諸凡夫。悉知如來法應之身。尚是權立之假名。而實不可得。況我凡夫色身識心。及所有諸法。豈是實乎。故使凡夫貪著之心。自然息矣。

與麼會得。返本還源。背塵合覺。不與麼會。慈同諸佛。悲合眾生。總不與麼。

此是科家。誠勉行人也。始一節文。謂與麼會得者。意云。法應之身。既屬名數。尚不可得。況我色身識心。及所緣諸法。皆即虛妄實不可得。故使凡夫意絕貪求。自然返本還源。背塵合覺也。次一節文。謂不與麼會者。乃科家拈情。要行人不在返本還源背塵合覺處著脚。須要入纏垂手。和光同塵也。正同觀音大士。初獲圓通。得二種殊勝。一者上與諸佛。同一慈力。二者下與眾生。同一悲仰。而入十法界。現三十二應。說法利生也。總不與麼者。斯一節文。是科家將上二法。一齊掃除。與麼不與麼。總拈向一邊。直顯頓宗即心之道。上不見諸佛可成。下不見眾生可度。而向下伸答是也。

巨靈擡手無多子 分破華山千萬重

此二句。答上總不與麼之義也。謂不住一真法界。諸佛眾生了無所有。如巨靈神大用現前。以斧劈開華嶽也。言巨靈者。乃太華山之神。巨靈即乃名也。因母昔有染緣之業。受罪於斯山底。巨靈欲救母罪。力所不能。後入華山西。恭禮鏡月峰光照禪師處。拜告曰。吾母受罪於此山未出。今欲請師求救。師即書一唵字。與神斧上。於是持斧于山頂。用斧一劈。山即兩開。其母承斯總持神呪之力。即生忉利天。巨靈求道三年。立化於華山之頂。後為金剛密跡大神也。所以云。劈開華嶽連天色。放出黃河至海聲。

一段生涯六不收 從前萬法盡非儔
輕輕劈破三千界 直得恒河水逆流

前二句。謂一段生涯。指般若真空而言也。六不收者。此理以六根。六塵六識。收他不得。即我空之義也。從前萬法者。科家意謂。此般若真空。就是從前第二分中。至此三十分。以文字總持。雖說無量玄妙之法。到此行容不出。比類不及。故云非

儔。即法空之義也。後二句。牒經義。以法身之妙用。輕輕劈破。三千世界碎為微塵。直得塵塵即毗盧境界。法法具常住真心。所以法應不分。界塵無礙。同歸圓融廣大之理也。直得黃河水逆流者。既是碎界作塵。聚塵成界。以喻法身即應。全應即法。直得大地平沉。虛空粉碎。心外無法。獨顯真空。故云。水逆流也。

九曲黃河直指君 分明全不涉途程
不知白日青天裏 開眼許多迷路入

始二句。明昔有僧問石霜圓曰。如何是南源境。霜云。黃河九曲。水出崑崙。僧又問曰。如何是境中人。霜云。流水人不顧。斫手望扶桑。乃科家。引古人。以九曲黃河直指於君。分明說出水之源頭。出自崑崙。此喻世尊大慈。雖設種種言教。方便譬喻。如黃河九曲。大意直指般若真源。澤機潤物。故不涉途程。當央顯露也。末二句。科家嗟嘆。錯過者多。明世尊。雖是分明直指。般若真源。長安大道。爭奈眾生不能履踐。如白日青天。開眼迷路也。

東晉遠公曾結社 遺民房叢總奇才
淵明入會多耽飲 今晚休盃歸去來

此四句。科家誠人。識破幻境。同歸淨土也。東晉遠公者。師諱慧遠。鴈門樓煩人。今河東代州是也。姓賈氏。生於石趙。二十四歲。聽道安法師。講般若經。大悟。於孝武帝大元九年。至廬山。以杖卓地曰。有泉則住。起杖水隨杖出。遂居之。所居之處有潭。一日忽水涸。遂成平地。無何雷電風雨。天地陡暗。山川震動。久而暗霽。其地四方平坦潔淨。並無草木。又一日如前。雷電風雨俱作。次日忽見。棟梁椽柱斧鑿皆淨。已成規矩。積而成[什/積]。師與江東太守。奏準建寺畢。請題曰東林寺。殿名神運。於中立彌陀像。建白蓮社。共集十八大賢。同脩淨業。師三十年。跡不下山。初十一年間。三覩聖像。而不令人知。後十九年七月晦夕從定起。忽見阿彌陀佛身滿虛空。圓光之中有諸化佛。觀音勢至。侍立左右。佛言我以本願力故。來安慰汝。汝七日後當生我國。又見佛陀耶舍慧持曇順。在佛之側。前揖曰。師志在吾前。何來之遲也。既知時至。謂其徒曰。吾始居此。三覩聖像。今復再見。吾生淨土決矣。於義熙十二年八月六日示眾曰。遺屍於松林下。言訖而逝。晉時劉程之。字仲思。號遺民。彭城人。楚莊王之後。妙善老莊。通百氏。少孤。事母以孝聞。自負其志。不干時俗。初解褐為參軍。謝安劉裕嘉其賢。相推薦。皆力辭。性好佛理。乃與雷次宗。周續之。宗炳。張銓。畢之等。同來廬山。遠公謂曰。諸君之來。豈宜忘淨土之遊乎。程之。乃鑿石為誓文。以志其事。遂於西林澗北。別立禪房。養道安貧。精研玄理。兼持禁戒。宗張等。咸仰嘆之。嘗貽書關中。與什肇揚確經義。著念佛三昧詩。以見專誦坐禪之意。始涉半載。即於定中。見佛光照地。皆作金色。居十五年。於正念佛中。見阿彌陀佛。玉毫光照垂手慰接。程之曰。安得如來。為我摩頂。覆我以衣。俄爾。佛為摩頂。引袈裟以披之。他日念佛。又見人入七寶池。蓮華青白。其水

湛湛。有人。項有圓光。胸出卍字。指池水曰。八功德水。汝可飲之。程之。飲水甘美。及覺異香發於毛孔。乃自謂曰。吾淨土之緣至矣。復請僧轉法華經。近數百遍。後時廬阜。請僧畢集。程之。對像焚香再拜。祝之曰。我以釋迦遺教。知有阿彌陀佛。此香先當供養釋迦牟尼如來。次供阿彌陀佛。復以妙法蓮華經。所以得生淨土。由此經功德。願令一切有情。俱生淨土。即與眾別。臥床上面西。合掌而化矣。

晉時房羣。暴死入冥府見王。王曰。據汝簿中。曾勸一人念佛。已得生淨土。君承斯福。亦令得生淨土。羣曰。尚誦金剛經萬卷。併禮五臺。故未欲往生。王曰。誦經禮拜。故為好事。不如且生淨土。羣良久。王知其志不可奪。乃放還人間。所謂。三軍可奪其帥也。匹夫不可奪其志也。

晉時陶潛。字淵明。事如前已引。居士居柴桑時。與廬山相近。同陸脩靜。常來訪遠公。遠愛其曠達。招之入社。潛性嗜酒。謂若許飲則住。遠許之。潛入山。久而無酒。攢眉而去。曾著搜神記。多載佛靈驗事也。

知見不生。返照還源。本性離言詮。見聞覺知。無正無偏。無垢無淨。無缺無圓。

此科昭明太子。判此一段經文。為知見不生分。蓋須菩提下以四相見佛乃許之。於一切法。如是知。如是見。如是信解。不生法相。故立斯名。為知見不生也。返照還源者。此明奢摩陀。定也。以定力故。能除人法二執。雙顯人法二空理。故云。返照還源也。本性離言詮者。此明毗婆舍那。慧也。以慧力故。能開演藏乘。說出種種法門。導利羣生。雖演諸法。了文性空。得真解脫。故云。本性離言詮也。見聞覺知等者。明三摩鉢提。即中道觀也。前文。單明定慧。此中。定慧雙融。見聞者。即如是見。乃慧也。覺知者。即如是知。乃定也。總言見聞覺知者。雙照顯中道也。無正無偏等者。雙遮顯中道也。今科家。教令行人不可偏局。尋常日用之中。於見聞覺知處。不可執著根塵境上。不可離了根塵而別有性。所以無正。即不住寂寂之中。無偏。即不住惺惺之上。無垢。即不隨掉舉。無淨。即不沉無記。無缺無圓者。出三諦之外。三觀圓融也。無缺。即三觀一心。三諦一境也。無圓。即一體圓融無礙。三諦歷然。乃是一乘深入之法門也。

靈光浩浩。杲日正當天。

此二句。法喻雙明。三諦圓融之處也。乃至釋迦出世。達磨西來。都顯此一段靈光。如杲日麗天。無處不照。所以玄沙云。盡大地情與無情。森羅萬象。一切諸法。悉在我這光明裏。自在受用。故云。靈光浩浩。杲日正當天也。

知見度眾生 眾生亦復盲 如來非法相

方到涅槃城

上二句。牒經義。謂地前菩薩。加行方便位中。有能所分別。知見度生。非但菩薩著相。則所度眾生亦著四相也。如云。若菩薩有我相。人相。眾生相。壽者相。即

非菩薩。斯言能度菩薩既有四相。所度眾生亦有四相。故云眾生亦復盲也。下二句。亦牒經義。明如來。斷分別見。不著法相。謂非法相者。不生法相也。此非法相。即勝諦中。不容他物。離性離相。不屬因緣。乃寂滅坦實之體。故云方到涅槃城也。

○知見不生分第三十一。

【經】須菩提若人言佛說(至)我見人見眾生見壽者見。

註曰。此分經文。明離我法二見。因前三十分中。界塵法應皆是我法所緣之境。令知不實。今破能緣我法見心。見心乃是凡夫。所起虛妄分別。茲今拈却令忘分別。即入聖位也。且初離我見者。有真我之見。有妄我之見。妄我之見者。乃虛妄分別。眾生見也。真我之見者。遠離執著。即如來見也。既離執著。示有我見人見眾生見壽者見者。此不見中。而示有見也。在迷眾生。以為如來實有四見。故云。不解如來所說義也。是故佛以四見審問善現。是人解我所說義否。善現。解佛問義。答云。是人。不解如來所說義也。何以故者。善現自徵前義。是人何故。不解如來所說義。以善現。既解如來所說之義。即知四見。皆非虛妄分別。是真我之見。故云。是名我見人見眾生見壽者見也。長水曰。佛說我見等。非實我人等見。是假名我人等見。眾生不解。謂之實有也。

【經】須菩提發阿耨多羅三藐(至)即非法相是名法相。

上文。已離我見。此文。却離法見。亦是總結降伏。安住正行也。前第二分中。善現初問發菩提心者。云何應住。云何降伏其心。如來答。應如是住。如是降伏其心。故今結云。發菩提心者。於一切法。應如是知見信解。此結前應如是住大乘知見也。不生法相者。即不於諸法取著。此結前降伏其妄心也。此明如來說。要令眾生發菩提心。修行契理。是故善現。聞佛所說之法。即解其義。故佛叮嚀發菩提心者。於一切法。應如是知見信解。不生法相也。須菩提所言法相等者。佛乃招告善現。重徵上義。謂所言法相者。知見信解。皆是法相。既有法相數量之名。即屬俗諦也。如來說即非法相者。以三方便中。無分別之心。故云。即非法相。即真諦也。是名法相者。以三方便中。分別心空。入無分別之理。非俗非真。離性離相。故云。是名法相。即中道諦也。

若著知見信解。難契如來妙義。悟無我人壽命。還同陽焰空花。楞嚴云。知見立知。即無明本。知見無見。斯即涅槃。祇如法相不生時。還信解麼。

若著知見信解等者。此一節。謂發菩提心者。於一切法。取著知見信解。則有分別。既有分別。則成法見。既有法見。則不能證無分別之理。所以難契如來妙義也。本科中言。若著見聞覺知。恐謗刻者。悞矣。悟無我人壽命等者。此一節。明善現悟佛問義。世尊雖說我人等四見。是如來真我也。非同凡夫。實有妄我也。既非凡夫我見。則知佛之示現假名我也。如同陽焰空花。皆不可得也。楞嚴云。知見等者。此引經文。釋呈上義。若著知見信解。難契如來妙義。此明法見存。而迷理也。知見無見

等者。亦呈上文。悟無我人壽命。還同陽焰空花。此明我見空。而不實也。祇如法相不生等者。乃是科家手眼。徵問行人。明前發菩提心人。於一切法上。不起分別之念。佛印云。如是知見信解。即今法相不生。還信解麼。科家要人。於知見信解。無分別之智。此三皆空。且道還信解麼。下文出其所以也。

大千世界海中漚 一切聖賢如電拂

此二句。明法相不生之義也。依報。正報。了不可得。此明人境。如漚如電。誰起知見分別。所謂百千世界猶如空華亂起亂滅。故云。大千沙界海中漚也。一切聖賢者。上明法見已空。此明人見不存。於實相中。非唯三賢十聖皆空。縱是佛之境界亦空。故云。一切聖賢如電拂也。

法空非我道非親 樹倒藤枯笑轉新

風掃止啼黃葉盡 千林全體露天真

首句。牒經義。即經中一離法見也。然有三種發菩提心者。不分別也。二於一切法。亦不分別也。三於方便門。知見信解。故離於法見。即法空也。非我者。即第一義。離我見也。此之我見。即能緣我法之見心。此之見心。乃是所起分別之念。此念亦空。故云。非我也。道非親者。即經中不生法相。此法不生。是無分別之理。此理亦遣。故云非親。乃破執情也。次句。引宗證明。此世尊道。應如是知。如是見。如是信解。不生法相。於樹倒藤枯。笑轉新一般也。昔疎山。到瀉山便問。承師之言。有句無句。如藤倚樹。忽然樹倒藤枯。句歸何處。瀉山呵呵大笑。疎山曰。某甲四千里。賣布單來參和尚。何得相弄。瀉喚侍者。取錢還這上座。遂囑云。向後有獨眼龍。為子點破去在。後到明昭。舉前話。昭云。瀉山可謂。頭正尾正。祇是不遇知音。疎便問。樹倒藤枯。句歸何處。昭云。更使瀉山笑轉新。疎於言下有省。乃云。瀉山元來笑裏有刀也。末二句。明佛說三藏十二部。諸祖千七百葛藤。盡是止啼黃葉。為化眾生。暫止其妄念。及到理極玄微之處。皆用不著。所以世尊祇得拈花。迦葉祇得微笑。今此經中。謂發菩提心者。於一切法。應如是知見信解。不生法相。正是風掃止啼黃葉盡處。千林全體獨露天真。可謂。皮膚脫落盡。唯有一真實。

朝日忙忙暮日忙 眾生何不早思量

人如春夢終須短 命若風燈豈久長

前二句。嗟嘆世事無窮。奔忙不定。勸人省悟。急早修行也。後二句。喻人命不能長久。今日雖安。明朝未保。如春夢而短。似風燈無常。故石屋詩云。風檣來往塞官塘。站馬如飛日夜忙。胃寵貪榮謀仕宦。爭名奪利作經商。人間富貴一時樂。地獄辛酸萬劫長。古往今來無藥治。如何不早去修行。春夢短者。如黃粱一夢。古云。珊瑚枕上片時間。遊盡江南數千里。

淨土緣生稱本懷 一靈更不墮胞胎

法身解脫俱齊等 瞥地回頭歸去來

初句。謂淨土所生之緣。隨心所欲。九品池中。即得稱心而生。既生。欲往十方國土供佛。隨心即往。或衣或食。即得隨心而至。故曰。稱本懷也。淨土詩云。一朵蓮含一聖胎。一生功就一華開。稱身瓔珞隨心現。盈器酥醃逐念來。金殿有光吞日月。玉樓無地著塵埃。法王為我談真諦。直得虛空笑滿腮。次句。言此土眾生。所生之緣。有三緣會合。十月懷胎。種種之苦。不得隨心。所以科家誠勉行人。一靈真性。直往蓮胎托質。休更入母胞胎也。末二句。謂此土行人。果能生在淨土。即得三德俱備。故云。法身解脫俱齊等。與佛無殊。既是如斯妙處。此土眾生。何不瞥然急早回頭。萬緣一齊放下。晝夜專念南無阿彌陀佛。歸淨土去也。

應化非真。如露如電。有為法。不牢堅。住相布施。果報人天。

此科昭明太子。判此一段經文。為應化非真分。蓋不取於相。又一切有為。如夢如幻。故立此名。為應化非真也。如露如電者。明佛現應化之身。示同生滅。亦屬有為無常之法。虛假不實。故以六喻而譬之。如露者。以喻妄身。念念遷[冰-水+射]。生滅無常。似草上之露。日出則晞也。如電者。以喻現在所念之法。剎那不住。猶如電光。既屬有為。豈有牢堅。了此不堅。方證真常也。住相布施者。此明經中。以滿無量阿僧祇世界七寶。持用布施。蓋是有為果報。只在人間天上受福而已也。

持經四句。入聖超凡。頻頻轉念。金剛體最堅。

上二句。明持經。即無為福而得成佛。謂四句者。即一切有為法。如夢幻泡影。如露亦如電。應作如是觀。以此經。即化身佛所說。蓋化身佛說法。離言說相。而無取著。弘經行人亦能離著。故功德無量。所以入聖超凡。故演說之福。勝彼無量阿僧祇布施也。下二句。乃科家誠勉後學。但凡持誦。須要以圓融妙觀。專住一心。觀三諦理。不可循行數墨。轉益見知。其猶春禽晝啼。秋蟲夜鳴。風氣所使。終無意謂也。今言頻頻轉念者。要人孜孜切切。正念不忘。一念萬年。萬年一念。斯一念非紙墨文字。而可詮註。乃無字真經。金剛妙體。水火難壞。故云最堅也。昔東印土國王。請二十七祖般若多羅齋。王問云。何不看經。祖曰。貧道入息不居陰界。出息不涉眾緣。常轉如是經。百千萬億卷。此即頻頻轉念之意也。玄沙亦云。仁者在甚麼處。汝今欲得出他五蘊身田。但識汝秘密金剛體。古人道。圓成正徧。徧周沙界。乃至大地山河。十方國土。明暗色空等。無非是汝金剛體也。

演說四句偈 六度已為初 縱橫無罣礙

般若自如如

初一句。即是為人宣演解說。一切有為法等。四句之偈也。次句。言六度者。即布施。持戒。忍辱。精進。禪定。智慧。以布施度慳貪。以持戒度破戒。以忍辱度嗔恚。以精進度懈怠。以禪定度散亂。以智慧度愚癡。故云六度也。已為初者。以布施為五度之首。布施有二種。一財施。二法施。今科家言。為人演說四句偈等。即法施。故云。為五度之初也。末二句。科家意。要為人演說四句偈。以為法施。欲令行人

。均脩萬行。成就四心。六度圓融縱橫無礙。了一切法體空。不可得者。獨顯般若如如理也。

○應化非真分第三十二。

【經】須菩提若有人(至)如露亦如電應作如是觀。

註曰。此分之義。由前十七分中。佛告善現。發菩提心者。無能度所度之念。至二十六分。二十七分。重誠執著。相好俱空。則成斷滅。及二十八分。但以相好修福德故。而不取著即證法身。謂有漏不受。無漏受而不著也。二十九分。應身有去來。法身無去來。乃至三十分。如來以碎界作塵。喻法應二身。能一能異。非一非異。三十一分。於一切法不生法相。故此分經文。而有三節。初節。以無量阿僧祇世界七寶。持用布施。此是假喻校量。二節。若有善男子善女人。發菩提心者。乃至其福勝彼。此明持說福勝。三節。從云何為人演說等。此釋福勝所以也。前以七寶布施。但得有漏因果。人天受福而已。福盡還墜。此以發菩提心者。持於此經四句偈等。直下明了般若真智。即得見性成佛。復兼受持讀誦。為人演說。亦令見性。所以功德轉勝。又況此經。乃是化佛所說。以為經教之主。受持演說。是弘經之人。所弘之經。既是化佛。稱性所說離言說相。故功德無量。弘經之人。亦能離言說相。所以其福勝彼也。云何為人演說者。佛自問云。如何為人演說。乃自答云。不取於相。如如不動。意云。為人演說。若能不以生滅心行。說實相法。則稱真理不取於相。唯顯真如故。此即心如境如。故曰如如。蓋以心境皆真。如是法身不動也。何以故者。佛自徵起上文。何故為人演說。不取於相。如如不動。佛恐或者疑云。既言為人演說。則諸佛如來。常在世間。為眾生說法。何故言如來入般涅槃耶。以涅槃。即是不動無為之義。今涅槃寂靜。與說法喧動。動靜相返。云何兩存。恐有此疑。故說偈以釋其疑也。此偈謂一切有為法者。即一切世間。依正。染淨。生滅之法。以佛生人中。示同生滅。亦屬有為無常之法。無常之法虛假不實。故以夢幻泡影露電六喻而喻之。既知無常虛假不實。無非真常之道也。應作如是觀者。觀即般若妙智。蓋般若具空假中三觀也。以斯妙智。觀一切有為法。有依正染淨等。無量差別。此即假觀。觀俗諦也。以斯妙智。觀一切有為法。皆生滅無常。如夢幻泡影露電。此即空觀。觀真諦也。以斯妙智。觀一切有為法。即真即俗。非空非有。此即中觀。觀第一義諦也。能如此觀一切有為法。具足圓融三觀三諦者。以能觀既是妙智。即一心三觀也。所觀無非妙境。即一境三諦也。能達此義。而如來法身。常在世間。豈有滅也。言入滅者。乃應身耳。故舉喻以顯無常。令人易曉。故曰。應作如是觀也。亦云一經始末。皆稱如是者。始云應如是住。如是降伏其心。中間節節云如是。主此又云如是觀者。論乃釋云。妙智正觀。故知妙智。實一經之宗也。從第三分至此。正宗分已竟。

【經】佛說是經已長老須菩提(至)皆大歡喜信受奉行。

此節經文。即流通分也。流通者如水之不壅塞。喻流通般若。利益羣生。使聞經而出離苦海。令聽法而必證菩提。天親偈曰。佛說希有總持法。不可稱量深句義。從尊者聞及廣說。回此福德施羣生。經初但言與大比丘眾。今經末。兼言四眾八部。顯前說經之始。此八部亦在會也。聞佛所說皆大歡喜者。文殊請問經云。歡喜奉行有三種義。一說者清淨。不為取著利養所染故。二所說法清淨。以如實知法體。說理如理。說事如事故。三得果清淨。起信解行。得無漏果故。三種既皆清淨。孰不歡喜奉行者哉。傳大士頌曰。如星翳燈幻。皆為喻無常。漏識修因果。誰言得久長。危脆同泡露。如雲影電光。饒經八萬劫。終是落空亡。

施七寶滿僧祇。福有求而即妄。持此經演四句。德雖勝而非真。宴坐水月道場。成就空華佛事。度幻化之含識。證寂滅之菩提。凡情聖解俱空。生死涅槃如夢。

初節。施七寶等者。牒經中喻以七寶布施。惟在人天受福。即屬有求而即是妄。未離有為。故須遣也。二節。持此經等者。乃是科家拈情。以受持演說四句之偈。福德雖勝。而福德非真。以執著無為。亦須遣矣。所以云。真不立。妄本空。有無俱遣不空空。是也。宴坐水月道場等者。此文。呈前非真之義。指示行人。以般若真空之中。受持演說皆是不真。所以宴坐道場。即同水中之月。持經演說。成就佛事。猶如空裏之華。總言不實之義也。永明壽云。建立水月道場。莊嚴性空世界。羅列幻化供具。禮拜影現法會。施為谷響度門。修習空華萬行。是也。度幻化之含識等者。此文亦呈前非真之義。以為人演說。只要度脫眾生。既是幻化不實。云何度之。所證菩提既是寂滅。寂滅理中無取證故。佛告清淨慧言。於實相中。實無菩薩。及與眾生。何以故。菩薩眾生皆是幻化。幻化滅故。無取證者。永明壽曰。常遊如幻法門。出入無礙觀門。降伏鏡像魔軍。大作夢中佛事。廣度如化含識。同證寂滅菩提也。凡情聖解俱空等者。乃是科家手眼。拈人執情。我前來如此說話。將凡情聖解。俱要拈了。以生死涅槃猶如夢事。所以封慧上堂曰。未陞座前。大地人成佛已畢。更有何法可說。更有何生可利。況菩提煩惱本自寂然。生死涅槃猶如作夢。施設門庭。誑惑初機。方便門開。羅紋結角。於衲僧面前。皆成幻惑。且道衲僧有甚長處。卓杖一下曰。孤根自有擎天勢。不比尋常曲彙枝。真如元云。凡見聖見。春雲掣電。真說妄說。空華水月。翻憶長髭見石頭。解道紅爐一點雪。

銷釋金剛科儀會要註解卷第八

銷釋金剛科儀會要註解卷第九

姚秦三藏法師 鳩摩羅什 譯
隆興府百福院 宗鏡禪師 述
曹洞正宗嗣祖沙門 覺連 重集

昔梁武帝。請傳大士講經。大士揮案一聲。便乃下座。如斯洪範。千古分明。不悖弘慈。當機辨著。噫。大士揮尺講經。猶是曲垂方便。美則甚美。了則未了。若論最上頓宗。直是不通凡聖。以金剛王寶劍。盡情掃蕩無餘。一任渠明來暗來。四方八面來。普教他休去歇去。一念萬年去。雖然如是。且道末後一句。誰堪奉行。咄。

此一節。科家引證。真空實相中。凡聖皆空。梁大通五年。有義烏雙林大士者。姓傅氏。名翕。法號善惠。年十六。納劉氏女妙光為室。生二子。名普建。普願。嘗有西域沙門高頭陀者。見大士曰。吾與汝。毗婆尸佛所。同發誓願。今兜率宮衣鉢現在。何日當歸。因命臨水觀其影。見圓光寶蓋。大士笑謂之曰。爐鞴之所多鈍鐵。良醫之門足病人。度生為急。何思彼樂乎。居無幾。常見釋迦。金粟定光三如來。放光襲其身。大士喜曰。吾得首楞嚴三昧。即捨田宅。及賣妻子。得錢五萬。以設法會。遂於松山之頂。因雙檣樹。剏寺而居。故名雙林。日則營作。夜則行道。一日梁武帝。請誌公講金剛經。公曰。貧道不能講。市中有賣魚翁。號傳大士。能講此經。帝詔大士。於壽光殿。講金剛經。大士陞座。即於案上揮按一聲。便乃下座。誌公曰。陛下會麼。帝曰不會。公曰。大士講經已竟。此即凡聖情忘離言之道也。如斯洪範等者。指大士揮案處。可為千古規範。分明顯示不言之道。乃是不悖弘慈。悲心太甚。正是當機覲面。與人辨出一著子真理也。噫者。乃科家歎辭。有縱奪之意。似大士前來揮尺講經。雖是不涉言詮。當面顯理。猶是今時門頭曲垂方便。如唐宣宗。問弘辯法師曰。何為方便。對曰。隱實覆相。權巧門戶。被接中下之人。曲施誘進。謂之方便。設為上根利智言之。所謂。正直捨方便。但說無上道。乃至祖師門中。玄言密語。正案傍提。忘功絕謂。亦是方便之跡。帝乃然也。美則甚美者。乃科家先縱後奪之意。似大士如此揮案。直顯無言之道。甚是美妙。於理恰好。爭奈陞座揮案。乃是起模畫樣。未出建化之門。而未了也。故芙蓉楷上堂曰。纔陞此座。已涉塵勞。更乃凝眸。自彰瑕玷。別傳一句。勾賊破家。不失本宗。狐狸戀窟。所以道。真如凡聖皆是夢言。佛及眾生並為剩語。到這裡。回光返照。撒手承當。未免寒蟬抱枯枝。泣盡不回頭也。若論最上頓宗等者。乃科家顯示。最上一乘圓頓宗旨。直是不通凡聖。古德云。威音王未曉。彌勒豈惺惺。以金剛王寶劍者。寶劍喻理中。凡聖絲毫之情不容。故云。盡情掃蕩無餘。以般若真心外。了無片事可得也。故紹隆語曰。最初一步。十方世界現全身。最後一言。一微塵中深鎖斷。有時拈起。如倚天長劍光耀乾坤。有時放下。似大冶紅爐飛過片雪。乃至即此涅槃妙心。金剛王寶劍。敢問大眾。作麼生得到

這般田地。如人上山。各自努力也。盡情掃蕩無餘者。古頌。金剛寶劍最威雄。一喝能摧萬仞峰。徧界乾坤皆失色。須彌倒卓半空中。一任渠明來暗來等者。乃科家。伸出掃蕩之義。昔鎮州普化和尚。於州中行化。或城市。或塚間。振鈴一聲曰。明頭來明頭打。暗頭來暗頭打。四方八面來旋風打。虛空來連架打。一日臨濟。令僧捉住曰。不恁麼來時如何。師拓開云。明日大悲院裏赴齋。似此說話。豈不是明暗相參。通身顯露也。普教他休去歇去等者。此正明金剛王寶劍。掃蕩無餘之義。乃是忘功罷業。一了百當。以斯前來金剛寶劍。譬最上頓宗。掃蕩無餘。喻不通凡聖。所以。科家普教行人。凡聖之念一齊休去歇去。所謂不慕諸聖。不重己靈。上無諸佛可成。下無眾生可度。直得一念即是萬年。萬年即是一念。可謂十世古今。始終不離於當念。無邊剎海。自他不隔於毫端。明斯一箇真心。含裹十虛也。雖然如是者。結前之義。既云休去歇去。掃除凡聖。且道此經末後佛說。不取於相。如如不動言句。誰堪奉行。乃是重審之意。咄者。科家要人。於末後一句上。直下承當。向下伸答露也。

直得虛空悉消殞 天龍八部遍流通

此二句。答上末後一句流通之義。既是不取於相。如如不動。總是一箇真理。更無虛空可得。所以悉皆消殞。楞嚴經云。一人發真歸源。十方虛空悉皆消殞也。流通者。有二種。一理。二事。理者。即末一句。如如不動之理。勝天王所問般若經云。若能發明般若真理。如來與天王授記。而流通斯道。須菩提岩中晏坐。帝釋天雨花讚歎。尊者問曰。何故雨花讚歎。帝云。我聞尊者善說般若。尊者曰。吾於般若無說。帝云。尊者無說。我亦無聞。無說無聞。乃真般若。事者。以此金剛般若經。功德甚深。讀者獲益。所以天上人間。龍宮海藏。在在處處。八部守護。鬼神欽崇。是故流通天上人間。普遍微塵剎海也。

空生疊疊窮迷妄 大覺重重說偈言

末後了然超百億 明如杲日耀乾坤

初句。明善現疊疊請問。始從第二分中。總問菩薩。云何發阿耨多羅三藐三菩提心。應云何住。云何降伏其心。乃至經末而有九重請問。祇是深窮迷妄根源。故云。窮迷妄也。次句。明大覺世尊。答須菩提而重重徵問。展轉召告。總有三十重問答。然而說偈者。共有七處。即佛說。若有人受持四句偈等之言。自第八分中。說四句偈。第十一分中。說四句偈。第十二分中。說四句偈。第十三分中。說四句偈。第二十四分中。說四句偈。第二十六分中。說四句偈。第三十二分中。說四句偈。除十二分中四句偈。此偈在處尊如佛塔。除二十六分中。四句偈。以頌執著相好。即成邪見。其餘五處四句之偈。正是校量持經功德。倍勝之義。故云。大覺重重說偈也。後二句。言末後了然超百億者。牒經中義。明佛末後。道箇不取於相。如如不動。若人如此。受持讀誦。為人演說。其福。則超過無量阿僧祇。三千世界七寶布施功德。故云。超百億也。後總結云。此一卷金剛經。世尊與須菩提。如此問答。單顯實相真空。我

今又以科文解釋分明顯示其理。猶如杲日當天。乾坤普照。故云。明如杲日耀乾坤也。

直截根源說與君 了無些子涉情塵
奈何蹉過西來意 猶道休將境示人

前二句。明世尊末後所說之法。只此不取於相。如如不動。可謂直截根源。不曾牽枝引蔓囊藏被盖。分明與諸人說出。併無絲毫涉於情塵也。後二句。引證。佛與汝等直指。甚是分明。汝善不會。蹉過如來妙意。正如猶道休將境示人相似。昔僧問趙州曰。如何是祖師西來意。州云。庭前栢樹子。僧曰。和尚莫將境示人。州云。吾不將境示人。僧復曰。如何是西來意。州云。庭前栢樹子。此僧不會。却問廣教曰。某甲問西來意。趙州道庭前栢樹子。他只將境示某甲。教云。我不辭與汝道。汝還信得及麼。僧曰。爭敢不信。教云。汝試問我。僧曰。如何是西來意。教云。簷頭水滴聲。其僧悟入。遂述偈曰。簷頭水滴。分明歷歷。打破乾坤。當下心息。更不疑也。

極樂家鄉甚妙哉 無諸憂苦樂常諧
因談果海圓音徹 時禮金容歸去來

前二句。言西方極樂世界。境妙無諸眾苦。所以楊無為曰。唯是淨邦。更無諸苦。蓮苞托質。無生苦也。寒暑不侵。無老苦也。身離分段。無病苦也。壽命無量。無死苦也。無父母妻子。無愛別離苦也。上善人聚。無怨憎苦也。華穢香食。珍寶受用。無求不得苦也。無諸憂苦。可謂真樂也。後二句。言西方人。勝此土凡夫。既生彼國。時時見佛聞法。即證無生。遂得補處。因談果海者。即彌陀因中。發四十八種願。果上不捨因門。而接引凡夫往生。即得聞法。瞻禮金容。可謂圓修圓證之行人也。

金剛般若。六度根源。內外最牢堅。三千大千。萬古流傳。

此科。金剛般若經後題。以金剛般若之智。為六度之根源。乃至一切萬行。皆因般若真智成立。故五度如盲。般若如導。所以布施無般若。惟得一世榮。後世受餘殃。持戒無般若。暫生上欲界。還墮泥犁中。忍辱無般若。報得端正形。不證寂滅忍。精進無般若。徒興生滅功。不趣真常果。禪定無般若。但行欲界禪。不如金剛定。萬善無般若。空成有漏因。不契無為果也。內外牢堅者。以此般若。既為六度根源。則內之六根。外之六塵。無非般若智用。故云。內外最堅也。三千大千等者。以斯金剛般若經。非為此土流通。而萬億四天下。皆悉流通。故云。萬古流傳也。

雙林默語。祖祖重宣。開六悟入。眾生大有緣。

雙林默語等者。以此道。唯可以心傳。不立於文字。故世尊拈華。而妙心。傳與迦葉。謂之默契真心。自迦葉已來。祖祖相傳。重宣此道。至於一花五葉。千花競秀。潛通後進。直接上根。故有瞬目揚眉。擎拳豎指。或行棒喝。豎拂拈搥。或持叉張弓。輓裘舞笏。或拽石搬土。打鼓吹毛。或一默一言。一呼一笑。乃至種種方便。皆是親切為人。於動靜中。顯示無言之道也。開示悟入等者。以宗教隱顯雖殊。同一開

示其理。而行人各各悟入之處。皆不異也。溫陵曰。開者。破無明之封蔕。示者。指所迷之真體。悟者。豁然洞視。入者。深造自得也。又曰。開即道慧智。示即道種智。悟即一切智。入即一切種智也。眾生既悟此智。豈非大有因緣也。

說破無生話 決定往西方 彌陀極樂國

常聞般若香

前二句。科家意云。我以此經科儀。如斯開示。講演分明。可謂。說破無生之話也。若有行人。信解受持。讀誦演說。見聞隨喜。永除四相。獨顯一真。決定往生。西方極樂世界也。後二句。言彌陀國中。受用境界。既見彌陀。常聞般若微妙之法。故般若是諸佛母。出生自性彌陀。所以生淨土者。祇聞佛功德香。不聞二乘之香。入簷蔔林。惟聞簷蔔香。不聞餘香。故優曇曰。一句彌陀自主張。更無一法可思量。明明徑指歸家路。優鉢華開徧界香。

觀之為言。內心覺照。其在般若心經。則首云。觀自在菩薩。行深般若波羅蜜多時。照見五蘊皆空。在此經。則終以如是觀。如發菩提心者。印證諸法空義。學者勿以肉眼觀之而會之。則為親參黃面矣。凡諸聞者。莫不頓然開悟。無量歡喜。信而受之。奉而行之。且道信受奉行。箇甚麼。

此科經中。應作如是觀之義。故觀之為言者。即訓釋之言也。觀之一字。訓為內心覺照之義。此之覺照。即今經末云。應作如是觀。即是圓融三觀也。其在般若心經者。其者指法之辭。指此觀之一字。即在般若心經。甚詳。所言心者。玄奘大師云。若歷事備陳。言過二十萬頌。若撮其樞要。理盡一十四行。心顯要妙所歸者。六百卷之中心。故云歸也。蓋以彼心經。例此金剛經。亦六百卷之中心也。則首云。觀自在菩薩者。即指能觀之行人。觀者。即觀照之智慧也。自在者。即無拘無滯。謂之自在。以菩薩。運權實無礙之智。照空色融通之境。冥神心於真空。所不能滯。及耳目於聲色所不能礙。故云。自在菩薩也。行深般若波羅蜜多時者。明菩薩所觀之境。所行之行也。深即簡別義。非二乘之淺行。即菩薩甚深之般若。能觀之觀智。時者。即菩薩超觀之時也。照見五蘊皆空者。此菩薩以深般若。能觀之智。照見五蘊。所觀之境也。色蘊者。即五根六塵最粗。受想行者。此三蘊為心所。識蘊為心王。此之四蘊。最極微細。難斷難空。今言五蘊皆空。即法空也。然大乘菩薩。先觀法空。而能依之我。任運自空。即人空也。在此經等者。明所修之觀智。以此金剛經中之妙觀。例彼心經中之覺照也。如發菩提心者。明菩薩所發之大心也。此金剛經中發菩提心者。即彼心經中觀自在菩薩。乃至云。依般若故得阿耨菩提是也。印證諸法空義者。明所空諸法也。謂此二經。皆是大般若經所攝之部分。以斯二經校之。既部分同。則觀照亦同。發大心亦同。所空諸法亦同。所以印證諸法皆同。然法空義者。宗鏡云。一者三輪體空。檀波羅蜜實相也。二者罪性本空。尸波羅蜜實相也。三者三心安忍。羼波羅蜜實相也。四者勤修善法。精波羅蜜實相也。五者心不亂味。禪波羅蜜實相也。六者

非境非智。智波羅蜜實相也。以擴而充之。萬法無非實相真空。故云。印證諸法空義也。學者勿以肉眼觀之等者。乃科家誠行人。不可以肉眼觀之。凡意會之。謂。隔紙膜不能見外物。隔皮膚不能見五臟。既有此礙。豈能照見諸法皆空也。似前二經之中。菩薩皆以般若智慧為眼。亦名爍迦羅金剛堅固正眼。照窮諸法無非真空。學者若能如斯觀之。則為親參黃面世尊。以法空即是見佛也。凡諸聞者莫不頓然開悟等者。凡一切行人。若以智眼觀諸法空。則頓然明了自性。便能信受奉行。方是親見如來。親聞法要。親自流通。天上人間利澤羣生也。且道信受奉行箇甚麼者。此是科家手眼。徵問行人。如前來要人信受奉行。端的奉行個甚麼道理。而下文伸答也。

觸目對揚真般若 山河全露法王身

此二句。答上之辭。若解信受奉行。即是般若真心信之。故觸目見色。對揚般若。所以青青翠竹總是真如。鬱鬱黃花無非般若。大地山河全露法王之身。此明諸法依真而起。法法全是真心。可謂。溪聲常瀉空王偈。山色全彰古佛心。

五千來字妙難量 八百餘家解謾詳

珍重諸人休外覓 回光直下自承當

前二句。明金剛經始末經題。三十二分字數。共計五千一百七十五字。及昭明科目。二百五十七字。總該五千四百三十二字。故云。五千來字。妙難量者。以此金經。深含妙理。人難測量也。八百餘家者。當時譯經潤文。雖有八百之人。不曾詳細解明。與人指出。故云。解謾詳也。後二句。指出妙難量之義。所以珍重諸人。須要消歸自己。故休外覓。要人回光返照。見自本心。直下承當。不離動靜。於一切見聞覺知處。明了無疑。是為直下承當也。

鬼神稽首聽經聲 妙悟圓通萬法明

從此諸人如會得 這迴更不問前程

前二句。以此經。獨顯真空。頓除色相。故鬼神稽首聽之。無不獲益。悉得妙悟圓通。萬法皆明也。後二句。科家指示行人。若於此經。直下會得般若真智。勝過鬼神異類。而得直成佛果。故云。這迴不必問前程也。

人身得處最為難 莫把浮生過等閒

須藉金剛三昧力 直教打破死生關

前二句。歎人身難得。如須彌山。輶芥投針相似。故最為難也。既知人身難得。今已得之。須要生難遭想。不可虛度光陰。空延歲月也。後二句。科家指示行人。須借金剛三昧定力。斷除無始已來。俱生無明。一切煩惱。方得出離生死。古德云。百年只在暫時間。莫把光陰當等閒。努力修行成佛易。今生錯過出頭難。無常忽到教誰替。有債元來用自還。若要經閻老案。祇須參透祖師關。

三十二分。分分全真。言下好惺惺。四流浪息。六國安寧。

此科三十二分之文言。此一部金剛經。從正宗中第二分善現請問。云何應住。云何降伏其心。佛答發菩提心者。應如是住。如是降伏其心。第三分中。住中降伏。第四分中。修中降伏。從第五分至末。唯一降伏。而斷二十七疑。以該安住修行。蓋二十七種。疑妄已空。真空妙道。於斯明矣。故分分皆是真如妙理。至於字字皆是真如。十方法界色色皆真。故云。分分全真也。科家恐人。於斯錯過。故指示云。雖是分分全真。須要行人。言下惺悟。句前知歸。便得四流浪息。六國安寧。言四流者。即欲流。有流。無明流。見流也。六國者。迷時於六根境內。各有一類心心所法。心識。於自境中取捨未休。如國有賊。不得安靜。今則因經證理。達安全真。生死之流。於是則息。六根之賊。於是則滅。故得心王安寧也。

朝看暮轉。拔楔抽釘。春雷震響。推倒望州亭。

此一節。明此經。雖是分分皆真。須要行人。二六時中。孜孜切切。常在於此。得義忘言。朝看暮轉。方得分明。了諸法空人空。自殞二執。自絕二障。亦忘二空。真如於斯明矣。故喻拔楔抽釘也。春雷震響等者。前云。言下惺惺不昧。即得四流浪息。六國安寧。此又喻春雷震響推倒州亭。以古誌書云。十里一亭。百里一跬。今或七十里。八十里。亦為一跬也。而行路之人。一程望一程。一跬望一跬。而進之。以此而比於修行人。進道階級也。所言推倒者。欲使行人。忘却階級。不歷修證。不涉途程。歸家穩坐。所謂。眼中撥盡黃金屑。觸處縱橫鳥道玄。

見色非干色 聞聲不是聲 色聲不礙處

親到法王城

前二句。要令行人。於聲色中。返聞自性。返見真理。眼雖見色。心非干色。耳雖聽聲。意不著聲。古德云。祇此見聞非見聞。更無聲色可呈君。箇中若了全無事。體用何妨分不分。後二句。果能聲色不礙。即得親到法王之城。深入真如之理。六根門頭縱橫自在。所謂。回光返照便歸來。廓達靈光無向背。

○般若無盡藏真言。

【經】納謨薄伽伐帝鉢刺若(至)三蜜栗知佛社曳娑訶。

佛言。如是真言。是諸佛母。能誦持者。一切罪滅。常見諸佛。得宿命智。所聞正法總持不忘。疾證無上正等菩提。

今同善眾。共閱最上乘經。慶幸今辰佛事。時當滿散。普集良因。莊嚴會首之福田。成就無窮之善果。此事且止。試問諸人。這一場公案。作麼生施行。還會得麼。拈起則佛觀不破。展開則法界難藏。若能直下承當。管取本來具足。雖然如是。猶涉途程。且道即今兩手分付。又作麼生。

首一節。乃科主。撫安在會眾善人等。同臨眼見耳聞。共閱金經般若。乃最上大乘教。如來。為發大乘者說也。次節。慶幸今辰佛事等者。科家意云。此金剛經。千生罕遇。萬劫難逢。今建道場。同共披閱。科判講演。豈非慶幸。今辰佛事時當滿散

等者。乃是科判此經之時。正當圓滿將散。所以普集良因。普令見聞隨喜。受持讀誦講演開示。俱獲良因。無盡功德也。莊嚴會首等者。以前來科判講演無盡功德。先當回向會首之福田。言會首者。如來說法三百餘會。皆有會首。華嚴七處九會。各有會首。今經以善現為會首。而以般若轉教菩薩。各各授記作佛。而善現蒙佛授記。號名相如來。自他皆成菩提。利莫大焉。故云。成就無窮之善果。今之會首。因果亦然。此事且止等者。科家意云。上來科判回向等事且止。向下自彰手眼。審問大眾這二場公案。作麼生施行。試問此理如何施設。還會得麼。要人急須著眼。下文發明此理。拈起則佛覷不破者。以此理。沒踪跡。斷消息。三光猶未照。五眼尚難窺。展開則法界難藏者。以此理。逼塞乾坤。充滿法界。所謂法法不隱藏。古今常顯露。山河及大地。全露法王身。若能直下承當等者。科家誠勉行人。我今拈此公案。當面直指。汝等諸人。若能直下承當此理。管取本來具足。人人本有。個個不無。在聖不增。在凡不減。不從千聖借。豈向萬機求。是汝本有之道也。雖然如是等者。乃科家拈情。吾今拈提公案。猶涉途程。所以洞山守初曰。若論此事。放行則曹溪路上月白風清。把住則少室峰前雲收霧捲。如斯話會。已涉言詮。六祖云。祇此不立兩字。早是文墨。道個單傳直指。已落曲垂。經云。但凡言說。皆屬方便。且道即今兩手分付等者。即今兩手分付。恐抄錄者悞之。應是不涉途程一句。又作麼生。此是科家徵問。向下伸答是也。

言言見諦言非有 句句超宗句本無

此二句。答上不涉途程之義。此明道本無言。借言顯道。行人若能言言見諦。則不見有言。而唯見真理。可謂得義忘言。得魚忘筌也。下句。理借文句發明。行人若能句句超宗。於理無住。不見有句無句。而唯見中和之道也。川老頌曰。有相有求皆是妄。無形無見墮偏枯。堂堂密密何曾問。一道寒光爍太虛。超字。恐錄者而訛。當作朝字。智者再詳。

金剛本體湛然虛 把斷牢關一物無

若要山僧通線路 諸人收取護身符

上二句。頌金剛經後題。言此經中所詮之理。乃是真如本體。清淨妙性。湛然空虛也。既是湛然空虛。於真如體上。了無一物。所以把斷牢關不通凡聖。故般若如太阿劍。觸之則喪身失命。似大火聚。燎之則燒破面門。十方無壁落。四面亦無門。初自五蘊。終至無上菩提。中間無有一法不空。故云。一物無也。下二句。科家意云。我如斯頌。若有人問。把斷牢關一物無處。請師通一線路。我向他道。若要山僧通達一線之路。汝等諸人。當收護身之符。即指金剛經中。所詮真理。若能會得。乃是脫生死法。出世之良方也。

閻王本是平等君 不愛民財祇取人

陰司若用錢打當 貧者先亡富者存

此四句。明地府十王。乃是菩薩化現。所以至公無私。外現威惡之相。內懷慈愍之心。既是菩薩。豈愛錢財打當。故稱平等君也。觀佛三昧經云。化閻羅大王。告勅獄中痴人。昔造五逆十惡。命終生此阿鼻。汝今應當發菩提心。歸投三寶。將諸鬼等稱南無佛。承佛恩力。尋即命終。生四天中。生彼天已。發菩提心。故知閻羅王等皆大菩薩。所以教化地獄。既是菩薩。豈愛財耶。夫論作罪之人。命終之後。牛頭獄卒錄其精神。在閻羅王前。辯覈是非。當爾之時。一切冤對皆來證據。不可以錢財寶貨。囑託求脫。杳杳冥冥。恩赦無期。於是閻羅王。切齒訶責。將付地獄。歷無窮劫求出莫由。此事不遠不關他人。正是我身自作自受。父子雖親。一旦對至。無代受者。可謂。明明公道終難隱。暗暗私情到了知。古德云。盡說修行不在遲。今生還有後生期。三途一報五千劫。出明頭來是幾時。

西方極樂景幽深 寶網光騰百萬尋
菩薩為鄰談妙旨 聲聞作伴演圓音

前二句。言西方景致幽深。佛言阿彌陀佛刹中。復有無量寶網彌覆其刹。皆以金銀珍珠。百千雜寶。奇妙莊嚴。周匝四面垂以寶鈴。光色晃耀。有百萬尋。盡極嚴麗。亦有自然德風徐動。不寒不暑。柔軟溫和。不速不遲。吹諸寶樹。及諸寶鈴。演發無量微妙法音。流布萬種清雅德香。其有聞者。塵勞垢習自然不生。風觸其身皆得快樂也。後二句。謂西方世界。諸大菩薩。聲聞之眾。既皆浴已。或在地上。講經者。誦經者。說經者。授經者。或虛空中。講經者。誦經者。說經者。授經者。有得須陀洹者。乃至阿羅漢者。得不退地菩薩。莫不欣然適意而悅。得與諸上善人。俱會一處。與菩薩為鄰。聲聞作伴。同談妙旨。共演圓音。

良緣眾等。聊聽些箇。般若大摩訶。行住坐臥。不離這箇。

此科。大摩訶般若經題言。良者善也。緣者。指講演聽受之緣也。眾者。即在會四眾之行人也。聊聽些箇者。科家誠勉眾等。諦實而聽。此大摩訶般若。即真空大智慧。目性分中本有真經。一向塵埋。迷而不知。吾今勸汝諦實聽信也。行住坐臥等者。此大般若真如妙性。只在諸人。行住坐臥四威儀中。動靜不離也。大人云。一切心中有法王。行住坐臥露堂堂。聲求色見空勞攘。笑倒東村孟八郎。

人人本具。非我非他。諸人薦取。今生休蹉過。

此一節。呈前般若大智。既是坐臥不離。豈非人人本具。自性圓明。故非我非他也。古德云。無相家風本現成。人人心地發光明。豁開自己神通藏。受用無窮出世人。諸人薦取者。科家要人。不可蹉過此理。既是當人本具。應須直下薦取。故云。今生休蹉過。可謂。此身不向今生度。更待何時度此身。

摩訶空最大 最大是摩訶 般若波羅蜜
撒手見彌陀

此節。明摩訶般若心經之題。上二句。明摩訶最大。以此摩訶真空最大者。言心真如門中。示摩訶衍體。即是體大。乃諸佛眾生之心也。即此最大是摩訶者。牒上最大之義。言心生滅門中。示摩訶衍相。於自體相用中體大也。然於一心法中。兩言其體大者。蓋以般若智之大。彌綸法界。細入微塵。縱脫凡證聖而妙體凝常。雖入死出生而真心不變。大包無外細入無內。故云。空最大也。下二句。明般若最大功能。以此大般若是能空之大智。世出世間。是所空之相法。故色相無邊。般若無際。此中祇言般若。而不云相者何耶。舉能空顯所空也。即生滅門中。三大之相大也。斯般若大智若有行人。於四威儀中。頓在目前。即得超出生死愛河。直到菩提彼岸。撒手見自性彌陀。舉步遊寂光淨土。此是生滅門中。三大之用大也。今言彌陀者。即本覺清淨真如。乃自性佛也。優曇頌曰。高超淨土勝娑婆。一步歸來快活多。常寂光中都坐斷塵塵剎剎見彌陀。

摩訶般若波羅蜜多心經。

此經。大般若經分所攝。故玄奘嘗云。若歷事備陳。言過二十萬頌。若撮其樞要。理盡一十四行。心顯要妙所歸者。乃六百卷之中心。故云。心經也。

夫欲了最上大乘。須具金剛正眼。看釋迦老與須菩提。顯大機。施大用。聚須彌山王等七寶。碎大千沙界若微塵。盡僧祇劫布施將來。獨最上乘無法可得。直得人天膽喪。魔外心寒。俱能捨命承當。依舊白雲萬里。

此是科家。開示行人。夫欲了最上大乘。金剛經者。此經乃大乘終實之教。即般若大慧也。須具金剛堅固燦迦羅之正眼。照窮諸法體空。盡其底蘊。無不明了。方纔了此大乘之道也。看釋迦老與須菩提等者。明善現有九重請問。而如來以三十重問答。以斷二十七疑。皆是顯大機大用也。聚須彌山王等七寶者。牒前二十四分中。若三千大千世界。所有諸須彌山王。如是等七寶聚。有人持用布施。不如此經四句偈。為人演說。其福勝彼也。碎大千沙界若微塵者。牒前三十分中。若善男子。善女人。以三千大千世界。碎為微塵是微塵眾寧為多否也。盡僧祇劫布施將來者。牒前三十二分中。若有人以滿無量阿僧祇世界七寶持用布施不如為人演說四句之功也獨最上乘無法可得者。牒前如來與善現問答。顯出大機大用。以世界七寶布施。祇得有為之福。未離生死。獨最上乘無法可得者。牒前發菩提心菩薩。為人演說四句之偈。不取於相。如如不動。即是無法可得。心無所染。故勝前功德無量也。直得人天膽喪等者。此明無法可得之理。勝前布施之功。乃是最上大乘之道。非人天小機。天魔外道所及。故云。膽喪心寒也。俱能捨命承當者。科家教人。與最上一乘。捨命承當也。昔鄧隱峰。推車次。馬祖振兩足。在路上坐。峰云。請祖收足。祖曰。已振不縮。峰云。已進不退。峰乃推車。輾損祖脚。祖歸法堂。手執斧曰。適來輾損。老僧脚底僧出來。峰便出來於祖前。引頸受刃。祖擲斧子。如此捨命承當。真大丈夫也。依舊白雲萬里者。乃科家先縱後奪。若能於此大乘之道。捨命承當。還有個承當底心在。所以科主。

道個白雲萬里。以此理。但有執著遠之遠矣。古人云。百丈有三訣。喫茶珍重歇。直下便承當。敢保君未徹。

所以解此經者。八百餘家。頌此經者。不滿屈指。盖古人錯答一字。尚墮野狐。謬誦此經。應入地獄。宗鏡自惟不入地獄。何由拯濟羣生。既能為法忘軀。豈避彌天逆罪。橫按寶劍。重說偈言。摧涅槃心。滅正法眼。掃除知見。截斷命根。堪報不報之恩。用酬難酬之德。

所以者。呈前起後之辭。科家意云。於最上乘直下承當。尚是於理轉遠。況今解此經者。譯人有八百餘家。皆是循行數墨逐句尋言。豈非遠乎。頌此經者不滿屈指者。言此般若經。當時翻譯場中。有八百人。解會其義者雖多。若論著書成頌者少。故不滿屈指者也。以滿其指者有五。不滿者三人而已。即傳大士。川老。科主。是也。盖古人錯答一字等者。乃科家設問難之辭。古人者。指前百丈。錯答。學人一字墮野狐身五百生盖以道眼未明。證性未圓見處偏枯。依文解義。而謬執邪解。僻說聖意。故於問答之時。不免有錯也。謬頌此經等者。有等之人。自恃天性明敏。善通文義。採取佛祖宗教語言。加以文彩效顰而作。緝成部卷。安置名題。流傳於世。若無道德戒行。發明見諦之處。皆成謬說壞亂正法。謂之誑談般若。瞎眾生眼。入阿鼻獄。吞噉鐵丸。無有出期也。我今科判此經。只恐凡情淺識。以思惟心。測度如來不思議智。有所差訛。招罪於己。故引錯答謬頌。而問焉。宗鏡自惟不入地獄等者。此是科主。自答難辭。我若不入地獄。何由拯濟羣生。涅槃經云。佛告迦葉菩薩。復入三途。拔其苦惱。一切趣中。脫未脫者。度未度者也。既能為法忘軀等者。科家意云。我今既弘大法。必然不顧形軀。豈避彌天五逆之罪也。昔提婆達多。推山壓佛。出佛身血。拳打華色比丘尼眼出。破和合僧。三逆重罪。入無間獄。佛告阿難言。提婆與汝。性均天倫。汝應問安。阿難承命。向阿鼻獄問訊云。汝安樂否。答曰。我雖在地獄。如三禪天樂佛又令問。還出地獄否。答曰。我待世尊來此獄中。我便出獄。阿難云。佛是三界大師。豈有入地獄分。提曰。佛既無入地獄分。我豈有出地獄時。盖謂提婆大權示現。為化眾生也。橫按寶劍重說偈言者。科家權衡在手。顯大機大用。以寶劍喻般若大智。能空聖解執情。重為說偈。此下文即偈也。摧涅槃心滅正法眼者。科家以金剛寶劍。將如來所傳涅槃妙心。正法眼藏。盡情摧滅。又言如來知見信解。亦併掃除。祇得截斷命根。不存凡聖。六祖謂智常偈曰。不見一法存無見。大似浮雲遮日面。不知一法守空知。還如太虛生閃電。此之知見瞥然興。錯認何曾解方便。汝當一念忽知非。自己靈光常顯現。堪報不報之恩等者。科家意謂。我以無切用智。掃除聖解之情堪報我佛未報之恩。用酬佛祖難酬之德。所以說法度生者。滿佛之願。報佛之恩也。

四十九年成露布 五千餘卷盡言詮
妙明一句威音外 折角泥牛雪裏眠

前二句。明佛出世說法四十九年。談經三百餘會。而有三乘五教。皆是隨機所說。故成露布。如天子不封之書也。共有五千餘卷。其中盡是言詮。以文字是能詮之教體。真如是所詮之理性。故云。言詮也。後二句。顯妙明真心一句。貝葉收不盡超過威音之外。以此心。正如折角泥牛雪裏而眠此明尊貴人。全居那畔。正位一色也。此四句頌。乃是僧問百岩。如何是教。岩曰。貝葉收不盡。所以丹霞。頌此四句也。

阿彌陀佛色光輝 白毫宛轉五須彌
頂上旋螺青絲髮 三十二種相巍巍

此四句。頌佛相好光明。欲令行人起觀思惟。若能一一觀想分明即得上品上生。親得見佛。觀經云。無量壽佛身。如百千萬億。夜摩天金色光明。高六十萬億。那由他由旬。白毫右旋。如五須彌山高。然佛青蓮目。如四大海。毛孔光。如一須彌山圓光。如百億三千大千世界大。八萬四千相好具足勝過一切諸佛相好。故云。種相巍巍也。

銷唱金經滿散緣 回施今辰福無邊
合會眾等齊修證 見聞熏種已周圓

前二句。科家意云。我今銷釋演唱科判。此一卷金剛經。圓滿將散功德因緣。祇以四句偈。回施今辰眾等。勝過河沙七寶布施。百千萬億倍功德。何況全此一經功德。豈可窮盡。故云。福無邊也。後二句。科家普勸合會眾等修進。意云。若有行人欲要脩證者。此一經中。雖有三十二分。二十七疑。而其中唯住修降伏。是脩證之緊要也。果能或念佛。或參禪。祇是先要降伏妄心。而後修無住之行。安住大乘菩提心。故以斯大乘金剛種子。願今見者聞者熏此種子。納在八識田中。已為成佛之種。故云。周圓也。

道場圓滿。不可思議。人人用心機。銷唱金經。佛聖徧知。上祝皇王。聖壽萬歲。法界有情。同生極樂國。

科家以此經。三十二分。次第宣揚。科判演唱已周。故云。圓滿。斯金剛般若經。稱性之談。故云。不可思議亦勸進修。人人當可。於不思議法。用心也。機者。弩牙也。即心之妙用。故云。心機也。銷唱金經佛聖徧知者。科家望佛證明也。意云。我今銷釋演唱此金剛經。望佛聖徧知冥加守護蓋以此經。一切諸佛。及諸佛阿耨多羅三藐三菩提法。皆從此經出。乃是諸佛守護之經故銷唱時佛聖徧知也。上祝皇王聖壽萬歲者。此經有無盡之功德。祝延聖壽無疆。邦畿永固。可謂。四海謳歌共享殷湯之世。八方鼓腹同歡堯舜之年。法界有情等者。以此經無盡功德。願十法界中有情。同生極樂淨土也。

南無一乘宗。無量義。真空妙有。金剛般若經。

南無者。歸敬之辭。一乘宗者。前云。為發最上乘者說。故知此經。是一乘所攝。科家剖判將終。即歸依一乘大道也。此一乘者。含無量妙義。恒沙性德。上文云。

一切諸佛。及諸佛阿耨多羅三藐三菩提法。皆從此經出。故云。無量義也。真空妙有者無量義經云。顯示一事一理。一動一靜之中。莫不具無量義。五蘊即涅槃。妙有即真空也。涅槃即五蘊真空即妙有也。四大六根六塵。乃至無上菩提。例之可知。證一乘道。具無量義。二諦融。通。皆是般若智力也。故知此金剛經。能詮之文理。皆是真空妙有也。

伏願。經聲琅琅。上徹穹蒼。梵語玲玲。下通幽府。

伏願者。隱伏也。即心中所含之事。願即希慕仰望之辭。經聲琅琅者。荀子曰。崑崙山有琅玕樹。類瑠璃而五色擊之聲美今願此誦經之聲。上徹於穹蒼。以春為蒼天。其色蒼蒼然即天之色相也。梵語玲玲者乃梵天之語。即經聲也。玲玲者。大玄經云。玲瓏也。擊之聲美願此誦經之聲。下通幽府。其中多有罪苦眾生。承斯銷釋良緣。普願經聲至處。同息苦[車*念]離苦得樂。超登彼岸也。下文伸出息苦之所以也。

一願刀山落刃。二願劒樹鋒摧。三願爐炭收焰。四願江河浪息。

此四願。願地獄道中。四苦永息也。前二願落刃鋒摧者。慧燈云。刃力刀山誰人鍛煉。華含德水非彼開敷善因終值善緣。惡行難逃惡境。辨果知因。見未識本。施般若脫刀山之苦。寫金經痊劒樹之瘡也。後二句。收焰浪息者古德云。陰陽有至。水火無情。行善則焰消爐冷。修德則海宴河清。由嗔恚心。故遭爐炭之焚燒。因欺瞞意故陷波濤之沒溺。憑佛力。救鑊湯之沸煮。仗經功。離波浪之漂沉也。

鍼喉餓鬼。永絕饑虛。鱗甲羽毛。莫相食噉。惡星變恠。掃出天門。異獸靈魑。潛藏地穴。

鍼喉餓鬼者。此願鬼道中。有九種餓鬼。霑恩離苦也。此明慳貪者千生常受飢虛。障施者。萬切恒遭火焰。慧燈論曰蹈雲霞而飲甘露非他所授。臥烟燄而噉膿血。皆自所招。罪福昇沉。纖毫不忒慳恠珍鏹。易粗食以供僧。報常噉糞障遮施利。墮鍼喉蒙佛力果得生天也。鱗甲羽毛者。此願傍生道中霑恩。離互相食噉之苦也。所以佛印曰。鱗甲羽毛諸品類。眾生與佛心無二。祇為當初錯用心。致使今生頭角異。楞嚴經云。人死為羊羊死為人。傳曰。狗死為人。人死為狗。昔趙文若。一念佛名。使所殺生而盡得超昇。令五釘釘體。因思痛苦。當懷恐懼也。惡星變怪者。此願天上。息一切怪異之禎也。楞嚴經云。此娑婆世界。有八萬四千變恠惡星。作種種形出現世時。能生眾生種種灾疫。承佛威力。仗經功能。咎徵殄滅也。異獸靈魑者。此願人間。妖恠永息也。昔唐蜀。白衛嶺。多虎豹。光化有韋秀才。選調巴南宰。常念金剛經。赴任至泥溪。遇一女人挈二子。同秀才登山。行人叫譟。見女子。乃赤色大虫。二小虎隨後逡巡。與韋分路而去。韋終不覺蓋持經之力也。又有隋僧法崇。篤志經論尤精法華。至湘州鹿山。山精化為夫人。詣寺請戒。因捨所居山為寺。潛處別山而去。此亦持經之力。故感異獸靈魑。潛藏地穴。可謂。念金剛感赤虎。而衛形引路。誦妙法使山精。而捨地移居。

囚徒禁繫願降天恩。疾病纏身早逢良藥。盲者聾者願見願聞。跛者啞者能行能語。懷孕婦人子母團圓。證客遠行早還家國。貧窮下賤惡業眾生。誤殺故傷一切冤尤。並皆銷釋。金剛威力洗滌身心。般若威光照臨寶座。舉足下足皆是佛地。

此是科家。普願人間。種種苦。難。仗此金剛般若威光。利益功德。悉皆消滅。初囚徒者。昔唐時僧神晏。被人告停劫。賊。繫縛獄中。惟精誠誦經月餘。忽於夜間滿獄有金光。枷鎖自脫遂蒙恩宥故云。願降天恩也。二疾病者。昔唐時。強伯達世傳惡疾二百年矣。伯達纔冠便患風癩。父母以為不可療。送入山中。其父裹糧。置伯達於岩下而去。忽有僧過。見傷謂曰。汝念金剛經內四句偈。或脫此苦。伯達受教念之數日。其瘡稍乾。前僧復至。授青草一握曰。可以洗瘡。以煎湯洗浴。身體潔然。皆無瘡[病-丙+(角*夕)]。故云。早逢良藥也。可謂。放光照獄。蒙皇恩以免刑。誦偈除災。遇善古而施藥。三盲者昔唐時。江陵。有力昌子。名僧護。因父悞傷聽經神蟒。冤訴陰府。托夢於妻。寫經超度神蟒。無錢寫經。賣子與蜀客。母得錢寫經回向。留。一卷自誦幾三十年。願求子母重見。母因憶子。雙目失明。隨處乞食。後僧護回至江陵修齋追薦父母。母因乞食。子母相見遂焚香云。果有孝心舐。目雙明。以水漱口以舌舐目。母眼雙明。平復如故。故云。盲者得見也。四啞者。昔有一人。室內誦金剛經隔壁有一惡人。憎惡毀謗。後感音啞之報。其人追悔曰。因我謗經感斯惡報。自今懺過發善讚經。夜感須菩提告曰。汝因毀謗般若。招報如是。令其出舌。以刀割之。此人即能言語。次後出家入山修道。故云。啞者能語也。可謂。堅志無疲。俾盲目而復得清明。至誠不倦。使失音而還能語話。五子母團圓者昔宋時。有清信女王氏。身懷六甲。二十八箇月不能分娩。恐母子難全。命僧印施金剛經千卷。飯僧千員。至夜夢一金剛。以杵指腹疼痛覺已忽生二男。王氏既得子母雙全。不勝欣慶。至年六十一歲。無疾而終。故云。子母團圓。可謂金剛神力。令子母以團圓。般若功勳。使兒孃而得見。六征夫還家者。昔唐時有褚西倫。因亂被羗。充軍行營一鎮。河北經涉九年。家中莫知消息。其妻為夫。出錢寫金剛經每寫一字。合掌念一聲佛。其夜夫在陣交戰。忽遇風雨不知所適惟見一道大光。猶如火引。尋光信步備涉平川。即得至家夫妻相見。遂開經函視經猶濕。故云。早還家國也。七唐時。有一富商。常誦金剛經每以經卷自隨。客販外國宿於海島。眾商取財害之。以繩而繫。盛一大籠加之巨石。並經卷沉於海眾商平明發船而去。其海島。乃有僧院。其夕寺僧。聞念金剛經。在於海底。僧乃異之。命善泅者。入水訪之。見一老人在籠中讀經。仍捧挽而上。僧問其故。老人云。被殺沉於水。不知是籠中。忽覺身處宮殿。常有人送食。安樂自在。蓋誦金剛經之靈驗。遂投寺出家。可謂。征夫九載。得經光而引路還家。商客一誠。感僧力而挽籠出水。貧窮下賤等者。即前能淨業障分中。若為人輕賤是人先世罪業。應墮惡道。以今世人輕故。先世罪業即為消滅。亦得阿耨菩提也。故殺悞傷者。可謂。承般若之殊勳復還魂而重增壽算。又能。仗金剛之妙力。解冤結而遂得重生。並皆消釋

者。總結上文之義也。金剛威力。洗滌身心。般若威光照臨寶座。此四句。明金剛般若威光。加被在會之眾。身心清淨。無諸病苦。灾禍不生又祈道場法會寶座。勿使外魔[打-丁+(唵-口)]擾也。舉足下足皆是佛地者。以金剛般若之力。令諸在會之眾。舉足下足。皆是佛地之受用所以法華經云。佛子住此地。則是佛受用。常在於其中。經行及坐臥。

更願。七祖先亡。離苦生天。地獄罪苦。悉皆解脫。

乃科家。以斯金剛般若之力。普願各人七祖先亡。俱霑利益也。初一節。謂離苦生天者。即宋時。任觀察。寫能詮之大教。免錢棒之臨身。夢所生之父母。生忉利之天宮也。次一節。罪苦解脫者。即宋時。明州王氏。閻羅賜座誦金經。地獄心酸一時停。勅命還魂。精勤念佛。臨終淨土。得親登也。

以此不盡功德。上報四恩。下資三有。法界有情。齊登正覺。

科家意云。我今以此。科判講演金剛般若。不盡功德。上報天地蓋載之恩。日月照臨之恩。皇王水土之恩。父母生育之恩。故云四恩也。復以般若不盡功德。下資三有。而欲有色有無色有中。即三界因果未忘。故屬於有也。法界有情等者。乃總回向。科主欲令十法界有情。承斯般若威光。齊登正覺者也。

川老頌云。如飢得食渴得漿。病得瘥熱得涼。貧人得寶。嬰兒見孃。飄舟到岸。孤客還鄉。早逢甘澤。國有忠良。四夷拱手。八表來降。頭頭總是。物物全彰。古今凡聖地獄天堂。東西南北不用思量。剎塵沙界諸羣品。盡入金剛大道場。

此是。治父川老之頌。總二十句。乃明金剛般若大智。世出世法無不周遍。此頌。乃是慶幸讚美之辭。我今得遇般若金經。如飢飡香積之美飯。似渴飲甘露之瓊漿。病逢善見藥王。頓然痊瘥。熱遇月愛之光。忽爾清涼。貧人獲如意之神珠。嬰兒見般若之親娘。慈舟載四生而直到彼岸。導師接九品而徑往蓮邦。亦如久旱忽逢甘雨。他鄉偶遇。故知。國有忠良。萬邦朝賀。四夷者。乃邊外之夷人也。以中國衣冠正統。代代相承。謂之中國。此中國四望極邊。謂之四夷。上國正統。四夷來貢。故云拱手。八表。即八方邊國。而臨時歲。皆進表章於中國。謂之來降。可謂。堯舜有德四海來賓。湯武施仁八方拱手。此喻眾生。得此般若之法。則四弘。八正。無不顯揚也。復以。頭頭總是真如智。物物全彰古佛心。古今凡聖皆同體。地獄天堂總一真。東西南北長安道。不用思量見本人。科家仍發願云。願此一佛剎微塵。恒河數羣品有情。俱明般若金剛智體。故云。同證金剛大道場也。

三塗永息常時苦 六趣休隨汨沒因

恒沙含識悟真如 一切有情登彼岸

此四句。科主普同回向。我今科判金剛般若功勳。願地獄中。刀塗火塗血塗。此三塗霑恩。而永息其苦也。復願。天趣。人趣。阿脩羅趣。地獄趣。餓鬼趣。畜生趣。最初趣往是因。次趣已到為果。一切眾生而入六趣受種種身。今願六趣。休隨汨沒

也。後二句。回向。願此恒沙含識有情。悉悟真如妙果。同入究竟實際。故云登彼岸也。

乃至虛空世界盡 眾生及業煩惱盡
如是四法廣無邊 願今回向亦如是

此是科家。廣大回向。亦如普賢之行。乃以非喻而喻。廣大回向無盡之義。以虛空界盡。眾生界盡。眾生業盡。眾生煩惱盡。我此回向。無有窮盡。念念相續無有間斷。身語意業無有疲厭。如是四法。若無窮盡。願今道場之中。所有功德回向。亦無有窮盡也。

銷釋金剛科儀會要註解卷第九(終)

No. 467-B銷釋金剛科儀會要註解後跋

於戲。我教

金剛科儀者。即宗鏡禪師所作也。以般若迺大乘教。為菩薩說。顯一乘之奧旨。為萬法之淵源。論不空之真空。見無相之實相。了明虛妄。即夢玄泡影而可知。推其根原。於我人眾壽而可見。誠

佛祖傳心之秘要。實菩薩轉教之真宗也。今宗鏡者。宋時人也。智識雄邁。行解圓融。字該三藏之文。理證一真之妙。依金剛經三十二分之全文。科判一經之大義。提綱要旨。明般若之根原。偈頌宣揚。示真如之妙理。如標月指。見月忘標。了知心月孤圓。方信光含萬像。俾真言而洞徹。令秘義以昭融。智愚皆獲菩提。垢淨通為般若。自宋迄今。見聞受持。家諭戶曉也。予因戊申。而抵南海遊禮普陀。駐錫吳門。而方外友。敬愚許公。所蓄先師科儀註頌。示予鏤板流行。予謂金臺有達桂二師。註解已刻。辭義玄奧。實起後學膏肓之疾。其柰文義廣略。未得折中。平昔以此為嘆。公欲不忘先師之意。豈可搶卒為之。須請具眼者。校正重。集。方為盡善。即命澹齋張公。齋幣之京。同予禮請少室山。宗主大方連公。之重集。及徵寶山吳公。統錄而完畢矣。擬欲鋟梓用傳永久。欲符先師付囑之願。常寂光中。令生懽喜也。倘諸方學道之士。忽於科註之文。盡心披玩。情妄消除。發生智慧光明。照見本有面目。以斯殊因。祈

舜日與佛日同輝。冀
金輪共法輪並轉也。

時在

皇明嘉靖歲次辛亥中秋望日

勅賜智化寺後學沙門螢菴道燈頓首謹識跋後

卅云卷十銷釋金剛科儀會要原文會入于註解中故不再錄。